



Bibliothèque de la Faculté  
de Théologie

Les Fontaines - CHANTILLY

N 62/3<sub>1</sub>



K 8

# **HOMO APOSTOLICUS**

**INSTRUCTUS IN SUA VOCATIONE**

**AD AUDIENDAS CONFESSIONES.**





175  
111  
L. Haller



ALPHONSUS DE LIGORIO  
*Patricius Neapolitanus*  
S. Agathæ Gothorum Episcopus  
Congregationis SS. Redemptoris. Instructor.

# HOMO APOSTOLICUS

INSTRUCTUS IN SUA VOCATIONE

*ad audiendas Confessiones ,*

SIVÈ

PRAXIS ET INSTRUCTIO CONFESSARIORUM ,

AUCTORE ILLUSTRISS. ET REVERENDISS.

D. Alfonso De Ligorio,

Olim Episcopo S. Agathæ Gothorum, etc. etc.

CUM NOTABILIORIBUS DOCTRINIS SUPER OMNIBUS TRACTATIBUS  
THEOLOGICÆ MORALIS, ERUTIS, ET IN COMPENDIUM REDACTIS  
EX ALIO OPERE EJUSDEM AUCTORIS, IN QUO UBERIORI CALAMO  
QUESTIONES MORALES FUSIUS EXPOSITÆ INVENIUNTUR.

*Adsunt in fine Operis appendices perutiles.*

EDITIO SEPTIMA,

*A mendis omnibus maximè cum cura expurgata. Et  
in hac editione additur Elenchus quæstionum  
quas reformavit auctor.*

TOMUS PRIMUS,

DE CONSCIENTIA. DE LEGIBUS. DE ACTIBUS HUMANIS, ET DE  
PECCATIS. DE PRÆCEPTIS DECALOGI, ET ECCLESIE. DE  
STATIBUS PARTICULARIBUS, NIMIRUM RELIGIOSO, ECCLE-  
SIASTICO, ET LAICALI.



MECHLINIÆ,

Typis P. J. HANICQ, Typographi Celsiss. Domini Principis  
DE MÉAN, Archiep. Mechliniensis. — 1824.

**Cavenda est Conscientia nimis larga ,et nimis stricta ;  
nam prima generat præsumptionem , secunda de-  
sperationem. Prima sæpe salvat damnandum ;  
secunda contrà damnat salvandum. S. Bonaventura  
Comm. Theol. verit. lib. 2. cap. 32. num. 1.**



## FINIS AUCTORIS

*Omninò legendus pro Operis  
intelligentiâ.*

**J**UVAT hic præmittere notitiam quamdam finis, et summæ hujusce Operis. Jàm ego Neapolitanis typis edideram aliud grandius Opus Theologiæ Moralis, quod postea Venetiis typis REMONDINIANIS tribus Tomis in folio cum aliquibus meis additamentis sæpè est recusum, et nuper etiam novis accessionibus meis locupletatum iterùm prodiit, quodque in multis Europæ partibus non sinè plausu est exceptum. In eo Opere conficiendo quindecim annorum labores perpessus sum, percurrèdo, et ponderando doctrinas plurimorum quos lustravi; quorum aliquos plùs justo benignos inveni, quippè qui falso ducti zelo expediendæ salutis Animarum, nimium libertati indulserunt, non sinè Divinarum Ecclesiasticarumque legum præjudicio; alios verò inveni, qui tantam condescendentiam abominantes, inciderunt in aliud extremum excessivi cujusdam rigoris. Hic meus maximus labor fuit, seligere scilicet ex tantarum opinionum congerie, sententias illas, quæ ex parte unâ debitum Divinis, et Ecclesiæ Præceptis obsequium

*Tom. I.*

\* 3

servarent, et ex aliâ non adderent onera quæ à Deo non sunt imposita, obstringendo unumquemque ad perfectionem illam, quæ secundum humanam imbecillitatem communi Fidelium est moraliter impossibilis. Hinc ego Theologorum partim lectione edoctus, quos passione quâcumque spoliatus legere studui; partim experientiâ triginta annorum Confessionum, et Missionum, præfatum Opus composui ad instructionem Juvenum nostræ Congregationis. Sed quia Opus illud utpote voluminosius, atque diffusius non ita facile legi, aut à multis poterat comparari, ideò cogitavi (addito mihi insuper stimulo complurium id desiderantium) in lucem edere præsens opusculum. In hoc præcipuus meus finis fuit, publici juris facere Instructionem quamdam practicam ad benè Pœnitentiæ Sacramentum administrandum: at quia in praxi nunquam ritè Confessiones excipi possunt, neque, ut par est, Animarum directio teneri, nisi habeatur notitia principiorum, doctrinarum, et quæstionum principaliorum rei moralis; ideò operam dedi, ut brevi, et facili stylo exponerem hic omne id quod pertinet ad sufficientem non minùs quàm necessariam instructionem cujusvis Confessarii; adnotando in suis peculiaribus locis Canonum, Bullarum Pontificiarum, atque etiam SS. Congregationum definitiones, quarum modica nimis notitia ex aliis libris habetur. Opus in compendium redegì, ut minori sumptu

posset comparari, et ut facilius legeretur. Quoad ordinem, in primo Tomo agetur de Præceptis Decalogi, et Ecclesiæ. In secundo de Sacramentis, et Censuris. In tertio de Privilegiis, et in ipsis de Facultatibus quas habent Episcopi et Prælati Regulares quoad absolutionem à casibus, et censuris reservatis. Indè agetur quomodo practicè gerere se debeat Confessarius cum peccatoribus in occasione proximâ existentibus, vel cum habituatis et recidivis; et quomodo cum diversis personarum generibus, scilicet Rudibus, Pueris, Surdis, Mutis, ad mortem Damnatiss, Obsessis, Puellis, aliisque mulieribus. Tandem quatuor additæ sunt Appendices. In *Primâ* adest instructio ad dirigendas Animas devotas ad perfectionem cum exercitio meditationis, et mortificationum, frequentiæ Sacramentorum, et præcipuè Communionis. Ibi etiam sermo erit de Oratione supernaturali, et peculiariter de singulis gradibus contemplationis; et de modo dirigendi animas, quas Deus evehit ad huiusmodi gratias extraordinarias secundum varios in quibus inveniuntur status. In *Secundâ* Appendice adest Praxis assistendi Morientibus, cum advertentiis opportunis ad Sacerdotes assistentes quoad remedia contrà tentationes, circa ultima Sacramenta, et circa affectus qui suggerendi sunt Morientibus tempore infirmitatis, et agonix, cum notitiâ signorum proximæ mortis. In *Tertiâ* Appendice adest Examen Ordinandorum,

in quo instruitur Ordinandus circà Sacramenta in genere, et præcipuè circà Sacramentum Ordinis in genere, et in specie cujuscunque Ordinis. Ibidem agetur de Voto Castitatis, de Horis Canonicis, et de Censuris in genere, et in speciè, quantùm necesse est pro Ordinandis; et tandem de Sacrificio Missæ, et de Potestate, et Officio Sacerdotis. In *Quartâ* demùm Appendice sunt quædam valdè utilia monita pro Confessariis, et Parochis cum instructione practicâ Orationis Mentalis. In hoc Opusculo non solùm adest (licèt breviter) omne id quod in præfatâ Theologiâ continetur; sed insuper addita sunt plura alia, quæ in Opere priùs edito non inveniuntur. Omne ad gloriam Jesu, et Mariæ!





~~~~~

## ORDO , ET SUMMA OPERIS.

---

### TOMUS I.

**T**RACTATUS I. *De Conscientiâ.*

TRACTATUS II. *De Legibus.*

TRACTATUS III. *De Actibus Humanis , et de Peccatis.*

TRACTATUS IV. *De I. Præcepto Decalogi.*

*Et hîc agitur primo loco de Virtutibus Theologicis.*

TRACTATUS V. *De II. Præcepto.*

*Et hîc additur EPISTOLA RESPONSIVA ad quandam Dissertationem editam adversùs Auctorem circâ Maledictionem Mortuorum.*

TRACTATUS VI. *De III. Præcepto.*

TRACTATUS VII. *De IV. Præcepto.*

*Et hîc plenus fit sermo de peculiaribus obligationibus , quibus tenentur Parochi , et Episcopi ; et circâ eas plura valdè notabilia afferuntur.*

TRACTATUS. VIII. *De V. Præcepto.*

TRACTATUS IX. *De VI. Præcepto.*

TRACTATUS X. *De VII. Præcepto , et de Contractibus.*

TRACTATUS XI. *De VIII. Præcepto.*

TRACTATUS XII. *De Præceptis Ecclesiæ.*

TRACTATUS XIII. *De Præceptis circâ statum Religiosum , Clericalem , et Laicalem.*

# INDEX

## TRACTATUUM, ET CAPITUM,

*Quibus adduntur omnia Summaria, ad hoc, ut  
præ oculis habeantur cunctæ materiæ, quæ  
in hoc Primo Tomo continentur.*

**I**NTRODUCTIO.

pag. xxx.

## TRACTATUS I.

### *De Conscientiâ.*

Regula remota, et proxima rectè operandi 1. Variæ  
distinctiones Conscientiæ 2. pag. 1

CAPUT I. *De Conscientiâ rectâ, erroneâ, perplexâ, et  
scrupulosâ.* 2

De Conscientiâ rectâ 3. De erroneâ 4. An detur igno-  
rantia circâ præcepta naturalia 5. Qui existimat  
desiderium malum non esse peccatum 6. De Con-  
scientiâ perplexâ 7. De Conscientiâ scrupulosâ 8.  
ad 11.

CAP. II. *De Conscientiâ dubiâ.* pag. 8

Dubium negativum, et positivum 12. Speculativum,  
et practicum 13. et 14. Si lex est dubia 15. et 16.  
Si votum est dubium 17. Si Superior jubet rem  
dubiè peccaminosam 18. In dubio circâ Jejunium,  
et Communionem 19. De impedimento, et debito  
dubio 20.

CAP. III. *De Conscientiâ probabili.* pag. 13

De Conscientiâ probabili 21. In materiâ Fidei 22.  
Medicinæ 23. Justitiæ 24. Sacramentorum 25. ad 27.  
In damno alterius 28. Gradus probabilitatis 29. De  
opinionem tenui probabili, et de opinione proba-  
bilissimâ 30. De probabili, et probabiliori 31 ad 79.

## TRACTATUS II.

*De Legibus.*CAP. I. *De naturâ Legis.* pag. 54

Distinctiones Legis 1. 2. et 3. Conditiones 4. Promulgatio 5. 6. 7. et 8. Acceptatio 9. et 10. Si Lex per 10. annos non esset acceptata 11. Si major pars eam non receperit , etc. 12. et 13.

CAP. II. *De obligatione quam parit Lex.* pag. 63

Obligatio Legum præceptivarum 14. 15. et 16. An Lex possit obligare ad actus internos 17. An cum gravi incommodo 18. An Lex possit tollere naturalem obligationem 19. An impedimenta remove teneamur 20. et 11. Dubia circâ Legem 22. et 23. De Legibus pœnalibus , spiritualibus , privativis , et inhabilitantibus 24. et 25. De Legibus quæ in falsâ præsumptione fundantur 26. De Conventionalibus 27. An caritas necessaria sit 28. An intentio 29. An per plures actus satisfieri possit pluribus præceptis , vel uno tantum actu 30. et 31. Si diversa sint præcepta circâ eandem materiam 32.

CAP. III. *De iis qui Leges condere possunt.* pag. 71

Quisnam possit condere Leges Civiles , et quis Ecclesiasticas 33. De Decretalibus sive Responsis Pontificiis , et Declarationibus SS. Congregationum ac Decisionibus Romanæ Rotæ 34. et 35.

CAP. IV. *De iis qui obligantur ad Leges.* pag. 75

Quis teneatur ad Leges 36. An pueri 37. An Legislatores 38. An Peregrini 39. et 40. Si peregrinus per breve tempus moram facit 41. Si Episcopus dispensat in votis , et jejuniis cum Peregrinis , etc. 42.

CAP. V. *Quæ causæ excusant à transgressione Præceptorum.* pag. 77.

Excusat Ignorantia 43. Timor 44. Impotentia 45.

CAP. VI. *De Dispensatione.* pag. 79

An semper requiratur justa causa ad dispensandum 46. Si dispensatio est obreptitia , etc. 47. Peti potest etiam à tertio 48. Dispensatio tacita 49. Causæ pro dispensatione 50. In dubio an requiratur dispensatio 51. An superior teneatur dispensare 52.

- Dispensatio malâ fide, aut bonâ, sed sine causâ concessa 53. Præ timore concessa 54.
- PUNCTUM I. *De iis qui dispensare possunt.* pag. 82
- De potestate ordinariâ, in quo dispensare possit Pontifex 55. et 56. In quo dispensare possunt Episcopi 57. et 58. Parochi 59. Prælati Regulares 60. De potestate delegatâ quisque eam habet ab Ordinario etc. si moriatur Delegatus 61. Clausula: *Donec dispensetur* 62. Subdelegatus 63. Cum semetipso 64.
- PUNCT. II. *Quot modis dispensatio cessare possit.* pag. 87
- Cessat dispensatio I. per cessationem causæ 65. et 66. II. per revocationem 67. III. per renunciationem 68.
- CAP. VII. *De cessatione, interpretatione, et Epickeja Legis.* pag. 88
- Cessat finis Legis 69. De libris prohibitis 70. De Legibus municipalibus 71. De interpretatione 72. An declarationes requirant promulgationem 73. et 74. De interpretatione doctrinali 75. Regulæ interpretationis 76. De epickejâ 77. Quando Lex extenditur de casu ad casum 78.
- CAP. VIII. *De consuetudine.* pag. 94
- Conditiones pro consuetudine 79. Conditiones pro desuetudine 80. Si Lex reprobat quamcumque futuram consuetudinem 81. Usus interpretator Legum 82. Si Lex revocat quamcumque consuetudinem præcedentem, etc. 83.

### TRACTATUS III.

#### *De Actibus Humanis, et de peccatis.*

- CAP. I. *De Actibus Humanis.* pag. 97
- Actus hominis, et actus humani 1. et 2. De voluntario, et suis conditionibus 3. Quotuplex sit voluntarium, 4. ad 6. De Libero, et quotuplex 7. ad 11. Impedimenta actus humani 12. Et I. De ignorantia 13. II. De Violentia 14. III. De concupiscentia 15. IV. De timore, et quotuplex 16. 17. et 18. Unde sumant actus humani bonitatem, vel malitiam 19. An exterior actus addat malitiam actui interno 20. An detur actus indifferens 21.
- CAP. II. *De peccato in genere.* pag. 103

PUNCT. I. *De peccato mortali, et veniali* 22. et 23. De advertentiâ 24. ad 39. De consensu 40. ad 45. De peccato philosophico 46.

PUNCT. II. *De peccatis in particulari, de desiderio, de complacentiâ, et de delectatione morosâ.* pag. 117

Desiderium, gaudium, et delectatio 47. An in delectatione species explicari necesse sit 48. Delectatio de opere malo, et de cogitatione malâ 49. Desiderium de malo, si licitum esset 50. Delectatio, et desiderium sponsorum etc. et conjugum 51. Delectatio de causâ malâ ob bonum effectum 52. De damno alieno ob bonum finem 53. De rebus à lege positivâ vetitis 54.

PUNCT. III. *De distinctione peccatorum, I. quoad speciem, II. quoad numerum* pag. 123

De distinctione specificâ 55. et 56. De numericâ, et de I. radice *multiplicitatis actuum* 57. Circâ actus internos 58. ad 61. Circâ actus externos 62. et 63. De II. radice ob *diversitatem obsectorum totalium* 64. et 65.

PUNCT. IV. *De peccato mortali, et veniali.* pag. 129  
Effectus mortalis, et venialis 66. Quot modis mortale fit veniale 67. Quot modis veniale fit mortale 68. An in periculo probabili de mortali etc. 69.

## TRACTATUS IV.

### *De primo Præcepto Decalogi.*

CAP. I. *De Virtutibus Theologicalibus* pag. 131

De Fide 1. ad 5. De Spe 6. ad 8. De Caritate 9. ad 12. Actus exercendi circâ Virtutes Theologales 13.

CAP. II. *De caritate ergâ proximum.* pag. 137

Ordo caritatis 14. Ordo personarum, quæ præferri debent 15. Punct. I. Signa communia adhibenda ergâ inimicos 16. Remissio 17. Punct. II. Obligatio eleëmosynæ 18. et 19. Punct. III. De correctione fraternâ 20. Quando aliquis excusatur 21. Obligatio superiorum circâ correctionem 22. Punct. IV. De scandalo, et quotuplex sit 23. et 24. An scandalum sit peccatum tùm contrâ caritatem, tùm contrâ virtutem quæ leditur 25. Si proximus ad

peccandum paratus sit 26. et 27. An propter scandalum bona nostra deserere teneamur; et etiam omittere præcepta etc. 28. De scandalo quod præstant mulieres præ pectoris immodestiâ: et de comœdiis 29 An minus malum insinuari possit 30. Quandò licita sit coöperatio materialis 31. et 32.

PUNCT. I. *De amore inimicorum.* pag. 138

PUNCT. II. *De eleëmodynâ.* 140

PUNCT. III. *De correctione fraternâ.* 141

PUNCT. IV. *De Scandalo.* 142

PUNCT. V. *De coöperatione materiali.* 146

CAP. III. *De religione, et vitiis oppositis.* 148

De religione 33. Punct. I. De superstitione et præsertim de Astrologiâ, somniis, ensalmis, et sortibus 34. De virgâ divinatoriâ 35. De vanâ observantiâ 36. De pulvere sympathico 37. Punct. II. De tentatione 38. De sacrilegio 39. De simonia 40. ad 48. De ejus pœnis, et absolutione 49. ad 53.

PUNCT. I. *De superstitione.* pag. 148

PUNCT. II. *De irreligiositate.* 150

## TRACTATUS V.

### *De secundo Præcepto.*

CAP. I. *De blasphemiâ.* pag. 161

Quandò committitur blasphemia 1. De maledictione creaturarum 2. De maledictione mortuorum 3. ad 11.

*Hic subditur, EPISTOLA RESPONSIVA adversus quamdam Dissertationem Auctori oppositam circa maledictionem in mortuos.* pag. 166

CAP. II. *De Juramento.* 190

Quandò fit Juramentum 12. Quotuplex est Juramentum 13. Conditiones Juramenti liciti 14. An liceat jurare cum æquivocatione 15. et 16. Qui jurat sinè animo jurandi 17. Juramentum non obligat ad illicita 18. Quot modis tollitur obligatio Juramenti 19. De adjuratione, et de Exorcismis 20.

CAP. III. *De voto.* pag. 197

De animo se obligandi 21. 22. et 23. De materiâ possibili, et meliori 24. De voto emisso ob malum

finem 25. De voto non petendi dispensationem 26. ducendi uxorem 27. non amplius vovendi 28. Diversa notabilia 29. De voto conditionato 30. De voto disjunctivo; et de eo qui satisfacit sinè memoriâ voti 31. Si tempus præterit 32. De culpâ in differendo 33. De voto Religionis 34. De materiæ mutatione 35. De irritatione 36. et 37. De commutatione 38. De dispensatione, et suis causis 39. et 40. Si votum emissum sit in utilitatem tertii 41. Quis possit dispensare 42. ad 44. De votis reservatis 45. ad 49. An Papa dispensare possit in votis solemnibus 50.

## TRACTATUS VI.

*De tertio Præcepto.*

CAP. I. *De obligatione talis præcepti.* pag. 211

An tale præceptum hodiè sit Ecclesiasticum, an verò Divinum; et an obliget infideles 1. Qui peccat in festo 2. Quis possit festa instituere 3. Obligatio concionem audiendi 4. Obligatio prædicandi 5. Qui pueri etc. 6.

CAP. II. *De abstinence ab operibus servilibus.* p. 214

PUNCT. I. *De operibus in festo prohibitis.* *ibid.*

Opera servilia, liberalia, et communia 7. Liberalia ob lucrum exercita 8. Transcribere 9. Pingere 10. Venari, et piscari 11. Opera Forensia 12. Nundinæ, venditiones, et contractus 13.

PUNCT. II. *De causis quæ usum operum servilium in festis permittunt.* pag. 216

Excusat I. Dispensatio summî Pontificis, aut Episcopi, aut Parochi 14. II. Consuetudo 15. III. Pietas. IV. Caritas 16. et 17. V. Necessitas 18. ad 21. An pro magno lucrò etc. 22. An ad evitandum otium 23. VI. Utilitas 24. VII. Parvitas materiæ 25. Qui decem servos laborare facit, etc. 26.

CAP. III. *De obligatione audiendi Sacrum.* pag. 221

PUNCT. I. *Quomodo adimpleri debeat hæc obligatio.* *ibid.*

De intentione 27. De attentione 28. Qui in Missâ Horas Canonicas recitat, etc. 29. Qui celebrat 30. Qui confitetur 31. Qui dormitat, aut eleemo-

- synas colligit 32. De parvâ materiâ 33. Qui duas dimidias Missas audit 34. De loco ex quo Missa audiri potest 35. De Oratoriis, et ubi Episcopus celebrare possit 36. et 37. An dispensare possit Episcopus, ut in privatis domibus celebretur 38.
- APPENDIX *De Oratoriis privatis.* pag. 228
- PUNCT. II. *De causis excusantibus ab obligatione audiendi Missam.* pag. 234
- Excusat *impotentia* infirmorum, excommunicatorum, in carceribus existentium; custodum, etc. 39. De servis, filiis, et uxoribus coactis etc. 40. Excusat *grave incommodum* 41. Excusat *usus* 42. An propter scandalum, etc. aut magnum lucrum, aut confitendi causâ Missa omitti possit 43.
- Additur hic Catalogus Festorum, in quibus tantum in Regnis Neapolis et Siciliarum adest obligatio abstinendi ab operibus servilibus.*

## TRACTATUS VII.

*De quarto Præcepto.*

- CAP. I. *De obligatione Filiorum.* pag. 237
- De amore erga genitores 1. De reverentiâ 2. De obedientiâ 3.
- CAP. II. *De obligatione genitorum, et fratrum.* p. 238
- De alimentis, legitimâ, et dote. Decisio quatuor Rotarum 4. De educatione. Si pater vocationem impedit; aut ad aliquem statum cogit; aut ad ingrediendum in Monasterium 5. Obligatio fratrum 6.
- CAP. III. *De dominorum, servorum, et conjugum obligatione.* pag. 241
- Dominorum obligatio, præsertim circa salarium 7. Obligatio servorum. Si furta permittunt. Si contra pactum discedunt 8. Præscriptionem salarii 9. Compensatio 10. et 11. Viri obligatio 12. Obligatio uxoris, præsertim sequendi virum 13.
- CAP. IV. *De Pastorum animarum obligationibus.* p. 245
- PUNCT. I. *De Parochorum obligationibus.* *ibid.*
- I. De *residentia*. Dispositio Concilii 14. Si Parochus inutiliter residet 15. Bona fides non excusat à restitutione 16. De licentia Episcopi 17. Ubi residere



tenentur Papa, Cardinales, Episcopi, et Parochi  
 18. Excusat caritas, necessitas, obedientia, et  
 utilitas 19. An sufficiat licentia per vocem, aut  
 tacita, aut præsumpta 20. Si causa existat pro  
 absentia, licentia verò non habetur 21. An om-  
 nes fructus restitui debeant 22. Et cui restitui  
 debeant 23. II. De *administratione Sacramentorum*  
 24. ad 27. An tempore pestis etc. 28. III. De *Ce-  
 lebratione Missæ* 29. IV. De *Correctione* 30. ad 32.  
 Impedire debet Clericalem habitum, et indignis  
 fides negare 33. Inquirere debet, etc. præsertim  
 Communionis cartulas, et impedimenta Matrimonii  
 34. V. De *Concione, et instructione* 35. et 36. Quæ  
 prædicari sint magis necessaria 37. ad 44. Aliæ  
 obligationes Parochi, scilicet 1. Exemplum: 2.  
 Assistentia Moribundis: 3. Eleëmosyna: 4. Exa-  
 minare Obstetrices, etc. circa Baptismum 45. et  
 46. De pulsandâ campanâ horâ 3. post meridiem  
 etc. *ibid. vers. Notandum.*

PUNCT. II. De *Episcoporum obligationibus.* pag. 268

I. De *Ordinatione* 47. Ordinandi circa spiritum pro-  
 bandi sunt 48. ad 51. Et circa Doctrinam 52. De  
 Seminario ad talem finem 53. II. De *Electione Pa-  
 rochorum* 54. Quæ ipsis insinuare debet Episcopus.  
 Hic agitur de Congregatione puellarum 55. De  
 electione Confessariorum. Hic agitur de Academiis  
 56. De Congregationibus particularibus Ecclesias-  
 ticorum 57. Attendere debet Missarum celebra-  
 tioni 58. III. De *Visitatione* 59. et 60. IV. De *Cura  
 pro monialibus* 61. V. De *Residentia* 62. VI. De  
*Correctione* 63. VII. De *Eleëmosynâ* 64. De Missâ,  
 de audientiâ, et de exemplo, præsertim circa  
 mansuetudinem, paupertatem, orationem, etc. 65.  
 et 66.

## TRACTATUS VIII.

### *De quinto Præcepto.*

CAP. I. De *occisione sui ipsius.* pag. 285

Quando licet vitam periculo mortis exponere 1. et 2.

Non licet mutilare seipsum, nisi ad vitam con-

servandam. De puerorum castratione 3. De ebrietate 4. An medicinæ causâ ebriari licet 5. An ne occidatur 6. An proximum ad ebrietatem inducere liceat, ut majus malum ei impediatur 7. Quæ culpæ imputantur ebrio 8. Et vide ibi de peccato in causâ *vers. Quæritur etc.*

CAP. II. *De proximi occisione.* pag. 291

De occisione ex publicâ auctoritate 9. et 10. Ob propriam defensionem 11. Confutatur super hoc puncto opinio cujusdam Neoterici 12. De occisione Tyrannorum, an unquâ liceat? 13. De honoris invasore 14. Bonorum 15. Pudicitiae 16. Ob proximi defensionem 17. et 18. An liceat prævenire aggressorem 19. De adultero etc. 20. De innocentis occisione 21. De abortu 22. An incurrant excommunicationem prægnautes 23. De dubiâ foetus animatione 24. An mater possit sumere pharmacum cum periculo abortûs 25. et 26.

CAP. III. *De Duello, et de Bello.* pag. 314

PUNCT. I. De Duello; Propositiones proscriptæ à Benedicto XIV. circa Duellum 27. Quando liceat Duellum 28. *ibid.*

PUNCT. II. De Bello. An possit inferri Bellum cum opinione probabili 29. An vocare liceat in auxilium inimicos Fidei 30. An miles in dubio justitiæ bellare possit 31. Quæ actiones licitæ sunt in Bello 32. pag. 316

## TRACTATUS IX.

### *De sexto Præcepto.*

PUNCT. I. *De tactibus, aspectibus, et verbis turpibus.* pag. 318

An detur parvitas materiæ in delectatione carnali, aut sensibili 1. et 2. De tactibus 3. De choreis 4. De muliere permittente se tangi 5. An puella oppressa teneatur clamare 6. An possit unquâ permittere sui violationem 7. De aspectibus 8. De verbis 9. De audientibus verba turpia 20.

PUNCT. II. *De actibus turpibus consummatis naturalibus.* pag. 323

De fornicatione 11. An permittendæ meretrices 12.  
 An fornicatio sponsorum sit diversæ speciei 13.  
 De stupro 14. De raptu 15. De adulterio 16. De  
 incestu 17. et 18. Si dispensati coëant , etc. 19.  
 De sacrilegio 20. ad 23.

PUNCT. III. *De actibus turpibus consummatis contrâ naturam.* pag. 327

De sodomiâ 24. 25. et 26. De bestialitate 27. De  
 coitu cum Dæmone 28. De pollutione 29. De dis-  
 tillatione 30. An liceat expellere semen corrup-  
 tum 31. An teneamur impedire pollutionem de  
 se venientem 32. An vitare omnes pollutionis cau-  
 sas 33. Quid si actiones ponantur ex justâ causâ 34.

## TRACTATUS X.

*De septimo Præcepto.*

CAP. I. *De justitiâ , jure , et dominio.* pag. 334

Divisio justitiæ , juris et dominii 1. Peculium filii-  
 familias. De Castrensi , et quasi Castrensi 2. De  
 Profectitio , et de bonis in patrimonium donatis ,  
 aut à filio in negotio lucratis 3. De Adventitio 4.  
 Bona uxorum. 5. Bona Clericorum : I. Patrimo-  
 nialia : II. Industrialia : III. Ecclesiastica : IV.  
 Parsimonialia 6. An Beneficiatus absolutum fruc-  
 tum dominium habeat 7. Qui recipit hos fructus  
 à Beneficiato 8. Quotupliciter dominium acquiri-  
 tur etc. 9. De præscriptione 10. ad 13.

CAP. II. *De furto.* pag. 344

PUNCT. I. *De essentiâ furti.* ibid.

Definitio furti 14. De paupere in extremâ , aut quasi  
 extremâ necessitate 15. De redemptione Christia-  
 norum 16. An pauper teneatur petere 17. An pos-  
 sit capere rem magni valoris 18. De fure qui in  
 extremâ necessitate furtum consumit 19. An dives  
 qui non subvenit , ad restitutionem teneatur 20.  
 De compensatione 21.

PUNCT. II. *De furti quantitate ut gravem constituat materiam.* pag. 348

De gravitate materiæ respectu diversorum persona-  
 rum generum 22. De furtis in vineis 23. et 24. lig-

norum 25. De furtulis 26. Furtum Sacrarum Reliquiarum 27. De furtis factis pluribus, præsertim à Tabernariis 28. Qui retinet materiam gravem absque culpâ gravi 29. De furtulis factis à multis eodem tempore 30. Qui parvam capit materiam post grave furtum 31. De furtis filiorum 32. Uxorum 33. Servorum 34.

CAP. III. *De restitutione.* pag. 356

PUNCT. I. *Undè oritur restitutio, et quæ culpa ad ipsum obligat.* *ibid.*

Quando obliget restitutio 35. et 36. De radicibus restitutionis 37. De culpâ theologica, et juridicâ 38. et 39. An culpa venialis obliget ad restitutionem 40. An in contractibus, et in officiis obliget sola culpa juridica 41.

PUNCT. II. *De iis qui ad restitutionem tenentur.* p. 359

De cooperantibus, et I. De mandante 42. et 43. II. De consulente 44. In dubio an consilium, etc. 45. Si executor paratus erat 46. Si minoris damni consilium datur 47. Si revocatur consilium 48. Qui consilium dat ex ignorantia 49. III. De eo qui iniquum præbet *Suffragium* 50. IV. De adulatore 51. V. De receptatore 52. Qui emit à fure, an ei rem reddere possit 53. VI. De participante 54. Si multi domum comburunt 55. Qui cooperatur præ timore proprii damni 56. et 57. Qui damnum impedire volentem impedit 58. VII. De causis negativis 59. Quis prius tenetur ex cooperantibus; et si creditor uni suam partem remittit, etc. 60. Qui proximum à justo bono impedit 61. Qui Fiscum impedit ne quod et ex poenâ debetur capiat 62. Qui præ odio impedit, sed sinè malis artibus 63.

PUNCT. III. *Cui fieri debeat restitutio.* pag. 369

Si bona sunt certa, et dominus abest 64. et 65. Si dominus rem evincit è manibus tui emptoris 66. Si bona sunt incerta 67. De compositione 68. De rebus inventis 69. De thesauris 70. De animalibus venatione captis 71. Quæ venatio Clericis sit prohibita, ac Religiosis 72.

PUNCT. IV. *Quid restituere teneatur possessor bonæ fidei? et quid possessor malæ fidei?* pag. 375

De possessore bonæ fidei 73. De fructibus naturalibus, civilibus, mixtis, et industrialibus 74. Qui recipit à fure rem ablatam mixtam cum re illius 75. Qui infert damnum existimatum minoris quo valet 76. De possessore malæ fidei 77. Quid si res crescit, aut crevisset pretio, et de expensis utilibus à fure factis; et de eo qui se simulat pauperem 78. Si etiam res periissent apud dominum 79. Qui emit cum dubio 80. Qui defraudat gabellas 81.

PUNCT. V. *Quid restituendum pro homicidio. p. 380*  
 Quid restituere debet homicida 82. Si ob offensionem vitæ, famæ, etc. 83. Qui occidit unum pro alio an teneatur restituere 84. et an incurrat excommunicationem, vel irregularitatem 85. Qui obtinuit remissionem ab occiso, an teneatur restituere filiis 86. Quid restitui debet hæredibus defuncti, et quid si intendatur eorum aut creditoris damnum 87. Si homicidium imputatur tertio 88. Qui occidit excedendo justam defensionem 89. An hæres supplicio affecti teneatur ad damna 90.

PUNCTUM VI. *Quid restituendum ob stuprum. p. 385*  
 Ad quid tenetur corruptor, si mulier consentit 91. Ad quid si defloravit vi, aut minis 92. Si adest promissio vera, aut ficta, tenetur ad Matrimonium 93. Limitatur I. Si mulier poterat advertere fictionem 94. II. Si timeatur malus exitus; III. Si mulier remittit; IV. Si adest familiæ dedecus; V. Si vir habet tantum tactus 95. VI. Si inveniat puellam corruptam; VII. Si mulier renuit nuptias 96. Si corruptor ligatus est voto castitatis, an etc. 97. Si est consanguineus, etc. 98.

PUNCT. VII. *Quid restitui debet ob adulterium. p. 391.*  
 Ad quid tenetur adultera et an teneatur se prodere apud spurium filium 99. An filius teneatur credere ei 100. Ad quid tenetur adulter; et licet non induxerit matrem ad supponendam prolem 101. In dubio si proles sit viri aut alterius adulteri 102. Si proles mittatur ad hospitalia, etc. 103.

PUNCT. VIII. *De tempore et modo restitutionis. p. 394*  
 Obligatio statim restituendi, et damnum reparandi 104. Non debet absolvi pœnitens antequàm restituat 105. Potest restitui per alium: Sed quid si

iste non restituit , etc. Et si Confessarius facit celebrare Missas , cùm dominus est certus , etc. 106.  
**PUNCT. IX. *De ordine personarum , quibus restitutio prius facienda est.*** pag. 396

Si res existit , debet domino tradi , sed si alienata est , etc. 107. Debent præferri creditores onerosi 108. Si omnes sunt onerosi 109. An credita ex delicto , aut ex contractu , etc. 110. An credita certa 111. An hypothecaria anteriora , et an anteriora personalia 112. An debitor possit præferre quem maluerit 113. Quid si creditor exigit etc. 114. Si servus recipit salarium à domino ære alieno gravato 115.

**PUNCT. X. *Quæ causæ excusant à restitutione.*** p. 400

Causæ excusantes ex parte creditoris sunt 1. Si restituitur ejus creditori : 2. Si præsumitur ejus consensus : 3. Si prævidetur ejus abusus 116. Ex parte debitoris 1. Si deest culpa : 2. Si obtinetur compositio : 3. Si damnum est multò majus : 4. Si adest animæ periculum : 5. Vel vitæ , vel famæ : 6. Si oedit bonis 117. Excusat necessitas 118. Quid si creditor etiam esset in necessitate ? 119. et 120.

**CAP. IV. *De contractibus.*** pag. 406.

**PUNCT. I. *De contractibus in genere.*** *ibid.*

Quot modis constituatur contractus 121. Qui contrahit sinè animo contrahendi , aut se obligandi 122. De contractibus turpibus 123. De contractibus initis dolo , aut errore 124. Metu 125. Sinè solemnitatibus 126.

**PUNCT. II. *De promissione et donatione.*** pag. 409.

De promissione 127. Qui non potest donare , et si quis recipit dona à debitis gravato 128. De donationibus inter conjuges , et patres , et filios 129. De donatione non acceptatâ , et si per nuncium , aut per litteras facta est 130. Si est pro causâ piâ ; et an hæres possit acceptare 131. Traditio ; Adimplementum ; Donatio prodiga ; causa finalis 132. Causæ ut donationes revocari possint , præsertim si sint inofficiosæ 133. De donatione causâ mortis 134.

**PUNCT. III. *De commodato , precario et deposito.*** p. 413.

De commodato , et precario 135. De deposito 136. An debeat præservari res domino 137. In quibus casibus depositarius teneatur restituere 138.

**PUNCT. IV. *De mutuo et usurâ.*** pag. 414.

De mutuo, et quando debet restitui 139. De mutuo Minoribus concesso 140. De concesso filiisfamilias 141. De usura 142. De mutuo dato sub spe lucri 143. De lucro gratis oblato 144. De oblato ex timore, etc. 145. De pacto non repetendi sortem, nisi intra tempus longum 146. De damno emergente 147. De lucro cessante 148. Conditiones, 1. ut mutuarius admonitus sit 149. 2. Ne ultra spem exigatur 150. 3. Ut mutuum sit causa damni, et lucri cessantis 151. An damnum, aut lucrum debeat esse certum 152. De periculo 153. et 154. De Montibus Pietatis 155. De pœna conventionali 156. et 157. An ut exigatur benevolentia, etc. 158.

De pactis obligatoriis, etc. 159. De pacto restituendi in eâdem quantitate 160. De præstando quod debetur ex justitiâ, aut caritate 161. Obligatio usurariorum, et hæredum 162. De cooperatoribus 163. et 164.

PUNCT. V. *De emptione et venditione.* pag. 425

Determinatio pretii, et rei 165. De emptione 166. Quando transfertur dominium 167. De emptione conditionatâ 168. An periculum et fructus rei spectent semper ad emptorem 169. De pacto exigendi fructus usquè ad solutionem 170. Si emitur pecuniâ alienâ, aut venditur res aliena 171. De pretio justo 172. Quomodo pretium crescit, aut diminuitur 173. De mercibus ultroneis, et quando potest carius vendi 174. De venditione sub hastâ 175. ad 177. An si ob dilationem, vel anticipationem pretii etc. 178. De chirographis 179. Pactum retrovendendi 180. Reëmendendi 181. De contractu mohatræ, et antichrîseos 182. De monopolio 183. et 184. De vitio rei 185. ad 187. Qui novit brevi pretium fore ut crescat, aut decrescat, etc. 188. De venditricibus, et proxenetis 189. Si res est vendita duobus 190. Si res perit, etc. 191.

PUNCT. VI. *De negotiatione.* pag. 435

Cui prohibita sit negotiatio; et quando est culpa lethalis; et si Clericus negotiatur per alios, aut alii 192. Emere pecora pro suis pascuis, etc. 193. Vendere pluris, ut emat minoris. Emere lanam, etc. Si fit ob necessitatem 104. An Clerico liceat esse Tutor, Factor, etc. 195.

- PUNCT. VII. *De censu.* pag. 437.  
 Quid sit census 196. Conditiones requisitæ à Nicolao V. 197. Conditiones requisitæ à S. Pio V. 198. An liceat census personalis 199. An liceat census redimibilis ex parte emptoris 200. An pereunte fundo pereat census 201. An possit constitui census pecuniâ priùs debitâ 202.
- PUNCT. VIII. *De cambio, locatione, emphyteusi, feudo, et libello.* pag. 439.  
 De cambio, et ejus speciebus 203. Qui recipit monetam falsam 204. De locatione 205. De successore locatoris 206. In casu sterilitatis etc. 207. An possit conduci jus mendicandi 208. Si tabellarius eodem proficiscatur duorum mandata executurus, an etc. 209. An debeatur salarium famulo ægro-tanti 210. De emphyteusi 211. De feudo 212. De libello 213.
- PUNCT. IX. *De sponsione, et ludo.* pag. 443.  
 De sponsione an sit licita; et quid si altera pars dicat se certò scire factum 214. De ludo filiorum-familias, et Religiosorum 215. De fraudibus 216. De ludis prohibitis; an sint prohibiti laicis, et an victor possit sibi retinere lucratum 217. An qui perdit teneatur solvere; quid si intercesserit juramentum solvendi, et non repetendi 218. De ludis prohibitis Clericis 219. Religiosis 220. Episcopis 221.
- PUNCT. X. *De societate.* pag. 447  
 Conditiones ut sit justa societas 222. Debet priùs detrahi capitale domino 223. Debet attendi valor laboris, et commoditatis sortis quæ spectat ad dominum 224. Damnum sortis cui spectet 225. De animalium societate ad caput salvum; et de pacto supplendi animalia mortua 226. De contractu trium contractuum 227. An filius negotiando pecuniâ paternâ, etc. 228. De societate inter fratres 229. Quot modis finitur societas 230.
- PUNCT. XI. *De assecuratione, fidejussione, pignore, hypothecâ, tutelâ, et testamentis.* pag. 451.  
 De assecuratione 231. De fidejussione 232. De pignore et hypothecâ 233. De tutelâ et curatelâ; et an pupilli possint se obligare, et donare 234. De testamentis. Si constet de voluntate testatoris etc. Si adsit tantum unus testis etc. 235. De Legato pro virginibus.



virginibus. An ultimæ voluntates possint immutari à Papâ, aut ab Episcopo 236. De obligatione legandi bona filiis, fratribus, aut aliis conjunctis pauperibus 237. In quibus casibus pater possit exhæredare filios 238.

## TRACTATUS XI.

*De octavo præcepto.*

CAPUT UNICUM. *De judicio temerario, contumelia, et detractioe.* pag. 455

PUNCT. I. *De judicio temerario.* ibid.

De judicio, et suspitione temeraria 1. Advertenda pro praxi 2.

PUNCT. II. *De contumeliâ.* pag. 456

De contumeliâ, et de honoris restitutione 3. Causa quæ excusat 4. De reservatione, et lectione epistolarum 5. Cui hoc permissum sit 6.

PUNCT. III. *De detractioe.* pag. 458

Detractio quando est culpabilis 7. De arcano per fraudem cognito, etc. 8. De arcani obligatione 9. An possit publicare delictum ob defensionem 10. An propter consilium, et solamen, et an viro probo 11. Delictum est publicum in uno loco, etc. 12. Si fuerit publicum aliquo tempore, etc. 13. Si delictum est connexum 14. Si referat ut ab aliis auditum 15. Qui nominat aliquem Ordinem, aut Monasterium 16. Qui inducit, aut audit detractio-nem 17. De famæ restitutione 18. Causæ excusantes a restitutione 19. An adsit obligatio compensandi infamationem cum pecuniâ 20. An infamatus possit sibi compensare 21. Qui sint libelli famosi, et quæ pænæ adsint contrâ eos conficientes 22.

## TRACTATUS XII.

*De præceptis Ecclesiæ.*

CAPUT I. *De jejuniis ecclesiastico.*

PUNCT. I. *De jejunii obligatione.*

Tom. I.

pag. 467.

ibid.

\*\*

De abstinentiâ à carnibus 2. De lacticiniis 3. et 4.  
 De larido 5. De tribus Bullis Benedicti XIV. 6.  
 An dispensati possint vesci piscibus 7. De carne  
 suinâ 8. De unicâ comestione 9. De interruptione  
 prandii 10. De electuariis, etc. 11. De potionibus  
 12. De vino, et birra 13. De sorbetto 14. De cho-  
 colate 15. De collatiunculâ serotinâ 16. ad 19. Si  
 quis pluries vescitur carnibus, aut alio cibo, etc.  
 De parvâ materiâ 20. De horâ refectionis 21.

PUNCT. II. *De causis excusantibus à jejuniis.* p. 483

I. De dispensatione, et qui dispensare potest 22. II.  
 De impotentiâ physicâ 23. De impotentiâ morali  
 24. De adolescentibus, et senibus 25. III. De la-  
 bore 26. et 27. De viatoribus 28. ad 30. De artific-  
 bus opulentis 31. Si artifex potest sinè gravi incom-  
 modo jejunare 32. Qui sinè causâ suscipit aliquem  
 laborem 33. IV. De pietate, et quis hâc causâ sit  
 excusatus 34.

CAPUT II. *De præcepto annuæ Confessionis et Com-  
 munionis.* pag. 492

De præcepto annuæ Confessionis; an obliget, qui  
 tantum habet venialia, et an debeat prævenire,  
 qui prævidet, etc. 35. An qui anno præterito ne-  
 glexit Confessionem, teneatur confiteri quàm pri-  
 mum; et quot peccata committit, qui neglexit il-  
 lam 36. An qui confitetur anno sequenti, satisfa-  
 ciat præteritæ obligationi 37. Poenæ in transgres-  
 sores 38. De præcepto Communionis Paschalis 39.  
 An qui eam neglexit teneatur ad quamprimùm;  
 etc. Et an teneatur prævenire, etc. 40. An ex-  
 communicati, et in carcere detenti, etc. 41. Debet  
 in Parochiâ fieri 42. A tali obligatione eximuntur  
 Sacerdotes, Peregrini, et Servi Monasteriorum 43.  
 Quâ ætate, et quando pueri communicari debent  
 43. Quando amentes 44.

## TRACTATUS XIII.

*De præceptis particularibus certo hominum statui  
 propriis.*

CAPUT. I. *De statu Religioso.* pag. 500

PUNCT. I. *De obligatione Professionis Religiosæ.* ibid.

Quid sit status Religiosus , et quanam possit approbare Religiones 1. Religiosus tenetur tendere ad perfectionem ; quandò peccat contrà hanc obligationem ; et quando peccat Prælatus non corrigendo illum 2. Ætas , acceptatio , et spontanea deliberatio requisita ad Professionem. Causæ nullitatis etc. 3. An Episcopi teneantur ad vota , et regulas , et an fugitivi , et expulsi ; causæ expulsionis 4.

PUNCT. II. *De votorum obligatione.* pag. 504

I. Circà votum paupertatis. De manuscriptis 5. De Peculio 6. Quandò peccatur contrà votum paupertatis 7. De prohibitione donorum 8. et 9. Quanta erit materia gravis , et quandò Religiosus teneatur ad restituendum 10. An sufficiat licentia præsumpta 11. Quid si injusta denegata fuerit licentia ? Quandò Prælatus negaturus fuisset licentiam , si scivisset etc. An Abbatissæ possint donare , et licentiam dare 12. Quid si Religiosus impendit in usus turpes , et vanos cum licentiâ generali 13. An Prælatus possit dare licentiam exponendi ludo 14. II. Circà votum castitatis , et circà clausuram 15. III. Circà votum obedientiæ , quandò obliget et circà quæ 16. Si Capitulum præcipit pristinam observantiam. Inobedientia est duplex peccatum. An in dubio sit obligatio obediendi 17. Si præceptum sit revelandi secretum 18. Si superveniat nova circumstantia 19. Si inferior dat licentiam negatam à Superiore 20. Cui tenentur Moniales obedire 21. Quid circà electionem Abbatissæ 22.

PUNCT. III. *Cuinam ingredi Religionem vetitum est.* pag. 517

An impediri possint filii relinquendo parentes in necessitate. Et an professi teneantur egredi , ut succurrant parentibus 23. An possint ingredi invitis parentibus. An si relinquuntur filii in necessitate ; quid si fratres , aut sorores 24. Qui avertit aliquem à statu Religioso 25. Qui vocationem negligit 26. An ingredi possint debitores 27. An Episcopi 28. An Parochi 29.

CAPUT II. *De statu Clericali* 30. pag. 522

PUNCT. I. *Cuinam conferri possint et debeant beneficia.* pag. 523

Quotuplex sit beneficium 31. Quot modis acquiritur. De jure Patronatûs 32. An etiam beneficia simplia conferenda sint dignioribus 33. An patroni debeant digniores præsentare 34. An ad Prelaturas etc. 35. An sit valida minùs digni electio 36. An elector teneatur ad restitutionem 37. An peccet dignus qui concurrit cum digniori 38. An examinatores non denunciando etc. 39. De pluralitate beneficiorum 40. et 41.

PUNCT. II. *De qualitate, et obligatione Beneficiatorum, et quot modis Beneficia amittuntur.* pag. 533

Qualitas Beneficiatorum. De intentione infrà annum suscipiendi ordines etc. 42. Qui recipit Parochiam cum animo dubio aut conditionato 43. Qui recipit Beneficium cum animo illud abdicandi 44. Munia Beneficiati. Quoad fructus etc. Si de illis vivere potest 45. Quibus debet erogare superflua 46. An loci pauperibus 47. An consanguineis 48. An pensionarii teneantur erogare superflua 49. De residentia Canonorum 50. Pœnæ non residentium 51. Causæ excusantes; et I. Infirmitatis 52. II. Necessitatis 53. An excommunicatus etc. 54. An irregularis, etc. 55. III. Utilitatis. De eo qui assistit etc. De Pœnitentiaro, et Theologo 56. De Examinatoribus, Visitoribus etc. 57. Quot modis emittuntur Beneficia, præcipuè renunciatione, et jure; præsertim si intercedit simonia 58. De Pensionibus 59. Quæ artes et officia sunt Clericis interdicta 60. De bonorum Ecclesiasticorum alienatione 61. De solemnitatibus requisitis 62.

CAPUT III. *De statu, et officiis nonnullorum sæcularium.* pag. 547

PUNCT. I. *De iudicibus, et Scribis.* *ibid.*

De *Judicibus*. Quando Judex potest condemnare, aut inquirere, aut pœnam diminuere. Et an possit ex scientiâ privatâ judicare 63. et 64. Et an possit judicare cum opinione minùs probabili 65. An possit cum commissario stipendium partiri, et an possit dona acceptare 66. An possit sibi retinere pretium injustæ sententiæ 67. De *Scribis* 68.

PUNCT. II. *De Advocatis, et Procuratoribus.* p. 553

**An** Monachi et Clerici possint agere advocatos. Et quandò advocatus tenetur defendere 69. Quas causas potest defendere , et quanto salario etc. 70. Si causa est justa etc. Si conveniatur de salario in litis prosecutione, aut pactio fiat de quotâ litis 71. De *Procuratoribus* , si habent advocatum gratis ; si ipsi se offerant , etc. 72.

**PUNCT. III.** De accusatore , testibus , et reo. p. 656

**De accusatoribus.** Quandò debeat fieri accusatio aut denunciatio. An custodes , etc. 73. Clerici quandò possunt accusare. Et an debeat præcedere correctio. Præsertim si in communitate vivitur 74. De monitoriis 75. De denunciationibus hæreticorum 76. De blasphemiiis hæreticalibus 77. De superstitionibus 78. De *testibus*. Quando tenentur etc. 79. Qui omittit dicere veritatem 80. Qui occultat veritatem 81. De *reis*. Quandò reus teneatur confiteri 82. An cùm pœna est magna 83. Si falsum delictum sibi imponit 84. Si falsum delictum imponit accusatori 85. An reus possit resistere , et an teneatur fugere etc. 86. An possit carcerem effringere ; et an custodem pecuniâ corrumpere. An alii possint in hoc ei auxilium præbere , etc. 87.



## INTRODUCTIO.

**N**ON mediocri profectò in Coelis donabuntur præmio, et certam sibi æternam suam operabuntur salutem Confessarii partes suas benè gerentes, qui operam ad peccatorum salutem impendunt. Nos Jacobus Apostolus his perspicuis verbis certos facit; *Qui converti fecerit peccatorem ab errore viæ suæ, salvabit animam ejus*, (nempè suam ipsius convertentis, ut loquitur textus græcus) *à morte, et operiet multitudinem peccatorum.* Ep. Cap. 5. vers. 20. Sed ingemiscit Mater Ecclesia tot filiorum suorum perditionem malorum Confessariorum culpâ; in eorum enim bonâ, aut malâ agendi ratione potissimum populorum salus, aut perniciēs sita sunt. *Dentur idonei Confessarii* (ajebat S. Pius V.) *ecce omnium Christianorum plena reformatio.* Pro certo igitur habendum est, quòd si in omnibus Confessariis ea scientia, et ea morum integritas reperiretur, quam tantum ministerium exposcit, non esset tot peccatorum sordibus mundus ità contaminatus, nec infernus adeò in dies animabus repleretur. Pro bonitate autem non hìc expostulatur illa habitualis tantum, quâ simpliciter homo in statu Gratiæ constituitur, sed positiva, nempè quæ per virtutum exercitium comparatur, sicut Pœnitentiæ ministrum decet; qui duplicis alimenti opus habet; uno, ut vitam suam sustentet; altero, ut prolem nutriat. Etenim Confessarius alio-

rum conscientias dirigere debet , quin aut nimiâ indulgentiâ , aut immoderato rigore erret ; tot vulnera sibi attrectanda sunt , quin se inquinet : cum mulieribus , et adolescentulis versandum sic erit , lapsus eorum in Confessionibus maximè pudendos auscultando , quin nec minimùm capiat sibi detrimenti ; fortitudine cum hominibus præclaris utendum erit , quin cujusvis respectu moveatur : denique totius caritatem , mansuetudinem , et prudentiam redolere debet. Itaque , ut has omnes adimpleat partes , non vulgari opus est probitate , ad quam nemo attinget , si quotidianâ meditatione coadjuvante , in oratione versatus non sit ; aliter carebit luce , et gratiis huic muneri ritè exercendo necessariis , quod ( ut dici solet ) humeris Angelicis etiam formidandum esset.

Præter morum probitatem , Confessarius , cum ipse sit conscientiarum Iudex , tenetur etiam , ut suprâ attigimus , scientiâ ad rectè judicandum esse præditus. Propterea non tantùm ea ad meram praxim spectantia , sed etiam animadversiones notabiliores , et scitu magis necessarias super præcipuis Moralis tractatibus , in hoc brevi opere colligenda duxi ; Definitiones , Principia , Textus tùm Civiles , tùm Canonicos , item Sanctiones Pontificum , et Sacr. Congreg. Declarationes , ac insuper doctrinas magis necessarias magisque acceptas , adnotando : materias enim , quæ diligentiori indigent disceptatione , ad opus Morale , quod in duobus

tomis distinctum in lucem edidi, recurrat, ubi eas suis rationibus, et cum citatione locorum Auctorum, qui de illis tractant, fusè discussas reperiet. Hic solummodò breviter eos delibabimus, quantum satis erit, ut lectoris diligentia excitetur ad eas librandas. Nonnullæ sententiæ, quas hic secuti sumus, alicui forsitan aut nimis rigidæ, aut nimis benignæ videbuntur; sed obtestarer hunc, ut antequàm hâc notâ eas damnet, præfatum Opus in tribus tomis distributum grandioris molis (quod semel Neapoli, et pluries Venetiis typis datum est) revolvat, cujus loci frequenter hic citantur, quia fusè rationes, et Doctorum, qui eas defendunt, auctoritates ibi legendo, minimè alienas, nec rationi temerè innixas sibi visum iri, pro certo spero.

Quoties in præsentì opere adspiciuntur citationes, nullo allato auctore, ex nostrâ Theologiâ Morali lector sciat esse desumptas.

Littera *L.* denotat Librum, *Tr.* tractatum, *N.* numerum, *P.* paginam, *V.* versum, *To.* tomum.

TRACTATUS



# TRACTATUS PRIMUS

DE

## CONSCIENTIA.

*Regula remota, et proxima bene agendi 1. Varice  
Conscientiarum distinctiones 2.*

1. — **P**RIMA regula benè agendi est, lex divina cui postea debet se uniformare Conscientia; sed quia bonitas aut malitia actionis talis nobis apparet, qualem eam Conscientia apprehendit, hinc fit, quòd regula remota, sive materialis nostrarum operationum est lex Divina; proxima verò et formalis est Conscientia, ut docet S. Thomas (a) sic loquens: *Ratio humana est regula voluntatis humanæ, ex quâ ejus bonitas mensuratur.* Et apertius alibi (b) *Actus humanus judicatur virtuosus, vel vitiosus secundum bonum apprehensum, in quod voluntas fertur, et non secundum materiale objectum actûs.* Quâ de re in hoc primo Tract. agemus de Conscientiâ, in sequenti verò de lege.

2. — Sermonem faciens de Conscientiâ, oportet plura distinguere. Oportet 1. distinguere Conscientiam à Synderesi. Synderesis est notio principiorum universalium, nempe: Deus est honorandus: malum est fugiendum: quod tibi fieri non vis, alteri ne feceris. Conscientia verò est judicium practicum, quod ab hujusmodi principiis formatur circa præsentes operationes, quæ hîc et nunc agendæ sunt, aut vitandæ, secundum præsentes circumstantias; quapropter definitur Conscientia: *Dictamen rationis, quo judicamus aliquid hîc et nunc agendum,*

(a) 1. 2. q. 19. a. 4. — (b) Quodlib. 3. a. 27.

Tom. I.

*vel fugiendum.* 2. Distinguenda sunt varia conscientiarum genera, quæ possunt accidere, nimirum *Conscientia Recta, Erronea, Perplexa, Scrupulosa, Dubia, et Probabilis.* De singulis hæc cum distinctione nobis erit loquendum.

## CAPUT PRIMUM.

De Conscientiâ Rectâ, Erroneâ, Perplexâ,  
et Scrupulosâ.

*De conscientiâ rectâ* 3. *Erroneâ* 4. *Si detur ignorantia Præceptorum naturalium* 5. *Si quis æstimat desiderium prævum non esse peccatum* 6. *De Conscientiâ Perplexâ* 7. *De Conscientiâ Scrupulosâ* 8. ad 11.

3. — **C**ONSCIENTIA *Recta* est, quæ dictat rei veritatem, contrâ quam qui operatur, certè peccat.

4. — *Erronea* est, quæ dictat falsitatem. Hæc dividitur in *Invincibilem* et *Vincibilem*, sive *Culpabilem*. *Invincibilis* est cum nulla erroris dubitatio in mentem occurrit, et juxtâ istam nos tenemur tunc ad operandum; cum enim hæc sit regula proxima (sicut superius dictum est) nostrarum operationum, juxtâ illius dictamen nobis operandum est. *Vincibilis* est cum in mentem occurrit erroris dubitatio, et obligatio errorem vincendi, ac insuper negligitur ordinaria (non autem maxima) quæ debet adhiberi diligentia ad veritatem inquirendam. Qui cum hujusmodi Conscientiâ operatur, semper peccat, sive juxtâ, sive contrâ conscientiam operetur.

5. — Quæritur hæc, an possit dari ignorantia invincibilis circâ præcepta naturalia? Cum ignorantia est invincibilis, est etiam inculpabilis, sicut constat ex *Propos. 2. Michaelis Baji* proscripta ab *Alexandro VIII. Tametsi detur ignorantia invincibilis juris naturæ, hæc in statu naturæ lapsæ non excusat à peccato formali.* Idem quoque dixit *M. Nicolius (in def. de Prob. ad fin. Epist. 5. Montaltatii apud Cont. Tournely tom. 1. pag. 12. in fin.)* sub nomine *Wendrochii* dicens, talem ignorantiam esse poenam

peccati originalis. Sed hoc jam contrà Bajum proscriptum est. Restat igitur videndum, an detur ignorantia invincibilis circà Præcepta naturalia. Respondemus cum communi (contra *Sannichium*, et alios pauciores) quam tenent *S. Antoninus*, *Sotus*, *Maldonatus*, *Suar.*, *Azorius*, *Sanchez*, *Gommachæus*, *Duvallius*, *Wigandt*, *Gonet* (qui meritò vocat contrariam singularem, et improbabilem) et multi alii, inter quos numeratur doctissimus *Cardin. Gotti* (a), adhibendam esse distinctionem inter prima principia, et conclusiones immediatas à conclusionibus mediatis. Hoc posito, dicimus cum allatâ sententiâ circà prima principia seu circà præcepta principaliora Legis naturalis, quæ sunt ex se nota, et à Synderesi dictata, ut superius diximus; *Deus est colendus: Quod tibi non vis* etc. non potest dari ignorantia invincibilis. Circà verò conclusiones immediatas, seu proximè deductas à principiis, qualia sunt Præcepta Decalogi, nec datur ignorantia invincibilis, nisi in rudibus, et ad breve tempus, vel nisi additâ aliquâ circumstantiâ apparenter cohonestante. Circà autem conclusiones mediatas, sive remotas discursu à Præceptis Decalogi deductas; ut sunt præcepta de non faciendis usuris, de scandalis vitandis, et alia id genus, circà has dicimus posse dari ignorantiam invincibilem, et inculpabilem, tunc cùm adhibetâ communi, quam debet (ut diximus) diligentiam, non potest dubium vincere. Vide in nostrâ Morali (b) ubi hoc multis auctoritatibus *D. Thomæ* comprobatum est: et *P. La-Croix* (c) confirmat hoc idem auctoritatibus *S. Bonaventuræ*, et *Alberti Magni*. Idque confirmatur ex eâdem allatâ Prop. 2. ex Bajanis proscriptis, ubi animadvertitur Ecclesiam aut sentire, aut valdè probabile esse tenere, quòd detur ignorantia invincibilis etiam circà Legem naturalem; nam si teneret contrarium, non declarasset ignorantiam

---

(a) *Tom. 2 tr. 3. q. 1. dub. 4. n. 17. ex D. Thom. 1. 2. q. 19. a. 6. Adde Tourn. Mor. tom. 1. p. 14. qui citat D. Thom. et D. August. Adde Mercorum lib. de Praxi opin. Vicent. Baron. in post. p. ad Mor. Theol. D. 4. q. 5. §. ult.* — (b) *L. 1. n. 169.* — (c) *Num. 720.*

invincibilem excusare hominem à peccato, quum damnasset propositionem de impossibili eventu.

6. — Non desunt inter DD. qui excusant à mortali eum, qui putaret opera tantum esse peccatum, non autem peccandi desiderium : sed huic opinioni numquam potui acquiescere, cum intelligere non valeam, quomodo evenire possit, ut qui jam scit aliquam actionem, v. g. fornicationem, esse peccatum, possit non peccare deliberatè desiderando illam deliberatè exequi : impossibile mihi videtur, quòd quis credat non peccare, cum deliberatè vult opere complere, quod jam advertit esse Dei offensam(a).

7. — Conscientia *Perplexa* est, cum quis inter duo Præcepta constituitur, v. g. servandi proximi vitam, et non pejerandi, et ipse nescit, quid deberet. Quid tunc ei faciendum erit? 1. Sapientes consulere debet, si potest. 2. Si non potest, minus malum eligendum erit, evitando potius transgressionem Præcepti naturalis, quàm humani, aut Divini positivi. 3. Si facile sibi non erit ad liberandum, quodnameorum sit minus malum, tunc ad quodcumque se determinat, non peccat, quia tunc deest ei libertas necessaria ad peccatum.

8. — Conscientia *Scrupulosa* est ea, quæ ex levi formidine dubitat de alicujus actionis honestate, adeoque sæpè formidat peccatum esse ubi non est. Multas DD. assignant regulas pro scrupulosis, sed reverà post orationem nullum his remedium efficacius (imo unicum, ut benè ait *P. Segneri*) restabit, nisi obedientiam omnimodam Directori præstare. Hinc antè omnia Confessarius suadeat hujusmodi Pœnitenti hoc duplex principium principale. Primum, quòd coram Deo tuto incedit, si Patri spirituali obtemperat, ubi evidenter peccatum non apparet : tunc enim non homini obedit, sed ipsimet Deo, qui dixit : *Qui vos audit, me audit*. Ita docent omnes Doctores, et Magistri Spirituum cum *S. Bernardo*, *S. Antonino*, *S. Francisco Salesio*, et *S. Philippo Nerio*, *S. Theresiâ*, *B. Dionysio Cartusiano*, *B. Umberto*, *V. P. Magistro Avila*, *Magno Gersone*,

---

(a) L. 1. n. 18.

etc. Secundum, quòd major scrupulus, qui debet eum angere, erit inobedientia, propter quam non tantum amittendi animi pacem, devotionem, et in virtutes progressum, sed etiam desipiendi, sanitatem consumendi, et quod deterius est, etiam animæ faciendi jacturam, magno se exponit periculo: possent enim eò devenire scrupuli, ut vel ad tantam eum redigerent desperationem, quâ sibi met mortem inferret; sicuti non paucis accidit, vel ut præcipientem se ad omne vitiorum genus deflecteret. Item Confessarius insinuet Pœnitenti scrupuloso, ut benè ait doctus *Auctor Instructionum Confessariorum tyronum* (a), cum Deo non sunt calamo, ut dici solet, rationes colligendæ: Deus enim boni nostri causâ vult, nos incertos vivere de nostrâ salute. Quâ de re moralem diligentiam adhibendo, ne eum offendamus, in ejus misericordiam nostra cura jactanda est, et nostram non posse facere salutem sinè ejus gratiæ adjutorio confitentes, hæc cum perseverantiâ, fiduciâ, et pace expostulanda nobis erit. *Optimum est*, ajebat S. Franciscus Salesius, *cæco ductu incedere sub divini Providentiâ inter hujus vitæ tenebras, et perplexitates. Expedit quiescere, dum à Patre spirituali intelligit, se benè progredi, quin ejus rei causam perquirat. Numquàm perit obediens*. S. Philippus Neri (b) asserebat, quod qui Confessario obsequebatur, se certum faciebat, Deo non redditurum de suis operibus rationem. Contrà verò, ajebat S. Joannes de Cruce (c), non satisfieri de eo, quod dicit Confessarius, esse superbiam, et in Fidem peccatum.

9. — Deinde curet Confessarius, 1. ut percrebros cum hujusmodi pœnitentes habeat sermones de nimia fiduciâ in Jesu Christo collocandâ, qui pro nobis mortuus est: et in sanctissimâ ejus Matre, quæ maximâ potentiâ à Deo donata est in eos, qui ad se confugiunt: Quare hortetur, ut vivat securus, semper ac Jesu, et Mariæ se committit patrocinio, qui proculdubio exaudiunt se invocantes. 2.

---

(a) P. 1. n. 76. — (b) In vitâ l. 1. cap. 20. — (c) Tract. de spiritus. Coll. 4. §. 1. n. 8.

Prohibeat, quominus libros, quibus scrupuli excitantur, legat, et cum scrupulosis versetur; et illi, qui valde his vexatur, interdicat ne ad conciones terrore plenas adeat, nec conscientiam examinet in iis rebus, ubi scrupulos, sed immeritos apprehendit.

3. Si consistit scrupulus in timore pravis cogitationibus (v. g. contra fidem, puritatem, aut caritatem) assentiendi, Confessarius sit promptus, atque intrepidus ad eos negligendos, et ad sincerè ei affirmandum huiusmodi cogitationes, potius poenas, quam consensus, et peccatum sibi esse. Et in hoc præcipuè Confessarius præ oculis habeat illam regulam, quam DD. (a) tradunt, eum, qui timorata est conscientia, nisi plusquam certus est de peccato mortali, immunem à peccato in eo iudicandum esse; nam tale monstrum (prout aiebat *P. Alvarez*) impossibile est in animam ab eo abhorrentem ingredi, quin apertè dignoscatur. Hæc de re juvat pariter imponere scrupulosis, ut de huiusmodi cogitationibus nihil penitus se accusent, nisi certo sciant, et jurare possint, consensisse. Et hinc adverti debet, quòd cum scrupulosis, non per regulas peculiare, sed generales procedendum erit: per particulares enim scrupulosi numquam erunt ad deliberandum idonei, dubitantes semper, nùm illa regula apta sit pro præsentī casu, qui semper ei videbitur differre à casu, quem à Confessario audivit.

10. — Sit 4. pro illis, qui habent scrupulum circa præteritas confessiones, sive quia putant, non omnes circumstantias explanasse, sive ob defectum doloris. Confessarius cum advertit eos aut Confessionem generalem jam peregissee, aut per aliquod notabile tempus Confessiones præteritas repetiisse, istis imponat, ne ex proposito ad eas animum adjiciant, nec ampliùs verbum faciant de peccatis præteritis, nisi cum jurare possunt, ea certè fuisse mortalia, et certò item de eis, numquam fuisse confessos. Dùm DD. docent (b), scrupulosos, quamvis per inadvertentiam, aliquod grave omiserint peccatum, non teneri (saltem cum certi non sunt) cum tanto in-

---

(a) *Lib. 6. n. 476.* — (b) *Lib. 1. n. 87. v. 2. Quot nihil.*

commodo, et periculo ad integritatem Confessionis, à quâ etiam hoc minus incommodum excusare potest (a). In hoc Confessarius sit fortis, ut sibi obediri faciat; et si pœnitens non obedit, eum objurget, privet Communionem, et quantum potest ejus retundet duritiem. Humaniter cum scrupulosis agendum est, sed cùm in obedientiam delinquant, maximo cum rigore tractandi sunt: si enim hac obedientiæ anchora illi destituuntur, pereunt utique, nam aut in phrenesim labuntur, aut in morum se dant depravationem.

II. — Quinto loco veniunt illi scrupulosi, qui peccare formidant in omni opere; istis imponat, ut libere agant, et ut scrupulos vincant, imò vincere tenentur semper ac non vident illam actionem evidenter esse peccatum. Ita cum P. Segneri docent DD. (b) (P. Segneri, Pœnit. instr. c. ult.). Et nihil refert, quod cum actuali timore operentur (non deposito dubio, quod penè desperandum à scrupulosis); Is enim timor non est verum conscientiæ dictamen, quod alio nomine conscientia formata dicitur, uti benè distinguit Gerson (c); nec est verum dubium practicum, nec tollit judicium antea factum, quod virtualiter perseverat, licet ad illud propter timoris vehementiam tunc non advertatur, nempe, se non peccare in eo, quod non cognoscunt evidenter esse malum; siquidem tunc, non contra conscientiam agunt, sed contra illum inanem timorem (d). Imponat igitur Confessarius hujusmodi Pœnitentibus in virtute obedientiæ, ut parvipendant, et superent scrupulum; liberè operando id, in quo scrupulus eis est impedimento; item eis injungat, ut deinde amplius de illo non confiteantur.

---

(a) Lib. 6. ex n. 486. — (b) Lib. 1. n. 86. — (c) Vide loc. cit. lib. n. 86. — (d) Ib. ver. Hinc duo.

Tract. 1. De Conscientia.

CAPUT II.

De Conscientiâ dubiâ.

*Dubium negativum, et positivum* 12. *Speculativum, et practicum* 13 et 14. *Si lex est dubia* 15. et 16. *Si votum est dubium* 17. *Si superior jubet fieri rem dubiam de peccato* 18. *In dubio quid fieri debeat in jejuniis, aut communione* 19. *De impedimento, et debito dubio* 20.

12. — **C**ONSCIENTIA dubia est, quæ indeliberata manens, pro utrâque parte assensum suspendit. Hic tamen distinguendum est dubium negativum à positivo. *Negativum* est, quando ex neutrâ parte apparent rationes, quibus possit intellectus assentiri alteri parti, et hoc debet in rigore appellari dubium, quod definitur: *Suspensio assensus circa aliquod objectum*. *Positivum* verò est quando pro utrâque parte, aut saltem pro alterâ adest grave motivum assentiendi, licet cum formidine de opposito; proindè dubium positivum idem est, ac opinio probabilis, de quâ in sequenti puncto agemus.

13. — Distinguendum 1. dubium speculativum à practico; *Speculativum* est, quando dubitatur de rei veritate, ut si bellum sit justum necne: si pingere die festo sit opus servile: si valeat Baptismus cum aquâ distillatâ, etc. *Practicum* verò est, quando dubitatur de rei honestate, si v. g. licet in praxi depingere die festo: præliari in bello dubiè justo. Itaque semper distinguendum erit verum à licito. Etenim dubium speculativum respicit verum, practicum verò licitum. Hoc posito, dicimus cum dubio practico non licere operari, quia homo in operando debet esse moraliter certus de rei honestate; aliter, quia se periculo peccandi exponit, peccat, juxta illud Eccl. 3. 21. *Qui amat periculum peribit in illo*. Et illa peccati noxa, cujus dubium habet, reus erit; quare, si dubitat esse furtum, furti peccat; si dubitat esse mortale, mortale committit. Qui autem est certus in tali actione peccatum inesse, sed incertus est, si sit mortale, an veniale; alii



cum de mortali damnant; sed probabilius dicunt *Navarr. Valent. Granado*, et *La-Croix*, tantum peccare venialiter; modo ad graviter peccandi periculum, neque ad actionis expendendæ obligationem non advertat; et dummodò actio illa de se non sit certè peccatum mortale, et illius malitia saltem in confuso non apprehendatur (a).

14. — Contrà verò cum dubio speculativo operari licet, cum operans aliis ductus rationibus practicè judicat esse licitam eam actionem: Nam aliæ sunt rationes, ut judicetur de rei veritate, v. g. quòd bellum sit justum, quòd pingere in festo sit opus servile; aliæ sunt rationes, ut judicetur actio esse lionesta, nimirum licitum esse præliari in bello dubiè justo, pingere in festo, ex alio principio certo (ut est illud: *Melior est conditio possidentis*, aut aliud simile) dubium deponens. Qua de re in dubiis videndum est, cujus sit possessio, Præcepti, an libertatis. Et ut hoc dignoscatur, videndum, pro quo stet præsumptio. Cum pro indubitato habeatur stare præsumptionem pro eâ parte, quæ alteri onus probandi factum transfert; factum enim non præsumitur, nisi probetur, ut habetur *L. 2. de probation. et ex L. In Bello de Captivis*.

15. — Ex quo inferitur primo, quòd, si possidet libertas, debet probari certò adesse præceptum obligans; aliàs præceptum dubium non potest onus certum imponere, et ligare libertatem, quâ certò à Deo homo donatus est, ut quod sibi placuerit faciat, præter ea quæ sibi manifestè prohibita, aut imposita sunt, ut *Ecclesiastici 15. 14.* expressum habemus: *Deus ab initio constituit hominem, et reliquit illum in manu consilii sui. Adjecit mandata, et præcepta sua. Si volueris mandata servare, conservabunt te.* Contrà verò, si lex certè condita, et promulgata est, et dubium oritur, sitne abrogata, aut revocata, aut ubi observatur an sit dispensata, quia tunc lex manet in possessione.

16. — Et idem dicendum, si dubitatur de legis acceptione. Cum enim illa justa sit, præsumi debet,

---

(a) *Lib. 1. n. 14. et 15.*

acceptatam esse, inspecto illo alio principio : *Ordinarie præsumitur factum, quod de jure faciendum erat.* Cui respondet illa alia moralis regula communiter à DD. recepta, quòd cum dubitatur, sit necne positus actus, ille non præsumitur fuisse positus, nisi probetur, ut suprà dictum est; cum autem certè actus positus est, et duntaxat dubitatur de ejus validitate (v. g. illius matrimonii, Confessionis, voti etc.) *semper standum pro valore actus; L. quoties, ff. de rebus dubiis*: uti habetur quòd leges dubiæ actûs validitati favent. Hujus generis est etiam illud axioma : *Nemo præsumitur malus, nisi probetur (a).*

17. — Infertur 2. quòd quicquid de lege dictum est, idem de voto erit dicendum, quod est quædam particularis lex, quam sibi homo imponit. Quapropter, si quis dubitat, et non est certus de voto emisso, non tenetur ad votum, ut cum communi *Cabassutius, Suarez, Rebellio, Prado, Sanchez, Castropal. Anaclet. Salmant.* et alii (b). Idemque dicitur, cum dubitatur, an in voto emisso, aut in lege promulgatâ, comprehendatur nec ne aliqua res; tunc enim pro eâ parte, de quâ dubitatur, votum aut lex non possidet. Idque innuitur ex *Cap. Ex parte 18. de Censibus*; ubi cum aliqui vovissent, et dubitarent an tenerentur ad majus, an verò ad minus, juxta factam promissionem; fuit responsum, teneri tantum ad minus. Contrà, si votum fuisset certum, et dubitatur de satisfactione, debet persolvi, cum possessio tunc sit pro voto. Nihilominus dicunt *Lugo, Roncaglia, Laym. Salmant. Carden. La-Croix*, et alii, quòd, si quis probabiliter judicat, votum persolvisse (sive pœnitentiam Confessionis, aut Officium divinum) non teneri ad aliud, quia Deus contentus est de probabili suæ legis satisfactione (c). Nec obstare, ajunt, quòd voti obligatio sit in possessione; nam respondent, quòd possessio obligationis, posita probabili voti satisfactione,

---

(a) *Lib. 1. num. 77. et 79.* — (b) *Lib. 1. num. 76. v. 2. qui.* — (c) *Dicto num. 76.*

devenit dubia, et ideo vovens in suâ libertate remanet. Sed hæc ratio minimè mihi probatur; casu enim quo dubitatur de emissionem voti, pro certo habeo obligationem non adesse illud implendi, quia tunc possidet libertas; sed casu quo votum est certè emissum, intelligere nequeo, quomodo per probabilem voti satisfactionem vovens solvatur à voti obligatione, quæ adhuc in suâ possessione manet; sicut enim tunc certum est votum, ita pariter certa ejus impletio etiam esse debet. Eo solo casu opinio præfata admitti posset, quo probabilitas illa talis esset, quòd moralem certitudinem satisfactionis voti peractæ fundare valeret. Et idem dicendum de obligatione recitandi Horas Canonicas, et adimplendi poenitentiam sacramentalem. Si autem quis votum emisisset, et deinde immemor voti operam promissam impleret, dicimus tunc non teneri iterum satisfacere, semper ac pro certo judicare potest, quòd factus memor voti pro illo operam impletam applicasset, prout cum sententiâ communi dicitur *Tract. X. num. 120. in fin. vers.* Idem autem etc.

18. — Inferitur 3. quòd cum superior jubet, subditus tenetur obedire, quoties res præcepta non est certè illicita; cum enim dubitatur tantum de rei inhonestate, possidet superioris auctoritas, quam habet præcipiendi, quâ non potest expoliari in dubio. Ità communiter *S. Bonav. S. Anton. Cajet. Silvius, Cabass. Tournely, Azor. Sanch. Palaus, Salmant.* etc. Et probatur ex *Cap. Quid culpatur, dist. 23. q. 1.* ubi *S. Augustinus* dicit subditum rectè obedire Principi militare præcipienti, si bellum non sit certè injustum. Limitationem hanc habet hæc doctrina obediendi præceptis dubiè injustis, quoties periculum gravis damni spiritualis, aut temporalis, secum conjungeret: aut si res præcepta esset etiam probabiliter illicita, et una simul esset valde molestæ, et difficilis, ità *Lessius, Sotus, Tournely, Prado, Sanch. Holzmann. Busemb. Castropal. Salmant.* et alii plures (a).

---

(a) *Lib. 1. num. 24, et fusiùs l. 4. num. 47, v. limitant.*

19. — Infertur 4. quòd dubitans, an jam com-  
pleverit annum, non tenetur ad jejunium; si du-  
bitat verò an pervenerit ad annum 60. in quâ ætate  
probabiliter deobligatur à jejunio Ecclesiastico, ut  
dicemus *Tract. XII. num. 25.* tunc tenetur ad jeju-  
nium, quia possidet jejunandi præceptum. Idem di-  
cendum, si quis dubitat de ætate pro Ordine sacro,  
aut pro beneficio requisitâ, quia tunc possidet præ-  
ceptum Ecclesiæ (a). Pariter si erit feriâ V. et dubi-  
tatur an jam transierit media nox, potest, factâ  
diligentiâ, vesci carnibus (b). Qui autem dubitat,  
an deglutiverit aliquid post mediam noctem, possit  
nec ne communicare? alii negant, sed alii plures,  
ut *Laym. Sa, Busemb. La-Croix, Sporer, etc.* pro-  
babiliter affirmant, dicentes, legem jejunii esse pro-  
hibitivam potius, nempe, ne quis non jejunus com-  
municet, ut colligitur ex Canonibus relatis in  
Opere (c). Propterea semper ac non sit factus casus,  
quo vigeat legis prohibitio, certæ nimirum jejunii  
fractionis, homo est in possessione communicandi.

20. — Infertur 5. quòd superveniente dubio de  
matrimonii impedimento, bonâ fide contracti, post  
factam diligentiam, dubio perseverante, potest con-  
jux tùm reddere, tùm petere debitum conjugale  
(d). Infertur 6. quòd certus de debito, at dubius  
de solutione, tenetur solvere. Contrâ verò dubius  
de debito, si est possessor bonæ fidei, ad nihil  
tenetur, dùm possessio (modo sit legitima) dat  
certum jus retinendi, quod possidet, adversus quod  
non potest prævalere, nisi jus certum proximi.  
Hinc S. August. (*Can. Si Virgo 34. q. 1.*) ait: *Pos-  
sessor rectissimè dicitur, quamdiù se possidere igno-  
rat alienum.* Ita *Castrop. Laym. Lugo, Roncag.  
Carden. Molin. Sanch. Card. Sfondratus, Sporer,* et  
alii plures (e). Secùs autem dicendum, si possessio  
sit infirma, nempe dubia, aut dubiâ fide incepta,  
quia tunc debet fieri restitutio pro ratâ dubii (f).  
Et non secùs faciendum puto (quicquid dicant alii)

---

(a) *Lib. 1. num. 78.* — (b) *num. 78. et 79.* — (c) *Lib. 1. n. 8.  
v. Et quod.* — (d) *n. 8. et fusius l. 6. n. 505.* — (e) *Lib. 1. n. 83.  
et. 84.* — (f) *n. 84. v. Præfectæ, et l. 3. n. 611. et n. 702.*

casu, quo possessor, superveniente dubio, tempore debito, neglexerit diligentiam facere, quia proximum defraudavit, saltem spe, quam habebat, forte ut verus creditor inveniri posset, et pro hujus spei rata tenetur restituere.

## CAPUT III.

### De Conscientiâ Probabili.

*De Conscientiâ probabili 21. In materiâ Fidei 22. Medicinæ 23. Justitiæ 24. Sacramentorum 25. ad 27. In damno alterius 28. Gradus probabilitatis 29. De opinione tenui probabili, et de opinione probabilissimâ 30. De probabili, et probabiliori 31. ad 79.*

21. — CONSCIENTIA probabilis est illa, quæ propter aliquam probabilem opinionem dictat licitam esse aliquam actionem. Opinio probabilis est illa, quæ gravi aliquo innititur fundamento apto ad hominis prudentis assensum inclinandum. Sed in hoc primum omnium oportet scire, non licere operari cum opinione probabili cum periculo de facto damni proximi, cum proximus est in sui juris possessione; cùm distinguendum sit cum *P. Suarez* alium esse casum cùm agitur de simplici jure, nempe utrum possimus licetè aliquid agere; alium esse cùm agitur de facto, et de rei veritate; si enim talis opinio vera non sit, Proximus certè damnum patietur, adeoque tunc opinione probabili uti fas non erit. Ponamus exemplum: Si ego dubito utrum ille sit homo, an fera, non licebit eum ferire, nisi certus factus sum esse feram; licet probabilius, nedum probabiliter existimem feram esse: nam si reverà est homo, eum vulnerando ex meâ opinione licet probabiliori, illius damnum non vito.

22. — Hinc infertur 1. quòd in materiâ Fidei et salutis æternæ non solum est illicitum sequi opinionem minùs probabilem, ut dicebat *Propos. 4.* damnata ab *Innocent. XI.* sed probabiliorē etiam, atque probabilissimam; et teneri ad amplectendam tutam, et consequenter Religionem, quæ tutos ho-

mines efficit, prout est Catholica; nam ceteræ Religiones, cùm falsæ sunt, quamvis istarum aliqua forsân videretur probabilior alicui, ille tamen destitutus Sacramentis, et aliis mediis necessariis ad consequendam salutem æternam, non aufugeret utique suæ beatitudinis jacturam.

23. — Infertur 2. quòd Medicus tenetur adhibere remedia tutiora pro infirmi salute, neque illi fas est uti aliquâ medicinâ, quam nescit, utrum ei profutura, an nocitura sit, ut periculum de illâ faciat. Dubitant tantummodò DD. si infirmi salus jam sit desperata, an Medico liceat ei dubium pharmacum præbere, ex quo potest infirmus convalescere, vel mors ejus accelerari. Alii id negant, sed plures alii, inter quos *Sanchez Valent. Laym. Bonac. Busemb. Filliuc.* etc. id non improbabiler affirmant, dùm etiam ipsa natura videtur dictare, vitæ modico periculo se exponere spe perfectæ valetudinis, prudentis esse viri (a).

24. — Infertur 3. quòd Judex debet judicare secundum probabiliorē sententiā, cùm lege divinâ, et humanâ teneatur unicuique jus suum tribuere pro causæ meritis. Quare jure merito proscripta fuit ab Innoc. XI. hæc 2. *Propositio: Probabiliter existimo, judices posse judicare juxta opiniones etiam minus probabiles.* In quo nihilominus validiori innixi fundamento notant *Cardenas, Filguerra, La-Croix*, et alii, reum qui in legitimâ est rei controversiæ possessione, non posse à judice expoliari, nisi actor eas afferat rationes, quæ nedum sint probabiliores, verum etiam convincentes: dùm, ut dictum est n. 20. legitima rei possessio jus certum confert cui-cumque possidenti (donec non constet de alterius jure) rem retinendi. Idque multis argumentis, atque DD. auctoritatibus, ac etiam perspicuis textibus probat *Carden.* (b)

25. — Infertur 4. quòd in Sacramentorum collatione non potest Minister uti opinione probabili, aut probabiliori de Sacramenti valore, sed tutiores sequendæ sunt, aut moraliter certæ. Propterea fuit

---

(a) *Lib. 1, n. 28.* — (b) *Lib. 4, n. 210. Qu. 2.*

proscripta hæc 1. Propositio ab Innoc. XI. *Non est illicitum in Sacramentis conferendis uti opinione probabili de valore Sacramenti, relictâ tutiore, nisi id vetat lex, conventio, aut periculum gravis damni incurrendi. Hinc sententia probabili tantum utendum non est in collatione Baptismi, Ordinis Sacerdotalis, et Episcopalis.* Sit tamen notandum, quod in duobus dumtaxat casibus licet uti opinione probabili, etiam circa Sacramentorum valorem, videlicet :

26. — Primus casus est, cum versatur in extremâ necessitate; tunc enim licitum est uti quâcumque opinione probabili, etiam tenui, ut dicunt multi DD. (a). Semper tamen tunc adhibenda est conditio, si valet : quia conditio in illarum rerum angustiis removet injuriam à Sacramentis, si forte invalidè conficiatur, et necessitas contrâ justam præbet causam Sacramentum conditionatum ministrandi.

27. — Secundus est casus, cùm præsumitur Ecclesia aliundè supplere, ut sacramentum validum reddatur; prout accidit cùm contrahitur Matrimonium probabiliter validum, quia tunc præsumitur Ecclesiam impedimentum, si unquam foret, abstulisse, ut redderet Matrimonium certè validum; juxtâ communem DD. cum *Suar. Less. Coninch. Cardenas, Sporer*, et aliis cum *Lugo*, qui testatur hanc esse totius Ecclesiæ praxim (b). Idem sit in Sacramento pœnitentiæ, cùm agitur de Confessarii jurisdictione, etenim cùm adest opinio verè probabilis de jurisdictione, Ecclesia etiam supplet eam conferendo, si fortè Confessarius eâ caret, et hoc ex universali Confessariorum consuetudine absolvendi cum probabili jurisdictione, et communiter testantur *Suarez, Lugo, Card. Sanch. Bonac. Less. Coninch. Maldero, Castrop. Salmant. La-Croix* etc. Hanc tamen sententiam non admitto, nisi adsit gravis necessitas, aut saltem magna utilitas, ut benè limitant *Wigandt, Holzmann. Marchant, Sporer, Elbel*, etc. cum ipso *Suarez*, aliàs non debet præsumi Ecclesia Sacerdotum libertati favere velle.

---

(a) *Lib. 6. n. 103. et 481. in fin.* — (b) *Lib. 1. n. 30. v. not. 2. et l. 6. n. 901.*

28. — Itaque, ut dictum est n. 21. non licet uti opinione probabili cum alterius damno. Hoc tamen (ut suprâ annuimus) valet, cùm Proximus certè possidet suum jus; si secùs esset, opinio poterit esse practicè probabilis *de jure*, sive probabilis proxima, ut dicunt DD. v. g. opinio asserens, quòd quoties aliquis alicubi est jam infamiâ notatus, nulla ei gravis injuria infertur, si quis ejus crimen licèt occultum alibi promulgaret. Vide alia hujus generis exempla in opere (a). Ratio, quia in omnibus istis casibus proximus consideratur non habere jus certum, aut saltem certam possessionem illius.

29. — Quod hìc dictum est locum habet cùm agitur de puro facto; secùs autem erit cùm agitur de mero jure, et de solâ rei honestate, tunc non enim licèt operari cum opinione probabili. Sed hìc videndum, quænam, et qualis esse oporteat opinio, ut censeatur probabilis, et licèt eâ uti possimus. Igitur distinguenda sunt opinio tenuiter Probabilis, Probabilis, Probabilior, Probabilissima et moraliter certa. Opinio *tenuiter Probabilis* est quæ innititur momento, quod non valet ad se viri prudentis assensum pertrahere. *Probabilis* est, quæ innititur fundamento gravi, tàm intrinseco rationis quàm extrinseco, nempè auctoritatis DD., ità ut capax sit flectere assensum viri prudentis, licèt cum formidine de opposito. *Probabilior* est quæ innititur fundamento graviori, sed etiam cum prudenti formidine de opposito, dùm opinio contraria potest aliquandò esse vera, quamvis minùs verisimilis appareat. *Probabilissima* innititur fundamento adeò gravi, sive gravissimo, ut opinio opposita non appareat graviter probabilis; Sed quoniam probabilissima non excedit fines probabilitatis, licèt principem locum teneat inter probabiles, ideò non excludit omnem prudentem formidinem, quòd veritas etiam pro opposita possit stare. Opinio denique, vel, ut meliùs dicam, *Sententia moraliter certa* ità excludit omnem prudentem formidinem, ut opposita censeatur omninò improbabilis.

---

(a) Lib. 1. a. n. 36. ad n. 43.



30. — His positis dicemus 1. cum opinione tenuiter probabili non licere operari, ut compertum est ex Propos. 3. ex proscriptis ab Innocentio XI., quæ sic dicebat : *Generatim dùm probabilitate sive intrinsecâ sive extrinsecâ quantumvis tenui, modò à probabilitatis finibus non exeat, confisi aliquid agimus, semper prudenter agimus.* Et ratio est, quia tenuis probabilitas non potest dici vera probabilitas, sicuti tenuis fortitudo, et tenuis peritia, non possunt dici vera fortitudo, et vera peritia, sed potiùs dicendæ sunt debilitas, et imperitia. Dicimus 2. pro indubitato licere operari cum opinione probabilissimâ, ut habetur ex propos. 3. ex proscriptis ab Alexandro VIII. quæ dicebat : *Non licet sequi vel inter probabiles probabilissimam.*

31. — Utrùm autem liceat cum opinione probabili operari, tres adsunt sententiæ; prima quarum est, ut possit quis licitè sequi opinionem etiã minùs probabilem pro libertate, licèt opinio pro lege sit certè probabilior. Hanc sententiam elapsi seculi Auctores quasi communiter tenuère; sed nos dicimus eam esse laxam, et licitè amplecti non posse. Ratio est, quia quandò opinio pro lege est certè probabilior, tunc lex non est ampliùs dubio stricto dubia, uti accidit (quemadmodum postea explicamus) cùm opiniones tam pro lege, quàm pro libertate sunt æquè probabiles; sed est moraliter certa, quum habeat pro se fundamentum certum quòd vera sit; ubi è contrario opinio minùs probabilis, quæ favet libertati tale habet fundamentum ut vera non sit, ut remaneat tenuiter, sive saltem dubiè probabilis præ opinione tutiore; ideòque non est prudentia, sed imprudentia eam velle sequi. Quum enim intellectui certè appareat, quòd veritas stet magis pro lege quàm pro libertate, tunc voluntas nequit prudenter et sine culpâ partem minùs tutam sequi; tunc enim non operaretur ex proprio iudicio seu propriâ credulitate, seu quodam ex conatu quem suâ voluntate faciet intellectui, removendo illum ab eâ parte, quæ ei verior videtur, eumque deflectendo ad illam partem, quæ non solum videtur ei non vera, sed ne demonstrat quidem certum habere fundamentum

quòd possit esse vera. Est et alia ratio, quòd nos observare debemus præceptum illud, quòd sufficienter fuisse nobis propositum possimus judicare, et prudenter credendum est sufficienter fuisse propositum, quum præ legis existentia argumenta adsint graviora: ad rem facit quod dicit Apostolus: *Omne autem quod non est ex fide, peccatum est. Rom. 14. 23.* ex quo deducitur, quòd nos ut rectè operemur debemus esse de actionis honestate moraliter certi. Hinc falsum illud Probabilistarum principium, *Qui probabiliter agit prudenter agit*, penitus reprobamus: ut enim benè operemur, sola non sufficit probabilitas, sed certitudo moralis requiritur, quòd actio nostra honesta sit.

32. — Secunda sententia, quam hodiè nunc quidam moderni tenent Scriptores, vult, ut tunc aliquam quandam opinionem, quæ libertati favet, sequi possimus, quum ipsa sit moraliter certa. Sententiam hanc existimamus nimis rigidam, et quæ illaqueat Conscientias, tale illis onus imponendo, ut nullas alias opiniones sequi possint, nisi quæ moraliter certæ sint, et in hoc opusculo demonstrabimus usum opinionum æquè probabilium procul dubio licere. Lectorem meum rogo, ne propositionem hanc meam contemnat priusquam legat totum id, quod pro hac sententiâ afferam in medium. Contemnere quod quilibet Auctor dicit, quin quod dicit intelligatur, non est neque charitas neque prudentia. Legatur; et postea contemnatur.

33. — Tertia igitur, quæ nostra est sententia, dicit, quòd quum opinio, quæ libertati favet, est æquè probabilis, atque opinio illa quæ legi favet, sinè dubio, et licitè sequi potest, excipe in materiâ Fidei, in quâ tutiorem sequi debemus, uti habetur ex Propositione 4. proscriptâ ab Innocentio XI., uti quoque in materiâ valoris Sacramentorum, uti habetur ex Propositione 1. ab eodem Innocentio proscriptâ: Idem locum habet in materiâ Medicinæ, in quâ Medicus tutiora remedia adhibere tenetur (prout communiter docent DD.). Ità pariter non possumus uti opinione probabili cum periculo non rituali aut temporali damni proximi semper ac

( intelligitur ) proximus est in certâ sui juris possessione. Ratio quia inter duas opiniones æquè probabiles non tenemur sequi tutam , quia lex dubia nequit , certam inducere obligationem , quippè quia lex dubia non est sufficienter promulgata , ita ut possit ad suam observantiam nos obligare , quemadmodum demonstrabimus sexcentis auctoritatibus D. Thomæ omniumque Theologorum. Auctores illi qui tenent non licere sequi ne opinionem quidem probabilissimam vocantur Tutoristæ *Rigidi* ; Auctores autem Probabilioristæ moderni , qui existimant licitum usum probabilissimæ favore libertatis , et non requirunt quod opinio pro libertate omninò certa esse debeat , uti volunt Rigidi Tutoristæ , ita ut opinio contraria pro legi sit penitus improbabilis , vocantur quoque Tutoristæ , sed Tutoristæ mites ; dicunt enim quod , ut quis licite opinione minùs tutâ uti possit , moraliter certa esse debeat , sed largè , ita ut contraria magis tuta probabilis non sit. Ego tamen §. II. num. 36. evidenter demonstrabo Sententiam hanc , quæ probabilissimam tantum pro libertate permittit , difficulter à prædictis Auctoribus in praxi adhiberi posse , quin in rigorismum labantur. Ardua isthæc videtur assertio , et forsân aliquis credit , ne ad extremum usque vellem rem protrahere , ut vanam eorum sententiam reddam ; Lectorem tamen meum rogo , ut totum hoc Opusculum legat , quia agnoscet quod loquendo secundum horum Mitium Tutoristarum effata , negari haud poterit quod dicam.

34. — P. Eusebius Amort , vir undequaquàm perspectus pro variis et doctis Operibus quæ his temporibus in lucem edidit , in suâ Theologiâ Morali et Scholasticâ typis commissâ anno 1733. Bononiæ , postquam eam emendare fecerat Auctor Romæ à Benedictio XIV. , quemadmodum eum rogaverat , uti in ejus præfatione legitur , scribit , quod si opinio quæ legi favet , notabiliter probabilior non apparet ( advertendum . quod cum opinio est , non dubiè , sed certè probabilior . tunc quoque est notabiliter probabilior ) , moraliter certum est , quod hujusmodi lex non obligat , dicens , quod Deus juxtâ suam Divinam Providentiam , quando vult , ut , aliqua sua lex

obliget, tenetur eam notabiliter reddere probabilior-  
rem: *Quandocumque existentia legis non redditur  
credibilior, non ipsâ, moraliter certum est non dari  
legem; quia ex naturâ Providentiæ Divinæ Deus,*  
*sicut tenetur suam Religionem reddere evidenter cre-*  
*dibiliorem, non ipsâ ita etiam tenetur suam legem*  
*reddere notabiliter credibiliorem, non ipsâ, Theolog.*  
*tom. 1. disp. 2. §. 4. qu. 20. pag. 232. Illud, non ipsâ,*  
*intelligitur, quod Deus, ut nos obliget ad legis ob-*  
*servantiam, debet facere nobis cognoscere legem*  
*illam probabiliorē non ex eâ ipsâ, sed ex aliis*  
*argumentis. Unde idem Auctor Disp. 2. §. 4. q. 5. p.*  
*383. scribit, quod quando adsunt duæ opiniones*  
*æquē probabiles, si in hoc casu non datur lex directē*  
*prohibens, quia in hoc casu non datur sufficiens pro-*  
*mulgatio legis, quæ est character inseparabilis, et*  
*essentialis legis; siquidem sola legis promulgatio est*  
*illa, quâ lex fit credibilior, non ipsâ. Promulgatio*  
*itaquē illa est, quæ reddit legem credibiliorem. Et*  
*subdit in hunc modum sensisse Patres, qui in dubio*  
*stricto, an adsit vel ne lex, hominem ad sequendam*  
*opinionem magis tutam non obligavere.*

35. — Et reverà S. Gregorius Nazianzenus (orat.  
39.) loquendo de quodam Novatiano dicit: *An juve-*  
*nibus viduis propter ætatis lubricum ineundi ma-*  
*trimonium potestatem facis? At Paulus hoc facere*  
*minimè dubitavit, cujus scilicet te magistrum profi-*  
*teris. At minimè post baptismum, inquis. Quo argu-*  
*mento id confirmas? Aut rem ita se habere proba,*  
*aut si id nequis, te condemna. Quod si res dubia est*  
*(nota), vincat humanitas tua. Scribit amplius S. Leo*  
*(ep. 9. ad Rustic. Narbon. in præfat. 12. c. Sicut quæ-*  
*dam, fin. dist. 14.) : Sicut quædam sunt, quæ nulla*  
*possunt ratione convelli, ita multa sunt, quæ aut pro*  
*consideratione temporum, aut pro consideratione æta-*  
*tum oporteat temperari: illâ consideratione semper*  
*servatâ, ut in iis, quæ vel dubia fuerint, aut obscura,*  
*id noverimus sequendum, quod nec præceptis Evan-*  
*gelicis contrarium, nec Decretis SS. Patrum inveniat*  
*adversum. Dicit sequendum, quia Superiores debent*  
*rigorem temperare, et non obligare subditos ad ri-*  
*gidiores opiniones sequendas, quando opiniones be-*

nignæ non sunt contrariæ Præceptis Evangelii, aut Decretis SS. Patrum. Ad rem quoque facit quod dicit D. Augustinus : *Quod enim neque contrà Fidem, neque contrà bonos mores esse convincitur, indifferenter esse habendum.* Dicit convincitur, quapropter non est prohibenda quæcumque actio, nisi certi simus, quòd illa sit contrà fidem aut contrà bonos mores. Non aliter scripsit D. Bernardus : *Sanè ibi unusquisque in suo sensu securus abundat, ubi aut certæ rationi, aut non contemnendæ auctoritati quod sentitur, non obviat.* Epist. ad Ugon. S. Victorin. cap. 5. n. 18. vol. 1. Oper. Ex Edit Maurin. Paris. col. 634.

36. — Joannes Jerson scripsit, *necesse est dari manifestationem ordinationis, et voluntatis Dei; nam per solam ordinationem, aut per solam suam voluntatem non potest Deus absolute creaturæ imponere obligationem Deo.* Vit. Spir. lect. 2. col. 176. Idem scripsit Joseph Rocasull Præpositus Valentix : *Casu quo, factâ diligentia, non constat, an lex sit imposita, sed res dubia manet, non obligat, sive sit lex, vel præceptum naturale.* Lib. 1. de leg. in comm. c. 4. n. 65. Idem scripsit Melchior Canus contrà Scholasticum obligantem Peccatores ad contritionis actum singulis diebus Festis : *Jus humanum nullum est, aut Evangelicum, quo hoc præceptum afferatur; proferant, et tacebimus.* Relect. 4. de Pœnit. p. 4. q. 2. prop. 3. Et num. 5. subjungit : *Quoniam ignoro, undè ad hanc opinionem Doctores illi venerint, liberè possum, quod non satis exploratè præceptum est, negare.* Canus itaque sentiebat nos non teneri ad illa, quæ non satis exploratè præcepta sunt. Hinc scripsit Dominicus Sotus : *Quandò sunt opiniones probabiles inter graves Doctores, utramque sequaris, in tuto habes conscientiam.* De Just. et Jure lib. 6. quæst. 1. art. 6. circa fin. Amplius D. Antoninus apertè scribit quòd inter duas æquè probabiles opiniones, licitè possumus sequi benigniorem : *Secundùm Cancellarium non plùs nocet homini errare in articulo Fidei, qui non est declaratus ab Ecclesiâ, quòd sit articulus de necessitate credendus; quàm nec esse posset actus moralis contra aliquid agibile perpetratus, qui actus non dicitur certus ex Scripturâ, aut determinatione Ecclesiæ, quòd sit illicitus. Sed*

constat quod in materiâ Fidei licitum est antè determinationem Ecclesiæ, tenere unam vel alteram partem sinè periculo peccati, etc. Ergò à simili licet unam opinionem in moralibus tenere juxtâ limitata superiùs, ubi saltem magis Sapiens non sentit contrarium (Idem sentit Du-Hamel Auctor modernus) Theol. lib. 2. de Act. human. cap. 3. in fin. scribens : Hoc argumentum ( scilicet de usu opinionis probabilis ) magnâ prudentiâ temperatum nuper tractavit P. Gisbertus, primò enim postulat, ut opinio ex utrâque parte veram habeat probabilitatem, non fucatam : secundò ne altera penè certa, aut multò sit probabilior cum mitiore comparata ; tunc enim mentem multò probabiliori rationi cedere necesse est. Et idem dicunt innumerabiles alii docti Auctores, prout Episcopus Abelly, Episc. Tapia, Episc. Alvarez, Episc. Ledesma, Episc. Angles, Episc. Zerola, Episc. Maldero, Episc. Tudesco, Archiepiscopus Panormi, Episc. Medina, et Antistes Barbosa. Ampliss. Cardinalis Sfrondati, Card. Toledo, Card. De Lugo. Præterea Christianus Lupus, et plures Doctores citati in meo Opere de usu moderato Opinionis probabilis insimul tùm locis, uti potest videri in dicto opere pag. 263.

37. — Præfata igitur nostræ sententiæ ratio non est quædam simplex ratio, sed certum quoddam principium, quod receperunt, et docuerunt Theologi omnes, et præcipuè D. Thomas ( uti videbimus ), scilicet quòd lex dubia vim obligandi non habet quia non sufficienter promulgata. Tunc enim promulgatum erit tantummodò dubium sive quæstio, non vero lex ; quæ, ut sit sufficienter promulgata, opus est, ut sit proposita et manifestata ut certa, quemadmodum superiùs diximus, et quemadmodum dicit S. Thomas cum omnibus Theologis, prout videbimus.

38. — Evidentes tandem afferamus probationes, quas à D. Thomæ Doctrinâ depromamus. Docet D. Thomas, quòd *lex quædam est regula, et mensura actuum, secundum quam inducitur aliquis ad agendum, vel ab agendo retrahitur. Dicitur enim lex à ligando, quia obligat ad agendum.* 1. 2. qu. 90. art. 1. Docet indè S. Doctor Regulam hanc sive legis mensuram, ut eam observare teneamur, debere nobis

promulgatione manifestari : ideòque eàdem ipsà qu. 90. art. 4. proponit dubium : *Utrum promulgatio sit de ratione legis ?* et respondet : *Lex imponitur aliis per modum regulæ et mensuræ : regula autem et mensura imponitur per hoc, quod applicatur his, quæ regulantur et mensurantur. Undè ad hoc quòd lex virtutem obligandi obtineat, quod est proprium legis, oportet, quòd applicetur hominibus, qui secundum eam regulari debent. Talis autem applicatio fit per hoc quòd in notitiã eorum deducitur ex ipsa promulgatione. Undè promulgatio ipsa necessaria est ad hoc, quòd lex habeat suam virtutem.* Lex itaque antequàm promulgatione manifestetur, vim obligandi non habet. Hinc à D. Thoma definitur : *Quædam rationis ordinatio ad bonum commune promulgata.* 1. 2. qu. 90. art. 4. Ergò promulgatio est aded legi essentialis, ut virtutem obligandi habeat, ut ipsà deficiente, lex non erit obligans, quemadmodum scribit doctus P. Petrus Collet continuator Tournely, et rationem affert : *Lex enim, ut obliget, debet dari, ut regula, ac proindè innotescere : atqui lex non innotescit nisi per promulgationem, cùm per eam solam eo intimescitur modo, qui obediendi necessitatem inducit, etc.* Et consequenter dicit, legem in Legislatoris mente existentem virtutem obligandi habere tantum in actu primo, scilicet pro tempore quo fuerit promulgata, sed ut actu obliget, opus est, ut applicetur et manifestetur subditis (*debet innotescere*) ut ipsi possint se illà regulare.

39. — Promulgatio isthæc necessaria est tam in humanis, quàm in naturalibus et Divinis Legibus, quemadmodum docet idem Sanctus Doctor, qui eodẽ art. ad 1. sibi objicit : *Sed lex naturalis non indiget promulgatione : ergò non est de ratione legis quòd promulgetur :* et respondet : *Dicendum quòd promulgatio legis naturalis est ex hoc ipso, quòd Deus eam mentibus hominum inseruit naturaliter cognoscendam.* Dicit igitur naturalis legis promulgationem non fieri humano modo, signis externis v. g. per edicta, aut per præconis vocem ; sed naturali lumine, quod Deus hominum mentibus inserit. Quod clarius explicat Sylvius scribens, quod *Actualiter tunc* (lex naturalis)

unicuique promulgatur, quando cognitionem à Deo accipit dictantem, quid juxta rectam rationem sit amplectendum, quid fugiendum, in 1. 2. q. 9. art. 4. in fin. Idem scribit Cardinalis Gotti (*Theolog. tom. 2. tract. 5. de leg. q. 1. dub. 3. §. 3. n. 18.*) et n. 21. ibidem scribit: ad hoc ut lex in actu secundo obliget, requiritur quidem indispensabiliter, ut subditis promulgatione proponatur. Immediatè subdens, quòd sicut mensura in actu secundo non mensurat, nisi mensurabili applicetur: quemadmodum mensura nequit actu mensurare, nisi rei quæ mensuranda est applicetur, ità lex non potest esse mensura, et regula hominis, nisi ei promulgatione proponatur. Idem scribit Dominicus Sotus: *Nulla lex ullum habet vigorem legis antè promulgationem, sed tùm instituuntur, cum promulgantur*: et asserit: itaque nullam exceptionem conclusio hæc permittit. Quod confirmat P. Gonet in Clyp. Theol. tom. 2. disp. 1. art. 3. n. 47. ubi probare volens dari posse ignorantiam invincibilem Præceptorum naturalium, quæ à primis principiis mediatè deducuntur, hoc facit argumentum. *Lex enim vim obligandi non habet, nisi applicetur hominibus per promulgationem, sed lex naturalis promulgatur omnibus hominibus quantum ad omnia præcepta, quæ sunt remotissima à primis principiis: ergò non obligat omnes quantum ad illa præcepta. Subindèque potest dari de illis ignorantia invincibilis, et excusans à peccato.*

40. — Esto igitur, quòd quando duæ æquè probabiles adsunt opiniones, lex est dubia, et uti dubia nequit obligare, quia tunc lex sufficienter promulgata non est, sed promulgatum tantum sufficienter est dubium, sive quæstio, an vel ne lex adsit, ecce principium certum non directum, sed reflexum, in quo sententiæ nostræ Fautores collocant certitudinem moralem, præ quâ licitè opinionem æquè probabilem sequi possumus.

41. — Quòd autem certâ securitate agitur, quum judicium certo licèt reflexo principio adhæreat, constat ex Canonibus, et ex communi Theologorum consensu. In Cap. Dominus 2. de Secund. Nupt. dicitur, quòd si secundus vir dubitet de morte



morte primi viri suæ uxoris conjugale debitum petere non potest, sed requisitus tenetur illum reddere uxori bonâ fide petenti : *Debitum non denegat postulanti ; quod à se tamen noverit nullatenus exigendum*, verba sunt textûs. Quâ tamen ratione potest vir conjugalem actum adhibere de primi viri morte dubitans, et consequenter an illa sit vel ne sua uxor? Potest, respondetur, ob principium certum reflexum, quia quum et uxor sit in bonâ fide de secundi matrimonii valore, ipsa possidet, et jus certum petendi debitum habet, cujus juris privari non potest præ viri dubio. Probatur prætereà ex *Can. 4. quid culpatur caus. 23. qu. 1.* ubi D. Augustinus ita docet : *Vir justus, si fortè sub Rege homine etiam sacrilego militet, rectè potest illo jubente bellare, si vice (aliàs Civicæ) pacis ordinem servans, quod sibi jubetur, vel non esse contrà Dei præceptum certum est, vel utrum sit, certum non est ; ita ut fortasse reum faciat Regem iniquitas imperandi, innocentem autem militem ostendat ordo serviendi.* In dubio igitur an Bellum justum sit, licitè subditus Principe jubente bellare potest, et quomodò? judicio innixo principio certo reflexo, quòd in dubio Princeps jus, ut sibi pareatur, habet : ideòque subditus, quotiescumque certus non est quòd bellum sit injustum, obedire debet : *vel utrum sit (contrà Dei præceptum) certum non est*, verba sunt textûs.

42. — De hoc non dubitant ne ipsi quidem nostri Adversarii. P. Joannes Laurentius Berti asserit non licere sequi opinionem æque probabilem minùs tutam. Videamus tamen quomodò id probet. Probat duo principia Probabilistarum, quæ et ego pro falsis habui, confutando. Dicunt Probabilistæ quidem quòd ob duo principia potest quis licitè probabilem opinionem minùs tutam sequi, et quod ob illa judicium speculativum dubium redditur in praxi certum. Primum eorum principium hoc est : *Qui probabiliter agit, prudenter agit.* Hoc tamen principium, dicit P. Berti, et nos quoque dicimus, non potest probabilis opinionis usum licitum reddere, quia quum opinio contraria tutior sit æquè probabilis, tunc nos in dubio remanemus, et moralem honestatis certi-

Tom. I.

B

tudinem necessariam ad benè operandum non habemus : Undè operans tunc haud operatur prudenter , sed imprudentissimè , quum principio nihil certo utatur. Secundum principium est , quòd quum opiniones sunt ambæ probabiles , tunc homo potest iudicium cohibere ab opinione revidiore , et uti opinione benigniore , illius probabilitati inhærens. Hoc tamen , quemadmodum sapienter dicit Berti , ne nos quidem certos moraliter reddere potest de actionis honestate ; talis enim voluntaria cohibito iudicii cum ignorantia invincibili imò affectatâ convincitur , quia homo practicè dubium non deponeret , sed affectatè in eodemmet dubio de actionis honestate remaneret. Rectè igitur concludit Berti , quòd quotiescumque nullum alium de probabilitate opinionis minùs tutæ suppetit fundamentum , illâ uti non possumus ; et ego dico , horum duorum principiorum falsitas à Probabilistis adoptatorum , plures Modernos scriptores induxit , ut sententiam nostram reproarent , et plurimos acquirerent sequaces , penitùs non animadvertendo , quòd nos præfata falsa principia refellimus , atque indubitato principio , quòd lex dubia obligare non potest , utimur. Secùs esset , uti subjungit Berti , quum præter opinionis probabilitatem aliquod certum adesset reflexum principium , quod in praxi nos de actionis honestate certos redderet ; quia tunc iudicium nostrum præ principii reflexi certitudine , cui inniteretur , redderetur certum. Adducit exemplum Religiosi , qui in dubio an vel ne possit jejunium frangere ut studio vacet , licitè potest illud frangere præcepto Superioris , quo certus redditur posse vesci cibis sine peccato. Adducit et exemplum possessoris , qui in dubio an justè fundum aliquem possideat , licitè potest in illius possessione perseverare , quandò vir doctus ei præstabit , quod aliquam rationem illum possidendi habet ; possessor enim ( juxta D. Augustini auctoritatem , quam idem Berti refert ) non tenetur expoliare se re legitimè possessâ , nisi illam suam non esse certò sciat ; hoc enim jus dat legitima possessio. Hinc P. Berti generaliter concludit his verbis : *Procul dubio potest hoc pacto ex reflexione mentis antea perplexæ fieri iudicium practicum moraliter*

*certum*. Non dubitat itaque Berti quòd in praxi rectè efformari potest ultimum dictamen moraliter certum in opinionibus dubiis non solum præ principiis directis, sed etiam præ indirectis et reflexis. Quod certam reddit sententiam nostram, quæ principio evidenter certò innititur, uti probavimus, et uti magis magisque demonstrabimus, legem nempe dubiam, quia non sufficienter promulgata, obligationem certam inducere non posse.

43.— Idem effatum quod tenuit Berti, sequuntur Domini Ballerini in libro inscripto *Moral. Action. Regulæ etc. seu quæstio de opinion. prob.* qui quamvis moderatæ sint rigidæ sententiæ Sectatores, laudatam tamen Doctrinam confirmant dicentes: *Quod in praxi ex directis principiis minimè certis incertum est, ex certo reflexo principio fit omnino certum; et probant peculiariter exemplo quod nos adduximus n. 41. in Cap. Dominus, uxoris bonâ fide debitum petentis; et sequentia verba subnectunt: In his omnibus exemplis observandum est, refl. x. a principia particularem quæstionem non solve, sed incertam relinquere, sola praxis certa est, eo quòd principia reflexa praxis in eo dubio dirigendæ certam regulam figant.* Et idem scribit P. Gonet pro certo; *Manual. to. 3. Tract. 3. c. 16. circa fin.*

44.— Videamus tandem quid aliud docet D. Thomas qui nostræ sententiæ fidem accrescit. Ipse in *Opuscul. de veritate q. 17. art. 3.* docet, quòd *nul- lus ligatur per præceptum, nisi mediante scientiâ illius præcepti.* Scitur quòd scientia importat certam alicujus rei cognitionem. Et ut intelligatur quòd D. Thomas nomine scientiæ certam intelligit cognitionem, animadvertere oportet quæsitum quod eodem in loco proponit: *Utrum Conscientia liget?* et hoc modo ratiocinatur: *Ità se habet imperium Gubernantis ad ligandum in rebus voluntariis illo modo ligationis, qui voluntati accidere potest, sicut se habet actio corporalis ad ligandum res corporales. Actio autem corporalis agentis nunquàm inducit necessitatem in rem aliam, nisi per contemptum coactionis ipsius ad rem in quâ agit. Undè nec ex imperio alicujus domini ligatur aliquis, nisi imperium attingat*

*ipsum, cui imperatur. Attingit autem ipsum per scientiam. Unde nullus ligatur per præceptum aliquod, nisi mediante scientiâ illius præcepti: sicut antea in corporalibus agens corporale non agit nisi per contactum; ita in spiritualibus, nisi per scientiam. Similitudo hæc D. Thomæ non potest esse neque clarior, neque convincentior, ut principium nostrum, quod lex incerta certam nequit inducere obligationem, comprobetur. Dicit Sanctus, quod scientia præcepti est ad instar cujusdam funis, quæ voluntatem ligat; et quemadmodum ut res materialis ligetur, oportet ut actu ei applicetur funis, quæ eam liget, et cogat, ita ut voluntas hominis ligetur ut illam faciat actionem, aut ab eâ actione absterneat, oportet, ut præcepti scientiam habeat, aliàs homo liber remanet. Itaque quandò homo remanet in dubio utrùm adsit vel ne præceptum, uti evenit, quum adsunt duo opiniones æquè probabiles, tunc utique non habet scientiam præcepti; ideòque illam, quam mavult, opinionem sequi potest.*

45. — Idem alibi declarat D. Thomas, scilicet 1. 2. q. 19. ar. 10. ubi quærit: *Utrum necessarium sit voluntatem humanam conformari voluntati divinæ in volito, ad hoc ut sit bona?* Indè eodem articulo 10. ad 1. sibi objicit: *Videtur quòd voluntas hominis non debeat semper conformari divinæ voluntati in volito; non enim possumus velle quod ignoramus... Sed quid velit Deus ignoramus in pluribus: ergò non potest humana voluntas divinæ voluntati conformari in volito.* Et respondet: *Ad primum dicendum, quòd volitum Divinum secundum rationem communem, quale sit, scire possumus; scimus enim quod Deus quidquid vult, vult ob rationem boni. Et ideò quicumque vult aliquid sub quacumque ratione boni, habet voluntatem conformem voluntati divinæ quantum ad rationem voliti.* Itaque homo quotiescumque vult aliquid sub aliquâ ratione boni conformat se Divinæ voluntati. Subdit postea D. Thomas id quod pro nobis maximè facit: *Sed in particulari nescimus quid Deus velit; et in quantum ad hoc non tenemur conformare voluntatem Divinæ voluntati.* Ergò non tenemur conformare nos voluntati Divinæ in parti-

culari , et peculiariter quoad præcepta , quotiescumque isthæc divina voluntas nobis non innotescit , quemadmodum distinctiùs declaratur à P. Gonet in hæc verba : *Homo non tenetur conformari voluntati divinæ in voluto materiali , nisi quandò voluntas divina nobis præcepto , vel prohibitione manifestatur.* Gonet Cap. t. 3. D. 6. art. 2. nu. 37. in fin. In dubio itaque alicujus præcepti , quo Deus nobis præcipiat , aut prohibeat aliquam actionem in particulari , non tenemur Divinæ voluntati conformari , nisi postquam voluntas Divina nobis sit manifestata , aliàs , ut dicit Gerson , quandò Deus nobis suam non manifestat voluntatem , non potest nos obligare. *Necesse est dari manifestationem ordinationis , ac voluntatis Dei , nam per solam suam voluntatem nondum potest Deus absolute creaturæ imponere obligationem.* Gerson de Vit. Spir. etc. Lect. 3.

46. — Idem docet D. Thomas 2. 2. q. 104. art. 4. ubi quærit : *Utrum in omnibus Deo sit obediendum ?* Respondet affirmativè , sed ad 3. sibi objicit : *Quicumque obedit Deo , uniformat voluntatem suam voluntati Divinæ etiam in voluto ; sed non quantum ad omnia tenemur conformare voluntatem nostram voluntati Divinæ ut suprâ habitum est ( 1. 2. q. 19. art. 10. qui locus ille est quem adduximus superiùs ) ergò non in omnibus tenetur homo Deo obedire.* Et respondet : *Ad tertium dicendum , quod etsi non semper teneatur homo velle quod Deus vult ; semper tamen tenetur velle quod Deus vult eum velle , et homini præcipuè innotescit per præcepta divina.* Homo itaque tenetur obedire Deo , et conformare se Divinæ voluntati circà præcepta , non in omnibus quæ Deus vult , sed tantum in illis , quæ Deus vult nos velle. Quo tamen pacto sciemus quòd Deus non solum vult , verum etiam vult nos velle ? *Sciemus ;* inquit D. Thomas , *quando nobis innotescit per præcepta divina.* Non satis est igitur dubia præcepti notitia , ut obliget nos ad observandum illud tanquam voluntatem Dei , sed necessaria est cognitio certa et manifesta , quod procul dubio significat verbum illud *innotescit.*

47. — Hinc perspicitur quòd S. Thomas semper

B 3

fuit uniformis docendo legem debere esse certam, ut ad suam nos obliget observantiam. Dixit promulgationem legis naturalis tunc fieri, quandò *Deus eam mentibus hominum inseruit naturaliter cognoscendam*. S. Thom. 1. 2. qu. 90. art. 4. ad 1. dixit *cognoscendam*; ergò homo tunc tenetur legi obedire, cum eam lumine cognoscit naturali, non verò cum de illà dubitat. Prætereà dixit, hanc legis cognitionem (quam vocavit *Mensuram*, quia cum illà debet homo suas actiones mensurare) debere esse certissimam, ut hominem ad legis obliget observantiam: *Mensura debet esse certissima*. 1. 2. q. 19. ar. 4. ad 3. Dixit amplius quod quemadmodum fynis non ligat nisi contactu applicetur, ità *nullus ligatur per præcepta nisi mediante scientià illius præcepti*. Opusc. de Verit. qu. 17. art. 3. Dixit Hominem tunc tantum teneri obedire voluntati Divinæ, cum hæc divina voluntas ei per præcepta manifestatur: *Et homini (quod Deus vult) præcipue innotescit per præcepta divina*; 1. 2. qu. 19. a. 10. Significationes istæ itaque D. Thomæ, scilicet quòd lex ut obliget debet esse *cognita*, quòd *nullus ligatur per præceptum nisi mediante scientià illius præcepti*; quòd lex debet esse *certissima* ut obliget; quòd non tenemur conformare nos voluntati Divinæ, nisi quandò illa nobis per præcepta *innotescit*; nil aliud denotare possunt, quàm quòd lex non obligat nisi quandò *cognoscitur*, nisi quandò est *certissima*, nisi quandò habetur scientia illius, et nisi quandò *promulgatur*.

Hoc quod docet D. Thomas comprobatur à pluribus Sanctis et Doctoribus. D. Isidorus dicit: *Erit autem lex manifesta*. In Can. *Erit autem*, dist. 4. S. Raymundus scripsit: *Non sis pronus judicare mortalia peccata, ubi non tibi constat per certam scripturam*, lib. 3. de Pœnit. §. 21. D. Antoninus asserit: *Quæstio in qua agitur utrum sit peccatum mortale, nisi ad hoc habetur auctoritas expressa Scripturæ, aut Canonis Ecclesiæ, vel evidens ratio, periculosissimè determinatur*. S. Ant. p. 2. tit. 1. Cap. 11. D. 28. Et rationem adducit dicens, quòd qui in dubio determinat esse mortalem quamdam actionem, de quâ prudenter dubitatur, an sit mortalis, *ædificat*

*ad gehennam*, scilicet exponit periculo damnationis illum qui eam faceret actionem. Idem scripsit Joannes Nyder citando quoque Bernardum de Claramonte. *Ex quo enim Opiniones sunt inter Magistros, et Ecclesia non determinavit alteram partem, teneat quam voluerit.* Nyder in *Consol. Av. par. 3. Cap. 20.* Sic quoque scripsit Gabriel Briel anno 1480. dicens: *Nihil debet damnari tamquam mortale peccatum, de quo non habetur evidens ratio, vel manifesta auctoritas Scripturæ.* In 4. *Sent. D. 16. qu. 4. Concl. 3.* scripsit Lactantius: *Stultissimi hominis est præceptis eorum velle parere, quum utrum vera aut falsa sint dubitatur.* Lib. 5. *Instit. cap. 21.* In *Cap. 13.* *Cum jure de Offic. et pot. Judic. de legib.* dicitur: *Nisi de mandato certus extiteris, exequi non cogeris quod mandatur.* Dominicus Sotus loquens de lege, dicit, quod ut ipsa obliget quum debet esse regula nostrarum actionum, necesse est, ut homo intueatur eam, scilicet ut clarè eam cognoscat: *Qui regulâ utitur, eam intueri necesse est.* De *Just. lib. 1. qu. 1. art. 4.* Ità demùm scripsit Benedictus XIV. in suis Notificationibus (*Notif. 13.*): *Non debent imponi vincula, cum non adest manifesta lex, quæ illa imponat.*

## §. II.

*Respondetur ad objecta Adversariorum, et ex responsionibus magis sententia nostra elucebit.*

49. — Nolo quædam non diluere objecta Adversariorum; immò diluere lubet; ex responsionibus enim sententiæ nostræ certitudo magis magisque elucebit. Incipientes ab oppositione illâ quæ responsionem requirit prolixior.

50. — Objiciunt 1. minimè dubium esse etiam leges divinas ac naturales opus habere promulgatione ut obligent; dicunt tamen naturales leges fuisse ab æterno promulgatas, et usquè ab æterno vim perfectam obtinuisse obligandi hominem, vel antequam existeret, quippè quia lex naturalis participatio quædam est legis æternæ, quod quidam Auctor deducere autumat à quibusdam D. Thomæ verbis, quibus ipse D. Thomas pro nobis respon-

det, uti postea videbimus. Angelicus (1. 2. qu. 90. a. 1. ad 1.) dicit quod lex æterna æternam habet promulgationem ex parte Dei promulgantis. Ego tamen quæro : Quænam promulgatio Divinæ legis illa est, quæ obligat homines, promulgatio ex parte Dei, an promulgatio ex parte creaturæ ? D. Thomas, uti superius diximus §. 1. n. 3. docet, quod lex non habet vim obligandi, nisi promulgatione hominibus applicetur : *Ad hoc quod lex virtutem obligandi obtineat, oportet quod applicetur hominibus, qui secundum eam regulari debent; talis autem applicatio fit per hoc, quod in notitiam eorum deducitur ex ipsa promulgatione.* S. Thom. 1. 2. q. 90. art. 4. Et oppositioni (ad primum) dicit, quod lex quoque naturalis opus habet promulgatione, hæcque fit cognitione legis, quam Deus mentibus hominum inserit lumine naturali : *Dicendum quod promulgatio Legis naturæ est ex hoc ipso, quod Deus eam mentibus hominum inseruit naturaliter cognoscendam.* Et idem docet S. Doctor in loco antea citato ab Adversario, ubi postquam dixit, quod Lex æterna æternam habet promulgationem ex parte Dei promulgantis : immediate subdit : *Sed ex parte creaturæ audientis et inspicientis non potest esse promulgatio æterna.* Cit. a. 2. ad 1. Promulgatio itaque quæ obligat, fit, quando creatura cognoscit præceptum lumine rationis, aut illud audit ab Ecclesiâ, vel à sapientibus, qui eam docent.

51. — Id clariùs explicat D. Thomas in alio loco (1. 2. qu. 91. a. 2.) ubi dicit : *Lex cum sit regula et mensura, dupliciter potest esse in aliquo & uno modo sicut in regulato, et mensurato : quia in quantum participat aliquid de regulâ sic regulatur. . . . Et talis participatio legis æternæ in rationali creaturâ lex naturalis dicitur.* Angelicus igitur asserit quod quum lex quædam regula sit, quâ debet se homo regulare, alio modo consideratur in Legislatore regulante, alio in homine regulato. Itaque dicit D. Thomas, quod quemadmodum aliquid homo participat de lege naturali, quæ est unica ejus regula, ita actiones suas regulare debet. Antequam igitur hoc lumen præ lege naturali recipiat, ad nihilum



obligari potest, quia nondum recepit regulam, quae se regulare possit. Itaque lex aeterna regula est pro Deo regulante, sed pro homine qui regulandus est, regula est lex naturalis, lumen scilicet illud, quod naturali ratione ei manifestatur.

52. — Hinc Theologi communiter, et jure dicunt, legem aeternam non esse propriè legem, sed esse instar legis, et, ut ita dicam, est lex et regula pro ipso Deo; et si vult vocari promulgata, est quaedam lex à Deo sibi ipsi promulgata. Hoc modo loquitur Du-Vallius, qui scribit, legem aeternam tunc propriè habere rationem legis, cum hominibus manifestatur; inde subdit: *Si tamen ab aeterno spectetur, dicendum est eam non esse verè et propriè legem, sed tantum aliquid quod se habeat instar legis; tunc quia de ratione legis est, ut promulgetur subditis: nulli autem fuerunt subditi ab aeterno; tunc quia lex essentialiter est regula quaedam practica, hæc autem regula non potuit imponi Verbo, et Spiritui Sancto, quia ipsimet sunt regula, et rectitudo ipsa. Du-Vall. in 1. 2. S. Thom. de Leg. q. 2. p. 293.* Et ita quoque dicunt Montesinus, et Jodochus Lorichius Doctor Lovanii. Montesinus dicit, legem aeternam non esse legem nec regulam pro nobis, sed tantum pro Deo ipso sibi promulgatam: *Respondeo hujusmodi legem aeternam promulgatam esse ab aeterno ipsimet Deo; Deus sibi est lex, et regula: Et ita intelligimus Deum sibi promulgare legem. Montesin. D. 20. de Leg. q. 4. n. 83.* Lorichius *Thes. novus utr. Th. verb. Lex*, nu. 6. de eadem aeternâ lege edisserens scribit: *Hâc lege Deus omnia ordinat ad seipsum, et est promulgata apud ipsum ab aeterno; hominibus autem promulgata, quando eis innotescit.*

53. — Quando igitur quæritur, an obliget homines lex ista? Respondet Du-Vallius, quod tunc obligat, cum homo ad discretionis annos pervenit, quia tunc lumine naturali lex illi promulgatur: *tunc autem sufficienter (legem) promulgari, quando quisque annos discretionis incipit. 1. 2. de leg. q. 3. a. 3.* Et pag. 296. subdit, quod lex aeterna nobis manifestatur per legem naturalem, quæ est illius participatio: *dico eam per alias leges nobis innotescere,*

*cum leges illæ sint illius participationes.* Non secus scribit prælaudatus Montesinus *Disp. 20. de Leg. q. 4. n. 85. Lex naturalis promulgatur in unoquoque, dum primo venit ad usum rationis; et quamvis pro tunc solum promulgatur ista lex quantum ad principia communissima juris naturæ, tamen postea paulatim, per discursum promulgatur eadem lex quantum ad alia.* Non dissentit Petrus de Lorca Cisterciensis, immò subjungit; cognitionem legis essentialem esse atque intrinsecam tam Legibus humanis, quam naturalibus. *Lorca in 1. 2. S. Thomæ D. 6. de leg.* Idem scripsit Joannes Major: *Cum primum aliquis habet rationem, legem naturalem habet. In 3. dist. 27. q. 2.* Ità quoque scripsit Conradus Koellin à Divi Dominici Familiâ: *Cum venerit (homo) ad usum rationis, tenetur ad ea, quæ sunt legis naturæ. In 1. 2. q. 90. art. 4.* Idem scripsit P. Manstrius Theol. Moral. D. 2. de leg. q. 2. a. 2. n. 34. *Hoc autem jus (naturæ) hominibus intimatur, et obligare incipit ab eo tempore, quo rationis usum accipiunt; et per talem legem sibi intimam inter bonum, et malum discernere incipiunt; hic enim rationis usus, est veluti ipsius legis naturalis notificatio et manifestatio. Et hoc intendit Paulus (Rom 7.) illis verbis: Ego autem vivebam sinè lege aliquandò, sed cum venisset mandatum, peccatum revixit.* Sic quoque sensit Joannes Granado (ignoscat qui legit si tot Theologorum textus idem dicentium in medium afferò, hoc enim mihi est per quam necessarium, ut Adversarii mei atque alii sibi persuadeant, Theologos omnes uniformiter locutos fuisse contrà id quod mihi mei objecerunt Adversarii); scribit Granado: *Dicendum est legem naturæ consistere in illo dictamine rationis; . . . Nec deest promulgatio, eo enim ipso quòd homo perveniat ad usum rationis, potens est discernere honestum et malum. Contr. 6. de leg. tract. 2. D. 4. n. 7.* Idem scripsit Blasius de Benjumea: *Cum lex naturæ debeat voluntati proponi, ad hoc ut habeat vim obligandi, et rationis dictamine possit præcognizative promulgari; ipsa præcognizatio intellectus notificat obligationem faciendi sive omittendi aliquam actionem etc. De leg. q. 2. art. 2. n. 220.*

54. — Hinc concludunt reliqui omnes Theologi legem æternam licet in actu primo habuisse virtutem obligandi, nihilominus neminem obligavit antequàm promulgata fuit atque applicata. Ad rem facit quod scribit Cardinalis Gotti : *Sequitur, quòd lex æterna ab æterno in actu secundo neminem obligaret.* Et subjungit, quòd quamvis illam virtutem obligandi habeat, attamen *nondùm ligat, quia nondùm applicata et promulgata.* Theol. tr. 5. q. 2. Dub. 1. n. 13. Hanc nimis claram rationem adducens, quòd *mensura in actu secundo non mensurat, nisi mensurabili applicetur.* Idem scribit Franciscus de Aravio : *Cùm lex æterna non obliget creaturas, nisi mediante lege naturali, vel positivâ Divinâ, ad istarum promulgationem illa quoque sufficiens promulgatur.* In 1. 2. q. 96. D. 1. sect. 5. pag. 525. Ità quoque tenet Honoratus Tournely, dicens : *Quia tamen lex antè Creaturarum existentiam verè obligans non fuit, cùm nihil esset ad extrâ, quod eâ obligaretur, palàm est rationem completam legis tunc tantùm ei competere potuisse, cùm extiterunt Creaturæ, quibus fuit lex promulgata.* Prælect. Theol. tom. 2. c. 4. q. 2. Eodem modo scripsit P. Collet : *Quia tamen lex æterna antè Creaturarum existentiam obligans non fuit, palàm est rationem plenam legis tunc tantùm ei competere potuisse, cùm extiterunt Creaturæ, quibus intimata fuit.* Tom. 2. de leg. c. 2. pag. 17. Hinc scripsit Joseph Rocaful Præpositus Valentiaë : *Quamdium (lex æterna) non promulgatur per modum legis, semper se habet per modum propositi ferendi legem, non autem per modum legis latæ.* Praxis etc. lib. 2. c. 1. P. Berti scripsit legem æternam non fuisse legem obligantem, sed paratam obligare in tempore, quo hominibus promulgaretur : *Nos promulgationem nihil aliud intelligimus, nisi paratâ jam legis promulgatione, æternam legem institutam dicimus antè tempora secularia, promulgatam verò in temporum conditione.* Quod explicavit verbis illis dicens, quòd *lex æterna fuit ab æterno solum vim habitura in rerum creaturarum conditione; ità ut tunc vim obligandi habere deberet cùm fuisset Creaturis promulgata.*

55. — Deniquè Theologi omnes sentiunt; legem æternam non fuisse legem obligantem, nisi postquàm fuit promulgata: ut scribit Franciscus Sylvius: *Lex æterna fuit ab æterno lex materialiter, non formaliter, seu sub ratione legis actualiter obligantis, quia tunc non fuit actualis et perfecta promulgatio.* In 1. 2. q. 41. a. 1. ad 2. Convenit quoque P. Gonet: *Legem æternam defectu promulgationis non potuisse obligare Creaturas ab æterno.* In Clyp. tom. 3. tract. 6. de Leg. D. 2. art. 3. Facit quod scribit Lorckius: *Hominibus autem (lex æterna) promulgatur, quando eis innotescit.* Thesaur. Verb. Lex, n. 6. et lubet hic repetere quod scripsit Dominicus Sotus: *Nulla lex ullum habet vigorem legis antè promulgationem; nullam exceptionem Conclusio hæc permittit.* Dicit enim legem, quum sit nostrarum actionum regula, regulam nobis esse nequire, nisi nobis applicetur et manifestetur: *Applicari autem nequit (lex) nisi per ejus notitiam, nam qui regulà utitur, eam inveniendi necesse habet.* Sotus de Just. lib. 1. q. 1. a. 4. q. 3. a. 2. Colligamus ergò. Theologi omnes ducere D. Thomà sentiunt, legem æternam quamvis in actu primo vim in se habuerit homines obligandi, actualiter tamen in actu secundo obligare non potuisse, nisi postquàm hominibus lumine rationis naturalis fuerit promulgata. Hinc repetere opus est doctrinam Joannis Gerson dicentis: *Necesse est dari manifestationem ordinationis, ac voluntatis Dei, nam per solam suam ordinationem, aut per solam suam voluntatem nondùm potest Deus absolute Creaturæ imponere obligationem.* De Vitâ Spir. lect. 2. Et Franciscus Henno scribit legem naturalem non distingui à lege æternâ, sibi ipsi tamen objicit: Promulgatio est essentialis legi, sed lex Naturalis fuit tantum in tempore promulgata, ergò solum in tempore incoepit esse propriè lex, et consequenter ab æternâ lege distinguitur: respondet verò: *Fuit ab æterno lex naturæ potens obligare, licet non obligaverit antequàm promulgaretur in tempore per dictamen rationis. Et idem est de lege æternâ; undè sicut non fuit lex æterna obligans ab æterno, sed in tempore (scilicet quando fuit manifestata); ita et lex naturæ.* Henno de Lege; sed sermone progrediamur.

56. — Objicitur 2. Ergò homo nascitur liber? non subditus et dependens à Deo? Noni equidem. Homo nascitur subditus et dependens, et devinctus parere præceptis omnibus, quæ ei Deus imponit; ut verò hujusmodi præcepta eum ligent, debent ei applicari actuali præcepti promulgatione, quæ fit cum ei præceptum rationis lumine manifestatur; usquedùm verò præceptum ei non manifestatur, homo possidet libertatem ei à Deo datam, quæ quum certa sit, non remanet, nisi à certo præcepto, ligata.

57. — Si unquàm homo nasceretur legi æternæ devinctus (quemadmodum quidam meus Adversarius credit) antequàm ei illa manifestaretur, ità ut nullas alias actiones facere posset, nisi illas, quas ei lex æterna permetteret necessarium, non fuisset; quòd Deus homini præcepta sua denunciasset impressione luminis naturalis et lege scriptà, sed ei declarare debuisset tantùm illa, quæ ei permittebat. Poterat, haud inficior, Dominus jubere, quòd homo nil aliud facere posset, nisi illud; quod ei expressè permisisset; sed non ità fecit: *Deus ab initio constituit hominem, et reliquit illum in manu consilii sui; adjecit mandata, et præcepta sua; si volueris mandata servare, conservabunt te. Eccl. 15. 14.* Ergò antea Deus creavit hominem liberum, donando ei libertatem juxtà id quod scripsit Apostolus: *Potestatem habens suæ voluntatis, 1. Cor. 7.* Postea adjecit mandata quæ observare debet, et ex observantiâ hujusmodi Præceptorum Dominus salutem hominis constituit. Ut verò quis ab hujusmodi ligetur præceptis, dicit D. Thomas, quemadmodum superius innuimus, quòd debet habere scientiam, idest certam eorum cognitionem: *Nullus ligatur per præcepta, nisi mediante scientiâ illius Præcepti. De Verit. qu. 17. art. 3.* Quum enim lex sit quædam mensura, quâ se homo regulare debet, dicit S. Doctor, eam debere esse certissimam; *Mensura debet esse certissima. 1. 2. q. 19. a. 4. ad 3.* secùs, si mensura esset dubia, nemo benè se regulare posset. Quod pluribus aliis in locis D. Thomas comprobavit dicens, illum, cui divina voluntas

non innotescit, non teneri eam sequi : *Sed in particulari nescimus quid Deus velit : et quantum ad hoc non tenemur conformare voluntatem divinæ voluntati.* 1. 2. q. 19 ar. 10. Et loquens præcisè Sanctus de obedientiâ quam divinis debemus præceptis, dicit, quòd nos non tenemur eis parere, nisi postquam nobis manifesta fuère, prout demonstratum est n. 7.

58. — Objicitur 3. Hominem non posse licitè exponere se periculo legem violandi : Cùm adsunt duæ æquè probabiles opiniones, tunc jam dubitatur an lex adsit. Quapropter si tunc homo opinionem minùs tutam sequitur, jam se conjicit in periculum legis violandæ. Respondetur, distinguendum esse inter casum, in quo lex certa est, et casum, in quo lex est dubia; haud inficior peccare illum qui se exponit periculo legem violandi; id verò intelligitur cùm lex est certa, et tunc locum habet textus ille: *Qui amat periculum, in illo peribit.* Eccl. 3. 27. Tali enim casu lex non solùm ad suam observantiam obligat, verùm etiam ne nos probabili periculo eam violandi exponamus. Secùs est quandò periculum est tantùm violandi legem dubiam, quia tunc, etiamsi antè Deum lex existeret, violaretur lex, non obligans: et lex non obligans non potest vocari lex; nam dicit D. Thomas (1. 2. q. 90. a. 4.) quemadmodum dicimus §. 1. n. 29. quòd lex ut mensura actionum hominis, debet ei promulgatione applicari, et postea subdit: *Undè ad hoc quòd lex virtutem obligandi obtineat, quod est proprium legis, oportet quòd (promulgatione) applicetur.* Notetur illud, *quod est proprium legis.* Ergò lex quæ virtutem obligandi non habet, neque est, neque dici potest propriè lex: et ideò qui violat legem aliquam nondùm manifestatam, uti evenit in casu duarum æquè probabilium opinionum, numquàm dici potest illum peccare, quia quamvis lex adesset, contrà legem operat non obligantem, ideòque non potest ei id ad culpam imputari.

59. — Objicitur 4. quædam S. Thomæ Doctrina dicentis, ignorantia illius qui potest et debet scire legem, quum sit voluntaria, non excusatur à cul-

pa : *Dicitur ignorantia voluntaria ejus , quod quis potest scire et debet. S. Thom. 1. 2. q. 6. a. 8.* Hinc deducunt Adversarii , quòd quotiescumque homo potest et debet scire praeceptum , quamvis nunquam , ne in confuso quidem praeceptum consideraverit , ejus ignorantia est vincibilis et culpabilis ; in hunc modum loquitur Anonimus modernus libri inscripti *Regula bonorum morum*. Sed quo modo , ego sciscitor , potest scire praeceptum ille , cui nunquam venit in mentem hujusmodi praeceptum existere posse ? Quid hoc ? dicunt Adversarii ; Homo enim , quotiescumque est cum mente non infirma , nisi moralem , physicam saltem potentiam habet ut possit praecepta considerare , ideòque semper est in culpa. Non tamen ità alloquitur D. Thomas , qui unà cum D. Augustino et Theologis omnibus Probabilistis atque Antiprobabilistis docet , quòd quotiescumque ignorantia est involuntaria , à peccato excusat. Sanctus Doctor sexcentis in locis hoc probat. Dicit primo bifariam ignorantiam involuntariam esse posse et culpabilem , *vel directè , sicut cum aliquis studiosè vult nescire : vel indirectè , cum aliquis negligit addiscere id per quod à peccato retraheretur : talis enim negligentia facit ignorantiam esse voluntariam , et peccatum.* Et immediatè subdit : *Si verò ignorantia sit involuntaria , sive quia est invincibilis , sive quia est ejus quod quis scire non tenetur , talis ignorantia omninò excusat à peccato. S. Thom. 1. 2. q. 77. art. 4.* Dicendo igitur Sanctus (oportet eadem verba repetere) , *Si verò ignorantia sit involuntaria , sive quia est invincibilis , sive quia est ejus quod quis scire non tenetur , talis ignorantia omninò excusat à peccato.* Sat superque declarat , ignorantiam , licèt illarum rerum quas scire tenemur , quandò est invincibilis , ità ut nullum veniat dubium in mentem , penitùs excusare à peccato. Idem Angelicus clariùs hoc docet *Quodlib. 8. art. 15.* scribens : *Error autem conscientiae quandòque habet vim excusandi , quandò scilicet procedit ex ignorantia ejus , quod quis scire non potest , vel scire non tenetur ;* et tali casu dicit , quòd *quamvis factum sit de se mortale , tamen intendens peccare venialiter , peccaret venialiter ; et consequen-*

ter si intenderet penitus non peccare, certè non peccabit. Adnotetur illud : Scire non potest ; vel scire non tenetur : Ergò etiam in casu quo quis præceptum scire tenetur, si illud scire nequit, ignorantia ejus erit invincibilis, eumque excusabit à peccato. Et hìc sapienter P. Joannes de S. Thomâ Dominicanus inter priscos Theologos celeberrimus animadvertit quòd illud *potest scire* intelligitur non jam remotè, sed proximè et expeditè, ità ut omissio diligentia debitæ in veritate quærendâ sit propriè voluntaria : *Illud Axioma : Qui potest et tenetur, et non faciat, peccat : intellige de eo qui potest proximè, et expeditè, non remotè tantùm et impeditè, quia (ut supra diximus) omissio, ut sit voluntaria, debet procedere ab ipsâ voluntate etc. Sanctus Thomas 1. 2. quæst. 5. disput. 3. Dist. 1.*

60. — Hinc scripsit D. Antoninus (p. 2. tit. 1. c. 11. §. 28.) rectè dari ignorantiam invincibilem juris naturæ in illis, *quæ per multa media, et non clarè probantur esse contra præcepta*. Sic quoque sentiunt Habert *Theol. tom. 3. de act. hum. c. 1. n. 3. circa fin.* Jo. Bapt. Du-Hamel *Th. tom. 3. de act. hum. c. 1. n. 3. circa fin. vers. ad legem*. P. Joannes Laurentius Berti *de Theol. Discip. to. 2. lib. 21. cap. 10. ubi scribit, quòd hujusmodi opinionem tenent omnes ferè Ægidiani, ac Thomistæ, et Sylvius, Herminier, aliquæ communiter*. Quod probat è D. Thomâ (1. 2. q. 110. a. 1.) dicente : *Quædam verò sunt, quæ subtiliori consideratione indigeant disciplinæ*. Idem tenet P. Gonet (*Clyp. Theol. t. 3. D. 1. a. 4. §. 1. n. 55.* et alibi (*Tract. de Probabil. circa fin.*) dicit quod opinio contraria est singularis paucorum, et improbabilis. Idem quoque tenent P. Collet (*Comp. Mor. to. 1. c. 1. art. 1. Sect. 2. Concl. 4. pag. 23.*) et P. Antoine (*Theol. Mor. de Pecc. c. 4. q. 6.*) qui refert Romæ anno 1685. proscriptum fuisse hunc articulum : *Nullam admittimus ignorantiam invincibilem juris naturæ in ullo homine, dùm hìc et nunc contrà jus naturale agit*. Sexcenta alia libenter omitto, quia fusiùs de hoc edisserui Cap. II. libri quem edidi, *Usus moderati Opinionis Probabilis*.

61. — Ad alios D. Thomæ textus transeamus,



in quibus docet ignorantiam, quandò est invincibilis, excusare à peccato. In uno loco dicit : *Ignorantia, quæ est omninò involuntaria, non est peccatum. Et hoc est quod Augustinus dicit : Non tibi imputatur ad culpam, si invitus ignoras, sed si scire neglexeris (lib. 3. de lib. arbitr. cap. 19.) Per hoc autem quod ait, Sed si scire neglexeris, dat intelligere, quòd ignorantia habet quòd sit peccatum ex negligentia præcedenti, quæ nihil est aliud, quam non applicare animum (intelligitur voluntariè) ad sciendum ea quæ quis scire debet. S. Thom. de Verit. q. 3. ad 7. Et idem repetit paulò post (ad 8.) dicens, peccare (tantummodò illum, qui, ne impediatur à peccato, quod diligit, scientiam recusat; et sic ignorantia est à voluntate quodammodò imperatà. Idem Angelicus 1. 2. q. 19. a. 6. dicit : Si igitur ratio, vel conscientia erret errore voluntario, vel directè, vel propter negligentiam quia est error circa id, quod quis scire tenetur, tunc talis error non excusat. Itaque è contrario, quandò error non est volitus neque directè, neque indirectè per negligentiam, excusat procul-dubio à peccato. Ergò semper requiritur negligentia, ut error voluntarius reddatur. Amplius idem S. Doctor Opusc. de Verit. qu. 17. art. 3. postquàm dixit : nec aliquis ignorans præceptum Dei tenetur ad præceptum faciendum, nisi quatenus tenetur scire præceptum; explicat quomodo intelligendum sit illud, nisi quatenus tenetur scire præceptum, dicens (ad 4.) Tunc conscientia erronea non sufficit ad absolvendum, quandò in ipso errore peccat. Quid sibi vult illud, in ipso errore peccat? nisi quod tunc peccet cum error est culpabilis, nempe cum homo animadvertit saltem obligationem sciendi præceptum, et illud scire negligit. Idem Sanctus repetit Quodlib. 8. num. 15. quandoquæ verò error Conscientiæ non habet vim excusandi, quandò scilicet ipse peccatum est. Quandò igitur error non est culpabilis, quia involuntarius; excusat à peccato, remanet enim tunc actio tantum materialiter mala, quæ antè Deum peccatum non est, quemadmodum scribit P. Collet : Porro peccatum, quod ex ignorantia invincibili committitur, non est*

*peccatum, nisi materialiter; nec impedit quominus æterna salus obtineri possit.*

62. — Imò scribit P. Concina in suâ Theol. Morali Tom. 2. lib. 2. de Consc. Diss. 1. Cap. 5. n. 36. *Potest enim quis, dum exercet opus materialiter malum, habere intentionem bonam Deo placendi, hos bonos actus et meritorios dicimus, etc. Opus materialiter malum, cum non sit voluntarium, refundere in istos actus malitiam non valet.* Quod autem dixit S. Joannes Chrysostomus his verbis: *Ex proposito bono, etiam quod videtur malum, bonum est, quia propositum bonum excusat malum opus.* Est commune axioma apud omnes: *Cuique facere libet, nisi id à jure prohibeatur*, uti legitur in Textu *Instit. de jure person.* §. 1. et uti etiam docet pro indubitato principio Angelicus etiam circà res legis naturæ dicens: *Illud dicitur licitum, quod nulla lege prohibetur.* S. Thom. in 4. sent. D. 15. q. 2. ar. 4. ad 2.

63. — Objicitur 5. ignorantiam tunc solùm esse invincibilem, quando nos nullam habemus rationem de actionis honestate dubitandi; quomodo tamen hujusmodi ignorantia invincibilis dici potest, quando, quum adsit opinio æquè probabilis legi favens, jam adsunt graves rationes dubitandi, quod actio illa sit illicita? Respondetur tamen, et perspicuè. Nos non dicimus, operantem cum opinione benignâ æquè probabili ac est rigida non peccare, quia legem invincibiliter ignorat, sed quia tali casu ignorat invincibiliter certitudinem legis existentiae; et posito pro certo principio, uti superius evidenter demonstravimus, legem debere esse certam et manifestam ut obliget, quotiescunque nec certa nec manifesta est, licite agit qui agit benignâ utens opinione. En quàm ad rem respondet P. Gonet ad tutionistam Fagnanum: *Eum, qui factâ sufficienti diligentia ad inquirendam veritatem, agit ex opinione probabili, quando alia probabilior ei non occurrit, non agere ex conscientia practice dubiâ, subindeque nulli peccandi periculo se exponere: quia tunc certificatur moraliter per judicium reflexum quod habet, dicens: Qui facit totum quod in se est ad inquirendam veritatem, et illam consequi non*

*valet, excusatur ratione ignorantiae invincibilis. Quod principium est omnino certum, et unanimi ferè Theologorum omnium consensu firmatum. Gonet, Manual. tom. 3. tract. 3. cap. 16. circ. fin.* Itaque P. Gonet hujusmodi verbis ponit pro principio certo, et communi inter Theologos, quòd cùm certa legis existentia ignoratur, quum violandi eam periculum adsit, rectè possumus opinione minùs tutà uti, quia hujusmodi dubia lex non obligat.

64. — In hoc igitur cardo rei vertitur, an principium, quòd lex dubia obligare nequit, sit vel ne certum. Esto enim quod sit certum, prout superius evidenter demonstravimus, et probavimus auctoritate D. Thomæ quem communiter secuti sunt Theologi; et esto quòd adsit ignorantia invincibilis certitudinis legis, procul dubio agens non peccat. At inquirunt: D. Thomas scribit: *Qui aliquid committit aut omittit, in quo dubitat esse peccatum mortale, discrimini se comittit; idèròque mortaliter peccat. In 4. Sent. dist. 21. q. 2. a. 3. ad 3* Ergo, respondens tunc dicit D. Thomæ, hominem peccare mortaliter, cùm committit aut omittit aliquid cum dubio pratico peccandi; *in quo dubitat esse peccatum.* Sed hoc locum non habet, cùm quis agit adversùs legem dubiam quæ non obligat, quemadmodum docet idem Doctor Angelicus: *Nullus ligatur per præceptum, nisi mediante scientiâ illius præcepti*, quia tunc agit cum dictamine certo licitè operandi.

65. — Objicitur 6. nos non posse uti opinione benignâ, nisi sit probabilissima, et moraliter certa (largè loquendo); nam secùs (inquiunt moderni nostri Probabilioristæ) honestatis actionis certitudo haberi nequit. Respondeo: Qui opinione æquè probabili pro libertate utitur innixus principio quòd lex dubia non obligat, certitudinem non habebit directam, habebit tamen indirectam et reflexam, quòd actio sit honesta, et hoc modo licitè operatur. Quòd autem licitè quis operatur cum Principio certo reflexo, non est dubitandum, uti demonstravimus §. 3. n. 12. Istis tamen modernis Probabilioristis objicio, quòd ipsi cum opinione probabilissimâ (juxta eorum effatum) nequeunt, aut

difficulter possunt tutâ conscientiâ uti opinione benignâ, sed semper debent opinionem sequi tutiorem; aut sententiam strictè certam, prout stricti Tutioristæ volebant: et hoc facio argumentum. Moderni nostri Probabilioristæ dicunt, quemadmodum superiùs innuimus, quòd nos non possumus nosmetipsos conjicere in periculum violandi legem: opus est tamen intelligere, quòd opinio probabilissima, quia inter fines probabilitatis est, non excludit omnem prudentem formidinem (quod sit falsa), quemadmodum omnem prudentem formidinem excludit sententia moraliter absolutè certa, quam tenent Rigoristæ, qui probabilissimam quoque excludunt: sed isthæc eorum Propositio proscripta fuit ab Alexandro VIII. *Non licet sequi opinionem vel inter probabiles probabilissimam.* Si opinio igitur probabilissima omnem prudentem non excludit formidinem, opinio contraria probabilissimæ non est jam tenuiter probabilis; quia tenuis probabilitas non est vera probabilitas, sed est tantum quædam falsa, seu vana probabilitatis species, quæ nequit producere aliquem prudentem timorem, sed tantum timorem aliquem imprudentem. Et timor imprudens non est timor, qui possit secum ferre aliquod peccati periculum. Idem rigidiores Tutioristæ communiter dicunt spernendos esse hujusmodi imprudentes timores: nimis magna dementia esset cogitare, quòd Deus nobis jubeat, ut nos imprudentes omnes vanosque vitemus timores. Itaque nisi velimus opinionem probabilissimam cum opinione absolutè certâ confundere, opus est dicere, quòd opinio contraria probabilissimæ non est tenuiter probabilis, sed dubiè probabilis, quam nemo sequi potest; sed si ea non est probabilis, habet tantum prudentem aliquam rationem quòd vera sit, uti probabilissimè (prout diximus) aliquam prudentem formidinem habet quòd sit falsa. His positis dico: Esto quod opinio quæ legi favet contraria probabilissimæ quæ favet libertati, est dubiè probabilis, et aliquam prudentem rationem, licet non omninò stabilem, habet, quòd sit probabilis: quo modo sciscitor, qui tenet non licere conjicere se in periculum violandi

legem, probabilissimam pro libertate sequi volens, possit in praxi suum inducere in animum tutâ conscientiâ, ut firmiter credat opinionem pro lege verè probabilem non esse, et uti posse probabilissimâ, quin timeat exponere se in discrimen legem violandi? Ubi inveniat talem libram, quâ tutus efficiatur, quòd opinio illa, quæ legi favet, certè non habeat tot probabilitatis notas, uti ad veram perveniat probabilitatem? et hoc modo possit tutè operari, et sinè periculo legem violandi? Ideò repeto quod à principio dixi, quòd credens non posse sequi quamcumque minùs tutam opinionem, nisi sit probabilissima; quum sit jam in dubio, an opinio legi favens sit vel ne probabilis, non sinè magnâ difficultate poterit tutâ conscientiâ operari, nisi strictum amplectatur Tutorismum, qui tantummodò à quocumque timore, et præsertim à periculo legem violandi est immunis.

66. — Objicitur 7. Unusquisque scit, quòd si in nemore aliquod adest objectum, quod probabiliter judicetur homo, qui illud in hoc dubio sagittâ ferit, procul dubio peccat: itaque si peccat, qui exponit ad periculum vitam corporis Proximi sui, quo modo excusabitur à peccato, qui in periculum exponit vitam Animæ suæ, conjiciendo se in probabile peccandi periculum? Respondemus; sed autem dicimus mirum esse quod ab Adversariis semper trivialis isthæc objectio repetatur, vel postquam toties nostri ad illam responderunt. Iterùm tamen respondemus, quòd si vibretur sagitta in probabili dubio an objectum illud sit homo, vel fera, non agitur contrà legem dubiam; sed contra certam: tali enim casu certa lex est, ne in probabile conjiciatur periculum vita proximi, qui certum jus habet ne lædatur. In casu tamen nostro non solum nulla certa lex adest ne exponamus nosmetipsos in periculum violandi legem, sed quoque certum est (quemadmodum innuimus) quòd, quum lex sit dubia, et consequenter nec promulgata, nec manifestata, virtutem obligandi non habet; ideòque si illa unquàm antè Deum existeret, qui illam violat, non peccat, quia legem violat non obligantem.

67. — Objicitur 8. Ut dicatur, quòd lex quædam dubia sit, dubitandum esset, an vel ne hujusmodi lex existeret: sed hoc (dicunt) accidere nequit, quia leges tam divinæ, quam humanæ, quas observare debemus, omnes certè existunt, et promulgatæ sunt. Dubium igitur (inquiunt) non est de legis existentia, sed de casibus particularibus, idest an casus ille peculiaris comprehendatur in illâ lege universali: Undè in concursu duarum æquè probabilitium Opinionum, dicere non possumus, quòd lex est dubia, sed quòd certa lex ad casum illum non extenditur; quis tamen hoc asserere audebit, quum quoque opinio pro lege sit probabilis? Ita scribit P. Daniel Concina in suâ Theologiâ Christianâ.

68. — Respondemus, imò pro nobis respondet illud quod ipsemet P. Concina scripsit in Compendio dictæ Theologiæ (*to. 2. de legib. cap. 2. n. 10.*) ubi dixit, quòd quamvis lex certa sit, circumstantiæ tamen quæ occurrunt diversæ efficiunt, quòd lex modò obliget, modò non; Præcepta divina sunt immutabilia, sed quandoque aliquâ datâ circumstantiâ non obligant. Hinc (nos concludimus) frustra dicitur, quòd leges omnes certæ sunt, quia mutatis casuum circumstantiis, in hujusmodi casibus leges illæ locum non habent, aut redduntur dubiæ et tanquàm dubiæ non obligant. Ergò, repetit prælaudatus Auctor, juxtà vestrum Principium, quòd lex dubia non obligat, concluditis, quòd in dubio an lex extendatur vel ne ad illum casum, certè non extenditur? Respondemus nos non dicere, quòd lex in illo dubio certè non extenditur, sed quòd cùm duæ adsunt æquè probabiles opiniones, tunc, quum certum non sit, quòd lex ad casum illum extendatur, respectu illius casûs lex erit dubia, et uti dubia non obligabit. Exemplum pro faciliori ponamus intelligentiâ. Lex prohibet usuram, sed cùm utrinque æqualis adest probabilitas quòd quidam contractus sit et non sit usurarius, tunc nulla est lex certa, quæ illum prohibeat; idèquè circa hujusmodi contractum dubia lex remanet: quoad usuram certa est lex quæ il-

lam prohibet , quoad tamen contractum illum dubia est lex. Esto igitur verè probabile esse, casum illum particularem in lege non comprehendi , idem est dicere dubium esse an ad casum illum lex extendatur , quàm dicere quòd respectu casus illius lex est dubia ; et si lex est dubia quoad illum casum , consequenter respectu illius non obligat.

69. — Obijcitur 9. Effatum seu Regula Canonum : *In dubiis tutior pars eligenda est.* Quod est Adversariorum fundamentum ; responsum tamen est meridiana luce clarius. Respondemus itaque præfatam regulam habere locum in solis dubiis practicis , quæ remanent in conscientiâ , quin deponi possint , non verò in dubiis speculativis , quæ ibique mediante Principio certo deponuntur , quia tunc agens non remanet in dubio , sed exit à dubio , et certitudinem habet moralem. Ideo dicunt communiter Doctores cum D. Antonino , Nyder , Tabienâ , Isamberto , P. Joanne Idelfonso , Vasquez ( quamvis hic contrà nos laudetur ) Tannero , Navarro ( doctrinæ quorum habentur in citato libro *Usus moder. etc. pag. 227. n. 7. et seq.* ) Soto , Medina , Sà , Valenza , Enriquez , Lorca , Vidal , Anglès , Bardi , Salas , P. Joanne à S. Thomâ , Merolla , aliisque innumeris , præfatam Regulam locum tantùm habere in casibus dubiis practicis , quemadmodum deducitur ab iisdem textibus , in quibus eadem Regula præscribitur , et quemadmodum ego omnes et singulos dictos casus ad trutinam revocavi in prælaudato libro *Usus moderati etc. pag. 234. à nu. 11.* Quoad verò ad speculativa dubia dicta Regula consilii est , non præcepti. En quàm opportunè occurrit D. Antoninus , qui de quodam contractu loquens , qui erat probabiliter licitus , probabiliterque illicitus præ contrariis sapientum opinionibus , scribit : *Inducunt illud : In dubiis tutior via eligenda est. Respondetur hoc esse verum de honestate , et meriti majoritate , et non de salutis necessitate quoad omnia dubia :* Brevitatis gratia prætereo hîc totum id quod super hoc puncto scripsi in libro *Usu moder. Cap. 5. n. 2. p. 221.* et rem ipsam aggredior. Dicit igitur D. Antoninus , quod in dubiis speculativis , quæ occur-

runt in casu duarum æque probabilium opinionum, præfata Regula est consilii, non præcepti: *Hoc esse verum de meriti majoritate, non de salutis necessitate quoad omnia dubia.* Opinio itaque dicentis, prælaudatam Regulam locum habere in dubiis omnibus etiam speculativis, mihi videtur, juxta id quod superius ostendi, omninò esse improbabilis atque insubsistens; ea enim adversatur rationi, et communi Theologorum sententiæ.

70. — Ut tamen extremam manum huic controversiæ imponamus illud proferamus responsum quod omnibus os claudit. Sciscitor, quid dicit præfata Canonum Regula? Dicit: *In dubiis tutior pars eligenda est*; ergò quotiescumque conscientia est in dubio (*in dubiis*) non potest operari sine stimulo et sine peccato. Quid vero obstat dicta Canonum Regula, quando homo aliquo cum Principio certo reflexo dictamen practicum moraliter certum sibi efformat? Tunc foràs à dubietate prodit, et à terminis de quibus loquitur textus, et ampliùs dici nequit quòd sit *in dubiis*.

71. — Verissima et justissima est Canonum Regula, sed non illa est, quam moderni volunt Tutoristæ, ut eam jure vel injuriâ trahunt; at dico quòd illi volunt, quod juxta suos terminos Regula ipsa non dicit Repetit tamen quidam meus Adversarius, quòd hocce meum argumentum subsisteret, si à me adoptatum Principium esset certum, sed quia est falsum, non subsistit. Ergò, ego repeto, si non demonstrant mei Adversarii principium à me adoptatum evidenterque demonstratum, esse falsum, scilicet quòd lex dubia certam non potest inducere obligationem, quia ei deficit sufficiens seu certa promulgatio, quemadmodum dicunt D. Thomas, et Theologi omnes, singulæ eorum Oppositiones evanescunt. Mihi tamen moraliter impossibile videtur, quòd ipsi unquam refellere poterunt hoc meum Principium adeò perspicuè probatum, et assero quòd nunquam hujusmodi Principium refellent, nisi D. Thomæ Doctrinas à me relatas confutent. Dixi *nisi confutent*, quia velle pro libitu illas



illas interpretari, et ad alium sensum detorquere, uti faciunt, idem est ac solis lucem obfuscare.

72. — Objiciunt demùm Decretum S. C. Inquisitionis Romanæ habitum anno 1761., ex quo contendunt quemlibet Probabilis usum fuisse proscriptum. Sed scire opus est anno 1760. quemdam Parochum Terræ Avisi Diœcesis Tridenti edidisse folium plures continens Propositiones, quæ omnes Probabilismo favebant, quarum quædam erant quæ justos excesserant fines. Hujusmodi folium cum omnibus ejus propositionibus transcripsi in dicto meo libro *Usus moder. etc. Cap. 5. pag. 282.* Prosriptum utique fuit folium, sed non proscriptæ fuere omnes Propositiones ejusdem; earum enim aliquæ justæ erant et innocentes: ideòque in Decreto dictum fuit: S. C. Folium prædictum, et Theses in illo expositas damnat, *tamquam continentia Propositiones, quarum aliquæ sunt respectivè falsæ, temerariæ, et piarum aurium offensivæ etc.* Itaque damnatæ non fuerunt Propositiones omnes in particulari, et divisim una ab aliis; dictum enim fuit: *Quarum aliquæ sunt respectivè falsæ etc.* Et reverà quum de hoc scripserim duobus Primariis Consultoribus ejusdem S. C., nempe Reverendissimo P. Magistro Thomæ Augustino Ricchino Sacri Palatii Magistro, et Reverendissimo P. Magistro Pio Thomæ Schiara à Secretis S. C. Indicis, mihi rescripserunt, à S. C. damnatum fuisse prædictum folium et Theses, non verò propositionem aliquam particularem in dictis Thesibus contentam, ideoque damnatum non fuisse Probabilismum, neque quoad æquè probabilem, neque quoad minùs probabilem libertati faventem. Scripsi ampliùs Eminentissimo Domino Cardinali Galli tunc Pœnitentiario majori, eumque rogavi, ut meo nomine responsum requireret à proprio Summi Pontificis ore. Dictus Eminentissimus Dominus postquam fuit Pontificem allocutus, respondit mihi, non fuisse damnatas omnes Folii propositiones, sed aliquas tantùm in illo contentas, et non damnatam fuisse aliquam propositionem illarum, *quæ disceptantur in Scholis Catholicis, et à multis catholicè propugnantur.* Præfatæ Epistolæ Tom. I.

tam Consultorum , quam Cardinalis Galli leguntur in dicto meo libro *Usus moder.* pag. 233. His positis , non credo aliud opus esse responsum ad hanc ultimam oppositionem Decreti Romanæ Inquisitionis.

73. — Ut denique Opusculum hocce meum concludam , habet hîc transcribere id quod hisce nostris temporibus scripsit Episcopus S. Pontii doctus Antistes Galliæ in quodam suo libro dicens , quòd hodie nunc adeò exclamatur adversùs Theologiam Moralem relaxatam , quandò potiùs exclamandum esset contra Rigorismum excessivum , et pag. 61. subdit hæc memoranda verba : *Ecclesia consolata fuit videndo impositum fuisse finem Regno relaxationis in Theologia Morali , sed postea doluit videndo successisse in ejus locum immoderatum Rigorismum. Hic secundus error ille est qui hodiè circumfertur.* Et reverà transacto Seculo plurimi abusi fuerunt in opinando ad probandas pro probabilibus multas laxas opiniones ; ideòque plures Ecclesia proscripsit Opiniones , quia immeritò vocabantur probabiles , quemadmodum sunt Propositiones 27. et 40. proscriptæ ab Alexandro VII. et 1. 3. 6 35. 44. et 57. proscriptæ ab Innocentio XI. Hæ omnes damnatæ fuere , quia in ipsis dicebatur , *Probabile est etc.*

74. — Hodiè tamen , prout scribit præfatus Antistes , hæc opinandi relaxatio terminavit , undè idem Antistes subdit : *Desièrè Magistri Theologiæ Moralis relaxatæ , sed eis successère novi Magistri , quorum effata sunt intolerabiliora , Homines ad desperationem adducentia. Nihil aliud efficere poterunt , quam morum corruptelam introducere. Longè plures sunt qui pravos mores suos nimio excusant rigore , qui hodiè nunc circumfertur , et moralem evertit , quàm qui relaxatæ Moralis subterfugio se excusare contendunt.*

75. — Unusquisque tamen scit , et cognoscere potest ex eo quod scripsi in meo postremo libro Theologiæ moralis , quantum relaxatam Moralem reprobavi. Quod meum systema æquè probabilis opinionis , evidenter demonstrasse mihi suadeo , quemadmodum credunt plures Antistites , Abbates , Religionum Superiores , et alii doctissimi viri , qui mihi scripserunt , sententiæ , quam certos intrà fines propugnavi , ne-

minem adversari posse; Principium enim, super quo præfata est mea sententia stabilita, nempe quòd lex dubia non obligat, quia non sufficienter promulgata, dicunt esse evidens, atque certum. Et rogo lectorem meum, ut legat Epistolas hujusmodi Virorum, quæ sunt in fine mei libri *Usus moderati etc.*

76. — Scio multos ut dictum meum librum legerunt rigidam deseruisse sententiam. Inter alios Abbas D. Prosperus de Aquila Congregationis Montis Virginis, qui multa erudita Opera edidit, in hunc modum mihi scripsit: » Libellum tuum de Opinionis Probabilis usu moderato legi, et adeo mihi placuit, ut eum relegi. Tam prudenter Dominatio Tua illustrissima argumenti demonstrationem tractavit, ut ego eum omnibus aliis, qui idem tractant argumentum, præposui, et nescirem quid amplius in eo possit desiderari. Principia super quibus tuam stabilisti sententiam, certa sunt, et tam à Probabilistis, quàm à Probabilioristis omnibus admissa. Cum lex certa non est, non potest certam inducere obligationem. Quòd tam rectè præ auctoritate Canonum, Patrum, et primi Ordinis Theologorum demonstrasti, ut nil melius demonstratum fuit. Quum igitur de dubiis æquè probabilibus opinionibus agatur, vel ego in sententiam tuam descendo, quòd quis licitè illam sequi possit, quæ libertati favet licet minùs tutam. Nullum finem facio tibi gratias agendi de ejusmodi dono, ac de notionibus, quas è tui libri lectione acquisivi, quem debitis extollam laudibus in probabilis opinionis articulo, quem pro manibus habeo in 3. tomo Dictionarii Theologici, ubi tuæ Dissertationis lectionem unicè proponam. « Et reverà in folio dicti Dictionarii impresso, verbo *Probabile* (quod postea in lucem non prodiit, Revisor enim pro rigido systemate informatus, noluit quòd in lucem prodiret) propriis oculis hæc sequentia verba impressa legi: » Doctam Dissertationem Episcopi S. Agathæ Gothorum D. Alphonsi de Ligorio de usu moderato Opinionis probabilis legendam propono. Duo ille perpendit. Primum an liceat sequi opinionem minùs probabilem. Secundum, an, quum duæ contrariæ

» opiniones sint æquè aut quasi æquè probabiles  
 » minùs tutam sequi liceat. Primo casu negat, secundo  
 » affirmat : Quòd omnibus argumentorum generibus  
 » confirmat, atque demonstrat hanc esse sententiam  
 » magis probatam tam à priscis quàm à modernis  
 » Doctoribus. Usquè à principiis suis revocat quæs-  
 » tionem adeò clamosam in Scholis, et postquam  
 » eam suo splendore restituit præ auctoritate Patrum  
 » honoratiorum nostræ Ecclesiæ, Doctiorum Theo-  
 » logorum decisione confirmat. Mirus hujus Disser-  
 » tationis est ordo Doctrinæ, ex quo se aperit per-  
 » spicuitas : Et variis cabalis atquè Moralistarum  
 » calliditatibus non obstantibus, propter quas quæstio  
 » videtur intricata, eam nihilominus tantâ nitiditate  
 » tractat, ut nihil unquàm clarius in hâc materiâ  
 » legerim, ejusque decisio definitiva mihi videtur.  
 » Ità alloqui existimavi, quia id mihi maximè cordi  
 » est, quòd omnes Homines eâ utantur Dissertatione,  
 » quum mihi Caput operæ videatur in hoc genere,  
 » in quo alii Theologi tam magna, et tam multa  
 » scripsêre volumina, ut quilibet illa accuratè legere  
 » exanimetur ». Et sciendum quod præfatus Abbas,  
 » uti in pluribus aliis Operibus ego legi, erat omninò  
 » rigidæ sententiæ sectator.

77. — Hic opus est ut ego quid circà meum sys-  
 tema moneam, quod est omninò monendum, et est,  
 quòd cùm dubitatur, an opinio legi favens sit æquè  
 probabilis, aut parùm probabilior, tunc locum habet  
 idem Principium, quod lex dubia non obligat, tali  
 enim casu ipsa lex non desinit esse strictè dubia ;  
 nam tunc quamvis aliqua pro lege major adesset  
 probabilitas, cùm dubitatur, an hæc major proba-  
 bilitas adsit vel ne, præponderantia erit tam levis  
 et minima, ut nihil facienda sit præ illo effato com-  
 munitè ab ipsis Adversariis admissio, quòd *Parum*  
*pro nihilo reputatur*. Secùs autem esset, quandò ex-  
 cessus esset evidens atque certus, quia tunc opinio  
 legi favens erit certè et multùm probabilior ; et  
 statuatur quòd cùm opinio legi favens est certè pro-  
 babilior, tunc est quoque multùm probabilior ; idèd-  
 que tunc, uti à principio dictum fuit, lex est jam  
 moraliter promulgata, idèdque obligat, et est procul  
 dubio observanda.

78. — Quoad tamen ad peculiare sententias meas, verum est, in primis meæ Theologiæ Moralis impressionibus plurium Auctorum auctoritate ductus pro probabilibus multas non satis firmas opiniones admisi; melius tamen re perpensâ, eas revocavi, aut reformavi, quemadmodum patet ex indice hujusmodi opinionum impresso in principio meæ Theologiæ Moralis nuper typis consignatæ; in quo quilibet observare potest quot propositiones et Busembaum, et aliorum Probabilistarum reprobavi; quâ de re quamplurimi existimaverunt me potius rigidarum, quàm benignarum sententiarum esse fautorem.

79. — Cæterum non minus mihi Religionis fuit sufficienter probabiles opiniones adprobare ex eo quod dicit D. Antoninus, quòd illi qui obligant alios opiniones plus nimio rigidas sequi *ædificant ad gehennam*, idest sunt causa quòd multæ Animæ damnentur, quæ hujusmodi opiniones sequi debere sibi persuadent, quas postea non sequendo miserandum in modum damnantur. Finem huic Opusculo impono. Ego pluribus abhinc mensibus detineor lecto quâdam præ infirmitate, quæ verisimiliter me brevî luce privabit. Communiter ajunt, quòd omnes Homines alio modo loquuntur in vitâ, alio in morte, quia in morte sentiuntur illi conscientiæ stimuli, qui non percipiuntur, seu, ut melius dicam, non volunt percipi in vitâ. Ego tamen nullis prorsus Conscientiæ stimulis exagitor præ meo, quod propugnavi circâ Probabile, systemate; immò religioni mihi esset contrariam tenere sententiam quoad aliorum instructionem rigidum amplectendo Systema quorundam modernorum Auctorum. Dixi *quoad aliorum instructionem* juxtâ consilium S. Joannis Chrysostomi: *Circâ vitam tuam esto austerus, circâ alienam benignus. In Can. Alligant. 26. qu. 7.*

## TRACTATUS. II.

## DE LEGIBUS.

## CAPUT I.

## De Naturâ Legis.

*Divisio Legis* 1. 2. et 3. *Conditiones* 4. *Promulgatio* 5. ad 8. *Acceptatio* 9. 10. *Si Lex per decennium non esset acceptata* 11. *Si major pars non acceptet etc.* 12. et 13.

1. — **D**EFINITUR Lex : Recta agendorum ratio. Lex non differt à Præcepto , nisi in eo quòd Lex datur Communitati , præceptum particularibus. Dividitur Lex in Æternam , Naturalem , et Positivam. Lex *Æterna* est ratio divinæ Sapientiæ , quæ præscribit hominibus regulas operandi ad illius observantiam. *Naturalis* est eadem ac Æterna ; dicitur enim Æterna , in quantum tradita est à Deo : in quantum verò consideratur ut hominibus manifestata lumine Naturæ , Naturalis appellatur , ad quam pertinent omnia Decalogi Præcepta. Lex *Positiva* est illa , quæ non dicitur à Naturâ , sed Legi naturæ est conformis , et in hoc præsertim ab illâ discrepat , quòd prohibita à Naturali ideò prohibita , quia mala ; prohibita verò à Positivâ , ideò mala , quia prohibita.

Positiva præterea dividitur in Divinam , et Humanam. Ad positivam Divinam pertinent omnia veteris Testamenti Præcepta Cæremonialia , et Judicialia : quæ postea morte Jesu Christi cessarunt : remanentibus firmis tantummodò moralibus , quæ Præcepta Decalogi nominantur. Ad eam quoque pertinent omnia Præcepta novi Testamenti circa Sacramenta. Positiva autem humana subdividitur in Legem Gentium , quæ Jus Gentium nuncupatur , in Ecclesiasticam , et Civilem.

2. — Lex gentium est illa, quæ cum consensu omnium Gentium condita et recepta est, ut sunt v. gr. lex, ut bellum sit justum, lex ut bona directum Dominum non habentia, sint primi occupantis, et his similes. Lex Ecclesiastica est illa, quæ ordinata est ab Ecclesiâ propter gubernationem spiritua-lem Reipublicæ Christianæ, et illa complexa est in Decretalibus, et Sexto Decretalium, in Clementinis, et Extravagantibus, et in omnibus aliis Bullis Pontificiis, quæ obligant absolute omnes Fideles. Canones verò in Gratiani Decreto collecti aliam obligationem non inducunt, quàm quæ ipsismet insita est. Lex Civilis denique, quæ à Principibus sancita est ob bonam populi temporalem gubernationem, et hæc diversa est pro diversitate locorum. Lex Civilis complectitur Digesta, Instituta, Codicem, Authenticam, sive Novellas.

3. — Conditiones Legis, ut obliget, hæc sunt. 1. ut sit *Honesta*; nempè ut sit Religioni conformis. 2. *Iusta*, ut non lædat Subditorum jura. 3. *Possibilis moraliter*, nempè ut non sit nimis observatu difficilis, locorum, et temporum ratione inspectâ. 4. *Utilis bono publico*, et ut bonum sit notabile. 5. *Necessaria*, ad prospiciendum malo, quod frequenter accidit. 6. *Manifesta*, nempè clara, ut habetur *Cap. Abbate, de Verb. Signif.*, ne per obscuritatem captionem contineat, et ut loquitur S. Isidorus *Can. 2. dist. 4.* Secùs cum lex esset obscura posset dissimiliter exponi, et cum possit erroris esse causa, potiùs officeret, quàm prodesset.

4. — Demùm ut lex obliget debet esse *Promulgata*, ut communiter omnes DD. cum S. Thomâ (a), et Scoto (b), ex *Can. In istis, distinct. 4.* ubi legitur: *Leges tunc constitui, cum promulgantur.* Propterea jure merito Doctor Angelicus dicit *loco cit.* quòd Lex nihil aliud sit, quàm *ordinatio promulgata*. Ratio est, quòd cum lex sit regula communis secundum quam toti communitati vivendum est, non potest illa communiter observari, nisi saltem in majoris Communitatis partis venerit notitiam (c).

(a) 1. 2. q. 90. a. 4. — (b) *Dist. 3. q. 4. a. 2.* — (c) *Vide lib. 1. n. 96.*

5. — Hinc est quòd leges Cæsareæ, et Principum saltem in aliquibus Imperatori subjectorum, licèt supremorum; debent promulgari in quâlibet Provinciâ, seu Civitate Metropolitanâ. Et hæ leges non obligant, nisi post duos menses à promulgatione, ut habetur in *Authenticâ, Ut factæ novæ. Coll. 5.*

6. — Dubitatur hîc 1. An leges Pontificiæ, et aliorum Principum ab Imperatore independentium, ut obligent, debeant in quâlibet Provinciâ promulgari? *Prima sententia* affirmat, et hanc tenent plures Auctores graves, ut *Becanus, Natalis Alexander, P. Collet, Continuator Tournely, Cabassutius*; et eam probabilem vocant: *Sylvius, Anacletus, Roncaglius* et alii cum *Angelo, et Medina*. Citatur pro hâc sententiâ quoque *Cajetanus*, sed *Cajetanus* aliud non dicit, quàm Leges Canonicas non obstringere ignorant. Citatur etiam *Lessius*, sed *Lessius* loquitur de legibus contractus irritantibus. Citatur etiam *Sotus*, sed *Sotus* loquitur potiùs de Legibus inhabilitantibus, aut revocatoriis Privilegiorum (a) Fautores hujus primæ sententiæ præcipuè fundantur super *Authenticam* mox suprà allatam, *u' factæ novæ*, dicentes quòd ubi specialis dispositio Legis Canonice non adest, servanda est Civilis; prout deducitur ex *Cap. 2. de Nov. op. nunc.* in quo sic habetur: *Sacrorum Statuta Canonum Principum Constitutionibus adjuvantur.* Dicunt prætereà nimis durum esse, obligare totius Christiani Orbis Fideles ad leges tantùm Romæ publicatas. Sed adhuc juxtâ hanc primam sententiam excipiendæ sunt Bullæ insertæ in Bullario, istæ enim sunt in Corpore legum et in hoc omnes conveniunt, prout testatur Cardinalis *Petra* (b). *Secunda* verò sententia valdè communior, et probabilior, negat, docetque leges Pontificias, et Principum Imperatori non subjacentium, obligare per solam promulgationem, quæ solet fieri Romæ, vel

---

(a) *Becan. de Leg. qu. 1. n. 5. Natal. Alex. Theol. D. 4. a. 3. reg. 25. Colet. tom. 2. de Leg. Sect. 4. pag. 14. Cabass. Tehor. jure l. 1. c. 4. n. 4. Sylv. tom. 2. in 1. 2. qu. 96 art. 4. Concl. 3. Less. l. 2 c. 22. n. 89. Sot. de Just. l. 1. qu. 1. a. 4. et vide Lib. 1. n. 96. v. Not. 2.—*(b) *Card. Petra in Præmia §. 4. n. 50. et 54.*



in Principis Metropoli ; ita *Suarez* , *Bonac. Layman* ; *Azorius* , *Castropal. Cardenas* , *Ferraris* , et *Salmanticensis* , *Valentia* , *Navar. Menoch. Vasqu. Pontius* , *Salas* etc. (a). Ratio , quam adducunt , hæc est : Non dubitatur , quin lex ut vim habeat obligandi debeat esse promulgata , ut per promulgationem possit ad notitiam Subditorum pervenire ; sed circà modum promulgationis , hic modus ab arbitrio , et attentione Legislatoris pendet. Hinc observari , quòd inter omnes Doctores , etiam oppositæ sententiæ , nullus est qui neget ( prout testantur pro certo *Salmanticensis* ) ; non esse opus de suâ naturâ , quòd lex ut obliget in quâlibet Provinciâ publicetur , sed satis est , quòd in Legislatoris Curiâ promulgetur ; et in effectu scribunt *Salmanticensis* , quòd in Hispaniarum Regnis Regiæ leges , eo quòd non tenetur Rex leges Cæsareas servare , tantùm Madriti promulgantur. Sicque similiter plurimæ Bullæ Pontificiæ , juxtà receptum usum , tantùm Romæ locis ibi destinatis promulgantur , atque juxtà hujusmodi Constitutiones deindè omnes Ecclesiasticæ causæ judicantur. Contrà verò Apostolica Sedes , casu quo nolit aliquam legem obligare , nisi post publicationem in Provinciis peractam , id expressè declarat , prout declaravit in Interdicto ab Ecclesiâ imposito à Concilio Lateranensi IV. adversus Medicos , qui Infirmis assistunt , priusquàm illi Sacramentum Pœnitentiæ susceperint , ut habetur in *Cap. Cum infirmitas* , de *Pœnit. et remiss.* Et sic pariter id expressum fuit in Concilio Tridentino *Sess. 24. Cap. 1.* Circà Matrimonii Clandestini invaliditatem.

Hoc posito , cùm Papa determinat Bullas tantùm Romæ promulgari , minimè verisimile est , quòd ipse non intelligat alias Provincias , sed solam Romanam obligare ; cùm enim Pontifex solos Romanos obstrin-

---

(a) *Suar. de Leg. l. 3. c. 16. n. 8. Bonac. de Leg. D. 1. qu. 1. p. 4. n. 16. vers. Concedo etc. Laym. l. 1. tr. 4. c. 3. n. 4. Azor. p. 1. l. 5. c. 3. vers. in hac quæst. Castrop. de Leg. tr. 3. D. 1. p. 11. n. 4. Carden. in 1. Crisi D. 9. c. 20. ar. 12. Ferrar. Bibl. tom. 4. verb. Lex , ar. 2. n. 5. p. 440. Salm. tr. 11. de Leg. c. 1. ex n. 85.*

gere vult, condere particularia solet Edicta (et hæc italico idiomate conficit); sed generalia condens statuta pro totâ Ecclesiâ, eaque solemniter promulgans Clausulis obligatoriis, procul dubio præsumendum est velle omnes obligare Fideles, statim ac ipsis Bullarum pervenerit notitia; quæ facile est, ut è Roma ad alia Regna perveniat; nam omnes ferè Nationes Romæ conveniunt, omnesque Prælati (præsertim remotiores) ibi suos Agentes habent, qui ordinariè de Constitutionibus recentè promulgatis eos certiores faciunt. Præterea, quòd leges Pontificiæ obligant statim ac solemniter promulgantur, id clarè eruitur ex Cap. 1. *Ad hæc, de Postul. Prælat.* ubi dicitur: *Non sit necessarium, cum Constitutio solemniter editur, aut publicè promulgatur, ipsius notitiam singulorum auribus per speciale mandatum inculcare; sed solùm sufficit, ut ad ejus observantiam teneatur, qui noverit eam solemniter editam, aut publicè promulgatam.* Notentur verba, *solemniter editam, aut publicè promulgatam.* Qui igitur certam habet notitiam alicujus Bullæ jam solemniter Romæ promulgatæ; illam equidem observare tenetur. Idem deducitur ex Cap. *Quia cunctis* 1. §. *Nec obstaret, de Concess. præbend.* in 6 ubi habetur: *Lex, seu Constitutio, vel Mandatum nullos adstringunt, nisi postquàm ad notitiam pervenerint eorundem, aut nisi post tempus, infra quod ignorare minimè debuissent.* Quisque ergò illas servare debet leges, quorum notitiam habuit, cum promulgatæ jam fuerint, modo quo Leg slator eas promulgare valet. Certumque est posse Papam ad suas Bullas observandas omnes Fideles adstringere per solam promulgationem Romæ factam, prout quivis Princeps (juxtà id quod suprà vidimus ab omnibus admitti), per solam publicationem in suâ Curiâ peractam cuncta sua Regna ad ipsius Leges obligare quæit.

7. — Illud verò quod magis nostram sententiam confirmat, sunt duo Clausulæ, quæ apponi solent in his Bullis, quæ Romæ promulgantur, et locis consuetis affiguntur. Una ex Clausulis ità dicit: *Ut autem præsentès Litteræ ad omnium notitiam faciliùs deveniant, et nemo illarum ignorantiam allegare valeat;*

volumus illas ad valvas etc. affigi et publicari; si-  
que publicatas omnes et singulos, quos illæ concer-  
nunt, perindè arctare, et afficere ac si unicuique eorum  
personaliter intimatæ fuissent. Altera Clausula dicit:  
*Volumus autem, ut præsentium Literarum tran-*  
*sumtis, etiam impressis, manu alicujus Notarii pu-*  
*blii subscriptis, et sigillo personæ in dignitate Ec-*  
*clesiasticæ constitutæ munitis, eadem prorsus tam in*  
*judicio, quàm extrà illud, ubique adhibeatur obser-*  
*vantia, ac si unicuique forent exhibitæ, vel ostensæ.*  
Hæ autem Clausulæ ostendunt quidem pro certo men-  
tem Pontificis esse, velle omnes Fideles adstringere ad  
hujusmodi Statuta servanda, independenter ab eorum  
publicatione in particularibus Provinciis. Et *Sylvius*,  
ac *Roncaglia* locis suprà citatis, etsi primam sen-  
tentiam ut probabilem admittunt, attamen habent  
pro certo, omnes Bullas Romæ cum prædictis Clau-  
sulis publicatas obligare per se sine aliâ publicatione.  
Certum rectè ait *Roncaglia*, quòd ex relatis verbis  
talium Clausularum firmum argumentum adduci  
potest pro primæ sententiæ probabilitate respectu ad  
Bullas, in quibus præfatæ Clausulæ desunt; nihil  
etenim in legibus frustrà appositum supponi debet;  
illæ autem Clausulæ prorsus superflue essent, si  
omnes Bullæ Romæ publicatæ etiam sinè prædictis  
Clausulis antè quamcumque publicationem in Provin-  
ciis obligarent; dummodò (excipit) in aliquo loco non  
adesset consuetudo non recipiendi indifferenter Bullas  
Romæ quocunque modo publicatas. Quærit autem  
*Sylvius*, loco suprà citato *litt. d. vers. Petes*, an  
Episcopi teneantur promulgare; aut operam dare ut  
omnes leges Pontificiæ observentur, quæ jam Romæ  
promulgatæ fuerint? Et sic respondet: *Teneri cu-*  
*rare, ut observentur, quandò Pontifex significat se*  
*velle, quòd sua lex ubique obliget etiam absque alia*  
*promulgatione ibi factâ. Non tenentur tamen curare,*  
*ut promulgentur, nisi vel mandatum Pontificium ad*  
*eos dirigatur, vel rationabiliter judicent promulga-*  
*tionem in suis Diocesibus esse necessariam. Nihilo-*  
*minus qui legis notitiam habent, ad eam obligari*  
*videntur, nisi illa recepta non fuerit, vel per non-*  
*num ejus obligatio desierit. Cæterum si Pontifex non*

significet, non esse opus aliâ promulgatione, neque Mandatum dirigat ad Ordinarios, probabile est, quòd ipsi non tenentur legem promulgare, vel curare ut observetur, nisi fructum notabilem ex talis legis promulgatione in suis Diœcesibus expectent. Possunt enim tunc interpretari mentem Pontificis esse, quòd lex in diversis Provinciis tunc observari, vel promulgari curetur, quandò Ordinarii existimaverint ità esse pro suis locis expediens, et utile.

Præterea probabiliter censent Suarez, et Layman (a) cum Molina, et Soto, quòd leges Pontificiæ, quæ aliquem infirmant contractum de suâ naturâ validum, sicut fuit Bulla S. Pii V. circa contractus censuales, aut quæ auferunt jurisdictionem, v. gr. in Sacramento Pœnitentiæ; circa has potest benignè interpretari mens Pontificis esse, nolle eas effectum habere, nisi postquàm in Diœcesibus promulgatæ fuerint; alioquin ipsæ in damnum redundarent plurimorum, qui illas invincibiliter ignorarent. Oppositum autem tenendum est quoad pœnas inflictas contrà Clericos malè ordinatos, et Episcopos malè ordinantes, prout Sixtus IV. declaravit. Sic etiam oppositum tenendum quoad leges irritantes aliquem actum ex defectu solemnitatis; quia leges, postquàm vim obligandi habuerunt, valent etiam respectu ignorantium, ut inquit Sanchez et Layman cum Navarr. et aliis (b).

8. — Dubitatur 2. An tempus duorum mensium requisitum ut leges Cæsareæ post earum promulgationem obligent (sicut suprâ dictum est num. 6.) etiam quoad leges Pontificias, et aliorum Principum requiratur? Alii negant; sed probabilissimè affirmant alii plures graves DD. ut Sotus, Valentia, Sa, Silvester, Bonac. Tapia, Menoch. Reginald. Granado cum Salmant. et aliis. Ratio est; quia jam requiritur, ut ad Communitatis notitiam leges perveniant, ut exprimitur in Cap. 1. de Concess. præb. in 6. ubi hæc leguntur: *Lex et mandatum nullos adstringunt...*

---

(a) Suar. de Leg. l. 5. c. 33. n. 8. Laym. eod. tit. c. 2. num. 7. cum Molina et Soto. — (b) Sanch. de Matr. l. 3. D. 17. et l. 9. D. 42. n. 2. Laym. loco mox suprâ cit.

nisi post tempus intrâ quod ignorari minimè debuis-  
set. Quare, cum in lege non præfigitur tempus, taxan-  
dum est prudentum *determinatione*, quæ est jam  
facta in præfatâ Authenticâ *ut factæ novæ*, ne quis dic-  
tum tempus temerè pro arbitrio suo protrahat (a).

9. — Dubitatur 3. An ut Lex obliget, debeat esse  
à Populo acceptatâ? Nulli dubium est quin peccent  
illi, qui non acceptant leges tam Ecclesiasticas, quàm  
Civiles, si sunt justæ, ut habetur ex 28. ex proscrip-  
tis ab Alexandro VII. *Populus non peccat etiamsi  
absque ullâ causâ non recipiat legem à Principe pro-  
mulgatam.* Sed dubium fit, an obliget lex nondum  
acceptata? In hoc secernendæ sunt leges Civiles ab  
Ecclesiasticis. Quoad Civiles, dicunt nonnulli illas  
non obligare, nisi sint acceptatæ, quia Principes à  
Populo potestatem legis condendi recipiunt, ita *Val-  
entia, Becan. Navar. Azor. Bonac.* et hanc proba-  
bilem vocant *Salmant. (b)* et *Croix (c)*; sed oppo-  
situm probabilius defendunt plures alii, ut *Suarez*,  
*Pontius, Laym. Silv. Dian.* et alii (d) dicentes legem  
superioris, si justa est, ex semetipsâ obligare. Quoad  
verò leges Ecclesiasticas nemo est qui dubitet, quin  
Pontifex possit obligare Fideles independentè ab  
eorum acceptatione, cum certum sit Papam legisla-  
tivam potestatem non à Populo accepisse, sed à Jesu  
Christo, qui ei dixit in personâ S. Petri: *Pasce oves  
meas etc. Quodcumque ligaveris super terram etc.*  
idem procedit pro legibus quas statuunt Episcopi in  
suis Diocesisibus, qui etiam à Jesu Christo vel me-  
diatè, vel immediatè (ut dicitur n. 33. *circâ finem*)  
talem receperunt potestatem.

10. — Hoc non obstante dicunt DD. ut *Valent.*  
*Filiuc. Covar. Bonac.* et alii cum *Cabass.* spectare  
ad suave regimen Ecclesiæ, ut non obligent Fideles  
ex Leges, quæ ab ipsis non sunt receptæ, sed nos  
libentiùs adhæremus oppositæ sententiæ *Suar. Laym.*  
*Castrop. Salmant.* etc. ratione superiùs traditâ,  
nempe quòd subditi obedire tenentur, cum præcep-

---

(a) *Ibid. v. Qu. 11. et v. Salm. de Leg. c. 1. n. 91. et 92.* —  
(b) *Salm. de Leg. c. 1. n. 101.* — (c) *Lib. 1. n. 591.* — (d) *Ap-  
Salm. de Leg. n. 292.*

tum est justum, nec tunc præsumi debet superior, ne populus perturbetur, velle eum à præcepti obligatione eximere.

11. — Nihilominus prædicta sententia limitatur 1. si lex per decennium non fuerit acceptata, ut dicunt DD. communiter, imò etiamsi aliquando fuerit acceptata, deindè verò per decennium continuum in desuetudinem abierit: probabile est ampliùs eam non obligare, ut tradunt *Lessius*, *Azor. Nav. Castrop. Sa*, etc. et non improbabilem eam vocat *Bened. XIV. de Syn. l. 13. c. 5. n. 4.* (contrà alios, qui volunt desuetudinem per 40. annos). Nam ità de legibus Civilibus jam dispositum est, nec pro Ecclesiasticis contraria invenitur dispositio, et Canones, qui contrà afferuntur, requirentes præscriptionem 40. annorum, loquuntur de bonis immobilibus, et de juribus realibus Ecclesiæ, sed non jam de legibus. *Secus quippè* (ait cit. *Bened.* pro sententiâ *Suarez*) *lex lata à Romano Pontifice non posset abrogari, nisi per consuetudinem 100. annorum: tantùm enim temporis requiritur ad præscribendum cuncta bona, et jura Ecclesiæ Romanæ: ità ratiocinantur Less. Lugo, Pannorm.* aliique ab his citati.

12. — Limitant 2. *Suar. Lessius Castrop. Tapia, Salmant. Busem.* etc. si major, et sana pars Populi non receperit legem, quia tunc licèt desuetudo non adhuc sit præscripta, et primi legem non acceptando peccaverint, nihilominus alii non tenentur ad legem observandam, præsumendo Principem non instando pro observantiâ, nec transgressores puniendo, nolle obligare quemlibet ad observandum præceptum, quòd à majori parte non observatur (a). Dictum est *alii*; quia quamdiù lex non est præscripta, non ità judicatur de illis, qui contrà legem usum introduxerunt, ut benè advertit *Castrop.* (b).

13. — Limitant 3. *Salas, Castropal.* et *Suarez* (contrà alios), si lex sit contraria consuetudini, quæ viget, vel sit difficilis observantiæ. Sed *Salmanticenses* rationabiliter admittunt dictam opinionem in

---

(a) *Vide lib. 1. n. 129. Lim. 2.* — (b) *Tract. 3. D. 3. p. 2. §. 1. in fin.*

solo casu , quo essent eæ circumstantiæ , quæ si à Principe præcognitæ essent , legem non tulisset (a). Si verò Populus supplicasset pro revocatione , et Princeps non instaret pro observantiâ , probabiliter præsumitur non velle tunc legem obligare , ut dicunt plures Auctores (\*).

## CAPUT II.

De obligatione quam inducit lex.

*Obligatio legum Præceptivarum 14. 15. et 16. An lex possit præcipere actus internos 17. An cum gravi incommodo 18. An lex possit naturalem obligationem tollere 19. An teneamur removere impedimenta 20. et 21. Dubia circà leges 22. et 23. De legibus Pœnalibus Spiritualibus, Privativis, et Inhabilitantibus 24. et 25. De fundatis in falsâ præsumptione 26. De Conventionalibus 27. An necessaria Caritas 28. An Intentio 29. An satisfieri possit pluribus Præceptis pluribus actibus, vel unico actu 30. et 31. An possint esse plura præcepta super eâdem materiâ 32.*

14. — **O**PORTET secernere *leges Præceptivas à Pœnalibus*. *Pœnales* sunt illæ , quæ non obligant ad culpam , sed solùm ad pœnam injunctam. *Præceptivæ* autem obligant ad culpam , et in conscientiâ , sive illæ sint Ecelesiasticæ , sive Civiles , modò istæ non fuerint corruptæ à jure Canonico , ut in Opere probatum est (b) *Leges mixtæ* autem sunt illæ quæ obligant tam ad culpam , quàm ad pœnam , sed istæ enumerantur inter *Præceptivas* ; quarè hìc loquimur , 1. de *Præceptivis* ; 2. de *Pœnalibus* ; 3. de modo quo observandæ sunt *leges*. Et 1. loquendo de *lege Præceptivâ* , illa obligat ratione materiæ gravis , aut levis. Potest nihilominus Legislator secundùm sententiam probabiliorẽ etiam in materiâ gravi sub

(a) Lib. 1. n. 238. v. *Limitans*. (\*) n. 139. fin. — (b) *Vid. in fine Tomi I. v. Advertend. Dub. 3. et in edit. Venet. l. I. n. 106. in fin v. Quæritur hic.*

levi obligare (a) ; Sed non potest in materiâ levi sub gravi obligare , nisi gravis esset finis intentus , aut transgressio ob scandalum , aut ob commune damnum aut ob contemptum redderetur gravis. Contemptus autem , ut sit gravis , debet esse formalis , qui tunc est , cùm aliquis idcò transgreditur legem , in quantum illi non vult se subicere , non autem cùm eam violaret ob incuriam , iram , aut aliam animi afflictionem , *etiamsi frequenter peccatum iteret* , ut docet S. Thom. 2. 2. q. 185. art. 9. ad 3.

15. — Signa quibus discerni potest , an lex obliget sub gravi , sunt 1. Si materia est gravis in seipsâ. 2. Si consuetudo ità interpretata est. 3. Si ità verba significant : v. gr. *Præcipimus sub gravi , aut in virtute sanctæ obedientiæ , omnino , inviolabiliter* , et similia. Cæterum verba simpliciter imperativa , *Volumus , Præcipimus , Facite , Abstinete* , et alia id genus , sunt ambigua , propterea ex circumstantiis arguendum erit , an sint præceptiva , an hortatoria. 4. Si Præcepto addatur pœna gravis , v. gr. exilii perpetui , excommunicationis , irregularitatis , interdicti ad omnem usum , suspensionis totalis , aut ab officio , et beneficio ad tempus notabile. Hoc tamen intelligitur si censuræ sunt *latæ sententiæ* sicut si *ferendæ* juxtà opinionem probabilem (b).

16. — Dubitatur 1. An in casu , quo lex assignat pœnam , et unâ simul præcipit , obliget ad culpam ? Nonnulli id negant , si non exprimitur. Ità dicunt *Cajet. Gomez* , et alii cùm *Navarr. (c)* , qui ait : *Leges humanæ etiam præcipientes , quæ pœnam temporalem constituunt , in dubio ad æternam non obligant , quatenus sunt leges ejus , qui pœnam statuit*. Idque putant satis probabile *Valent. Bonac. Tapia* , et alii cùm *P. Mazzotta* , qui citat etiam pro hoc *Filliucium*. Ratio , quam adducunt , prima , quia non præsumitur , quod princeps velit ad culpam obligare , cùm sufficiens sit pœna ad frænum subditis imponendum ; secunda , quia dicunt sic à consuetudine has leges mixtas interpretari. Sed alii probabilius affir-

---

(a) *Lib. 1. n. 143.* — (b) *Lib. 1. n. 143.* — (c) *Navar. Man. c. 23. n. 55. et 60.*



mant; quia hoc differt (ut dictum jam est) lex pura poenalis à mixta, quia illa obligat ad solam poenam, hæc ad utrumque, alias Legislator frustra poenæ adjecisset præceptum. Ità *Valent. Bon. Tap. Diana, Salm.* etc. (a). Observa dicenda *Tract. X. num. 81.*

17. — Dubitatur 2. An leges humanæ possint præcipere actus internos? Directè non possunt, quia solus Deus potest judicare de internis. Possunt tamen indirectè, cum actus internus necessariam habet connexionem cum externo, v. g. Ecclesia præcipiendo annualem confessionem, præcipit quoque dolorem, et propositum, sinè quibus non consistit Confessio; præcipiendo fieri matrimonium, præcipit consensum: conferendo Parochiam Clerico, præcipit ut eam ipse acceptet animo infrà annum ascendendi ad Sacerdotium. Quoad autem actus externos, licèt occultos, nulli dubium est, quin lex possit eos universaliter præcipere, aut prohibere, prout imposuit excommunicationem hæresi occultæ externæ, et homicidio occulto irregularitatem (b).

18. — Dubitatur 3. An cum gravi damno aut incommodo teneatur quis ad observandam legem humanam? Communiter DD. negant, præter duos casus. 1. Si Legis observatio sit moraliter necessaria bono publico, quod semper bono temporali privato præferendum est. 2. Si transgressio legis redundaret in fidei, aut Ecclesiæ contemptum. Ità communiter DD.

19. — Dubitatur 4. An lex humana possit tollere naturalem obligationem, ut est lex irritans testamenta, aut contractus initos sinè solemnitatibus: aut lex deobligans filiumfamilias à solvendo mutuo? Et affirmamus cum probabiliori *Sanch. Castrop. Salmant.* etc. quia lex humana ob commune bonum à Deo obtinuit potestatem rerum Dominium transferendi: licèt contraria etiam sit probabilis (c).

20. — Quæritur 5. An teneamur auferre impedimenta proxima, quæ obstant legis executioni? Hic sermo est de lege humanâ (aliter procedit de lege naturali) et distinguendum est. Apponere aliquam

---

(a) *Lib. 7. n. 147.* — (b) *Lib. 2. n. 100.* — (c) *Lib. 3. n. 711. 757. et 927.*

causam, quâ quis subtrahitur à legis obligatione, est licitum; quare si hodiè est festum, licitè potes aliò peragrarè, ubi dies festus non agitur, et ab audiendo Sacro te eximere. Apponere autem causam non extrahentem, sed tantum deobligantem aliquem à lege, non licet. Hinc qui sinè justâ causâ aliquem laborem assumit, quo inapotens fit ad jejunandum, peccat, et quidem non solum si ideò laborat, ut eximatur à jejuniò, sed etiamsi laborat prævidendo exemptionem: quia omnis lex exposcit, ne sinè justâ causâ impedimentum suæ observantiæ ponatur. Hæc est sententia S. Thomæ (a) quam nos cum Laym. Sanch Mazzot. et Castropalao (qui eam communem appellat) contra Salmant. et alios, sequimur (b).

21. — An autem excommunicati, et in carcere detenti teneantur curare, ut absolvantur, aut à vinculis liberentur, quo possint adesse Sacro? communiter negant, quia hujusmodi impedimenta sunt remota. Sed isti etiam peccant, si ideò non curant liberari, ne teneantur sacrificio adesse. Imò probabiliter dicunt Bonac. et Trullench. quòd si ipsi facile possunt liberari, nec excusarentur, quia cum levi incommodo tenemur impedimentum remove, ut præcepto gravi, etiamsi humano, satisfaciamus (c) Proculdubio autem supradicti tenentur procurare, ut liberentur, ut Præceptum Paschale, quod quidem Divinum est, adimpleant (d).

22. — Dubitatur 6. An sit obligatio observandi legem, si hæc autem ejus obligatio dubia est? Respondetur negativè. 1. Quandò dubitatur adsit nec ne lex, et factâ diligentia dubium perseverat (ut dictum est de Conscientiâ Tract. 1. num. 15. et 32) 2. Quandò dubitatur, an aliquid comprehendatur nec ne in lege, aut si inceperit nec ne ejus obligatio, ut dicunt Suar. Sanch. Castropal. et Salm. cum Tapia, Villalob. (e). Et idem dicunt DD. citati cum dubitatur an lex promulgata sit nec ne (f).

---

(a) 1. 2. q. 71. a. 5. — (b) Vid. Lib. 3. n. 1045. et 1046. — (c) Lib. 3. n. 125. v. Excommunicatas. — (d) Vid. Lib. 7. n. 161. — (e) Salm de Leg. c. 2. n. 110. — (f) Vide Opus morale lib. 1. n. 97.

23. — Contrà verò debet observari lex 1. cùm dubitatur an recepta sit, quia cùm constet de lege, pro eâ stat possessio, cùm etiam pro lege stet præsumptio, quòd sit, ut debebat, acceptata: hæc est sententia probabilior cum *Sanch.*, *Castropal.* et *Salm.* contrà alios (a). 2. Cùm dubitatur an Legislator sit legitimus superior, qui tamen est in possessione suæ jurisdictionis. Excipiunt *Sotus*, *Sanch.* *Tapia*, *Salas*, *Lopez*, etc. casum quo esset nociva, aut valdè molesta res præcepta (b). 3. Cùm dubitatur an lex sit injusta, quia in dubio Superior est in possessione juris præcipiendi (c). Sed id pariter communiter limitant DD. si præceptum esset subditis damno, aut gravi oneri (d). In dubio autem an lex contineat præceptum aut monitionem, aut an liget ad pœnam, an etiam ad culpam, an ad culpam gravem, vel ad levem, in his dubiis pro mitiori parte standum est (e). Secùs verò in dubio, an res præcepta sit vel ne licita, certè tunc parendum superiori, ut dictum est *Tractat. I. num.* 18.

24. — Deveniamus II. ad leges purè pœnales, quæ obligant (ut diximus) non ad culpam, sed ad solam pœnam: prout sunt leges prohibentes, ne arbores incidantur, ne annona abstrahatur, et aliæ id genus. In hoc notandum est, quòd pœnæ spirituales sub pœnâ censuræ, irregularitatis, inhabilitatis, impedimenti matrimonii etc. cùm sunt latæ sententiæ, et non exigunt extremam executionem, statim atque patratum est delictum, incurruntur in Conscientiâ, antè omnem Judicis sententiam, ut constat ex *Cap. Non dubium*, de *Sent. excom.* et *Cap. Significasti*, de *Hom.* Idem procedit de pœnis inhabilitantibus, ac de pœnis privativis aliquo jure acquirendo; dummodo Reus non teneretur ad pœnam exequendam cum suâ infamiâ (f).

25. — Aliud est autem si pœna privativa est aliqujus acquisiti juris, v. g. Beneficii, electionis etc. quia tunc semper requiritur sententia, saltem *Criminis*

---

(a) *Lib. 1. n.* 97. in *fin.* — (b) *Ibid. n.* 98. — (c) *Lib. 1. n.* 99. — (d) *Vid. lib. 4. n.* 47. v. *Limitant.* — (e) *Vide Salm. de leg. 1. 2. n.* 12. — (f) *Lib. 1. n.* 148. et 149.

*declaratoria*, licet in lege dicatur quòd *ipso facto* incurratur, ut deducitur ex *Cap. Secundum de Her. in 6*. Et hoc tantò magis procedit si pœna est positiva, nimirum reipsâ restituendi, aut renuntiandi, aut aliud patiendi juxtâ leges, quæ (v. g. obsimoniam, aut alienationem bonorum Beneficii) privant personas etiam beneficiis antea obtentis: nimis enim durum est, quòd quis teneatur contrâ seipsum pœnas exequi. Excipitur solum, si pœna sit inhabilitans, sive conditionalis *sinè quâ non*, ut est pœna à Tridentino Parochis, et Canonicis non residentibus suos non faciendi fructus; vel ut est pœna imposita Beneficiatis simplicibus Horas Canonicas non persolventibus de non lucrando redditus (a). Hujus generis est pœna, ut privatus existat Beneficio Curato, qui intrâ annum Sacerdotio initiari negligit, ut habetur, *Cap. Licet de Elect. in 6*.

26. — Quæritur hîc 1. An leges pœnales fundatæ in falsâ præsumptione obligent in Conscientiâ? Oportet distinguere præsumptionem dictam *præsuppositionis*, quæ est præsuppositum facti, à præsumptione *definitionis*, quæ est præsumptio juris, quòd judicet secundum præsuppositum factum. Igitur si facti præsuppositio est falsa, lex non obligat; v. g. si in judicio falsè probatum fuerit tuum animal intulisse damnum, tunc non teneris solvere pœnam, et latâ sententiâ, ut solvas, licet externè, ut vitetur scandalum, tenearis solvere, tamen potes occultè tibi compensationem facere. Idem valet pro hæredibus, qui ob neglectum Inventarium, debita defuncti solvendo multantur ultrâ bona hæreditaria, cùm reapsè credita excedunt hæreditatem. Secùs verò dicendum, si falsa præsumptio, solùm esset falsa *Juris*: v. g. si tuum animal certè fuerit causa damni, sed falsa est præsumptio quòd id acciderit tuâ culpâ; quia tunc teneris solvere pœnam (hoc intelligitur post sententiam), quia legis finis non solùm est ut puniat, sed et ut reddat homines diligentiores ad evitanda damna aliorum (b).

---

(a) *Lib. 3. n. 663. lib. 4. n. 126.* — (b) *Lib. 1. n. 110. in fine v. Quæro.*

27. — Quæritur an pœnæ conventionales appositæ in contractibus debeant solvi antè sententiam? Alii affirmant; alii negant, ut *Nav. Lessius, Sanchez, Castrop. Vasq. etc.* et *Salm.* vocant hanc sententiam æquè probabilem, ex eo quia quicumque se obligat, intendit se obligare juxtà legum dispositiones, quæ non obligant ad pœnas nisi post sententiam (a).

28 — Veniamus III. ad modum quo observandæ sunt leges. In quo notandum 1. quod licèt necesse sit, hominem esse in gratiâ, ut ejus opera sint meritoria, nihilominus necesse non est habere caritatem, ut satisfaciat præcepto v. gr. jejunii, Horarum Canoniarum, Sacri etc. quemadmodum pro adimplendo voto, Pœnitentiâ Sacramentali; etenim ut docet *S. Thomas (b)*, cum aliis communiter, finis præcepti non cadit sub præcepto: *Non enim* (sunt verba Angelici) *idem est finis præcepti, et id de quo præceptum datur.* Quarè potest quis satisfacere præcepto jejunii, etiam ductus fine non recto, putà avaritiæ, aut inanis gloriæ (c).

29. — Notandum 2. ad præcepti satisfactionem esse quidem necessariam intentionem rem præceptam ponendi: ideò qui adest Sacro sinè animo assistendi, non satisfacit (d); sed dùm opus præceptum ponitur, opus non est, ut velit satisfacere præcepto. Itaque si quis in die festo adest Sacro, satisfacit quidem, licèt ignoraret esse festum (e); Imò etiamsi sciret esse festum, et non intenderet satisfacere, aut satisfaceret solo timore à Patre vel à Domino incusso; ipse enim, quamvis peccaret ob suum pravum animum, satisfaceret tamen præcepto, illud reipsâ adimplendo, dùm talis satisfactio non pendet à propriâ, sed à superioris voluntate: Quapropter dùm satisfacit non potest nolle satisfacere; et sibi debitum imponere, cui jam persolvit, uti sapienter dicunt *Suarez, Lessius, Tournely, Pontius, Sanch. Castrop. Coninch. Busemb.*

---

(a) *Num.* 150. — (b) 1. 2. q. 100, a. 9. et 10. — (c) *Lib.* 1. n. 162. et *lib.* 3. n. 264. — (d) *Lib.* 1. n. 162. et *lib.* 3. n. 264. — (e) *Lib.* 1. n. 165.

*Salmant.* et *La Croix* communissimè cum aliis (a). Aliud contrà esset, si quis habens votum, aut iuramentum, aut pœnitentiam adimplendam, opus exequens non intenderet satisfacere suo debito. Hoc tamen intelligitur quoties conscius voti etc. opus suum alteri fini destinasset, aliàs etiam satisfaceret; nam quilibet ex generali intentione priùs intendit debito satisfacere, quàm iis quæ sibi liberâ voluntate imposuit; Ità *Suarez*, *Azor. Less. Laym. Busemb. Roncaglia* etc. (b).

30. — Notandum 3. benè quidem posse satisfieri eodem tempore pluribus præceptis diversis actibus compossibilibus: et sic in audiendo Sacro de præcepto, potest recitare horas Canonicas, aut alias orationes, quibus tenetur ex voto, aut Pœnitentiâ (c).

31. — Notandum 4. unico solo actu posse satisfieri pluribus præceptis in eandem materiam ob eundem finem cadentibus (modò non sit in materiâ justitiæ). Quare in festis, diebus Dominicis occurrentibus, satis est semel Sacro adesse. Sic etiam subdiaconus Beneficiatus unicâ Horarum recitatione satisfacit oneri Beneficii, et Ordinis (d). Et tunc qui duo præcepta violat, unicum committit peccatum. Secùs verò, si præcepta habent diversa motiva. Quare qui tenetur jejunare ex voto, aut ex Pœnitentiâ à Confessario injunctâ, non satisfacit jejunando in vigiliâ (e), nisi Pœnitentia statuta esset per mensem, in quo incidit vigilia (f).

32. — Notandum 5. transgredientem unico actu diversa præcepta à diversis legislatoribus edita super eadem materiâ, unum solum peccatum committere, si legislatores idem habuerunt motivum. Qui committeret homicidium sub Excommunicationis pœnâ prohibitum etiam ab Episcopo, unum peccatum committeret, quia tam Deus, quàm Episcopus habuerunt unum tantum motivum Justitiæ: sic pariter Sacerdos beneficiatus omittens officium (quoties

---

(a) *Lib. 2. n. 164. et fœsius lib. 4. n. 116.* — (b) *Lib. 1. n. 263. et lib. 3. n. 170. Q. 11. verb. Limitant; adde Salm. de leg. c. 2. n. 162.* — (c) *Lib. 3. n. 409. et lib. 4. n. 167. v. circa in fin.* — (d) *Lib. 1. n. 156. cum Salm. c. 2. n. 109.* — (e) *Lib. 3. n. 166. ad 2. cum Salm. de Leg. c. 2. n. 151.* — (f) *Vide Salm. loc. cit.*

vellet restituere fructus) unum peccatum committeret contra Religionem, secus verò si motiva sunt diversa. Hinc frangens jejunium in vigiliâ promissum etiam voto, duplex peccatum committit; Ità etiam qui occiderit Clericum peccat dupliciter contra justitiam ex præcepto divino, et contra Religionem ex præcepto Ecclesiæ, quæ ex Religionis motivo prohibuit quominus in suos Ministros injuria inferretur ob reverentiam eis debitam (a); cum regula generalis sit, quòd cum Ecclesia aliquid statuit, sub illius virtutis specie collocat, ob cuius motivum rem præcipit (b).

### CAPUT III.

De iis qui possunt Leges ferre.

*Quis possit ferre Leges Civiles, et quis Ecclesiasticas*  
33. *De Decretalibus, sive Responsis Pontificis, et de Declarationibus SS. Congregationum, ac Decisionibus Rotæ Romanæ* 34. et 35.

33. — **L**EGES Civiles tantum possunt fieri ab illis qui habent Dominium Supremum, ut sunt Reges, Republicæ, et cæteri Principes superiorem non cognoscentes. Reliquæ universitates subditæ possunt duntaxat statuta conficere, quibus se obligant Cives ex contractu; sed etiam aliqua præcepta ad tempus revocabilia à Principe. Hæ Leges Civiles, quæ bonos mores respiciunt (ut diximus), jam obligant in conscientia, ut ostensum est in Opere Morali, quoties non correptæ sunt expressè à jure Canonico, quod vult ut observentur, Cap. 1. de Nov. Op. et Cap. super, de Privil. (c). Vide dicta num. 16. circa leges mixtas. Leges autem Ecclesiasticæ possunt fieri 1. à Papa pro Orbe. 2. à S. Conciliis Generalibus, modo congregata jussu Pontificis, ipsiusque auctoritate confirmata sint (in nostro Opere Morali pro-

---

(a) Lib. 1. n. 167. et fusiùs l. 5. n. 33. — (b) Ibid. l. 5. n. 33. v. ad agnosc. — (c) Vide in Calce Tom. 1. edit. Neap. et Editio Venet. l. 1. n. 106. in fin.

lixam Dissertationem lucubravimus, quâ ostendimus omnes Definitiones à Papa ex cathedrâ loquente, sive Ecclesiâ circâ Fidem, et mores docente, esse infallibiles; et ejus potestatem esse suprâ Concilia, quæ totam vim et infallibilitatem non aliundè, nisi ab ejus confirmatione desumunt; Vide *Lib. 1. ex n. 110.*) 3. à Conciliis Nationalibus, aut Provincialibus, nimirum constantibus ex Episcopis cum suis Archiepiscopis, aut ex Synodis Episcopi cum suis Parochis. 4. ab Episcopis pro suâ cujusque Diœcesi: *Cap. 2. de Major. etc.* et *Cap. 2. de Constitut. in 6.* sed accedente Concilio suæ Diœcesis, ut ex *Cap. Quanto, de iis quæ fiunt à Præl.* A quo autem Episcopi habeant immediatè hujusmodi facultatem; alii dicunt à Papa; alii à Deo cum subordinatione ad Papam (a): plures alij, ut *Sotus, Panorm. Abulens. Cabassut. Sanch. Pontius, Covarr. Huert. Perez, Henrig.* etc. tenent Episcopos tantâ frui potestate in suâ Diœcesi, quantâ Pontifex in totâ Ecclesiâ, modò non sint de iis, quæ spectant ad Ecclesiam universalem, ut sunt Definitiones circâ fidem, aut res magni momenti, v. g. impedimenta Matrimonii, et his similia (b). Capitula autem Cathedralium nequeunt ferre leges (nisi circâ propria Capitula) vivente Episcopo, possunt verò Sede vacante (c).

34. — Dubitatur hîc I. An Epistolæ Pontificiæ, Responsalia, sive Declarationes non insertæ in corpore juris, habeant vim obligandi? Respondetur affirmativè, semper ac authenticæ sint, prout declaratum habetur ex *Can. Si Romanorum 1. Dist. 19.* dummodò sufficienter sint promulgatæ, ut dicit *Bonacina (d)* inquiens, interpretationem legis factam auctoritativè non habere vim legis, nisi promulgetur; quia de ratione legis promulgatio est; citatque *Salas*, et alios; ac deindè *nu. 12.* sic subdit: *Ex quo licet inferre Epistolas Pontificias non habere vim legis, nisi publicentur eo modo, quo publicari*

---

(a) *Lib. 1. n. 104.* — (b) *Vide Lib. 6. n. 980. v. Sed.* — (c) *Lib. 1. n. 104. circâ fin.* — (d) *Bon. tom. 2. de Leg. D. 1. q. 1. p. 4. n. 11. et 12.*



*publicari solent leges. Idem ait Castropal. (a) dicens: Debet autem hæc Declaratio (Pontificia) publicari eâ solemnitate qua lex, aliàs non erit authentica, quæ legis obligationem non habebit, sed solum erit Declaratio doctrinalis. Idem docet P. Suarez, nam licet prius in Opere de Legibus (b) dicat: Ordinariè Epistolæ, sive Responsa Pontificia sunt potiùs non constitutiva, sed declarativa; et habent vim legis obligantis ad illam interpretationem tenendam, vel ad servandum antiquum jus secundùm illam interpretationem; Deindè tamen (c) sic addit: Ut authentica sit interpretatio, oportet, ut habeat legis conditiones, ut sit justa, (nota) sufficienter promulgata, etc. Undè consequenter fit, ut hæc lex interpretativa alterius exposita sit dubiis, ità ut aliæ interpretationes necessariæ sint. Idque satis confirmatur (nempè has Declarationes Pontificias sive Responsa) indigere promulgatione, ut obligent ex eodem citato Can. Si Romanorum, ubi refertur et confirmatur Decretum S. Leonis Papæ, et sic dicitur: Ne quid verò sit, ut quid à nobis prætermissum fortè credatur, omnia Decretalia constituta tam beatæ recordationis Innocentii, quàm omnium Prædecessorum nostrorum, quæ de Ecclesiasticis ordinibus, et Canonum promulgata sunt disciplinis, ità à vestrà dilectione custodiri mandamus. Nota illud, quæ promulgata sunt. Verumtamen hic benè advertit Roncaglia (d), quòd non solum Constitutiones Pontificiæ, quæ solemniter promulgatæ sunt, obligationem legis induerunt, sed etiam omnes aliæ quæ ex usu et consensu Ecclesiæ universalis jam à pluribus sæculis habentur pro sufficienter promulgatis et authenticis. Dubitatur II. An Declarationes Sacrarum Congregationum habeant vim legis? Priùs ut certum habendum, quòd Decreta S. Congregationis Rituum putanda sunt ut oracula Pontificis, ut Bulla 74. Xisti V. qui voluit etiam Capellam Ponti-*

(a) Castrop. Tr. 3. de leg. D. 4. p. 3. §. 1. n. 2. — (b) Suar. de leg. l. 4. c. 14. n. 3. — (c) Idem ib. l. 6. c. 1. n. 3. — (d) Ronc. de leg. Qu. 2. c. 2. q. 7. Resp. II.

ficiam subijci mandatis hujus Congregationis : ejus verò Declarationes, ait *Turrianus* apud Merati (a), licèt habendæ sint tantùm ut responsa sapientissimorum virorum, attamen præferendas esse aliorum DD. opinionibus. Et meritò, quia cùm ex Tridentino non possint induci novi Ritus, nisi approbati ab Ecclesiâ, utique sententia eorum præferenda est, qui maximè sunt versati circà ritus, et in quorum potestate est antiquos interpretari, mutare, et novos constituere, sententiæ eorum qui nec ullam potestatem circà hos habent, nec tantâ peritiâ callent. Quoad Declarationes aliarum Congregationum non est dubium quin in casibus particularibus, pro quibus fiunt, obligent uti leges. In similibus autem, multi DD. probabiliter affirmant, modò sint munitæ sigillo, et subscriptione Cardinalis Præfecti, et consulto Pontifice, ut præscripsit Xistus V. in Bulla 74. Multi alii tamen etiam probabiliter dicunt : Declarationes, licèt sint maximæ auctoritatis, nihilominus non obligant nisi sint emanatæ de mandato Pontificis, et editæ sint pro totâ Ecclesiâ, ità ut Papa declaret velle observandas esse ab omnibus Fidelibus; ità *Sanch. Tournely, Bonac. Vasqu. Cardenas, Terillo, Vega, Villalob. Tapia, Lezana, Salmant. et Mazzotta.* Ratio est (ut dicemus de Interpretatione, n. 73. et 74), quoties sunt factæ Declarationes ab aliis quàm à proprio Legislatore, sunt novæ Leges, quæ indigent novâ et solemnî promulgatione, juxtâ id quod dictum est *Tract. II. num. 5.* quæ promulgatio non advenit Declarationibus SS. Congregationum (b).

35. — Decisiones Rotæ Romanæ tantò minore robore sunt donatæ, ut leges universales habeantur. Si verò Regulæ Cancellariæ ubique obligent; negant *Lessius, Valerius, Diana*, et alii eâdem ratione, quia non sunt publicatæ, undè dicunt valere tantùm ad directionem Curiæ Romanæ. Sed *La-Croix, Gomez, Azorius*, et alii affirmant propter contrariam praxim, saltem quoad illas Regulas, quarum materia est communis, aut non addicta soli Curiæ Romanæ (c).

---

(a) *Mer. t. 1. p. 3. tit. 11. ad III. v. Hujus.* — (b) *Lib. 1. n. 106. v. Secunda.* — (c) *Viâ. La Croix l. 1. n. 575.*

CAPUT IV.

De iis qui tenentur Legibus.

*Quis tenetur Legibus 36. An Pueri 37. An Legislatores 38. An Peregrini 39. et 40. Si Peregrini morentur per breve tempus 41. An Episcopus possit dispensare cum Peregrinis in votis, jejuniis etc. 42.*

36. — **A**DVERTENDUM, quod alii non tenentur legibus Humanis, de quibus hic est sermo, et isti sunt infideles, Pueri, et mente capti. Alii verò sunt excusati à legibus, ut sunt Ebrii, Dormientes, et Ignorantes. Quà de re non licet secundos inducere ad legem transgrediendam, primos benè quidem. Sed semper peccatum est inducere quemquam ad violandam legem naturalem (a).

37. — Dicunt *S. Antoninus*, et alii, Pueros non statim post usum rationis teneri legibus Ecclesiasticis, sed saltem post decennium. Hæc opinio jure merito ab aliis rejicitur. Imò si quis parvulus in aliquo casu raro, etiam antè septennium perfecto rationis usu polleret, iste quoque valdè probabiliter teneretur, ut multi censent, licèt contrariam opinionem non puto improbabilem, ex eo quòd dicit *S. Thom. (b)* quod leges non respiciunt casus raros, sed communiter contingentes: *Legislator attendit ad id quod communiter et in pluribus accedit*. Præcepto tamen annuæ Confessionis hujusmodi Parvulus, si mortaliter peccasset, procul dubio teneretur; quia in *Cap. Omnis utriusque sexus, de Pœnit. et rem.* expressè obligat quemlibet, qui ad annos discretionis pervenerit. In dubio verò an quis Parvulus ad usum rationis perfectum pervenerit, nec ne: antè septennium non præsumitur pervenisse, post illud præsumitur utique (c).

38. — Legislatores etiam tenentur ad leges, saltem sub levi, ob exemplum cui debent esse subditis; Et

---

(a) *Lib. 1. n. 153.* — (b) 2. 2. q. 147. a. 4. — (c) *Vide lib. 3. n. 270. et c. 10. 12.*

sub gravi si res agitur de taxatione pretii, aut de valore contractûs (a).

39. — Quoad Peregrinos plura notanda sunt. 1. Peregrinus tenetur quidem legi communi pro quolibet loco, modo illa Regio sit Catholicorum, et ibi non adsit contraria consuetudo (b); sed non legibus localibus suæ Patriæ, quamdiù ab eâ abest, quamvis eo animo discederet, ut ab illis eximeretur. Hoc idem efficeret si in locum exemptum, etsi ipsiusmet Diœcesis, se conferret. Et hâc ratione probabiliter sunt ab Episcopi jurisdictione exempta Monasteria, et Ecclesiæ Regularium, ubi competens numerus manet, ut dicunt *Sayrus*, *Avila*, *Henriquez*, et *Salmant.* cum *Candido*, et *Diana*; Nav. Concil. Trident. sess. 14. cap. 5. de Ref. in fine vocat exemptas tam personas, quàm loca Regularium (c).

40. — Nota 2. quòd Peregrinus tenetur legibus loci, ubi moratur, licèt ibi contraxisset tantùm quasi domicilium, juxtà communem sententiam, quicquid dicant nonnulli Auctores, qui requirunt verum domicilium. Hic advertendum quòd ille dicitur contrahere verum domicilium, qui habet animum perpetuò permanendi alicubi, et hic animus præsumitur, cum ille eò majorem partem suorum bonorum transfert, aut ibi construit, aut emit domum: aut expressè declarat hunc animum habere: aut ibi moratus est decem annos, nullum præbens indicium, quòd velit illinc ampliùs discedere. Quasi domicilium contrahitur cum majorem anni partem aut per notabile tempus anni incolit aliquod oppidum (d).

41. — Dubitatur I inter DD. an teneatur legibus loci Peregrinus, qui breve tempus ibi moratur? Prima sententia affirmat cum *Pontio*, *Covar. Salas*, *Topia*, et vocant eam probabilem *Sanch.* et *Salmant.*; quia (juxtà quod ipsi dicunt) expedit publicæ paci, et ad vitanda scandala, ut omnes observent leges loci ubi reperiuntur. Sed plures DD. dicunt non sufficere simplicem illàc transitum, ut quis teneatur legibus illius loci: Alii dicunt sufficere unum diem

---

(a) *Lib. 3. n. 154.* — (b) *Ibidem n. 16.* — (c) *Lib. 1. n. 156. v. Notandum II. in fin.* — (d) *Cit. n. 156.*

moræ, alii requirunt majorem partem diei. Sed magis probe disserit *Pater Suarez*, qui sic distinguit. Si Peregrinus ille illuc advenit tanquam in terminum itineris sui, tunc tenetur ille ad omnes leges illius loci; si verò illuc tantum proficiscitur, non obligatur præceptis positivis v. gr. Jejunii, et Missæ, quia præcepta positiva tantum obligant incolas, non verò illuc transeuntes; sed tenetur ad præcepta negativa, quæ obligant *pro semper*, cum habeant tractum successivum per illum totum diem. Hæc prima sententia est satis probabilis, sed communius, et probabilius est non teneri legibus loci Peregrinum qui ibi quasi domicilium non contraxit, per moram (ut diximus) majoris aut notabilis partis anni, quia lex non obligat nisi subditos, quales non judicantur, qui parum temporis alicubi morantur. Dummodò (limitatur) non sit lex de jure communi, aut versaretur circa validitatem contractuum (a).

42. — Dubitatur II. an Episcopus loci possit dispensare cum Peregrinus Vota, juramenta, jejunia, et festa circa opera servilia? Affirmat prima sententia cum *Pontio*, *Tannero*, de *Januarii* (et probabilem vocat *Castropal.*), ratione quâ suprâ, nempe quòd Peregrinus pro quâlibet mansionem etiam brevi alicubi factâ (modo eò adveniat tanquam ad terminum sui itineris) fit subditus Episcopi loci, et si est probabilis hæc ratio, ut diximus, probabilis quoque est sententia hæc. Sed juxta id quòd dictum est, communior ac probabilior est sententia negans posse Episcopum dispensare vota, nisi cum iis Peregrinis, qui quasi domicilium contraxerunt (b):

## CAPUT V.

Quæ causæ excusent à Præcepti transgressione.

*Excusat Ignorantia* 43. *Timor* 44. *Impotentia* 45.

43. — **E**XCUSAT 1. Ignorantia, si est invincibilis etiam in materiâ Præceptorum Naturalium; quoad

(a) *Lib. 3. n. 332. in fin. et Edit. Venet. l. 1. n. 156. Dub. 2.*

(b) *Lib. 1. n. 158.*

conclusiones tamen solas mediatas, ut explicatum est superiùs de Conscientiâ *Tract. 1. n. 5.* Secùs verò si est vincibilis, nempè quandò homo potest, et debet scire veritatem et prætereà advertit ad obligationem dubium superandi, et negligit eam; Ita communiter *S. Antonin. Suar. Silvius, Gerson, Nav. Sanch. Castropal.* etc. ex *S. Thom. de Verit. qu. 15. a. 4. ad 10. (a).*

44. — Excusat 2. Timor; sed distinguenda sunt præcepta positiva à Naturalibus. A *Positivis* etiam Divinis excusat timor gravis mali, si Præcepti observantia non esset necessaria ad evitandum commune scandalum, aut ad conservandum ergà Ecclesiam obsequium: putà si quis cogeretur ad violandum jejuniū in Religionis Catholicæ contemptum, quia tunc tenemur præcepto obtemperare, etiam cum vitæ jacturâ. Præcepta verò *Naturalia* si sunt affirmativa, non semper tenemur ea observare: Quarè cum vitæ dispendio non tenemur depositum reddere, nec votum persolvere, etc. At à *Negativis*, putà à non fornicando, à non pejerando, nullus timor unquàm excusat. Et si ab aliquo præcepto negativo, putà à non occidendo, non furando excusat aliquandò timor (cùm liceat occidere injustum aggressorem pro tuendâ vitâ, et alterius bona surripere, si alia via non patet, quâ liberari possit ab aliquâ gravi infamiâ) tunc dicimus quòd cessat in tali casu præceptum. Et idem meliùs dicendum de præceptis Affirmativis, quin fiat illa distinctio, quam nonnulli assignant, nempè quòd præcepta *Naturalia* et affirmativa obligant *semper*, sed non ad semper, *Negativa* verò semper et ad semper (b).

45.—Excusat 3. Impotentia. An autem cùm non possit observari totum præceptum, debeat observari pars possibilis? Hâc distinctione utendum. Si præceptum commodè divisionem patiatur, ità ut in quâlibet ejus parte etiam salvetur finis præcepti, tunc licèt non possit servari totum præceptum, debet adimpleri pro parte possibili; v. gr. si non potes recitare omnes Horas Canonicas, debes recitare partem quam

---

(a) *Lib. 1. n. 7. ad 11. et n. 168.* — (b) *Lib. 1. n. 175.*

potes, et opposita propositio jam proscripta fuit ab Innoc. XI. et est 54; ità etiam tempore Jejuniorum si dispensatus es ad carnes, teneris tamen servare unicam Comestionem, ut declaravit Benedictus XIV. in Constitutione: *Ambigimus* (a). Secùs procedit, si in parte non salvatur ratio præcepti; Quare si ex voto teneris Romam proficisci, et illuc non potes pervenire, non est obligatio partem itineris aggredi (b). Excusant etiam à Lege Dispensatio, Epikeja, et Consuetudo contraria, sed de his seorsim in sequentibus Capitibus.

## CAPUT VI.

### De Dispensatione.

*An ad Dispensationem requiratur semper causa justa* 46. *Si est obreptitia etc.* 47. *Potest expostulari etià à Tertio* 48. *Dispensatio tacita* 49. *Causa Dispensationis* 50. *In dubio si indigeatur dispensatione* 51. *An superior teneatur dispensare* 52. *Dispensatio concessa, cum bonâ, aut malâ fide, sed sine causâ* 53. *Concessa ob timorem* 54.

46 — **D**ISPENSATIO Legislatoris aut illius, qui ei similem habet potestatem pariter excusat à lege; dummodò justa adsit causa, aliàs peccat qui dispensat: sed nonnisi venialiter (si ipse est primarius Superior), ut probabiliter dicunt *Sanch. Castropal. Laym. Salmant. Pontius*, etc. Et in dubio an causa sit justa nec ne, ab omni culpâ est immunis, ut rectè dicunt *Sanch. et Salmant. cum Granado, et Diana* (quicquid dicat *Bonac.*). Qui verò hujusmodi Dispensationem, nempe sine causâ, à superiore impetrat probabiliter non peccat dum ipsâ utitur, *Suar. Salmant. Castrop. Pontius* etc.

47. — Notandum 1. quòd cùm illud quod exponitur pro Dispensatione est subreptitium, vel obreptitium (nempe cùm falsum exponitur, vel veritas tacetur), Dispensatio est nulla quoties tacetur quod de *Stylo Curiae* erat exprimendum: seu cùm

(a) Vide l. 3. n. 1023. — (b) Lib. 1. n. 177.

causa finalis, sive motiva (non autem impulsiva) quæ exponitur, est falsa. In dubio verò an causa falsa allegata, sit finalis, aut impulsiva, dicunt *Sancti Pontius, Castrop. Salmant. etc.* dispensationem esse validam; Etenim leges in dubio favent actûs validitati. *L. Quoties, ff. de Reb. dub.* Et idem dicunt DD. citati, si multæ causæ fuerint expositæ, quarum aliæ veræ, aliæ falsæ, sed quælibet earum erat causa sufficiens ad Dispensationem impetrandam (a).

48. — Notandum 2. quòd Dispensatio pro uno, licet inscio, atque invito, potest impetrari ab aliis. Advertendum tamen est, quòd quæ à S. Pœnitentiariâ impetrantur, debent expostulari vel à Pœnitente, vel à Confessario, aut saltem à Consanguineis usque ad 4 gradum. *Cap. de motu, de Præbend. in 6.* Semper tamen Dispensatio debet acceptari à principali ut habeat suum effectum. (b).

49. — Notandum 3. quòd potest aliquis uti dispensatione tacitâ, modò possit justè præsumi consensus de præsentî superioris. Hinc fit, quòd si Superior videt legem negligi, et tacet, cùm posset faciliter, et sine incommodo corrigere, justè præsumitur, quòd velit tunc dispensare; *Suarez, Sanchez, Castrop. Salm. etc.* (c). Dictum est de præsentî, quia à DD. dumtaxat admittitur licentia præsumpta, non autem Dispensatio; Etsi hoc non obstante, dicit *Elbel* citans *Suarez, Silvestrum, Fittiu.* etc. quòd urgente necessitate in quâ non possit adiri Superior pro Dispensatione, benè potest operari cum Dispensatione præsumptâ (d).

50. — Notandum 4. alias esse causas quæ ex se excusant à præcepto, et his stantibus non requiritur Dispensatio, quoties sunt saltem probabiliter justæ. Alias esse sufficientes ad Dispensationem, sed eâ opus habent: hujusmodi sunt aut dignitas Postulantis, aut Superioris; v. gr. ut habeatur benignus, utilitas communis, et etiam privata, et aliæ id genus (e).

---

(a) *Lib. 1. n. 183. v. Quæritur.* — (b) *L. 1. n. 186. ad 10.* — (c) *Lib. 1. n. 187.* — (d) *Lib. 1. n. 195. v. Notandum.* — (e) *Elb. de 3. Præcepto 414.*



*Cap. 6. De iis qui tenentur Legibus. 81*

51. — Notandum 5. quòd in dubio sive negativo, sive positivo si casus indigeat nec ne dispensatione, potest subditus uti suâ libertate; licèt satius esset adire Superiorem, ut declaret, aut dispenset; Cùm in casibus dubiis Prælatus etiamsi inferior possit dispensare, licèt nihil specialiter circà hoc sibi commissum fuerit à Superiore, ut dicunt *Laym. Castrop. Sa, Diana, et Salm. (a)*. Excipiuntur tamen Dispensationes Matrimoniales; in his enim non solùm agitur de valore contractûs, sed etiam Sacramenti: ideòque non possumus operari cum dubio, imò nec cum opinione probabile circà factum (si tamen circà factum potest dari opinio probabilis), quia in dubiis de facto non præsimitur Ecclesia dispensare circà impedimenta, ut præsimitur in probabilibus de jure; nec sponsi possunt exponi periculo Nuptias celebrandi sinè gratiâ Sacramentali, nec hujus auxiliis possunt cedere. Propterea in casibus dubiis debent recurrere ad Episcopum, qui benè potest dispensare in impedimentis dubiis, ut communiter dicunt *Merbesius, Cabassut. Con. Tournely, Sa, Pichier, Castrop. Salm. Roncaglia, Holzman, etc. (b)*.

52. — Quæritur 1. An justâ existente causâ Superior teneatur dispensare? Distinguendum: Si causa ea est, ut tantùm reddat convenientem Dispensationem, non tenetur; Contrà verò, si reddit necessariam ad evitandum aliquod grave damnum, aut ad procurandum aliquod magnum commune bonum, imò etiam privatum, ut dicunt *Coninch. Sanch. Salm. etc. cum S. Thoma (c)* Sed cùm Dispensatio negatur, licèt injustè negetur, subditus nihilominus legi obligatus remanet, nisi causa esset talis, ut omninò eum à lege subtraheret, ut si urgeret necessitas contrahendi Matrimonium omissis Denunciationibus, et Episcopus injustè negaret Dispensationem, ut dicunt *Sotus, Sanch. Coninch. Salmant. Castrop. et alii (d)*.

53. — Quæritur 2. An valeat Dispensatio, cùm Superior eam concedit in malâ fide, putans causam non adesse, quæ reverà adest? Respon. si dispensat

---

(a) *Lib. 1. n. 190.* — (b) *Vide Tom. II. lib. 6. n. 902. Qu. I. et II.* — (c) *1. 2. q. 97. a. 4.* — (d) *Lib. 1. n. 179.*

Legislator utique valet. Si autem dispensat Prælatus inferior, alii dicunt nullam fore; inferiori enim data est facultas dispensandi tantum ex causa: sed opposita sententia est communior, et probabilior, quia valor dispensationis non ex causæ cognitione, sed ab existentia pendet; prout valet electio illius ad Beneficium, qui licet ab Electore judicetur incapax, ut ex *Cap. Nihil, de Elect. (a)*. Secus dicendum cum *Castropul. Pontio, Suarez, Laym. Salas, Soto, et Navar.* (contra *Sanchez, Busem. Salm. etc.*) si dispensatio obtenta fuerit bonâ fide, sed sine causâ, quia hac cessante Inferior nullam habet facultatem dispensandi in Lege superioris. Hoc tamen intelligitur, cum patet causam certè sufficientem non fuisse. Cæterum in dubio possessio stat pro Dispensationis valore, ut advertunt iidem Authores (b).

54. — Quæritur 3. An valeat Dispensatio timore incusso obtenta? Resp. semper ac justa adsit causa dispensandi, modò non constet (dum non satis est dubium) Superiorem non habuisse animum dispensandi, valida est Dispensatio, quia timor non aufert voluntarium. Et est etiam licitum huiusmodi dispensationem timore incusso obtinere, modo timor justè fuerit incussus, v. gr. Superiorem adeundi, si inferior eam deneget (c).

## PUNCTUM I.

De iis qui possunt dispensare.

*De potestate ordinariâ in quâ possit dispensare Papa 55. et 56. In quo Episcopi 57. et 58. Parochi 59. Prælatus Regularis 60. De potestate delegatâ, quicumque eam habet ab Ordinario. Si Delegatus moritur 61. Clausula, donec dispensetur 62. Subdelegatus 63. Cum seipso 64.*

55. — **S**ECERNENDA est in hoc potestas Ordinaria à Delegatâ. De potestate Ordinariâ potest Papa dispensare in omnibus legibus Canonicis, etiam ab Apostolis

---

(a) *Lib. 1. n. 183.* — (b) *Lib. 1. n. 182. et fusiùs l. 3. n. 251.*  
— (c) *Lib. 9. n. 184.*

emanatis, uti Præsulibus particularibus Ecclesiarum. Cujusmodi sunt jejunium Quadragesimale, observatio festorum in Dominicis, Irregularitas Bigamiæ, etc. Juxta quod docet S. Thomas (a) posse Papam dispensare in omnibus iis, quæ spectant ad *determinationem Divini cultûs*, non autem in legibus quas Apostoli tradiderunt uti receptas à Jesu Christo, prout sunt leges circa materias, et formas Sacramentorum, et circa oblationem Sacrificii.

56. — An autem Papa etiam possit dispensare in aliquibus Præceptis Divinis. Resp. quòd in iis in quibus Jus Divinum oritur à voluntate humanâ, uti sunt Vota, et Juramenta, certum est apud omnes (juxta modò existente causâ) posse dispensare. Nam tunc Papa non tollit Jus Divinum, sed aufert fundamentum talis obligationis, seu, ut ait S. Thomas (b), *Determinat quid sit Deo acceptum*: Dubium igitur versatur an possit dispensare in iis quæ absolute à Dei voluntate pendent. Tres adsunt sententiæ. Prima est *Abbatis* cum paucioribus, affirmativa universaliter. Secunda quæ est *Navarri, Cani, Sanchez* etc. affirmat tantum in casibus particularibus, prout, in Matrimonio rato, in Residentiâ Episcoporum, in dando facultatem simplici Sacerdoti conferendi Ordines Minores, et Sacramentum Confirmationis, et in similibus; sed negat in aliis rebus, in quarum quolibet casu debet evitari indecentia, uti in præcepto de non fornicando, de non mutandis materiis Sacramentorum (saltem quoad substantiam) et aliis id genus. Tertia communior, et probabilior est *Suar. Sylvest. Castropal. Cavarr.* cum S. Thomâ (c) negat universaliter, quia Inferior nihil potest in lege superioris. Nihilominus valdè probabiliter dicunt *Sotus, Suar. Navar. Coninch. Durandus*, etc. quòd Papa in aliquo casu particulari benè potest non jam dispensare, sed declarare legem Divinam in illo casu particulari non obligare: Nam talis potestas in Papâ videtur necessaria adesse pro bono communi Ecclesiæ, propter tot varias circumstantias, quæ contingere possunt (d).

---

(a) *Quod lib. 4. q. 13.* — (b) 2. 2. q. 88. a. 12. — (c) 1. 2. q. 97. art. 4. — (d) *Vide lib. 6. n. 1119.*

57. — Episcopi etiam de potestate ordinariâ possunt dispensare in omnibus statutis Episcopalibus, et Synodalibus suæ Diœcesis. Eâdemque potestate gaudet Capitulum, sede vacante, non autem Vicarius Episcopi, ut dicunt *Salmant.* et *Sanch.* cum aliis communiter (a); quia in generali Commissione non includitur facultas dispensandi, nisi specialiter committatur. Possunt quoque Episcopi dispensare cum suis subditis in statutis Concilii Provincialis non reservatis (b). Item in legibus Pontificiis communibus, ut sunt Irregularitates, impedimenta Matrimonii, Vota reservata, et his similia; quoties tamen imminens est periculum, et non patet facilis accessus ad Papam, ut dicetur *Tom. III. Tract. XX. de Privilegiis*. Item in iis legibus Pontificiis, quæ latæ sunt præcipuè pro illâ Diœcesi (c). Item in iis casibus in quibus justum dubium versatur utrùm indigeant dispensatione necne (d). Item in omnibus iis, quæ regulariter accidunt, ut in Votis, (modò reservata non sint) in jejuniis, in observantiâ festorum, in abstinentiâ à carnibus, et similibus. Et in his omnibus possunt delegare Dispensationem etiam aliis: talis enim facultas competit Episcopis de jure ordinario, cùm sit perpetuò connexa suæ dignitati (e).

58. — Possunt etiam Episcopi dispensare in omnibus Canoniciis statutis, in quibus adesset clausula, *Donec dispensetur*, propter quam intelligitur facultas data (f). An autem Episcopi possint dispensare in omnibus legibus Canoniciis, ubi reservata non est dispensatio expresse. Multi DD. hoc admittunt, prout *Sotus*, *Covarr.* *Sporer*, *S. Antonin.* (qui hanc vocat communem) et *Elbel* (qui vocat communissimam, et pro eâ adducit *S. Bonav.* et *Scotum*) et *Castropal.* appellat probabilem cum Glossâ in *Cap. Nuper, de Sent. Excomm.* ubi Pontifex sic fassus fuit: *Quia tamen conditor Canonis absolutionem sibi specialiter*

---

(a) *Salm. de leg. c. 5. n. 32. et Sanch. de Matr. l. 2. D. 40. n. 12.* — (b) *Lib. 1. n. 190.* — (c) *Ibid. Item in legibus.* — (d) *Ibid. n. 192. et l. 6. n. 902. v. Ceterum.* — (e) *Lib. 1. n. 190. v. Possunt, et v. Et in his.* — (f) *Salmant. de leg. c. 5. n. 37. cum Suar. Cajet. Bonac. Castrop. etc.*

non retinuit, eo ipso concessisse videtur aliis facultatem relaxandi. Et Glossa subdit: *Est hic argumentum, Episcopos posse dispensare ubi specialiter Dispensatio non est inhibita ex. l. Nec non, ff. Ex quibus caus.* Contrà verò negant Suar. Bon. Salmant. etc. ex Cap. *Dilectus, de Temp. Ord.* ubi quidam Episcopus, cùm contulisset uni plures ordines eodem die, suspensus fuit ob hanc rationem: *Cùm illi huiusmodi dispensatio à Canone minimè sit permissa.* Et respondent ad Textum primò allatum, quòd illa dispensatio fuit facta tantùm pro absolutione à Censuris. Sed hoc non obstante prima sententia est satis probabilis, quia possumus uti eadem responsione pro textu secundo, quòd valet tantùm in materiâ ordinationis. Tantò magis quòd in primo textu videntur verba generaliter loqui, in secundo autem specialiter de ordinatione, cùm adhibeatur verbum illud *huiusmodi.* Ad id quod opponitur, quòd inferior nihil potest in lege superioris, responderi potest id procedere de inferiori, qui totam suam potestatem habet à Principe, non autem de Episcopis, qui probabiliter suam potestatem immediatè habent à Deo (licet Papæ subordinatam) uti tenent *Sotus, Vasq. Victor. Tournely, Natal. ab Alexand.* etc. Hinc dicunt multi DD. quòd Episcopus potest in diœcesi id, quod potest Papa in totâ Ecclesiâ, præter ea, quæ sibi Papa reservavit, aut pertineat ad universalem statum Ecclesiæ, ut dictum est n. 33. circa finem (a).

59. — Parochi similiter de jure ordinario propter consuetudinem videntur posse dispensare cum suis Parochianis, etiam præsentè Episcopo in necessitatibus frequentibus; sed solùm in iis in quibus adest usus dispensandi, utpote in Jejunio, et in abstinentiâ à labore in diebus festivis; Ità *Suarez, Sylvester, Sanchez, Salmanticenses, Viva*, et alii communiter (b).

60. — Prælati Regulares etiam de potestate ordinariâ sibi à jure concessâ, possunt dispensare in Regulis particularibus, dummodò hoc eis non sit

---

(a) *Lib. 1. n. 191. et L. 3. n. 397. in fin.* — (b) *Lib. 1. n. 77. v. Item potest, et lib. 3. n. 397. in fin.*

expressè vetitum in aliquâ materiâ. Et ex Privilegio etiam Prælati inferiores possunt dispensare in omnibus parvi momenti rebus, aut propriis pro illo conventu, aut frequenter contingentibus: *Peirin. Custropol.* et alii (a).

61. — Quoad autem potestatem *Delegatam* dispensandi, notanda sunt. 1. quòd quicumque ordinariam habet potestatem, potest eam aliis delegare, ut communiter *Suar. Castropol. Pontius, Salmant.* et alii (b). Potestas ordinaria ea est, quæ officio, sive Dignitati annexa est, ut dicitur *Tom. III. Tr. XX.* dum agetur de *Privilegiis* n. 34. Si autem expiret necne morte delegantis; Affirmatur si facta sit per modum commissionis in Casu particulari, et cum res etiam integra est; et tunc dispensatio strictè est interpretanda, quia tunc uti odiosa habetur, ex *Cap. 1. §. 1. de Filiis Presby.* Dummodò non sit concessa ex motu proprio superioris, aut in corpore juris non inserta sit, ut in Decretali, etc. aut dummodò non concedatur ob commune bonum, aut in favorem alicujus communitatis. Si autem Dispensatio concessa sit per modum gratiæ, tunc non expirat morte delegantis; et tunc largè interpretanda est (c): Tunc igitur in dubio an adsit causa sufficiens, an non pro dispensatione, benè potest delegatus dispensare, ut dicunt *Cajetanus, Silvester, Sanchez, Salm. Tapia, Granado*, etc. (d).

62. — Notandum 2. quòd in iis legibus ubi appositae est clausula: *Donec dispensetur*, possunt Prælati inferiores semper dispensare, ut dicunt *Cajetanus, Suar. Bonac. Salm. Castropol.* etc. (e).

63. — Notandum 3. quòd delegatus non potest subdelegare, nisi cum expressè sibi concessum est, aut sit delegatus à Principe, aut à Pontifice; *Cap. fin. §. 1. de offic. et potest. Deleg.* aut cum est Delegatus ab ordinario Prælate ad universitatem causarum. *Lib. 1. §. An ab eo. ff. Quis et à quo* (f).

(a) *Lib. 1. n. 194.* — (b) *Lib. 1. n. 190. in fin.* — (c) *Lib. 1. n. 193. et 195.* — (d) *Ibid. n. 192.* — (e) *Lib. 1. n. 190. v. Notandum II.* — (f) *Lib. 1. n. 193.*

87 *Cap. 6. Quot modis potest tessare dispens.*

64. — Notandum 4. quòd habens facultatem universalem dispensandi cum aliis, potest dispensare etiam cum seipso: ità communiter *Cajetanus*, *Laym. Castrop. Salm. Bonac.* etc. cum *S. Th. 2. 2. q. 185. a. 8. in fine (a).*

PUNCTUM II.

Quot modis potest cessare dispensatio.

*Cessat I. Causæ cessatione 65. et 66. II. Revocatione 67. III. Renunciatione 68.*

65. — **D**ISPENSATIO tribus modis cessat. I. Causæ cessatione. II. Revocatione Dispensantis. III. Renunciatione Dispensati.

66. — Et I. cessat Dispensatio *Cessatione causæ*. Hoc tamen intelligitur 1. si cessat causa motiva, seu finalis, si cessat totaliter; si enim cessat sola causa impulsiva, aut si motiva non cessat omnimodè, etiam durat Dispensatio. Intelligitur 2. dummodò Dispensatio non sit sortita effectum suum, et dummodò Dispensationi non sit addita aliqua commutatio gravaminis. In dubio autem an cessaverit omnimodè, valet Dispensatio, quia in possessione reperitur (b). Intelligitur 3. Si Dispensatio concessa sit sub conditione saltem subintellectâ, si *perseverat causa*: prout præsumitur ità concessa quoties causa non esset perpetua. Etenim si dispensatio est data absolutè, cum conceditur ex causâ pro perpetuâ habitâ (v. g. propter morum honestatem, ob Ministrorum paucitatem, propter Parentum paupertatem, etc.) tunc probabile est quòd etiam, cessante causâ finali, non cesset Dispensatio, quia semel per Dispensationem sublatâ legis obligatione, hæc non redit, nisi iterum à Superiore imponatur; Ita *Suarez, Pontius, Castropal. Sa, Salmant. Laym. Perez*, etc. (contrà *Bonac. Trullench.* etc.) (c). Et quoties Dispensatio absolutè concessa est, illa ne cessat quidem, quia semel jam eâ quis usus fuerit, v. gr.

---

(a) *Vide lib. 3. n. 249. v. ultimo, et n. 256. in fin.* — (b) *Lib. 1. n. 195. v. Quar. et n. 196.* — (c) *Ibid.*

qui dispensatus fuit à voto Castitatis ad contrahendum Matrimonium, mortuâ Coniuge etiam durat Dispensatio, ut ad secundas nuptias transeat, modò illa non data sit pro illo solo casu (a).

67. — Cessat II. Dispensatio *Revocatione Dispensantis*, qui (nota hìc) peccaret si eam non revocaret, cum jam cessaverit totaliter causa finalis. Contrà etiam peccaret (licèt tantùm venialiter) si eam sine causâ revocaret: sed valida esset revocatio (b). Hic quæritur, an cesset Dispensatio morte Dispensantis? Respondetur: Si Dispensatio absolutè concessa est, aut cum clausulâ, *donec revocetur*, aut *ad arbitrium Sedis Apostolicæ, vel Episcopi*, tunc non cessat. Cessat contrà, si apposita est clausula, *donec nobis placuerit*, aut *ad nostrum arbitrium*, dummodò res executioni non incoeperit mandari (c).

68. — Cessat III. *Renunciatione Dispensati*, dummodò sit acceptata à superiore, aliàs subditus semper poterit eâ uti, licèt nunquàm eâ usus fuerit (d).

## CAPUT VII.

### De Legis Cessatione, Interpretatione, et Epickejâ.

*Si cessat finis legis* 69. *De libris prohibitis* 70. *De legibus Municipalibus* 71. *De Interpretatione* 72. *Si Declarationes indigeant promulgatione* 73. *et* 74. *De Interpretatione Doctrinali* 75. *Regulæ Interpretationis* 76. *De Epickejâ* 77. *Quandò lex extenditur à casu ad casum* 78.

69. — **C**IRCA cessationem legis, magna exagitur quæstio, an cessante fine legis adæquato (nempè totali) in particulari cesset lex. Certum est, quòd si cessat in communi finis totalis, cessat lex, cum enim hæc inutilis reddita sit, ampliùs non obligat. Ita *S. Thomas.* (e). Et tunc sufficit cuicumque, si

---

(a) *Cit. n. 196. in fin.* — (b) *Lib. 1. n. 197.* — (c) *Ibid. v. Notand.* — (d) *Lib. 1. n. 198.* — (e) *1. 2. q. 103. a. 4. ad 3. cum aliis communiter.*



sciat probabiliter quòd lex in communi cessaverit (a). Si autem cessat finis adæquatus tantum in casu particulari, tunc oportet distinguere: si cesset contrariè, nimirum si lex redderetur nociva in eo casu, aut saltem valdè difficilis, tunc etiam communis est sententià, eam non obligare. Dubium igitur restat ad videndum, an cessante fine adæquato in particulari, et privativè, nempè si lex pro illo casu particulari, aut pro illâ personâ esset inutilis. Sententia communior est quòd etiam obliget, quia quamvis cesset damnum particularis, non cessat tamen periculum in communi hallucinationis, quâ quisque in casu proprio decipi potest. Ità *S. Thomas* (b). Sed oppositum tenent plures graves DD., nimirum *Cajet. Silvester, Panor. Angel. Valent. Sa, Cardenas, Ledesm. Granado, Henriquez, Hurtad, et Tamb.* cum *Nav. Abb. et Comit. et Salmant.* ac *Viva* vocant etiam satis probabilem, dicentes quòd sicuti cessante fine in communi cessat lex pro omnibus, ità cessante fine in particulari, cessat lex in particulari, cum æquè in ambobus casibus lex reddatur inutilis. Et quemadmodum cessante fine in uno tempore, cessat lex pro illo, licèt non cesset pro alio tempore, ità cessante fine in uno casu, cessat lex pro eo, licèt non pro aliis. Et ideò dicunt communiter admitti, legem Fraternalæ correctionis non obligare ubi non speratur fructus. Et ut hæc sententia locum habeat, semper sic intelligenda est, dummodò certè in illo casu nullum subsit periculum hallucinationis, quod quidem semper inest in casu allato à *S. Thoma*, fornicationis nempè, de quâ dumtaxat loquitur loco citato.

70. — An possint legi libri prohibiti, cessante privativè fine legis in particulari, et præciso scandalo? Nonnulli admittunt, sed penitus dico, negandum cum *Suar. Castr. Sanch.* etc. quia in hoc numquam cessat adæquatè finis legis, ne in particulari quidem; cum finis prohibitionis sit, non solum ut vitetur damnum quod à lectione timetur,

---

(a) Vide *Salm. de leg. c. 4. n. 4.* — (b) 2. 2. q. 154. a. 2. n. in fine cum aliis.

sed præstetur Ecclesiæ obedientia in rebus tam perniciosis. Ad hæc accedit præcipuus finis, ne detur causa petulanti ac pravo ingenio Scriptoribus obnoxias doctrinas et novitates disseminandi (a).

71. — Denique notandum, quòd leges peculiares alicujus loci non cessant propter legem generalem, nisi in istâ expressè eis derogetur, vel saltem per clausulam; *Non obstante quâcumque lege particulari.*

72. — II. Quoad Interpretationem sciendum est, aliam dici authenticam, aliam doctrinalem, aliam usualem. Authentica fieri potest vel ab ipso Legislatore, aut ab ejus successore, aut à superiore. Doctrinalis est, quâ mens legislatoris manifestatur, et potest fieri à quocumque Doctore. Usualis est illa quam usus recepit.

73. — Hic dubitatur, an Declaratio quæ fit à Papâ circâ aliquam legem, indigeat promulgatione, ut obliget. In hoc distinguendum. Declaratio altera est *purè talis*, altera non purè talis, et potius dicenda est Interpretatio. Declaratio *purè talis* est ea cujus sensus à principio est imbibitus clarè in lege, v. g. si dubitatur an sub nomine Filii veniat Filius naturalis tantùm, an etiam adoptivus, et legislator declarat intelligi tantùm naturalem, tunc Declaratio est de sensu clarè imbibito in lege. Declaratio non *purè talis*, seu Interpretatio est illa, cujus sensus non est imbibitus clarè in lege, sed circâ illum plures adsunt opiniones, et solùm percipitur ex argumentis: v. g. si sub nomine *Patris* comprehenditur Avus, et an sub nomine *mortis* intelligenda sit mors civilis, perpetuus carcer, etc. cùm recurratur ad impropriam significationem.

74. — Hoc posito, dicemus cum *Suarez, Castr. Vasq. Salas, Salm. Holz. La-Croix, Suppletor. Spor.* Declarationem *purè talem* non opus habere promulgatione, sed obligare omnes ad quos illius pervenerit notitia, cùm non sit lex nova. Declaratio non purè talis indiget promulgatione, ut obliget, quemadmodum quælibet alia lex, quia hæc habetur tamquam nova lex, sicut dictum est n. 4. hujus Tract.

---

(a) *Lib. 1. n. 199. in fin.*

Hinc infert *Suarez* , et *Palaus* , ( qui citat *Bonca* , *Salas* , et *Lorca* ) (a) , quòd si Declaratio quæ fit à Legislatore sit de sensuclarè imbibito in lege (juxtà exemplum allatum de filio naturali , et adoptivo) non indiget promulgatione. Contrà verò Declaratio sensus obscurè imbibiti in lege (juxta exemplum de Avo , si veniat nomine Patris) indiget promulgatione , ut obliget ; quia illa statuit aliquid novi , quod de se non erat imbibitum in lege. Et idem dicunt *Suar.* et *Palaus* (b) de Declaratione , quæ fit non ab eodem legislatore , sed à successore , quia mens primi legislatoris non potest esse clarè illi conscia , prout ipsimet legem ferenti , quapropter ad illam declarandam ( licèt sit de sensu in lege imbibito ) debet recurrere ad argumenta et interpretationes , quæ uti leges novæ putantur , ac proindè opus habent promulgatione , aliàs declaratio non habebitur uti Authentica , sed solum uti Doctrinalis (c).

75. — Interpretari autem leges cuicumque permissum est , modò fiat juxtà regulas , et sensum à DD. magis receptum ; cum enim occurrunt dubia , et non possit commodè adiri Legislator , necesse fuit hanc Sapientibus tribuere potestatem leges interpretandi , ut habetur ex *Cap. 2. de Privileg. in 6.* Id commune est (d). An autem liceat legem interpretari , cum in illà prohibetur quælibet interpretatio : *Castrop.* (e) cum *Salas* , et *Sa* putat talem prohibitionem valere tunc , si interpretatio fuerit frivola , et inutilis ; sed meritò contradicunt *Salmanticenses* (f) , quia fuitiles , et frivolæ interpretationes ex seipsis sunt refellendæ , atque prohibitæ : quare tunc omnes interpretationes doctrinales sunt illicitæ , prout prohibitæ sunt à Pio IV. interpretationes super Tridentinum , ac propterea cum ( ut refert Bened. XIV. Synodo l. 13. c. 24. n. 2. ) sub Clemente VIII. compilatus esset Septimus Decretalium , ideò vulgatus non fuit , quia cum in

---

(a) *Suar. de leg. l. 6. c. 1. n. 3. eodem tit. Dist. 5. p. 3. §. 1. n. 5.* — (b) *Suar. loc. cit. et Palaus ibid. n. 2.* — (c) *Vide Opus nostrum Venet. editum lib. 3. ubi agitur an in cœnuld liceat sumere parùm casei.* — (d) *Lib. 1. n. 200. et Palaus loc. cit. §. 2. n. 1.* — (e) *loc. cit. n. 6.* — (f) *De leg. c. 4. n. 23.*

eo inserta fuissent multa Decreta Tridentini, aditus daretur violandi Constitutionem Pii IV. (*quæ vetantur privati homines* (sunt verba Bened. XIV. loc. cit. *S. Concilium Tridentinum commentari, atque interpretari, cum id S. Cardinalium C. ejusdem Concilii privativè sit reservatum*); ea Concilii Decreta interpretando; quod impediri non posset, si liber ille in lucem emissus fuisset; siquidem sicut cæteræ Decretales sunt Canonistarum interpretationes arbitrio expositæ, ita Tridentini Decretis tunc evenisset. Dicunt tamen complures Doctores hac prohibitionem PII IV. non esse veritas omnes interpretationes incidenter factas, aut oretenùs, aut manuscriptis, sed tantum ex professo per glossas, scholia, et commentaria typis data; sic enim usus talem prohibitionem interpretatus est. Et concordēs in hoc sunt *Castropal.* cum *Salas*, et *Barbosa*, et *Salmant.* cum *Rodriguez*, *Reginaldo*, et *Henriquez*, (a). Hujusmodi sunt etiam quæ statuta fuerunt ab Innoc. XIII. in Bullâ *Apostolici Ministerii*, pro reformatione Cleri Hispanici editâ, et confirmatâ à Bened. XIII. in Bullâ *In supremo* pro toto Orbe terrarum; nam præfatæ Bullæ, ejusque Decretorum privativè commisit interpretationem, explanationem, et declarationem, *quatenus dubietas aliqua aut difficultas emergerit*, præfatæ Cong. Conc.

76. — In interpretandis legibus sequentes traduntur regulæ. 1. Attendenda est mens, et finis Legislatoris, et ratio legis. 2. In dubio interpretari debet pro valore actûs. 3. Lex strictè interpretanda in odiosis, largè in favorabilibus. 4. Verba legis accipienda sunt in sensu proprio, nisi aliquod absurdum, vel iniquitas in legislatore sequeretur. Sensus proprius est ille quem naturaliter ex communi hominum acceptione et usu verba præferunt. Analogæ (quæ plura significant) accipienda sunt pro principaliori analogato, ut advertunt *Paulus*, et *La-Croix* (b). Ità pariter in legibus Pœnalibus, et præceptivis: sed in favorabilibus solet attendi etiam proprietas civilis verborum, v. g. sub nomine *legitimi* veniunt etiam

(a) *Palaeus ib. n. 2. Salm. dict. n. 23.* — (b) *Palaeus tr. 3. d. 5. p. 3. §. 1. n. 7. et Croix l. 1. n. 824.*

legitimati , et hujusmodi alia. Ad dignoscendum an lex sit odiosa , an favorabilis , attendendum est motivum propter quod lex lata est (a).

77. — III. Quoad Epickejam ( quæ est præsumptio saltem probabilis , quòd Legislatores in aliquâ rerum circumstantiâ noluerit obligare ) , illa locum habet , quoties lex redderetur nociva , aut valdè onerosa , et observatu difficilis (b).

78. — Restat demùm ad inquirendum an lex debeat extendi à casu ad casum , ubi eadem currit ratio. Divisa est in duas partes sententia , quæ inter se quidem discrepare videntur , sed reverà unum dicunt : siquidem ambæ conveniunt in hoc , quòd licèt lex se extendat de casu ad casum , in quo eadem ratio ità adest , ut si illa non extenderetur , posset culpari legislator aut injustitiæ , aut imprudentiæ , et in eo casu locum habet illud Axioma : *Ubi eadem est ratio adæquata , ibi eadem currit legis dispositio.* Et hoc evenit I. in *Correlativis* , v. g. sicut sponsa potest ab obligatione sponsalium liberari , si sponsus longè proficiscatur. *Cap. De illas , de Spons.* Ità etiam potest sponsus. II. In *Equiparatis* , ut sunt Electio , et Præsentatio ad Beneficium. III. In *Connexis* , ut sunt Diaconus , et Subdiaconus. IV. In *Contentis* : v. g. cui conceditur testari , conceditur posse codillos conficere : cui prohibentur ova , prohibentur etiam lacticinia. In præmissis igitur casibus , currit extensio ; et currit etiam si lex esset pœnalis , aut correctoria , quia Reg. 49. *de Reg. Jur. in 6. Odiâ restringi , favores conveniunt ampliari.* Sapienter Suarez , Bonacin. et alii dicunt , regulam illam valere , quoties legis dispositio extenditur ex interpretatione congruentiæ , non autem cùm debet sic interpretari ex necessitate ; tunc enim potiùs dici debet casum illum comprehensum esse in lege , quàm legem extendi ad casum. Cæterum ( regulariter loquendo ) leges pœnales non extendunt præter casum expressum , v. g. Excommunicatio lata in cogentes Mulieres ingredi Monasteria ,

---

(a) *Pal. l. c. §. per tot. 3.* — (b) *L. 1. n. 201. et vide Salm. c. 4. n. 44. et 45. et Pal. lib. c. §. 2. num. 3. qui cum Suarez vocat commune.*

non procedit in eos qui cogunt viros, et idem dicendum in casibus in quibus non currit eadem adæquata ratio, prout superius dictum est (a).

## CAPUT VIII.

### De Consuetudine.

*Conditiones ad Consuetudinem requisitæ 79. Ad Desuetudinem 80. Si lex reprobat omnem Consuetudinem futuram 81. Usus est legis interpret 82. Si lex revocat omnem Consuetudinem factam 83.*

79. — **O**PORTET secernere Consuetudinem quæ legem inducit, à Consuetudine quæ legem abrogat, quæ potius Desuetudo dicenda est. Sed de primâ hîc prius loquendo dicimus, ad hoc, ut vim legis habeat Consuetudo, tria exposcit; introductionem nempe à Communitate factam, tacitum Principis consensum, et legitimam præscriptionem. I. Igitur oportet, ut Consuetudo non sit à particularibus, sed saltem à majori parte alicujus Communitatis legem statuere potentis, licet actu talem potestatem non habentis, sit introducta; quia tunc Consuetudo vim legis ex tacito Principis consensu suscipit, ut docent *Salmant. cum S. Thomâ* (b). II. requiritur tacitus consensus Principis, qui adesse præsumitur, quoties ille cum posset eam vetare, diu eam tolerat; ita *Angelicus* (c). III. ut adsit debita præscriptio; pro quâ requiruntur 1. tempus *diuturnum*, saltem (ut dictum est *num. 11.*) decem annorum: 2. tempus *continuum*, quia si intra tempus præscriptionis interrumpatur consuetudo à majori parte Communitatis, aut si Princeps animadverterit in eos, qui eam introduxerunt, tunc etiam interrumpitur Consuetudo. 3. requiruntur actus multoties repetiti, ac liberè, non ex timore, nec ex ignorantia, putà si populus falsò crederet adesse legem, quæ reverà non adesset: dùm ait *Laym. (d). cum Suar. Abbat. et*

---

(a) *Vide l. 1. n. 200. v. Quæritur.* — (b) *Vide Salm. de Leg. c. 6. n. 6.* — (c) *1. 2. q. 97. a. 3. qd 3.* — (d) *L. 1. tr. 4. de leg. c. 24. n. 2. ad 4.*

*Molin.* non posse Populum adstrictum esse novæ obligationi, nisi certè intendat illam voluisse sibi imponere. Quare in dubio utrùm Consuetudo introducta sit ex obligatione, an ex devotione, et an sub gravi, vel sub levi; hoc inferri licet ex circumstantiis: v. g. si consuetudo onus grave afferat, et per tempus diuturnum fuerit constanter observata, tunc præsumendum est introductam, et continuatam animo se illi sub gravi voluisse obligare (a). Et ità dicimus tenendam esse Consuetudinem abstinendi à lacticiniis diebus Vigiliarum (b); et consuetudinem Regularium, et Monialium recitandi Divinum Officium (c).

80. — Hæc dicta sunt de Consuetudine, sed ad Desuetudinem legem abrogantem, duæ requiruntur Conditiones, 1. ut sit rationabilis, nimirum ut non sit contrà jus divinum. 2. ut sit legitimè præscripta, uti habetur ex *Cap. Licet, de Consuet.* (d). Sed in hoc notandum. 1. quòd ut Desuetudo legi deroget, non sufficit intentio legem transgrediendi, sed expressè intentio requiritur legem delendi; itaque etiam cum malâ fide lex præscribitur, ut dicunt *Castrop. Bonac. Laym. Salmant.* etc. (e). In quo advertit *Layman* eos, qui introducunt Consuetudinem adversus legem, semper peccare usquè dùm lex non sit perfectè præscripta; reliquos autem interim non peccare, si introducta Consuetudine utantur, ità *Layman* (f). Notandum 2. quòd quamvis ut aliqua positiva prohibitio (ut dictum est) et novum jus introducatur, requiritur intentio abrogandi legem, nihilominus, si lex diù bonâ fide, nempè ex legis ignorantia non observetur; ait *Laym.* (g) cum *Suarez. Azor. Glossa* etc. decennio etiam præscribitur, etiam ignorante Principe; præsumitur enim Princeps tacitè approbare quamlibet Consuetudinem, quæ legitimè præscripta est (h). Hoc tamen intelligendum, nisi Princeps positivè resistat cuilibet Consuetudini legem adversanti (i).

---

(a) *Vide Opus nostrum l. 1. n. 107. ad IV.* — (b) *Lib. 3. a. 988.* — (c) *Lib. 4. n. 22.* — (d) *Laym. c. 24. de Leg. n. 4.* — (e) *Lib. 1. n. 107. ad IV.* — (f) *Loc. cit. n. 4.* — (g) *Dict. c. 24. n. 11.* — (h) *Laym. loc. cit. n. 11. et Salm. de Leg. c. 6. num. 13. cum Suar. Sanch. Bonac. et communiter.* — (i) *Vide Opus nostrum l. 1. n. 107. ad X.*

81. — Effectus igitur Desuetudinis est legi derogare, etiamsi in lege appositâ sit clausula, *non obstante quâcumque consuetudine*; etenim talis clausula præteritas respicit consuetudines, non autem futuras. Imò probabile est, *ut dicunt Suarez, Pontius, Bonac. Salmant.* etc. Consuetudinem abrogare etiam leges futuram Consuetudinem contra ipsas reprobantes (a). Si tamen in lege reproberetur quælibet futura Consuetudo, tunc distinguendum. Si reprobat uti contraria legi Naturali, aut Divinæ positivæ, tunc Consuetudo nunquàm valere potest. Secus autem si reprobat uti irrationabilis respectu temporis, in quo lex humana constituitur, quia tunc suboriente aliquâ novâ causâ potest Consuetudo fieri rationalis, et valere, uti docent DD. communiter (b).

82. — Consuetudo potest etiam legem interpretari; et propterea hujusmodi Consuetudo dicitur *Usualis*, ut superius dictum est *num. 72*. Et huic satis est minus temporis spatium, quàm præscriptioni. Et regulariter loquendo, omnes leges debent interpretari secundum loci Consuetudinem (c).

83. — Deniquè advertendum hic, per leges generales nunquàm derogari particularibus loci consuetudinibus jam præscriptis, nisi de ipsis specialis mentio fiat; aut nisi in illis expressè non revocetur quælibet consuetudo, uti habetur ex *Cap. 1. de Consuet.* in 6. Hoc tamen non procedit in legibus, quæ sanciantur ab Episcopis; præsumuntur enim Episcopi omnium consuetudinum contrariarum habere notitiam (d). Item advertendum Consuetudinem immemorabilem non putari revocatam, nisi fuerit nominatim revocata à lege, prout pluries declaravit S. C. (e).

---

(a) *Lib. 1. n. 107. v. Sed quid.* — (b) *Sanch. de Matr. l. 7. c. 4. n. 14. Roncaglia de leg. p. 58. q. III. v. Secundo, et Salm. eod. tit. c. 6. cum Suar. Pont. Tapia etc.* — (c) *L. I. n. 167. v. Potest.* — (d) *cit. n. 107. v. Sed quæritur V.* — (e) *Vide Ib. q. 2.*



## TRACTATUS III.

## DE ACTIBUS HUMANIS, ET PECCATIS.

## CAPUT I.

## De Actibus Humanis.

*Actus Hominis, et actus Humani* 1. et 2. *De Voluntario, et ejus Conditionibus* 3. *Quotuplex est voluntarium* 4. ad 6. *De libero, et ejus speciebus* 7. ad 11. *Impedimenta Actus Humani* 12. et I. *De Ignorantiâ* 13. II. *De Violentiâ* 14. III. *De Concupiscentiâ* 15. IV. *De Timore, et quotuplex sit* 16. 17. et 18. *Undè desumant bonitatem aut malitiam* 19. *An Actus externus addat malitiam actui interno* 20. *An dentur actus indifferentes.* 21.

1. — **A**CTUM est in prioribus Tractatibus de duobus regulis Actuum Humanorum, de Conscientiâ nempe, et de Lege : nunc de ipsismet Actibus Humanis agemus, prius in genere, deindè in specie, de Peccatis nimirum.

2. — S. Thomas (a) docet, quòd actus qui ab homine procedunt, bifariam considerari possunt ; in genere naturæ, et in genere morum. Primo modo considerati *Actus Hominis* appellantur, hujusmodi sunt omnes actus quocumque modo fiunt ab hominibus. Secundo modo dicuntur *Actus Humani*, et sunt illi qui procedunt ex liberâ Humanæ voluntatis electione. Hinc omnes actus qui præveniunt rationis usum, sunt actus Hominis, sed non Humanæ. Duo requiruntur ad constituendum actum Humanum, ut capax sit boni, aut mali meriti, ut nempe sit Voluntarius, et Liber.

---

(a) 1. 2. q. 1. a. 1.

3. — Et prius agendo de Voluntario, dicimus quòd sit *illud*, quod procedit à principio *intrinsicò* (nempè non à vi extrinsicâ) *cum cognitione finis*, ex cuius deficientiâ homicidium non esset voluntarium illi, qui putans esse feram hominem occidit.

4. — Multiplex est voluntarium. 1. Formale, Virtuale, Habituale, et Interpretativum; 2. Elicitum, et Imperatum. 3. Directum, et Indirectum. Et 1. *Formale*, est illud quod exercitè eligitur aut imperatur à voluntate. *Virtuale* est quod procedit, et in effectum prodit ex voluntate præhabitâ. *Habituale* est actus voluntatis semel habitus, et nunquàm retractatus. *Interpretativum* dicitur actus ille, qui fit sine advertentiâ, sed etiam fieret à voluntate, si agens in talibus circumstantiis positus sibi deliberandum esset.

5. — Item 2. Voluntarium *Elicitum* est omnis actus voluntatis proximè à voluntate productus, ut amare, vel odio habere, eligere aut refellere aliquid, cupere etc. *Imperatum* est omnis actus, qui ex voluntatis imperio exercetur ab aliis potentiis sive externis, sive internis, ut meditari, ambulare, videre etc. Hic advertendum cum *S. Thom.* (a) quòd quilibet actus sive elicitus, sive imperatus à voluntate specificatur à fine propter quem exercetur; quare illi actus qui eundem finem habent, quamvis materialiter sint diversi, tamen eandem induunt speciem, v. g. si quis jejumat, orat, concionatur ob Dei gloriam, omnes isti sunt actus charitatis. Contrà si unus idemque sit materialis actus, si à voluntate eligitur ob diversos fines, ipse diversas induit species.

6. — Item 3. Voluntarium *Directum* est quod est volitum, et intentum ex se ipso: *Indirectum* est volitum in causâ voluntariè positâ, jam præviso effectû, licèt non intento. Ut igitur voluntarium indirectum imputetur ad culpam, primò requiritur, ut prævideatur effectus: secundò, ut agens teneatur impedire talem effectum; nam cum non teneatur impedire illum, et non intenditur, non pec-

---

(a) 1. 2. q. 1. a. 3.

cat causam honestam apponendo, licèt prævideat effectum de se illicitum, ut pluribus casibus progressu Operis explicabitur.

7. — Præterea (ut dictum est) Actus humanus, ut sit capax boni, aut mali meriti, necesse habet, ut sit *Liberum*. De fide est, contra Calvinum, adesse in Homine etiam post Adæ peccatum, liberum arbitrium, et ut definitum est à Tridentino *sess. 6. can. 5.* Hic distinguendæ sunt plures species libertatis. 1. libertas à *Coactione*, et à *Necessitate*. 2. Libertas *Contradictionis*, et *Contrarietatis*.

8. — Et primò alia est libertas à *Coactione*, quæ dicitur *Spontaneitatis*, alia est à *Necessitate*, quæ dicitur *Indifferentiæ*. Prima importat, ut actus sit spontaneus, idest violentiæ expers, quamvis sit necessarius, ut est amor Beatorum, qui necessariò amant Deum, sed sponte, quin vim patiantur; etenim docet *S. Thomas (a)* cum *S. Augustino*, nos ergà ultimum finem habere quidem libertatem voluntatis, quæ non repugnat cum necessitate naturalis inclinationis: sed non habere libertatem Arbitrii, sive *Contradictionis*, quæ importat velle, et nolle, ut mox explicabitur. Libertas à *Necessitate*, seu indifferentiæ, importat non solum immunitatem à vi, sed etiam à necessitate; ità ut Homo possit non ponere actum, qui dicitur *Contradictionis*, aut ponere actum contrarium, quæ dicitur libertas *Contrarietatis*, ut paulò post subjungetur.

9. — Secundò sciendum est aliam esse libertatem *Contradictionis*, quæ dicitur *Exercitii*, nempe posse operari, et non operari: aliam esse libertatem *Contrarietatis*, etiam *Specificationis* dictam, nimirum duos contrarios actus ponendi, ut amandi, aut odio habendi.

10. — His positis, dicimus, ut Hominis voluntas possit cum bono, aut malo merito operari, debet esse libera libertate *Indifferentiæ*, quæ sola verum libertatis nomen meretur, nempe non solum ut à vi, sed etiam à necessitate sit immunis. Hoc probatur ex Tridentino *sess. 6. can. 4.* ubi dicitur libe-

---

(a) *Quæst. de Verb. a. 1.*

rum esse homini Gratiae assentiri, aut dissentiri. Item probatur ex Propositionibus Baji, et Jansenii proscriptis; Bajus Prop. 39. ex damnatis à S. Pio V. et aliis Pontificibus, dixit: *Quòd voluntariè fit, etiamsi necessitate fiat, liberè tamen fit.* Prop. 66. *Sola violentia repugnat libertati Hominis naturali.* Et Prop. 67. *Homo peccat etiam damnabiliter in eo quod necessariò facit.* Et cum dixit Bajus *damnabiliter*, loqui intendebat de actibus deliberatis, etiamsi necessariis, dum ipse jam admittebat (uti legitur in Prop. 75.) actus indeliberatos, nempe sinè voluntatis consensu, non reputatos peccata. Jansenius in Prop. 3. ex 5. damnatis ab Innoc. XI. dixit: *Ad merendum, et demerendum in statu naturæ lapsæ, non requiritur in homine libertas à necessitate, sed sufficit immunitas à coactione.*

11. — Notandum hic quòd radix libertatis *Indifferentiæ* oritur ab *Indifferentiâ Judicii*, quæ nihil aliud est quàm deliberatio boni, aut mali quod in actione consideratur. Hæc Judicii indifferentia non jam constituit libertatem, sed, ut dictum est, est radix libertatis, ut postea possit liberè, et indifferenter voluntas eligere quod sibi placuerit.

12. — Obstacula autem quæ impediunt actum humanum, seu quominus actus sit voluntarius, sunt Ignorantia, Vis, Concupiscentia, et Timor, qui alioquin non aufert, sed minuit voluntarium. De singulis sigillatim agemus.

13. — Circà *Ignorantiam* plura sunt distinguenda.

1. Ignorantia, alia est *Negativa*, quæ est carentia scientiæ in subjecto non apto; alia est *Privativa*, quæ est privatio scientiæ in subjecto apto; alia est *Positiva*, quæ est deceptio seu error voluntarius. 2. Ignorantia alia est *Juris*, seu præcepti: alia est *Facti*, seu rei præceptæ. 3. Ignorantia alia est *Antecedens*, seu *Invincibilis*, quæ præcedit omnem rationis advertentiam: alia *Consequens*, seu *Vincibilis*, quæ saltem virtualiter aut in confuso est cognita: alia est *Concomitans*, quæ concomitatur actum, sed non est illius causa nec in illum influit; actus enim etiam poneretur eodem modo, etiamsi non adesset ignorantia: hujusmodi est ignorantia

illius qui occidit inimicum, putans esse feram, sed ita est dispositus, ut si cognovisset esse inimicum, etiam occidisset. 4. Ignorantia consequens, seu vincibilis dividitur in crassam seu supinam, et affectatam. *Crassa* est quando homo negligit scire quod potest, et tenetur scire: *Affectata* est quando negligit veritatem inquirere, ut liberiùs peccet. Hinc concluditur, quod Ignorantia *Antecedens* (quæ dicitur invincibilis) impedit et penitus aufert voluntarium. *Consequens* (quæ dicitur Vincibilis), non aufert, sed minuit voluntarium. *Concomitans* nec aufert, nec minuit voluntarium, nam ut superiùs dictum est, nihil influit in voluntarium.

14. — II. *Vis* quoque penitus impedit actum humanum; undè quæ fiunt vi, nihil nec boni, nec mali merentur. Violentum tamen differt à necessario, quia hoc potest esse voluntarium, ut est Amor beatificus, et differt etiam ab involuntario, quod potest causari ab ignorantia.

15. — III. *Concupiscentia* (quæ est motus appetitus sensitivi) quando est antecedens impedit actum humanum, seu voluntarium in partem, et quandoque in totum, si omninò rationem præveniat; undè fit quod motus sensuales, si omnis absit voluntatis consensus, ad peccata nobis non imputantur nec mortalia, nec venialia (a). Cùm verò Concupiscentia est consequens, et est illa quæ excitatur aut imperatur à voluntate, tunc nihil impedit actum humanum, imò auget voluntarium, et culpam.

16. — IV. *Timor*, vel est Levis, vel Gravis, qui etiam dicitur *cadens in virum constantem*. Ut sit gravis requiritur, ut malum comminatum sit, 1. probabiliter imminens. 2. ut non possit vitari. 3. ut sit magni momenti saltem respective ad personas, uti ad foeminas, filiosfamilias, pupillos, subditos, etc. in quibus datur etiam timor *Reverentialis*; sed hìc advertendum, timorem Reverentialem tunc esse gravem, cùm præter pudorem, quo afficitur Filius, pupillus, subditus in Patri, aut Tu-

---

(a) Vide l. 5. n. 6.

tori, aut Domino adversando, timet ampliùs ali-  
quam diuturnam indignationem, aut vexationem (a).

17. — Oportet 2. distinguere metum *ab intrinseco* qui provenit ab ipsis facti circumstantiis: putà timor mortis quo Mercator in procellâ projicit merces in mare, et timor *ab extrinseco* qui provenit à causâ liberâ extrinsecâ, nempè ab homine. Et timor ab extrinseco potest esse *Justus*, et *Injustus*: quod dignoscitur à considerando an timorem incutiens habeat necne jus ad illum incutiendum. Item hic timor potest esse incussus ad extorquendum certum aliquem actum, aut alio fine, præter actum timoris causâ positum.

18. — Hoc posito; timor dicitur non impedire actum humanum; illum nempè absolutè voluntarium, sed solùm *secundùm quid*, quod idem valet, quòd minuit voluntarium. Quandò autem metus excuset, vel non, à lege, jam dictum est *Tract. II. n. 44*. Et quandò metus invalidet, vel non actum, id, dùm loquemur de Voto, de Contractibus, et de Matrimonio, agetur.

19. — Quæritur 1. Undè actus humani desumant suam bonitatem, et malitiam? Respondemus (quicquid dicant alii) quoad materiale desumunt ab objectis, et ab eorum circumstantiis. Quoad formale, sive quoad moralem bonitatem, aut malitiam à virtutibus, quibus conformantur, aut adversantur. Et hactenùs de eo, quod spectat ad speculativam quæstionem, nam quod ad praxim spectat, agemus in sequenti Capite, *Punct III. n. 41*. agendo de distinctione specificâ peccatorum.

20. — Quæritur 2. An actus externus addat distinctam bonitatem, aut malitiam actui interno quoad præmium aut pœnam essentialem? (nam quoad accidentalem certum est apud omnes). In hâc quæstione Thomistæ cum communiori tenent negativam sententiam, Scotistæ affirmant. Sed quicquid sit de speculativâ quæstione, in praxi etiam Thomistæ (ut declarat *Estius*) dicunt, quod cùm voluntas operis mali executione vehementiùs adhæret objecto con-

---

(a) *Lib. 3. n. 717. v. Idem autem.*

cupito, aut magis oblectatur illo, tunc sinè dubio opus externum addit aliquam malitiam voluntati. Et regulariter sic accidit: ideoque benè ait *Habert*, quòd ille, qui externè operatur peccatum, semper dicendus est majus malum committere, quàm qui tantùm illud concupiscit (a).

21. — Quæritur 3. An detur actus humanus indifferens in individuo? Concordes sunt Thomistæ Scotistis dari actum indifferentem in specie, sive ex *objecto*, ut est deambulare, campum respicere, etc. Quæstio est an detur in individuo? Scotistæ affirmant; sed probabiliùs negant Thomistæ, quia cùm Homo sit rationalis, tenetur quicquid operatur ordinare alicui fini honesto; quod omittendo, culpæ ei verti hoc debet, et actus non est ampliùs indifferens, nisi fortè posset esse, quòd ex ignorantia aliquandò sine advertentiâ operetur. Hæc satis de his tribus celeberrimis quæstionibus, quæ magis pertinent ad Scholasticam, quam ad Moralem. Progrediamur ad loquendum de peccatis, quæ sunt actus humani in specie.

## CAPUT II.

### De Peccatis.

#### PUNCTUM I.

##### De Peccatis in genere.

*De Peccato Mortali, et Veniali* 22. et 23. *De Advertentiâ* 24. ad 39. *De Consensu* 40. ad 45. *De Peccato Philosophico* 46.

22. — **P**ECCATUM definitur à S. Augustino, et à S. Thoma (b), *Dictum, factum, vel concupitum contrà legem æternam. Dicitur contrà legem æternam*; quia in hoc consistit tota formalis malitia peccati; ideòque hæc definitio comprehendit tùm peccata commissionis, tùm omissionis; etenim omnia divinam legem offendunt; et comprehendit etiam trans-

---

(a) *Vide l. 7. n. 47. v. Secundum.* — (b) 1. 2. q. 71. a. 6.

gressionem legis humanæ; cui etiam ipsa lex Divina jubet, ut obediatur, *Qui potestati resistis, Dei ordinationi resistis. Rom. 13. 2.*

23. — Quodlibet peccatum grave est Dei offensa non effectivè, quia ut loquitur Angelicus (a), Deus incapax est nocuenti; sed affectivè, et est vera injuria, et contemptus in Divinam Majestatem, quæ postponitur creaturæ. An autem peccatum veniale debeat etiam dici Divinæ legis transgressio, affirmamus cum *Estio, Soto, Azorio*, et aliis; quia licet *S. Thomas* (b), dicat, quod veniale non est contrà, sed præter legem, nihilominus hoc est intelligendum in quantum sit tantum contrà ordinem, non contrà finem legis, qui est Caritas. Sed hic ordo legis observandæ est etiam præceptum: *Noli velle mentiri. Eccl. 7. Noli jurare omnino. Matth. 5.* Igitur veniale etiam est contrà legem, cum sit expressè à lege vetitum.

24. — Pro certo habendum, ut dictum est n. 2. peccatum, ut sit imputabile, debere esse voluntarium, et ut voluntarium sit peccatum mortale debet esse pleno consensu patratum. Itaque 1. requiritur plena, et perfecta advertentia ad malitiam objecti, idèoque motus concupiscentiæ primò primi dicti, qui penitus rationem præveniunt, carent culpâ. Motus secundò primi, qui cum semiadvertentiâ fiunt à semidormientibus, aut aliò distractis, ad summum possunt esse venialia. Motus verò deliberati, quorum plenè, aut saltem in confuso intellectus advertit malitiam, et voluntas eis consentit, hi sunt mortalia; ità communiter Theologi cum *S. Thomâ* (c), qui dicit quod peccatum mortale ex suo objecto potest evadere veniale ob imperfectionem actûs moralis, cum non sit deliberatus, sed subitus (d). Undè alio loco sic ait: *Si quis subito ex aliquâ passione in verba imaginata prorumpat, quorum significationem non considerat, et tunc est peccatum veniale, et non habet propriam rationem blasphemiae*

---

(a) 1. 2. q. 73. a. 8. ad 2. — (b) 1. 2. q. 88. a. 1. ad. 1. — (c) Q. 7. de Malo a. 6. per tot. et 1. 2. q. 88. a. 6. — (d) *S. Thom.* 1. 2. q. 88. a. 6.



(a). Prætereà alibi dicit : *Qui ex lapsu lingue jurat, siquidem advertat se jurare, et falsum esse quod jurat, non excusatur à mortali. Si autem hoc non advertat, à crimine perjurii excusatur* (b) Hinc concluditur, cum sententiâ communi, ad peccatum mortale non sufficere semiplenam advertentiam, sed requiri plenam et perfectam. *Et ratio est* ( rectè inquit Cardinalis Gotti ), *quîa peccatum mortale debet esse plenè voluntarium et liberum, et consequenter cum plenâ advertentiâ committi* (c).

25. — Sed magna quæstio est, an ad peccatum mortale requiratur advertentia actualis et expressa malitiæ actûs, vel sufficiat virtualis, et interpretativa? Prima sententia, quam olim tenuere *Cajetanus* (d) ac *Medina, Loppez, Serrâ, Prado*, et alii apud *Salm.* (e), atque enixè tuenter *Concina, Continuator Tournely, Angelus Franzoja, Antoine*, et alii recentiores (f), dicit minimè requiri advertentiam actualem, sed satis esse virtualem et interpretativam : quæ in hoc consistit, quòd homo teneatur, et possit malitiam actionis cognoscere, quamvis actualiter non advertat; alias (ut ajunt) reputandi essent immunes à culpâ omnes scelesti homines, qui à suis passionibus, aut pravis consuetudinibus obcæcati plura mala patrant, ad nihil advertentes.

26. — Secunda verò sententia communior affirmat requiri actualem advertentiam malitiæ, aut periculi illius, aut saltem obligationis illam advertendi. Et hanc tenent *Sylvius, Suarez, Tapia, Sanchez, Sayrus, Palaus, Salas. Bonac. Salmant.* tam Scholastici, quàm Morales, *Gamachæus, Isambert. DuVal*, item *Vasquez cum Lyrano, Tostato, Adriano VI. Curiel, Victoria, Corduba*, et aliis (g) Item S.

---

(a) *Id. 2. 2. q. 13. a. 2. ad 3.* — (b) *Idem 2. 2. q. 98. a. 3. ad 2.* — (c) *Gotti tr. 4. de Vitiis q. 1. dub. 4. §. 3.* — (d) *Cajet. 2. 2. q. 88. a. 1. dub. 3.* — (e) *Salm. tr. 20. c. 13. n. 5.* — (f) *Conc. in Comp. Theol. l. 8. D. 3. c. 2. n. 14. Cont. Tour. Tom. 2. de Pecc. c. 4. a. 1. Franzoja in Busemb. l. 5. c. 2. de Peccat. Anim. P. Antoin.* — (g) *Sylvius in 1. 2. q. 66. a. 3. q. 3. Concl. 2. Suar. to. 5. in 3. p. D. 4. sect. 8. ex n. 14. Tapia l. 3. q. 9. a. 5. et 11. Sanch. Dec. l. 1. c. 16. n. 21. Sayr. Thes. l. 2. c. 9. n. 11. Pal.*

*Antoninus, Wigandt, Sainte Beuve, et Card. Gotti*, quorum loca et verba infra afferentur. Hi dicunt ad omne peccatum mortale requiri aliqualem advertentiam, sive suspicionem malitiæ actûs, vel in se, vel in suâ causâ, saltem in confuso. Ratio eorum est, quia nihil volitum, nisi præcognitum; undè nequit ignorantia imputari ad culpam, nisi de malitiâ objecti habeatur saltem aliqua confusa apprehensio; ille enim qui nullo modo advertit malitiam suæ actionis, vel obligationem advertendi, nullo modo peccat adversus illam agendo.

27. — His positis, meum proferam sensum, et dico quòd sistendo intrà limites justì, præfatæ sententiæ facilè conciliari possunt. Nam si dicatur ad omnia peccata mortalia necessariò exposci actualem et expressam advertentiam, hoc utique falsum est, quia multipliciter evenire potest, quòd plura mala, quamvis actualiter et expressè non advertantur, benè tamen imputantur ad culpam ea patrantibus, si ipsorum ignorantia sit aliquo modo voluntaria, vel ob negligentiam, vel ob passionem, aut pravum habitum, vel ob voluntariam inconsiderationem in operando.

28. — Primo igitur modo ignorantia sit voluntaria ob negligentiam, ut docet S. Thomas (1. 2. q. 76. a. 3.) qui regulam ibi præmittit dicens: *Ignorantia quæ est causa actûs, quia causat involuntarium, de se habet quòd excuset à peccato, eo quòd voluntarium est de ratione peccati.* Deinde subdit ignorantiam posse esse voluntariam duobus modis, *Vel directè, sicut cùm aliquis studiosè vult nescire, ut liberiùs peccet: vel indirectè, sicut cùm aliquis propter laborem, vel alias occupationes negligit addiscere id per quod à peccato retraheretur. Talis enim negligentia facit ignorantiam ipsam esse voluntariam, et peccatum, dummodò sit eorum, quæ quis scire tenetur et potest. Et ideò talis ignorantia non totaliter excusat à peccato. Si verò sit talis ignoran-*

*tr. 2. D. 1. p. 15. n. 5. Salas. tr. 13. D. 8. sect. 11. n. 87. Bon.de Censur. D. 1. Salm. Schol. tr. 13. D. 13. Dub. 1. et Mor. tr. 20. c. 14. n. 8. Gam. T. 2. p. 194. Isamb. p. 233. Vasq. 1. 2. q. 123. c. 2. n. 6. Du-Val. D. 1. 178.*

*tia, quæ omninò sit involuntaria, sive quia est invincibilis, sive quia est ejus quod quis scire non tenetur, talis ignorantia omninò excusat à peccato. Nota, Talis enim negligentia facit ignorantiam ipsam esse voluntariam. Præterea nota hîc Angelicum ultimis verbis relatis non dubitare, quòd benè possit dari invincibilis ignorantia etiam eorum, quæ quis scire tenetur. Idem scribit alibi (de Malo q. 3. a. 7. ad. 7.); Ignorantia, quæ est omninò involuntaria, non est peccatum. Et hoc est quod Augustinus dicit: Non tibi imputatur ad culpam, si invitus ignoras, sed si scire neglexeris. Per hoc autem quod addit, sed si scire neglexeris, dat intelligere, quòd ignorantia habet quòd sit peccatum ex negligentia præcedente, quæ nihil est aliud, quàm non applicare animum ad sciendum ea, quæ quis debet scire. Eodemque loco ad S. Thomas, quòd tùm ignorantia reputatur voluntaria, cùm homo propter laborem addiscendi, vel ne impediatur à peccato, quod diligit, scientiam recusat; et sic ignorantia est à voluntate quodammodo imperata. Hisce igitur locis S. Doctor minimè quippè culpabilem reputat ignorantiam ejus, qui non advertit, sed ejus qui negligit, sive recusat actu quodammodo à voluntate imperato animum applicare ad ea addiscenda, quæ scire tenetur circà præceptum quod urget, ut expressiùs declarat in corpore prædicti articuli 3. inquires: Causa ignorantie est animum ad sciendum non applicare, et hoc ipsum non applicare animum ad sciendum id quod quis debet scire, est peccatum omissionis.*

29. — Secundo modo ignorantia fit voluntaria ob passionem, quam quis vult deliberatè sequi; illi enim, qui secundùm suam passionem operatur, benè imputabitur omnis parvus effectus tali passioni connexus, licèt in particulari non agnoscatur; quia cùm homo passionem aliquam amplexatur; consequenter ipse amplectitur omnes effectus communiter ex illâ passione provenientes, qui etsi in particulari non prævidentur, prævidentur saltem in confuso; volens enim aliquam explere passionem, putà vindictam, admittit consequenter saltem in confuso quæcumque perversa media, quæ ad explendam

passionem illam conducunt. Undè effectus provenientes, quamvis non sint voluntarii in se, sunt tamen voluntarii in suâ causâ; nimirum in adhærendo in passionem. Ità etiam docet S. Thomas (1. 2. q. 6. a. 8.) ubi ignorantiam hujus operantis per passionem vocat *ignorantiam malæ electionis*, dicens: *Alio modo dicitur ignorantia voluntaria ejus, quod quis potest scire et debet; sic enim non agere, et non velle, voluntarium dicitur. Hoc igitur modo dicitur ignorantia, sive cum aliquis actu non considerat, quod considerare potest et debet, quæ est ignorantia malæ electionis, sive ex passione vel ex habitu proveniens.* Idem repetit in *Opusc. de Malo* q. 3. a. 10. ubi ait: *Ligatio rationis per passionem non imputatur ad culpam, nisi fortè quoad principium talis passionis, quod fuit voluntarium, poterat enim voluntas à principio impedire ne passio in tantum procederet.* Prætereà alibi (1. 2. q. 77. a. 6.) dicit: *Quandoque verò passio non est tanta, quòd totaliter intercipiat usum rationis, et tunc ratio potest passionem excludere, divertendo ad alias cogitationes, vel impedire ne suum consequatur effectum.*

30. — Tertio modo ignorantia fit voluntaria ratione pravi habitus, ut etiam habetur ex S. Thomâ loco suprâ citato (1. 2. q. 6. a. 8.); et tunc actus mali qui ex malo habitu proveniunt, sunt pariter voluntarii, vel in suâ causâ, scilicet cum in principio prava consuetudo voluntariè contrahitur; vel potius, quia, ut sentio cum *Antoine*, et Auctore libri cui titulus, *Instruz. de' Novelli Confessori*, hujusmodi peccatores malè habituati, quamvis habeant cognitionem minùs expeditam quàm alii, semper tamen habent cognitionem aliquam actualem suorum criminum sufficientem ad reddendos actus deliberatos et mortales; cum enim ipsi parvipendant peccatum, non fit in eorum animis illa sensibilis et memorabilis impressio, quæ fit in alio habente conscientiam minùs depravatam; et hinc evenit, quòd in eorum memoriâ non remanet vestigium actualis illius cognitionis, quam satis habuerunt antèa de peccato, aut vestigium est adeò leve, ut interrogati de facili respondeant, quòd non ad-

verterint; sed cautus Confessarius non debet ipsi fidem præstare. Et idem videtur dici etiam posse de operantibus secundum suas pravas passionem, quibus non jam defuit omnis cognitio materiæ suarum culparum, sed cognitio est in eis tam obscura, ut vix discerni possit.

31. — Quarto demum modo ignorantia sit voluntaria et culpabilis, ut dicunt *Tannerus*, et *Antoine* (a) cum *S. Antonino*, si homo in agendo advertenter negligit adhibere considerationem, quam res agenda meretur; illi enim qui jam advertit (ut rectè ait *Antoine*) aliquid ampliùs considerandum, et tamen vult præcipitanter operari, meritò imputantur omnes errores, quos committit.

32. — Contrà verò mihi omninò tenendum videtur, si ignorantia nullo ex prædictis modis fuerit voluntaria, et homo nullam habuerit actualem advertentiam malitiæ, vel periculi, nec directè, nec indirectè, neque in se, neque in suâ causâ, tunc nullo modo imputantur ei errores quos non advertit. Ratio, quia ut imputentur alicui effectus cujusdam causæ, debet necessariò præcedere (saltem in principio) advertentia actualis et expressa malitiæ objecti; advertentia enim interpretativa, ut rectè loquuntur *Salmanticenses* (b), fundatur super aliquam advertentiam expressam, sicut voluntarium indirectum fundatur super directum. Præterquamquòd advertentia interpretativa supponit obligationem, et potentiam advertendi; sed deficiente omni advertentiâ expressâ, non est potentia adversandi, et idè nec obligatio, cum nulla obligatio liget, nisi priùs quodammodo agnoscatur.

33. — Dices: Omnis ignorantia in eo, qui tenetur et potest suam obligationem advertere, est vincibilis, et proterea culpabilis. Sed rectè respondent *Sylvius* et *Suarez*, quòd ille qui omninò ignorat malitiam objecti, et adhuc obligationem advertendi, habet quidem potentiam remotam, sive physicam ad advertendum, sed caret potentiâ proximâ et expeditâ,

---

(a) *Tanner. to. 2. D. 4. q. 5. Dup. 5. a n. 103. Antoine tr. de Pecc. c. 4. q. 7. in fin.* — (b) *Salm. tr. 20. c. 13. n. 7.*

quæ homini necessaria est ad cognoscendam deformitatem suarum actionum. *Quis nesciat non esse in hominis potestate, quòd sciat?* ait S. Augustinus *lib. de Spir. et lit.* Undè nequit ipse naturaliter, ac humano modo suam vincere ignorantiam. Agnoscet quidem suam actionem quà actio est, sed ignorabit eam quà mala est; sola enim cognitio objecti in esse physico non est sufficiens principium ad discernendum, nec ad inquirendum objectum in esse morali, quòd equidem prorsus differt à physico. *Quando nulla* (sapienter ait P. Suarez) *talis cogitatio in mentem subiit, quâ possit voluntas excitari ad quærendam scientiam, non est in potestate hominis se ad illam movere, et consequenter non potest talis ignorantia homini imputari* (a) Et hoc est quòd docet S. Thomas (1. 2. q. 76. a. 2.) dicens: *Undè propter negligentiam ignorantia eorum, quæ aliquis scire tenetur, est peccatum. Non autem imputatur homini ad negligentiam, si nesciat ea quæ scire non potest; undè horum ignorantia invincibilis dicitur, quia studio superari non potest.* Studium autem hoc sive diligentia adhibenda ad expellendam ignorantiam, ut rectè advertit Sylvius cum Medina, et Richardo (b), non debet esse summa, sed sufficit si sit moralis, et talis quam Prudentes communiter adhibere solent in re gravi; superveniente enim dubio Indoctus debet consulere peritos: Doctus verò consulere libros, vel cum aliis Doctis rem conferre.

34. — Hanc denique sententiam observo communiter teneri ab Auctoribus, non solum probabilistis (qui eam non jam ut probabilem, sed *tanquam certissimam apud omnes* agnoscunt, sicut scribit Suarez), at etiam antiprobabilistis; etenim de Sainte Beuve Doctor Sorbonicus sic ait: *Si advertatur tantum in actum materialiter sive physicè consideratum, et non formaliter seu moraliter, erit tantum volitus actus, ut est quid physicum, et non ut est quid morale; ergò non ut malum; et in hoc non erit malitia* (c). Cardinalis

---

(a) *Suar. in 3. p. to. 5. D. 4. Sect. 8. n. 18.* — (b) *Sylvius in 1. 2. q. 76. a. 3. Concl. 1. et deindè q. 3. Concl. 1.* — (c) *Sainte Beuve de Pecc. D. 5. Sect. 1. a. 3.*

Gotti scribit : *Dico secundò , ad peccatum mortale sufficere advertentiam implicitam seu virtuales malitiæ actionis vel ejus periculi. Etenim eo ipso quo quis dubitat aut suspicatur de malitiâ suæ actionis , vel malitiæ periculo , et tamen rei veritatem inquire negligens actionem ponit , censetur interpretativè et ipsam malitiam velle* (a) P. Wigandt pariter inquit : *Dico 1. Deliberatio , seu advertentia est duplex : una est plena et perfecta , quæ adest quandò homo advertit , non solum ad operationem quoad entitatem naturalem ejus , v. g. ad esum carnum , sed etiam ad ejus malitiam , aut periculum transgressionis legis : alia est imperfecta etc. Dico 2. Ut aliquid in individuo imputetur ad culpam mortalem , debet adfuisse plena et perfecta deliberatio* (b). Consentit his S. Antoninus , qui ad peccandum mortaliter in delectatione morosâ requirit , non solum deliberationem , sed etiam animadversionem periculi , his verbis : *Aut ergò manet talis complacentia post sufficientem deliberationem , et animadversionem periculi , et tunc est mortale* (c). Alio loco inquit : *Defectus recti judicii ad considerationis vitium pertinet , prout scilicet aliquis in rectè judicando deficit , ex eo quòd contemnit vel negligit attendere ea , ex quibus rectum judicium procedit* (d). Consentit etiam Continuator Tournely , qui sic concludit : *Itaque , ut intrà veri limitis gradum sistamus , existimamus eum , qui ità non advertit ad peccati malitiam , ut vel naturali raptus distractione , vel ob similem causam advertere non possit , peccato non teneri. Sic excusabitur Pœnitens , qui injunctam pœnitentiam præ oblivione non implet. Verùm aliter dicendum de actionibus , quas eliciunt aut omittunt viri terrenis rebus absorpti , passionibus suis servientes , assueti ut nequidem cogitent se non cogitare* (e). Sed idem jam nos admisimus suprà num. 28. ad 31. Consentit etiam Antoine , qui agens de Ignorantiâ dicit , inadvertentiam sive inconsiderationem esse culpabi-

---

(a) Gotti to. 2. tr. 4. de Vitiis q. 1. dub. 4. §. 3. n. 11. — (b) Wig. tr. 4. Ex. 2. de Pecc. n. 50. — (c) S. Ant. p. 2. tit. 5. c. 5. in fin. — (d) Idem ibid. c. 11. sub init. — (e) Cont. Tour. to. 2. de Pecc. c. 4. a. 1. pag. 283. in princip.

lem in eo, qui debitam diligentiam omittit, vel qui præcipitanter agit jam advertens rem indigere majori consideratione, vel qui actu positivo vult sequi passionem quæ advertentiam impediat. *Econtrà* (dicit) *si inadvertentia sit invincibilis in homine habente cognitionem habituales debitam, est prorsus inculpabilis, et excusat à peccato ea quæ ex illâ fiunt contra Legem; quia malitia actûs tunc nullatenus ne interpretativè quidem est voluntaria; nam sinè potestate cognoscendi non potest esse volitio* (a).

35. — Hinc concludendum, quòd opinio eorum (si fortè adsunt) qui dicunt operanti adversùs Legem imputandos esse omnes errores quos committit, etiamsi nulla unquam intercesserit actualis advertentia, nec directa nec indirecta, in se, vel in causâ, saltem in confuso, sed tantùm adfuerit advertentia interpretativa, in hoc dumtaxat consistens, quòd ipse debuit et potuit solâ potentiâ physicâ et remotâ malitiam advertere: hæc opinio nullo modo sustineri potest. Aliàs sequeretur quòd plurimi homines multis mortalibus culpis gravatos se invenirent, quin circâ illas ullam cognitionem unquam habuerint. Dicent quòd homines illi in pœnam aliarum culparum, putà ob cupiditates suas non repressas, obligationes proprii statûs non impletas, ceterasque negligentias merentur subtractionem lucis, quâ alioquin benè advertissent operationum suarum malitiam, et idcò omnes sui errores imputantur ad culpam. Sed ut illatio hæc valere posset, priùs probanda esset supposita propositio, quæ nobis minimè probatur: nam ratione aliorum defectuum Deus privabit aliquem suâ ulteriori luce, quâ tentationibus et passionibus propriis restitisset, nisi defecisset in aliis; itaque subtractio illa efficiet quòd talis homo incidat in culpas, quas satis advertit ut culpas; sed non efficiet quòd ei imputentur errores, quos nullo modo, neque expressè, neque in confuso ut culpas agnoscit; quia ubi non est cognitio, non est libertas; et ubi non est libertas, non est peccatum. Instabunt. Sed S. Thomas (*Lect. 7. in cap. 1.*

---

(a) *Antoine de peccat. cap. 4. q. 7.*



*Epist. ad Rom.* ) dicit : *Si ignorantia causatur à culpâ, non potest subsequentem culpam excusare.* At hoc dicimus sanè intelligendum de ignorantia voluntariâ aliquo ex modis, ut suprâ ab eodem Angelico explicatis. Præterquamquòd S. Doctor loquitur ibi de Infidelibus, quibus errantibus in Fide, ob eorum certè culpabilem ignorantiam, meritò imputantur ad culpam omnia mala quæ patrant.

36. — Præterea si absquè ullâ advertentiâ imputantur homini omnes sui errores, quamvis ipse, debitâ diligentia jam adhibitâ, rectè operari judicet, sequeretur quòd ad honestè operandum non sufficeret sequi sententias ( si sint minùs tutæ ) nec probabiliores, nec probabilissimas, nec etiam moraliter certas. Sed hoc dici nequit, cùm ab Alexandro VIII. damnata sit Prop. 3. quæ dicebat : *Non licet sequi opinionem inter probabiles probabilissimam.*

37. — Remanet objectionibus prolixis Adversariorum satisfacere, sed nos brevè expediemur. Opponunt I. illud in *Reg. 13. juris in 6.* ubi dicitur : *Ignorantia facti, non juris excusat.* Sed huic benè respondet *Sylvius (a)* id intelligi de Statutis forensibus, uti jam explicat Glossa ibidem ; in foro enim judiciali post legis promulgationem ignorantia transgressorum ordinariè præsumitur vincibilis ; nisi adsit aliqua ratio, quæ contrarium præsumere faciat, ut habetur in *Cap. In tuâ tit. Qui matrim. accus. etc.*

38. — Opponunt II. quòd si ad omnia peccata requireretur actualis advertentia, inculpabiles reputandi essent Judæi crucifigentes Dominum, Pagani occidentes Martyres, et Hæretici innumera crimina perpetrantes. Sed uno verbo his omnibus respondetur, nempe quòd horum omnium ignorantia fuit et est omninò crassa. Loquens enim Christus Dominus de Judæis, dixit : *Si opera non fecissem in eis, quæ nemo alius fecit, peccatum non haberent. Jo. 15. 24.* Idem quippè dicendum de Infidelibus, et Hæreticis, quibus ob suam malitiam vel supinam negligentiam omnes sui errores justè imputantur ad culpam.

---

(a) *Sylvius* 1. 2. q. 76. a. 3. *Qu. 1. Concl. 7.*

39. — Opponunt III. quòd sententia requirens aliquam advertentiam actualem non differt ab eâ, quæ peccatum philosophicum tuebatur à culpâ theologicâ immune. Sed respondetur, quòd ideò præfata opinio proscripta fuit ab Alexandro VIII, quia ille qui operatur contra rectam rationem, ut supponitur in peccato philosophico : etiamsi non reputet lædere Deum, reipsâ jam lædit, offendendo enim naturam rationabilem, offendit simul ipsius naturæ Auctorem. Sed in tali peccato semper requiritur, ut homo advertat suam actionem rectæ rationi adversari. Quid ergò commune est inter peccatum philosophicum, et actionem illam, quâ quis nullo modo, ne in confuso quidem avertit esse malam, et forte aliquando bonam reputat?

40. — Præterea ad hoc, ut peccatum sit mortale, requiritur plenus consensus voluntatis, ut communiter omnes DD. Catholici docent, *Contensonius, Tournely, Gonet, Wigandt, Gotti, Concina, Sanch. Salmant. Cardenas*, etc. ex *S. Thom. 3. p. q. 88. a. 7.* Ratio est, quia ad peccatum consummatum requiritur perfectum voluntarium, quod idem est, ac plenus consensus (a). Potest tamen voluntas assentiri gravi culpæ cum consensu indirecto, nempe cum vult causam prævidens effectum, ut superius dictum est; sed hoc intelligitur cum adest obligatio impediendi effectum, nam si in aliquo casu non adest talis obligatio, excusabitur quidem (causam ponendo) à malitiâ effectûs, cum positivè non vult, licet illum prævideat (b).

41. — Notandum I. post intellectus advertentiam, tribus modis posse voluntatem ferri circa objectum peccaminosum sibi propositum, 1. positivè in illo consentiendo, 2. positivè resistendo, 3. negativè se habendo, nec consentiendo, nec resistendo. Hinc fit quæstio, an graviter peccet, qui negativè se habet, et positivè non resistit appetitûs sensitivi motibus circa objectum graviter malum? Generaliter loquendo juxta sententiam veriore *Gerson. Sanch. Castrop.*

---

(a) *Lib. 5. n. 5.* — (b) *Lib. 5. n. 6.*

*Salmant.* cum *S. Thomâ* et aliis, iste leviter peccat, non verò graviter; nam periculum consensus quod potest esse in non resistendo, non est proximum, sed tantum remotum (a).

42. — Sed secus procedit in delectatione carnali, cui (juxta sententiam communem DD.) tenemur sub gravi positivè resistere, quia istæ cum sunt vehementes de facili possunt sibi trahere voluntatis consensum, si ipsa positivè non resistit (b).

43. — Quomodo autem hujusmodi carnis tentationibus resistendum sit, Auctor quidam modernus quoad frænandam externam, et sensualem commotionem dicit, multum prodesse, vestibus tegere, et comprimere partes commotas. Quoad præservandam animam à consensu, juvant devotæ cogitationes super Jesu-Christi morte, super inferno, aut Morte; et valde quoque proderit animo revolvere conscientia remorsus, quos Anima, patrato peccato, sensitura erit cum advertet Deum amisisse. Sed maximè quoque juvat, imò necesse est in hujusmodi tentationibus ad orationem confugere; nam (teste Sapiente) castitas obtineri non potest, nisi à Deo, et per orationem: *Et ut scivi, quod aliter non possum esse continens, nisi Deus det, adii Dominum, et deprecatus sum.* Sap. 8. 21. Invigilet Confessarius ad insinuandas Pœnitentibus præcipuè Recidivis, istas considerationes, ne eorum sequatur exemplum, quibus satis est ab ore pœnitentis audivisse, se amplius nolle peccare, et nullo alio interposito sermone, eos absolvunt. Præ cæteris eos moneant, ut in turpibus tentationibus, ne cum eis mente sermocinentur, sed propositum renouent se mori potius esse paratos, quàm assentiri Dei offensæ, et ut inde statim invocent pluries cum fiducia SS. Nomina Jesu, et Mariæ, hæc invocatione intendentes eorum auxilium exposcere. Dixi, *ne mente cum tentationibus sermocinentur*; omnes enim spiritus Magistri advertunt, quod in hujusmodi sensus tentationibus, sicut etiam in illis contra Fidem, satius esse mentem aliò divertere, quàm manu cum eis (ut dici

---

(a) *Lib. 5. n. 6.* — (b) *Lib. 5. n. 7.*

solet) conflictari; contrariis voluntatis actibus ob-  
sistendo, et rationes exquirendo, quibus sibi sua-  
deat, cur consentire non debeat. Cùm verò motus  
sunt leves, meliùs erit, quin resistat, si eos con-  
temnat (a).

44. — Et insuper advertatur non esse obligatio-  
nem resistendi tentationibus, et motibus carnali-  
bus, cùm adest justa causa positivè non resistendi,  
putà si quis expertus esset resistendo, magis augeri  
motus, et contrà contemnendo, cessari: aut si  
motus proveniant ex aliquâ necessariâ, aut utili  
actione, sicut est ab audiendis confessionibus, aut à  
legendis libris, ut discatur Disciplina Moralis, aut  
medica, aut à tactibus necessariis in medendo, et  
similibus. Nam tunc (ut docent DD.) non tenemur  
opus omittere propter hujusmodi involuntarios mo-  
tus, nec resistere positivè, si illi motus durarent, et  
magnæ esset molestiæ debere semper eos positivè  
repellere. Satis tunc erit dare operam, ne consen-  
tiant: dùm hæc ipsa diligentia erit sibi sufficiens  
reluctatio. Ita *Tolet. Cajet. Laym. Tournely, Azor.*  
*Sanch. La Croix etc.* (b).

45. — Notandum II. peccata Omissionis requirere  
actum positivum, et deliberatum voluntatis in con-  
sentiendo omissioni operis præcepti, ut benè docent  
*Gonet, Filliuc.* et *Salm.* quicquid dicant alii (c).  
Insuper advertendum omissiones, quæ proveniunt  
à causâ priùs positâ, non imputari ad peccatum  
tunc, cùm omittitur præceptum, sed cum ponitur  
causa, ut rectè dicunt *Sanch. Becan. Filliuc.* contrà  
alios. Hinc qui causam ponit prævidens effectum,  
exemp. g. qui ebriatur prævidens se omissurum sa-  
crum, etsi accideret, ut postea sacro adesset, etiam  
ei confitendum esset peccatum omissionis, quia præ-  
stitit consensum, cùm causam posuit, nempe ebrie-  
tatem (d). Nihilominùs si peccato consummato an-  
nexa sit censura, et quis, antequàm effectus sequatur,  
se retractaret, tunc esset reus effectûs præcogniti,  
sed non incurreret censuram; quia censura requirit

---

(a) *Vide lib. 5. n. 8.* — (b) *Lib. 5. n. 4.* — (c) *Vide Salm. tr.*  
*20. c. 10. n. 11.* — (d) *Vide lib. 5. n. 10. v. Notandum III.*

contumaciam eodem temporis momento, quo peccatum consummatur (a). Si quis omitteret sacrum, ut iret venatum, aut ut ludo vacaret, sat erit, si tantum confiteatur Missæ omissionem; quia ideo ludus, et venatio sunt illi peccatum mortale, quia sunt causa omissionis sacri (b).

46 — Notandum III. Propositionem, quæ dicebat non esse mortale, nec mereri pœnam æternam peccatum Philosophicum, nempe illam culpam, quæ dignoscitur esse contrà rationem, sed non contrà legem divinam, quæ his verbis adnotatur: *Quod in eo, qui vel Deum ignorat, vel de Deo actu non cogitat, sit grave peccatum, sed non offensa Dei, neque peccatum mortale dissolvens amicitiam Dei; neque pœnâ dignum*; meritò fuisse damnatam ab Alexandro VII. quia qui advertit opus suum esse Naturæ rationabili adversum, advertit saltem in confuso injuriam quæ irrogatur Naturæ Auctori, qui est ipse Deus.

## PUNCTUM II.

De peccatis in particulari, de Desiderio, Complacentiâ, et Delectatione morosâ.

*Desiderium, Gaudium, et Delectatio* 47. *An in Delectatione explicanda sit species* 48. *Delectatio de opere malo, et de malâ cogitatione* 49. *Desiderium mali, si esset licitum* 50. *Delectatio et Desiderium inter Sponsores etc. et inter Conjuges* 51. *Delectatio de causâ malâ ob bonum effectum* 52. *De damno alterius ob bonum finem* 53. *De rebus prohibitis lege positivâ* 54.

47. — **I**NTER Cogitationes peccaminosas distinguenda sunt inter se Desiderium, Gaudium (sive Complacentia), et Delectatio morosa. *Desiderium* respicit tempus futurum, et est cum homo deliberatè cupit opus malum opere complere. Hoc desiderium dicitur efficax, cum quis proponit illud exe-

---

(a) *Ibid. v. Not. III. in fin.* — (b) *Lib. 5. n. 10. v. Not. II.*

qui, inefficax cùm consentit in voluntate exequendi, si posset : v. g. si diceret, vellem surripere thesaurum ab Ecclesiâ, si possem. *Gaudium* respicit tempus præteritum; et est quandò Homo complacet sibi de malo patrato. *Delectatio morosa* deniquè respicit tempus præsens, et est cùm quis præsentem sibi imaginatur actum peccati, et de illo oblectatur, ac si tunc illum exequeretur. Et dicitur *morosa*, non quia opus sit longâ morâ, ut fiat peccatum; quia illa potest momento compleri; sed ob moram deliberatam, quam voluntas facit (a).

48. — Hoc posito, notandum 1. tàm *Desiderium*, quàm *Complacentiam* comprehendere totam malitiam, et omnes species, quibus objectum induitur; undè si quis v. g. cupit cum aliquâ coire, vel sibi complacet de copulâ habitâ cum illâ, debet explicare qualitatem mulieris, an sit conjugata, an habeat votum castitatis. Ideoque benè docent *Salm.* (b) cum *Lugo*, *Castrop.* etc. quòd si quis se jactat de peccato patrato, debet explicare in Confessione omnes species illius, quia in se jactando regulariter adjungitur ad jactantiæ malitiam etiam complacentia de peccato commisso (c). An autem idem dicendum de delectatione morosâ, quæstio est. Alii affirmant, ut *Cajet. Less. Sanch.* etc. Alii negant, ut *Azor. Lugo, Bonac. Laym. Coninch. Castropal.* etc. quid dicunt, quòd si quis delectatur de copulâ conjugatâ, non ut conjugatâ, sed tantùm ut pulchrâ, non committit adulterium, siquidem adulterii circumstantia non intrat in Delectationem, prout intrat in *Desiderium*, et in *Complacentiam*, quæ (ut dictum est) totum objectum, ut in se est, exhauriunt, nec possunt præscindere ab illius circumstantiâ. Hæc opinio speculativè loquendo est valdè probabilis, sed in praxi dico cum *Holzman*, sinè dubio esse explicandas in delectatione omnes objecti circumstantias, quia in illâ adest periculum proximum desiderii pravi peccandi cum hujusmodi personâ (d).

---

(a) *Vid. Opus nostrum l. 5. n. 15.* — (b) *Tract. 20. c. 3. n. 66. et 67.* — (c) *Lib. 5. n. 25.* — (d) *Ibid. n. 15. infra.*

49. — Notandum 2. aliam esse Delectationem de malo, cùm opus malum est objectum delectationis : et hæc delectatio sinè dubio est graviter peccaminosa, si opus est culpa gravis. Aliam esse delectationem de cogitatione operis mali, cùm non delectatur de opere malo, sed tantùm de cogitatione illius : v. g. aliquis legit materias turpes, et non delectatur de illis, sed tantùm de illarum lectione? Hæc delectatio etiam potest esse gravis, cùm adest proximum periculum consensûs : sed cùm non adest tale periculum, erit tantùm venialiter mala; imò omni culpâ carebit, cùm justam habet causam legendi, aut cogitandi de hujusmodi materiis, causâ v. g. studendi, medendi, aut Confessiones auscultandi, etc. Ità *S. Thom.* 1. 2. q. 74. a. 8. et *S. Anton. Sanch. Less. Bonac. Salm.* aliique communiter (a).

50. — Quæritur 1. An peccet graviter, qui concupiscit objectum graviter malum, sed sub conditione si esset licitum? In rebus prohibitis lege positivâ, certò negandum. Dubium restat in prohibitis lege naturali. Et tunc ità distinguendum : si conditio abstrahit totam malitiam peccati, v. g. si quis diceret, si Deus mihi permetteret, vellem equum Titii mihi accipere, hic non peccaret, vel saltem non graviter : secùs autem si conditio non aufert malitiam, v. g. peccarem, si non adesset Infernus; occiderem si non essem Sacerdos, et hujusmodi alia. Et idem rationabiliter dicunt *Sanch. Laym. Azor.* de eo, qui diceret : si non esset peccatum, ulciscerer, blasphemarem, etc. nam cùm hæc sint intrinsecè mala, nunquàm abstrahi possunt à suâ malitiâ. Quamvis probabiliter dicant *Sanch. Bonac. Castropal. Vasq. Sa, Valent. et Salm.* cum *Cajet.* et aliis, quòd cùm quis cupit aliquid malum sub conditione, si non esset malum, nunquàm concupiscit malum reverà, sed tantùm ostendit inclinationem ad illud, quod ad mortalem non attingit. Qui verò optaret absolutè, ne esset prohibitum, quòd est intrinsecè malum, non potest excusari à mortali, dùm ex se malum est velle invertere ordinem et legem Naturæ, ut rectè dicunt *Salm.* (b).

(a) *Lib. 5. n. 17.* — (b) *Vide l. 6. n. 13. v. Quæritur.*

51. — Quæritur 2. An Sponsus possit delectari de congressu cum Sponsâ sub conditione, si esset sibi uxor, aut cogitando ad tempus, quo erit uxor? Alii absolutè admittunt. Alii admittunt, modò delectatio sit de solo appetitu rationabili, præciso periculo appetitûs sensitivi, nimirum sinè spirituum commotione. Sed nos cum *Sanch. Suar. Laym. Azor. Salm. Holzman, Roncaglia, Croix* etc. dicimus, neutrum esse admittendum, quia delectatio facit objectum sibi præsens, et cum sit tunc præsens objectum à conditione cohonestante præcisum, tunc objectum certè est malum, et quamvis consensus sit conditionatus ergà objectum, est tamen absolutus ergà delectationem (a). Aliud est autem, ait *Roncaglia*, si sponsus desiderat simpliciter copulam futuram cum sponsâ, quando sibi erit uxor: quia tunc optat rem ad tempus, quo reverà illa sibi licita erit. Sed hoc non obstante ego subjungo, quòd per hujusmodi desideria, cum quis moratur in iis cogitationibus, magnum subest periculum delectationis præsentis; idèoque debet Confessarius omninò prohibere, ne sponsi in hujusmodi desideriis morentur. Contrà valdè probabile est per se, non esse mortale se delectare de copulâ habitâ, vel habendâ cum suâ uxore absente (quicquid dicant *Salmant. et Roncaglia*, qui affirmant, si delectatio habeatur cum commotione spirituum), dùm semper ac periculum pollutionis abest, Matrimonium ipsum licitos reddit tactus impudicos inter Conjuges (qui sine dubio nequeunt esse sine commotione, aut saltem sine proximo periculo commotionis, et tamen eos ipsi *Salmanticenses et Roncaglia* non damnant de mortali), ità reddit per se licitam ipsam delectationem copulæ; hujus sententiæ sunt *S. Anton. Cajet. Coninch. Vasq et Croix* cum *Suar. Gers. Laym. etc.* (b), et expressè eam docet etiam *S. Thomas* (c).

52. — Quæritur 3. An liceat oblectari de aliquo opere intrinsecè malo quod accidit ob bonum effectum indè secutum? Distinguendum: si opus est formaliter

---

(a) *Lib. 5. n. 14. et 24.* — (b) *Ibid. n. 25.* — (c) *Qu. 15. de Malo a. 2. ad 17.*



maliter malum, nempe cum peccato patratum, pro certo est apud omnes non licere delectari de illo. Si autem accidit sinè peccato, non desunt qui admittunt posse delectari de illo, uti de causâ boni effectus; Nos verò cum Sanchez, Laym. Croix, Salmant. Roncaglia etc. dicimus talem delectationem semper esse illicitam; quia licet opus non fuerit peccaminosum, nihilominus semper fuit objectivè malum. Et hoc videtur non posse ampliùs revocari in dubium post Proposit. 15. damnatam ab Innoc. XI. quæ dicebat: *Licetum est Filio gaudere de parricidio Parentis à se in ebrietate perpetrato, propter ingentes divitias inde ex hæreditate consecutas.* Nec obstat quod dicit S. Thomas (a): *Si autem placet (nempe nocturna pollutio) ut naturæ exoneratio, peccatum non creditur.* Dùm hoc intelligendum de pollutione purè naturali, quæ provenit à naturâ se exonerante, ideòque cùm non sit objectivè mala, licet delectari de exoneratione ob eam obtentâ. Contrà (per se loquendo) licet delectari non de causâ peccaminosâ, sed de effectu inde secuto ut de exoneratione ob pollutionem habitâ aut de acquisitione hæreditatis ortâ ex homicidio. Dictum est *per se loquendo*, quia etiam delectatio solius effectûs, ut dicunt Salm. et Ronc. non caret aliquo periculo (b).

53. — Quæritur 4. An licitum sit delectari, aut optare damnum Proximo propter aliquem bonum finem? Prænotandæ hîc sunt duæ Propositiones damnatæ ab Innoc. XI. nempe 13. quæ dicebat: *Si cum debitâ moderatione facies, potes absque peccato mortali de vitâ alicujus tristari, et de illius morte naturali gaudere, illam inefficaci affectu petere et desiderare: non quidem ex displicentiâ personæ, sed ob aliquod temporale emolumentum.* Et Prop. 14. *Licetum est absoluto desiderio cupere mortem Patris, non ut malum Patris, sed ut bonum cupientis, quia nimirum obventura est pinguis hæreditas.* Hæ fuerunt meritò damnatæ, quia secundum ordinem Caritatis vita Proximi præferenda est cuicunque nostro temporali emolumento bonorum, aut honorum. Contrà licet

(a) In 4. Dist. 9. q. 1. a. 4. q. 1. ad 5. — (b) Lib. 5. n. 20.  
Tom. I.

gaudere, et cupere damnum temporale Proximi ob bonum commune aut innocentis, aut proximi; ita docent *Toletus, Nav. Bonac. Salm. Ronc.*, etc. cum *S. Thomá* (a). qui sic loquitur: *potest aliquis salvá caritatis optare malum temporale alicui, et gaudere, in quantum est impedimentum malorum alterius, vel communitatis, vel Ecclesiæ.* Item scribit *S. Gregorius*: *Evenire plerumque potest, ut non amissâ caritate, et inimici nostri ruina lætificet, et rursus ejus gloria sine invidiæ culpâ contristet; cum et, ruente eo, quosdam benè erigi credimus, et proficiente illo plerosque injustè opprimi formidamus.* *Mor. lib. 22. c. 22.* Quarè licet (semper tamen servato ordine Caritatis) optare, aut sibi complacere de infirmitate, aut morte impii, ad exemplum aliorum, et ut cesset ille à præbendis scandalis, aut ruinæ esse alio modo animabus. Ità etiam gaudere licet de damno temporali privati ad evitandum damnum commune. Ità etiam dicunt *Salmanticenses*, et *Roncaglia*, posse Patrem cupere mortem filio, si justè timet ne ille dedecori futurus esset familiæ (b). Ità etiam *Sotus*, *Castrop. Trullench. Granad. Viva, Felix Potestas* (contrà *Nav. Salmant.* etc.) permittunt sibi posse mortem optare, si minùs duram putaret esse sibi mortem quàm vitam adèò molestam ob infirmitatem, paupertatem, aut aliam molestiam, quâ afficitur. Et hoc mihi non videtur probabile; ut contrà videtur improbabilis mihi cum *Roncaglia*, et *Salmant.* opinio *Azorii*, et *Bonac.* licitum esse Matri mortem filiæ optare, quia eam in matrimonium collocare nequit ob ejus deformitatem aut paupertatem familiæ, aut quia ipsa Mater vexatur à viro illius causâ (c).

54. — Oblectari autem de rebus solùm à lege positivâ vetitis, uti est in diebus jejunii oblectari de carnibus, etc. hoc semper licitum est, aut saltem non est culpa gravis. Sed contrà ei, qui ex inadvertentiâ in die jejunii carnem comedit, non licet de hoc delectari (d).

---

(a) *In 3. sen. Dist. 30. q. 1. a. 1. ad 4.* — (b) *Lib. 5. n. 21. v. licitum.* — (c) *Ibid. n. 22.* — (d) *Lib. 5. n. 27.*

### PUNCTUM III.

De peccatorum distinctione, I. quoad speciem, II. quoad numerum.

*De distinctione Specificâ 55. et 56, de Numericâ, et de I. Radice à Multiplicitate Actuum 57. Circâ actus internos 58. ad 61. Circâ actus externos 62. et 63. De II. Radice à Diversitate objectorum totalium 64. et 65.*

55. — **ET** I. Quoad speciem quæritur primò à Doctoribus à quibus radicibus desumenda sit distinctio specifica peccatorum? S. Thomas docet desumendam ab objectis vitiosis specie diversis; Scotus contrà ab oppositione ad diversas virtutes, quibus opponuntur peccata. Utraque sententia est probabilis; secunda tamen, ut fatetur etiam *Tapia* Thomista, est facilior ad distinguendas species peccatorum. Quare dicimus distinctionem specierum desumi à duabus radicibus, prima ab oppositione ad diversas virtutes, ut dictum est. Sed quia aliqua peccata opponuntur eidem virtuti, ut blasphemia, et perjurium ambo opponuntur Religioni, ideò dicimus secundam radicem desumendam à diversâ deformitate eidem virtuti oppositâ. Hoc tamen valet, ut distinguantur peccata commissionis; peccata enim omissionis quoad speciem distinguuntur tantummodò ab objectis, quæ omituntur, v. g. omissio Sacri, et jejunii ambo adversantur Ecclesiæ obedientiæ, et in tantum sunt diversæ speciei, in quantum Sacrum, et Jejunium sunt objecta diversæ speciei (a).

56. — Quæritur secundò, an peccatum ex *objecto* leve possit propter aliquam circumstantiam devenire ad gravitatem speciei superioris? *Vasq.* et *Durandus* negant; sed affirmat sententia communis quam tenent *Suar. Castrop. Salmant.* et alii cum *S. Thomâ* (b), cum non accidat physicè, sed moraliter. Quare ait S. Doctor (c) esse graviolem bestialitatem perjurio

---

(a) *Lib. 5. n. 30. 31. et 32.* — (b) 2. 2. q. 10. a. 3. ad 1. — (c) 2. 2. q. 144. a. 3.

(a). Et ideò regula prædicta metiendi gravitatem peccati ex oppositione ad superiorem virtutem currit tantum, quandò peccata sunt maxima adversus aliquam virtutem, non autem cum comparatur maximum peccatum adversans uni virtuti cum minimo adversante alii virtuti (b).

57. — II. Quoad numericam distinctionem, dicimus pariter ex duabus radicibus desumendam, 1. *Ex multiplicitate actuum moraliter interruptorum*. 2. *Ex diversitate objectorum totalium* (De hac secundà dubitant DD., sed nos juxtà nostram sententiam, de quâ in fine hujus puncti num. 64. agemus). Et loquendo de primâ radice, ut dignoscatur quandonam actus voluntatis moraliter interrumpantur, plures oportet facere distinctiones.

58. — Primò oportet distinguere actus internos ab externis. Et quoad internos, distinguendum, cum hi possint esse aut circa peccata interna (*Cordis dicta*) quæ interiùs consummantur, ut sunt odium, hæresis, prava desideria, delectatio morosa, et hujusmodi: aut circa peccata externa (*oris et operis dicta*) quæ externè perficiuntur, ut sunt blasphemix, furta, etc. Hoc posito dicimus actus internos circa peccata *Cordis*, odia, desideria, etc. statim ac multiplicantur, interrumpuntur; itaque tot sunt peccata, quot sunt actus consensus voluntatis; ut communiter *Suar. Azor. Vasq. Castrop. Bonac. Salm. Tourn. Conc.*; et alii contra *Canum*, et *Lugo*, qui tenent per somnum, aut per distractiones non interrumpi, sed solùm per contrariam voluntatem. Sed hæc opinio non est mihi satis probabilis; undè dico teneri Pœnitentem ad explicandum, si potest, numerum actuum internorum, quibus præstitit consensum; si non potest, saltem tempus, in quo in tali pravo animo perseveravit, explicando saltem in genere, si eæ interruptiones (præter ordinarias somni, etc.) fuerint raræ, an frequentes. Si enim prædicti actus procederent ab uno, et eodem impetu passionis, dicunt *Lugo, Viva, et Tamb.* (et id videtur probabile)

---

(a) *Lib. 5. n. 34. et 35.* — (b) *Lib. 5. n. 14.*

tunc eos, quamvis intercederet aliquod intervallum, sed breve, constituere unum peccatum (a).

59. — Quoad actus internos circa peccata externa *Oris* et *Operis*, ut detractio, homicidii, etc. hæc bifariam moraliter interrumpuntur: 1. voluntatis retractatione; 2. voluntaria cessatione, nempe si voluntariè à pravo proposito cessat; nam si post cessationem voluntariam à proposito, iterum illud reasumit, tunc novum committit peccatum (b).

60. — Certum igitur est apud omnes tam per retractationem, quam per voluntariam cessationem interrumpi actus internos circa peccata externa. Sed quæstio est, an per ordinarias interruptiones interrumpatur pravum propositum circa peccata externa. Alii affirmant, ut *Vasq. Henno*, et *Diana*, et hæc opinio est satis probabilis. Sed probabilior est altera *Salmanticensium*, *Vivæ*, *Roncag. et Concina*; quod si perseveret propositum per breve tempus, actus replicati non interrumpuntur; interrumpuntur autem, si tempus est diuturnum: et opinio aliorum, quod quantumlibet temporis pravum propositum duret, actus non interrumpuntur, est contra communem sententiam, quare id mihi non videtur probabile. Quodnam autem tempus judicandum sit longum in hac materiâ, *P. Concina* putat unum diem; *Roncaglia* duos, alii quatuor, aut quinque; ego autem sentio posse idem pravum propositum duos, aut tres dies perdurare, sed non amplius; dum existimo concupiscentiæ sive passionis vehementiam (regulariter loquendo) difficulter ultra duos aut tres dies posse persistere. Quare dico, quod si pravum propositum præcedat actum duobus, aut tribus diebus, potest accipi pro uno peccato unâ cum actu externo consummato. Sed si quis perseverat diutius tribus diebus, ille debet explicare tempus: Et tunc Confessarius accipiet in confuso numerum actuum eo tempore interruptorum per quamlibet morulam somni, cœnæ, distractionum, etc. prout sunt coram Deo, tunc utendo primâ opinione *Vasquez*, etc. nempe actus internos per quamcumque morulam semper interrumpi (c).

(a) *Vide l. 5. n. 37.* — (b) *Lib. 5. n. 38.* — (c) *Lib. 5. n. 39.*

61. — Advertendum nihilominus, hoc non procedere cum actus voluntatis, qui proficiscuntur à primo pravo proposito, perdurant in aliquo effectum, qui conducit ad perficiendum unum dumtaxat peccatum externum; quia tunc quantumcumque temporis perduret prava voluntas, illi actus unum constituunt peccatum. Hinc qui proponit occidere inimicum suum, et ideo parat arma, insidias struit, et postea eum occidit: licet tunc plures, et plures dies reiteret actus suae pravæ voluntatis, unum peccatum committit: ita omnes DD. cum *S. Thomâ* (a). Ità etiam fur unum peccatum committit, si ipse semper perseverat (licet diutius) in sibi proposita à principio voluntate furandi, vel non restituendi; quia in illa voluntaria et numquam retractata retentione virtualiter durat in effectum prima voluntas, ut valde probabiliter docent *Nov. Lugo, Sairus, Trull. P. Nav. Roncaglia, Diana, Malder, et Salmant.* (contra *Suar. Bonac.* etc.). Rectè tamen advertit *Diana*, quod si fur aliquando sit impotens restituendo, et postea iterum fieret potens, et non restitueret; tunc novum committeret peccatum; tunc enim tempore impotentiae non perseveravit in effectum voluntas non restituendi (b).

62. — Hoc quoad actus internos peccatorum, quæ externè perficiuntur. Quoad autem ipsos actus externos, isti tunc moraliter interrumpuntur, cum non respiciunt aliquem actum completum, v. gr. si quis pluries percutit inimicum, non habens animum eum occidendi, tunc omnes illæ percussiones sunt distincta peccata, quia quilibet actus habet suam distinctam malitiam. Idem dicendum de tactibus turpibus, sinè intentione coeundi adhibitis. Contrà advertendum, quod bifariam actus externi uniuntur, et unum constituunt peccatum: 1. si procedunt ab ipso impetu, cum quis eodem iracundiæ tempore pluries blasphematur, injuriis aliquem afficit, percutit, aut detrahit, sive eadem concupiscentiæ vehementiâ pluries turpiter tangit; ita com-

---

(a) *N. 2. Dist. 42. c. 1. —* (b) *Lib. 5. n. 40.*

munitur. *Nav. Less. Crastopal. Bonac. Concina, Viva, Salmant.* etc. 2. Si actus externi moraliter ordinentur ad idem peccatum consummandum, prout qui accipit arma, inquit inimicum, et postea eum occidit. Item si quis ad copulam consummandam prae-mittit verba, oscula, etc. Itaque tunc sufficit tantum explicare commisisse homicidium, aut copulam. An autem explicandi sint tactus statim copulam subsequentes? Respondetur probabiliter negativè; semper ac tactus (et idem est de complacentiâ, quæ habetur de copulâ) statim post copulam habeantur, et non dirigantur ad novam copulam; quia tunc verosimiliter tactus illi adhibentur ad primæ copulæ complementum (a). Sed hic notandum cum *P Viva*, et communi (ut ipse asserit) omnia media externa adhibita ad exequendum peccatum, prout sunt tactus et verba obscœna, ac etiam iter susceptum, ascensus in domum Meretricis, parare arma ad vindictam, et huiusmodi, omnia hæc explicanda sunt in Confessione tanquàm peccata distincta numero, quando peccatum intentum executioni non mandatur; quia illæ actiones jam externatæ omnes informantur à malitiâ pravi finis (b).

63. — Quæritur si quis habens animum suscipiendi 100. aureos, centum vicibus susceperet, quot deccata committit? *La Croix* putat centum peccata committere, quodlibet enim furtum suam propriam habet malitiam. Sed probabiliter *Holzman* sentit, satis esse confiteri furtum 100. aureorum, tanquàm unum peccatum; dum ceteri actus tendunt ad complendum furtum intentum. Si autem non est intentum ad centum, certè distinctè explicanda sunt omnia furta gravia (c).

64. — Hactenùs de primâ radice: loquamur de secundâ, nempè de Diversitate obsectorum totalium. Quæstio est tamen in DD. an per hanc radicem multiplicentur peccata, v. gr. si quis unico ictu sclopeti plures occidit, an committat plura peccata? Alii negant, ut *Suar. Lugo, Laym. Anacl. Viva*, etc. Sed nos cum *Azor. Tournely, Concina, Salmant. Diana*,

(a) *Lib. 5. n. 41.* — (b) *Ibid. n. 42.* — (c) *Lib. 5. n. 44.*

*Croix*, etc. et communi affirmamus, quia idem actus, sicuti potest continere plures malitias specie distinctas, ita pariter potest habere plures distinctas numero; et hoc etiam contra eandem virtutem; puta si Conjugatus committit adulterium cum Conjugatâ. Hinc dicimus plura committere peccata 1. Qui uno ictu sclopeti plures occidit Homines; aut unicâ detracti-  
one multos unius familiæ infamat; aut unico sermone pluribus est scandalo. 2. Qui unicâ vice furatur à pluribus; sed hoc non intelligitur, si furaretur bona Monasterii, aut Capituli, quia ea bona pertinent ad communitatem, non verò ad particulares. 3. Qui unico actu voluntatis proponit plures dies omittere officium, aut jejunium, aut malum optat pluribus, vel cupit ad plures fœminas accedere, aut pluries ad eandem, fortius si pluries successivè cum aliquâ rem habet (a).

65. — Si autem aliquis negat plures Fidei Articulos, unum committit peccatum; nam, cum unum sit objectum Fidei, nempe veritas Dei revelantis; æquè infidelis est, qui unum articulum negat, ac qui omnes. Ità pariter qui coram pluribus alicui detrahit, probabile est cum *Azorio*, *Molina*, *Lugo* etc. (contra *La Croix*) unum peccatum committere dum unicum est apud omnes jus ad famam. Item qui plura mala exoptat inimico, v. gr. infamiam, mortem, etc. sed sub unâ mali ratione ea apprehendit, nempe ut media ad illius perniciem, probabiliter cum *Cajet. Lugo, Valent. Bonac. Croix*, etc. committit unum tantum peccatum, et ei satis est confiteri: *Exoptavi grave malum Proximo*: Sed qui efficaciter optasset in suum inimicum diversa mala inferre: aut optasset specificè et in particulari ut prædicta mala illi acciderent, tunc debet omnia illa distinctè confiteri, quia illa sunt diversa peccata (b). Dicunt *Salmant. Viva*, et *Lug.* cum aliis Confessarium, qui est in peccato mortali, plures successivè absolventem, unum committere Sacrilegium. Sed nos dicimus cum *Bonac. Escobar, Concina, Tournely*,

---

(a) *Lib. 5. n. 46.* — (b) *Lib. 2. n. 30. v. 1. In Confess. et l. 5. n. 30. Qu. 5.*



*Croix*, etc. tot sacrilegia, quot sunt personæ, quas absolvit, quia quælibet absolutio est distinctum Sacramentum. Secus autem et non improbabiler dicunt *Filiuc. Viva, Busemb.* et alii de Sacerdote in peccato existente, qui pluribus ministrat Eucharistiam, cum una sit tunc administratio, et unum convivium (a). Quot autem peccata committat, qui celebrat Missam in peccato, vide *Tom. III. Append. III. n. 11.*

## PUNCTUM IV.

### De peccato Mortali, et Veniali.

*Effectus Mortalis, et Venialis* 66. Quot modis Mortale fit Veniale 67. Quot modis Veniale fit Mortale 68. Quid si in periculum probabile de mortali quis se exponat? 69.

66. — **P**ECCATUM mortale est illud, quod privat hominem Divinâ Gratiâ, quæ est Animæ vita, et ideo dicitur mortale. Veniale est, quod non privat Gratiâ, sed minuit Caritatem, non quidem Dei erga nos, sed nostram erga Deum. Admonet Confessarios *S. Antoninus*, ne damnent aliquem peccati mortalis, nisi habeatur auctoritas expressa Sacræ Scripturæ, aut Canonis, aut determinationis Ecclesiæ vel evidens ratio. Quare ait Sanctus ex *D. Thomâ*, in grave periculum peccandi se conjiciunt, qui sinè certitudine faciliter actiones damnant de peccato mortali in talem conscientiam ponendo Pœnitentes (b).

67. — Quæritur 1. quot modis peccatum ex genere suo mortale fieri potest veniale? Tria requiruntur ad Peccatum mortale, gravitas materiæ, plena advertentia intellectûs, et perfectus consensus voluntatis; et ob aliquem horum defectum mortale fieri potest veniale. Et I. quoad Materiam, ejus gravitas consideranda est non solum in se, sed etiam ex circumstantiis, ex toto, et ex fine intento. Quapropter

---

(a) *Lib. 5. n. 47. ad 50.* — (b) *Vide lib. 5. n. 52. circa fin. v. Bene hio.*

non datur parvitas materiæ, ubi parvitas non minuit offensam, uti accidit in Infidelitate, Simoniâ, perjurio, vitio turpi, etc. Præterea advertendum materias parvas reiteratas tunc constituere materiam gravem, cum ex se, aut saltem moraliter in se coalescunt; ut sunt furtula, parvæ omissiones in Officio, in Missâ, aut comestiones modicæ in jejuniis eodem die repetitæ. II. quoad advertentiam, potest excusari à mortali semidormiens, aut semidistractus, aut qui subitâ et vehementi turbatione ita corripitur, ut nesciat quid agat. III. quoad consensum, notetur quod hic non est supponendus perfectus ad peccatum mortale in iis, qui spiritualem agunt vitam, et meticulousæ sunt conscientiæ, semper ac certi non sint de consensu (a).

68. — Queritur 2. quot modis contrà, veniale possit transire in mortale? Respondetur quinque. I. ratione *Finis Adjuncti*, qui ex se sit mortalis, v. g. si quis dicat verbum leviter inhonestum, sed sine Proximum trahendi ad culpam gravem. II. Ratione *Finis Ultimi*, et est cum quis agit aliquid ex se non mortale, sed eâ animi adhæsiōe, ut potius sit paratus ad præceptum grave transgrediendum, quàm illud omittere; v. g. si quis die festivo sit paratus potius ad omittendum Sacrum, quàm ludum. Sat tamen tunc erit, si confiteatur tantum voluntatem omittendi Sacrum. III. Ratione *Contemptus Formalis* legis, aut Legislatoris, ut docet S. Thomas (b) cum aliquis ex proposito legem (etiamsi humanam) transgreditur, quia non vult ei se subijcere; aut idem superiori non obedit, quia illi non vult subijci; si autem nollet superiori obsequi, aut ex passione, aut quia res est parvi momenti, tunc ait S. Doctor *non peccat ex contemptu, etiamsi peccatum reitet*. IV. Ratione *Scandali* respectu Pusillorum, ut in *Tractatu sequenti* n. 28. V. Ratione *Periculi proximi* in culpam gravem labendi (c).

69. — Nonnulli AA. dicunt quod si quis se exponit periculo tantum probabili labendi in mortale,

---

(a) *Lib. 6. n. 476. v. Item, et l. 5. n. 53. ad 58.* — (b) 2. 2. q. 186. a. 9. ad 3. — (c) *Lib. 5. n. 59. ad 63.*

non peccat graviter semper ac sit etiam probabile, quòd non cadat. Sed hæc opinio rejicitur à Carden. Busemb. Croix, etc. quia si nobis nefas est uti opinione probabili cum periculo facti de damno alterius, ut dictum est *Tract. I. n. 21.* quantò minùs possumus eâ uti cum periculo propriæ Animæ? Tunc lapsus, licet sit incertus, certum tamen est periculum. Hoc intelligitur quòd peccet graviter, qui se exponit periculo sinè justâ causâ; hoc enim non currit juxta communem *Nav. Roncag. Hurtad. Salmant. Elbel*, etc. de eo qui ex necessitate se exponit (ut dicitur de Chirurgo, et parocho *Tract. IX. n. 34. de Sexto Præcepto*); quandoquidem tunc periculum ex proximo fit remotum, tùm propter necessitatem, tùm propter media præservativa quæ debet adhibere in hujusmodi occasionibus: nam licet nemo excusetur, etiamsi velit eadem media adhibere, qui præcisâ necessitate se exponit periculo; attamen benè excusabitur, qui illi ex justâ causâ se exponit, dùm huic, non autem illi in occasione auxiliaturus erit Deus, qui indigentibus, non temerè agentibus opitulatur (a).

## TRACTATUS IV.

### DE PRIMO PRÆCEPTO DECALOGI.

#### CAPUT I.

#### De Virtutibus Theologicalibus.

*De Fide 1. ad 5. De Spe 6. ad 8. De Caritate 9. ad 12. Actus exercendi circa Virtutes Theologales 13.*

I. — AD primum præceptum primo spectant Virtutes Theologicae, quæ sunt Fides, Spes, et Caritas. De singulis seorsim. Et I. Fides definitur: *Est*

(a) *Lib. 5. Cit. n. 63.*

*virtus Theologica à Deo infusa, inclinans nos ad firmiter assentiendum ob Divinam veracitatem omnibus, quæ Deus revelavit, et per Ecclesiam nobis credenda proposuit.* Dicitur 1. *Virtus Theologica*, id est Deum respiciens, quia Fides, sicut etiam Spes, et Charitas directè respiciunt Deum, ad differentiam Virtutum Moralium, quæ illum indirectè respiciunt. 2. *A Deo infusa*, quia Fides est donum Dei supernaturale. 3. *Inclinans nos ad firmiter credendum*, nam assensus Fidei non potest esse cum formidine, ut volebat Prop. 4. ex damnatis ab Innoc. XI, sed debet esse firmus. 4. *Ob Divinam veracitatem*, cum infaillibilis veritas (quæ est ipse Deus) sit objectum formale Fidei. 5. *Omnibus, quæ Deus revelavit*, cum omnia à Deo revelata sint objectum materiale Fidei. 6. *Et per Ecclesiam nobis credenda proposuit*, quia Divina Revelatio nobis non manifestatur, nisi per Ecclesiam, quæ eam proponit; est enim evidens per signa Credibilitatis (quæ sunt Prophetiæ, Miracula, Martyrum constantia, etc.) Ecclesiam non posse falli, nec fallere. Quare agebat S. Augustinus: *Evangelio non crederem nisi me Ecclesiæ Catholicæ commoveret auctoritas.*

2. — Itaque *Objectum Materiale* Fidei (nimirum id quod credere debemus) præcipuum est Deus, et inde cetera omnia à Deo revelata, ut dicit S. Thomas: *Fides quæ hominem Divinæ cognitioni conjungit per assensum, ipsum Deum habet sicut principale objectum, alia verò sicut consequenter adjuncta.* Objectum autem *Formale* (sive motivum quo debemus credere) est Dei Veritas. Quæstio tamen est inter Scholasticos, an Revelatio etiam sit objectum formale Fidei? *Juvenin*, et alii dicunt Dei veracitatem esse objectum Formale *Quod*, sive rationem præcipuam, in quâ fundatur Fides. Revelationem autem esse objectum formale *Quo*, nempè medium, quo nos credimus. Sed communior sententia, quam tenent *Habert*, *Gotti*, et *Holzman* cum *Scoto*, etc. vult objectum formale Fidei esse veracitatem Dei, et Revelationem esse tantum conditionem, quâ nobis applicetur notitia eorum, quæ credimus.

3. — Sed deveniamus ad ea, quæ nostri instituti laboris intersunt. Altera sunt præcepta explicitè credenda *de necessitate medii*, altera *de necessitate præcepti*. Nulli dubium est, quin explicitè *de necessitate medii* credenda sint, Deum esse, et Remuneratorem esse Boni, et justum Vindicem mali. Quoad autem Mysteria Sanctissimæ Trinitatis, et Incarnationis, et Mortis Jesu Christi, licèt adsit sententia probabilis pro utrâque parte, an debeant credi ex necessitate medii, an præcepti; attamen certum est ex Propos. 64. ex damnatis ab Innoc. XI. non esse Absolutionis capacem, qui ignorat ea Mysteria, aut quia agitur de valore Sacramenti, aut quia agitur de mysteriis longè maximis, et momenti valdè gravis, ut credantur, ad salutem æternam consequendam, ac edoctu ita facilibus, ut sinè magnâ difficultate ea addiscere possit pœnitens, antequàm Absolutione Sacramentali donetur. Sed ratio potior est, quia pœnitens Sacramentum pœnitentiæ recipiendo, quod est meritorum Salvatoris communicatio, tenetur illi explicitè credere, sive tenetur exercere fidem circà illa Mysteria Trinitatis, et Incarnationis. Explicitè verò *de necessitate præcepti* debent sciri. et credi, saltem in substantiâ, ut docet S. Carolus Borromæus in suâ *Instructione ad Confessarios*. 1. Symbolum Apostolorum. 2. Oratio Dominicalis, et Salutatio Angelica. 3. Præcepta Decalogi, et Ecclesiæ. 4. Sacramenta, quæ cuilibet sunt necessaria, ut Baptismus, Eucharistia, et Pœnitentia; cæterorum enim sufficit habere fidem implicitam, cùm explicita sit tantùm necessaria illis, qui ea suscipiunt.

4. — Peccata, quæ Fidei adversantur, sunt Infidelitas, et Hæresis: Infidelitas quæ triplex est: *Negativa*, eorum nempè, qui nihil audierunt in Fide. *Positiva*, eorum est, qui suâ culpâ ignorant veritatem Fidei. *Contraria* est eorum, qui Fidei sufficienter eis propositæ repugnant, aut eam contemnunt. In hâc Infidelitate contrariâ sunt, Paganismus, Judaismus, et Hæresis.

5. — Ad Hæresim duo requiruntur, Judicium erroneum intellectûs, et Pertinacia voluntatis. Quare non est hæreticus, qui tantùm externè detestatur

Fidem, aut qui tantum negativè dubitat de eâ, credulitatem suspendendo circa aliquem articulum, quia iste non format iudicium: contra verò est hæreticus, qui affirmativè iudicat aliquod Dogma esse dubium; aut qui ideò suspendit iudicium, in quantum virtualiter iudicat dubium esse illud dogma, licet sciat Ecclesiam illud docere. Nec est hæreticus qui est dispositus se iudicio Ecclesiæ submittere, quia tunc deest pertinacia (a). Ad Hæresim deducitur Apostasia, quæ est error Fidei ex toto contrarius, ab eâ nempe discedendo.

6. — II. Spes definitur: *Est virtus per quam certâ cum fiduciâ futuram Beatitudinem, et mediâ illius assequendæ expectamus per Dei auxilium.* Objectum materiale primum Spei, illud nempe quod sperare debemus, est Beatitudo æterna, quæ est Deus ipse fruendus; secundarium sunt Divina gratia et bona nostra opera Dei auxilio exequenda. Objectum verò formale, seu motivum quo nos sperare debemus, alii dicunt esse Dei Misericordiam; alii Divinam Omnipotentiam, ut communiter Thomistæ; alii Divinam Promissionem, ut tenet *Juvenin*; alii denique volunt esse Divinam Bonitatem, illam intellige Bonitatem, quâ nobis auxilia ad consequendam salutem communicat, quæ eadem est, ac Misericordia: quod si quis vellet Objectum Formale Spei esse Bonitatem Dei, in quantum est res spectata, benè ait *Continuator Tournely* (b) erraret utique.

7. — Hinc puto concludendum omnia illa tria prima motiva, quæ innuimus objectum formale Spei constituere, nimirum Dei Misericordiam, et Omnipotentiam, quâ nobis Deus opitulatur ad vincendos inimicos salutis; hæc duo motiva expressè docentur à S. Thomâ (c), qui sic ait: *Ita objectum formale Spei est auxilium Divinæ Pietatis, et Potestatis, propter quod tendit motus Spei in bona sperata, quæ sunt materiale objectum Spei.* Et puto his duobus debere addi tertium, quod est Divina Promissio, ut ait *Juvenin*, sive sit fidelitas Dei in promissis, quibus pollicitus

---

(a) *Lib. 1. n. 17. et 19.* — (b) *Tom. 3. de Spe p. 226. Conc. 2.*  
 — (c) *In Quæst. Disp. q. unic. de Spe.*

est se ob merita Christi ad gloriam nos adducturum ; nam , hâc promissione præcisâ , nos certâ fiduciâ non possemus nostram salutem sperare.

8. — Vitia Spei opposita sunt Desperatio , et Præsumptio : peccat præsumptionis ille , qui meritis ipsius , solius innixus , aut solius Jesu Christi meritis ipso non cooperante confisus , sperat salutem consequi. Præsumptionis pariter peccat , qui reiterat peccata sperans Deum æquè unum quàm duo peccata esse remissurum ; aut qui ex facilitate remissionis , quam sperat , inducitur ad peccandum : non autem qui ex passione peccaret , sperans eodem tempore sibi parcendum fore. Qui autem vellet diutiùs in peccatis perseverare , sperans postea fore , ut resipisceret , hic non peccaret quidem contrà Spem , sed contrà Caritatem ergà seipsum , æternæ damnationis periculo se exponendo (a).

9. — III. Caritas definitur : *Est Virtus , quâ diligimus Deum propter seipsum , ac nos , et Proximum propter Deum*. Itaque objectum materiale primarium Caritatis , (nempe id quod amare tenemur) est Deus , quem super omnia diligere tenemur , tamquàm nostrum ultimum finem. Secundarium sumus nos ipsi , et Proximus , quem sicut nosmetipsos diligere debemus , quia hoc nobis præcipit Deus. Objectum autem formale Caritatis (nempe motivum , quo tenemur diligere Deum) est quia ipse est Bonitas infinita , fons et aggregatio omnium perfectionum.

10. — Dubitatur 1. An desiderium fruendi Deo sit objectum Caritatis ? Et respondemus affirmativè : Caritas enim (ut diximus) tendit ad Deum , ut ad ultimum finem , idèòque desiderium eo fruendi , qui est ultimus finis noster , est actus proprius Caritatis , imò perfectissimus , quia fructio est Caritas consummata : quare Apostoli desiderium moriendi , et esse cum Jesu Christo , fuit actus perfectus Caritatis. Et hoc expressè dicit S. Augustinus : *Caritatem voco motum animi ad fruendum Deum propter seipsum*. Nec obstat dicere , quòd objectum Caritatis esset idem cum objecto Spei , quod est etiam frui Deo cupito ;

---

(a) Lib. 2. n. 20. et 21.

Nam rectè respondet *Habert* (a) dicens, Spem tenere ad Dei fruitionem, uti nostrum Bonum; Caritatem verò ad ipsius fruitionem ob gloriam ipsius Dei; dùm (ut ait S. Bernardus) cùm homo Deo fruatur, suū ipsius obliviscitur, et totis viribus eum diligit.

11. — Dubitatur 2. An sit actus Caritatis diligere Bonitatem Divinam, ut nobis convenientem, cùm hic actus videatur potiùs amor concupiscentiæ, quàm amicitiae? Respondetur cum *Habert*, *Gotti*, et *Juvenin*, quòd si in hoc respicimus nostrum bonum, ut terminum dilectionis, utique ille est amor concupiscentiæ ad spem spectans; si verò respicimus Gloriam Dei, uti terminum, ejus bonitatem diligentes, tamquàm nobis convenientem, quia nos adjuvat ad ejus voluntatem exequendam, et ad ultimum finem, qui est eum diligere, et ob quem nos creavit, assequendum, hic est verus actus Caritatis. Quare S. Augustinus agebat: *Sic amare debes, ut ipsum (Deum) pro mercede desiderare non desinas, qui solum te satiet.* In Ps. 34.

12. — Deum verò diligere propter beneficia, quæ in nos contulit, est actus gratitudinis, sed non Caritatis, ut dicit *Habert*, et *La-Croix* (b). Sed bene ait *Habert*, quòd si quis Divina beneficia respiceret, tanquàm Dei Bonitatis communicationem, verum eliceret actum Caritatis, in illis diligens non jam bonum ipsius recipientis, sed Bonitatem Dei dispensantis.

13. — Tenemur autem tam circà Caritatem ergà Deum, quàm circà Fidem, et Spem, actus elicere, uti constat ex Propositionibus proscriptis 1. et 7. ex illis Alexandri VII. et 6. 16. et 17. Innoc. XI. nam sublatiis actibus, illas virtutes exercere non possumus. Igitur hi actus aliquandò obligant ex se, aliquandò per accidens. Obligant *per accidens*, cùm urget necessitas eos eliciendi ad superandum aliquam tentationem, aut ad alicujus præcepti adimpletionem, v. gr. Confessionis, Communionis, etc. Obligant *per se*, (ut docent DD.) in pluribus vitæ temporibus: nimirum cum pervenitur ad rationis usum;

---

(a) *Tom. 3. de Spe c. 2. q. 2.* — (b) *Croix l. 2. n. 147. Hab. tom. 3. de Carit. c. 2. q. 4.*



in exitu vitæ : et pluries in vitâ , saltem semel quodlibet anno , ut dicunt AA. ; sed circâ actum Caritatis magis mihi arridet sententia eorum , qui eum requirunt semel in mense , dùm difficiliter observare poterit legem Divinam , qui frequenter suum ergâ Deum amorem actibus positivis non exercet. Attamen opus non est , ut hi actus reflexè , et explicitè fiant cum intentione præcepto satisfaciendi : sed satis est , si exercitè fiant , nempè ut actu fiant , licèt ex alio fine , nempè ad abjiciendam tentationem , ad eliciendam Contritionem , si confiteri velit. Itâ etiam actus Caritatis sunt omnes uniformitatis actus Divinæ Voluntati , et omnes virtutes exercitiæ ad Dei complacentiam. Itâ pariter sunt actus Fidei orare , Crucifixum adorare , signare se signo Crucis , etc. Quare benè ait *Card. de Lugo* , quòd ille , qui semel amplexus est fidem Christianam (aut vixerit , ego addo , Christianè , saltem Præcepto Paschali satisfaciendo) non debet dubitari , quin satisfecerit præcepto Fidei ; et idem intelligendum de præcepto Spei (a).

## CAPUT II.

### De Caritate ergâ Proximum.

*Ordo Caritatis* 14. *Ordo Personarum* , quæ præferri debent 15. *Punct. I. Signa communia adhibenda cum inimicis* 16. *Remissio injuriæ* 17. *Punct. II. Obligatio Eleëmosynæ* 18. et 19. *Punct. III. De Correctione fraternâ* 20. *Quando quis excusatur* 21. *Superiorum in hoc obligatio* 22. *Punct. IV. De Scandalo , et quot modis detur* 23. et 24. *An scandalum sit peccatum tam contrâ caritatem , quàm contrâ virtutem quæ læditur* 25. *Quid si Proximus sit jam paratus ad peccandum* 26. et 27. *An ne simus alicui scandalo , teneamur relinquere nostra bona , ac etiam omittere Præcepta positiva* 28. *De scandalo , quod præbent mulieres , et de Comædiis* 29. *An possit suaderi minùs malum* 30. *Punct. V. Quando erit licita Cooperatio Materialis* 31. et 32.

14. — CARITAS est ordinata ; undè fit quod tenemur præferre omnibus Deum , et ejus gratiam ;

(a) *Lib. 2. n. 6. ad 8.*

contrà verò non tenemur præferre bonum Proximi nostro bono : nisi quoties Proximi bonum sit ordinis superioris. Ordo bonorum hic est. Præ omnibus est vita Spiritualis, post hanc vita temporalis, indè fama, et postremò sunt bona. Itaque vita Proximi temporalis non est nostræ præferenda, benè verò spiritualis. Hoc tamen intelligendum, quoties Proximus est in extremâ illius necessitate; et etiam in gravi respectu Episcoporum, et Parochorum juxtà communem sententiam (a). Cùm autem necessitas proximi est extrema, tunc tenemur succurrere ei, licèt adsit aliquod probabile periculum labendi in aliquod peccatum, modò lapsus non sit moraliter certus, dùm in illo casu debemus merito jure sperare Deum fore nobis auxiliaturum; ità *D. Thom. Suar. Sch. Sylv. Journ. Pal. Salm.* etc. (b). Hoc tamen intelligendum, quoties æqualis afforet spes adjuvandi, et nemo alius esset dampnandus, hoc enim importat extrema necessitas. Sed tempore pestis, meritò ait *Laym.* quod in aliorum defectu, Sacerdotes tenentur infirmis assistere, quia in tantâ multitudine moraliter certum est multos adesse, qui in peccatis versantes suæ saluti æternæ prospicere non poterunt, ob ignorantiam eliciendi actum contritionis perfectæ (c).

15. — Ordo autem personarum, quas præferre debemus in officiis Caritatis, hic est : In extremâ necessitate vitæ, omnibus præferendi sunt Parentes, cùm enim ab ipsis nos vitam acceperimus, justum est, ut ceteris nos eos præferamus. Sed in gravi necessitate 1. succurrendum est coniugi, 2. Filiis, 3. Parentibus, sed Patri præ Matre, 4. Fratribus, et Sororibus, 5. Consanguineis, 6. Domesticis (d).

## PUNCTUM I.

### *De Dilectione inimicorum.*

16. — CERTUM est nos teneri inimicos diligere tam actu interno, quàm actu externo eis ostendendo

---

(a) *Lib. 3. n. 27.* — (b) *Tom. 2. l. 6. n. 453.* — (c) *Lib. 2. n. 27. v. An autem.* — (d) *Lib. 2. n. 27. in fine n. 1.*

saltem signa communia consueta ostendi aliis Amicis, aut Consanguineis : v. gr. eos salutando, aut resalutando, literis respondendo, eorum consortium non evitando, communibus eleemosynis non privando, etc. Diximus saltem *resalutando*, sed si inimicus esset superior, aut contrà adesset scandalum, aut si absque gravi incommodo posset suum inimicum salutare, et hoc modo eum liberare à peccato gravi odii, quo ipse ab illo habetur; tunc (ut rectè ait *Tournely*) tenetur salutationem prævenire. Nonnulli autem Auctores excusant à peccato gravi offensum, si nec resalutaret inimicum; si de recenti ab eo injuriâ esset affectus, ità *Roncaglia*, *Tamb. Mazzot.* (a).

17. — Hic memorare juvat illud dubium quod fit à DD. an teneatur offensus injuriam remittere offensori? *Salmanticenses* (b) dicunt teneri quidem injuriam remittere, sed non publicam pœnam, quia hæc refertur ad bonum Reipublicæ. Speculativè loquendo sententia vera est, sed in praxi ego numquàm ausus sum absolvere aliquem istorum, qui dicebant se inimicis pepercisse, sed voluisse ut justitia suum haberet locum, animadvertendo in scelestos; nam numquàm mihi suadere potui, quòd hujusmodi, qui aliquandò veniunt peccatis onerati, ità bonum commune, et Justitiam diligant (non quidem in alios delinquentes; sed dumtaxat in suum offensorem), ut omnis vindictæ tabe sint defæcati; undè in ipsis dicunt DD. (c) facillimum est, ut eorum ergà justitiam amor sit coloratus prætextus ad tegendam propriæ vindictæ cupiditatem. Nihilominus judico benè posse absolvi offensum, 1. si jam vellet remittere, sed justè prætenderet priùs sibi satisfieri de damnis passis, modo offensor non esset aded pauper, ut nullo modo esset satisfaciendo. 2. Si condonaret injuriam sub conditione, ut offensor in longinquam regionem proficisceretur, aut quia habet Fratres, aut filios, qui facile iracundiâ abripiuntur, aut quia offensor est ità discolus, et ad rixas proclivus, ut justè timeret suam expertus imbecillitatem, ne perlaturus esset ejus insolentias.

---

(a) *L. 2. n. 28.* — (b) *Tr. 21. c. 6. n. 18.* — (c) *L. 2. n. 23. v. Licet.*

## PUNCTUM II.

*De Eleëmosynâ.*

18. — **U**T videamus quandò urgeat obligatio eleëmosynæ, oportet 1. distinguere necessitatem Extremam à Gravi, et Communi. *Extrema* est cùm Proximus est in periculo vitæ. *Gravis* est cùm imminet periculum gravis mali, -ut infamiæ, dedecoris, aut à proprio statu justè acquisito decidendi. *Communis* denique est illa quam patiuntur mendici. Oportet 2. distinguere bona superflua vitæ, à bonis superfluis statui.

19. — In gravi necessitate proximi tenemur ei subvenire ex bonis superfluis statui; sed in extremâ etiam ex bonis superfluis vitæ; imò in extremâ possumus succurrere Pauperi etiam de bonis alienis, cùm nostris caremus (a). In communi autem dicimus cum *S. Thomâ*, *Tournely*, *Sanch.* etc. (contrà alios) divites teneri sub gravi mendicis eleëmosynas dare de superfluis statui, stante præcepto Evangelii: *Quod superest, date in eleëmosynam*, *Luc.* 11. Non tamen adest obligatio præstandi totum superfluum, sed sufficit, si detur quinquagesima pars annuorum proventuum, qui supersunt, seu duo in centena, ut probabiliter dicunt multi DD. ità *Roncaglia*, *Viva*, *Tambur. Mazzotta*, etc. et si reditus sunt pinguiores, admittunt minus quinquagesimâ parte. Imò *Layman* permittit Diviti, quod pauperibus hujusmodi elargiendum esset, posse totum in aliquem pium usum impendi (b). Hoc tamen non potest intelligi de Beneficiatis, isti enim tenentur totum superfluum Pauperibus, aut Piiis locis distribuere, ut dicetur *Tractatu X. num. 7.*

---

(a) *Lib. 2. n. 33.* — (b) *Lib. 2. n. 22. Vid. Edit. Ven.*

### PUNCTUM III.

#### De Fraternali Correctione.

20. — **M**ATERIA correctionis est quodlibet peccatum mortale, in quod Proximus aut lapsurus est, aut jam incidit, et non adhuc emendatus est, ut rectè dicunt *Suar. Less. Salm. Tourn.* etc. Advertendum, quòd sub gravi adest obligatio Proximum corripiendi, licèt ille ex Ignorantiâ inculpabili legem transgrediatur, modò speretur fructus; et hoc ex probabiliiori sententiâ *Castropalai, Coninck. Sanc. Croix, et Tournely*, non solùm currit cùm peccatur contrà legem naturalem, sed etiam contrà positivam; nam positâ lege talem actionem prohibente, jam illa actio redditur intrinsecè mala (a).

21. — Multis tamen de causis potest quis ab eâ correctione faciendâ excusari: 1. Si peccatum Proximi non est certum, dùm in dubio non est obligatio correctionis, nisi in casu damni communis, et gravissimi, ut homicidii, et similium. 2. Si non effulgeat spes fructus, et correctio magis nocitura, quàm profutura sit; tunc enim omittenda est, modò delinquens non versetur in mortis periculo, aut jam sit in malâ fide, aut modò alii non sit in periculo perversionis (b). 3. Si non desit alius æquè idoneus, qui eum correpturus sit. 4. Si judicatur prudenter quòd reus ex se resipiscat (c). 5. Si occasio, et tempus id non ferat, propterea dicunt DD. quandòque posse expectari delicti reiterationem, ut correctio fructuosior sit (d). 6. Si correctio non potest fieri, nisi cum gravi incommodo, cùm hæc obligatio sit Caritatis. Item docet *S. Thomas* (e) tantùm venialiter peccare eum, qui ex aliquo timore, aut cupiditate omitteret correctionem, dummodò non putaret suâ correctione certò Proximum à peccato aversum iri; tunc enim eam omitendo non excusaretur à mortali (f).

---

(a) *Lib. 2. n. 36. et 39.* — (b) *Cont. Tourn. to. 3. p. 320. cum Hab. et Antoine.* — (c) *Tournely loc. cit. cum iisdem, et S. Thoma.* — (d) *Lib. 2. n. 38. et 39.* — (e) *2. 2. q. 33. a. 2.* — (f) *Lib. 3. n. 37.*

22. — Hoc præcepto ligantur omnes, etiam subditi : sed strictiùs Superiores, ut Episcopi, Prælati, Parochi, Confessarii, Parentes, Viri, Curatores, Domini, et Magistri, quia isti tenentur suos subditos corripere, non tantùm ex caritate, sed et etiam ex sui officii munere. Et tenentur etiam ad inquirenda eorum crimina; cùm probabilia subsunt indicia. Et Prælati Regulares aliquandò sub gravi tenentur non solùm ad arguenda peccata gravia, sed etiam venialia suorum subditorum, cùm hujusmodi sunt, ut gravi sint damno communi observantiæ; ità *Laym. Busemb. Tourn. etc.* (a). An autem præfati Superiores ad correctionem teneantur etiam cum periculo vitæ, negatur. Excipiuntur tamen Pastores, isti enim non solùm vi officii, sed etiam ex justitiâ (ratione stipendii quod percipiunt) tenentur ad correctionem, et suis subditis in bonis spiritualibus consulere; et non solùm in extremâ necessitate, sed etiam in gravi, ut communiter DD. (b). Et hîc notetur etiam quòd Concionatores vi sui muneris debent emendare peccata publica, etiamsi nulla effulgeat spes emendationis. Et tenentur ad hanc publicam correctionem etiam cum periculo proprii damni, prout ajunt *Salman-ticenses*. Sed hoc currit semper ac ex reprehensione speratur fructus, nec timeatur damnum commune fore majus (c).

## PUNCTUM IV.

### *De Scandalo.*

23. — **D**IVIDITUR Scandalum in Activum, et Passivum : *Activum* definitur : *Est dictum, vel factum minus rectum, præbens alteri occasionem ruinæ.* Hoc autem Scandalum Activum potest esse Directum, et Indirectum : *Directum* dicitur, cùm directè inducitur Proximus ad peccandum : *Indirec-*

---

(a) *Lib. 2. n. 35. et l. 4. n. 13.* — (b) *L. 2. n. 40. ex S. Thom.*  
2. 2. q. 8. a. 5. — (c) *Ibid.*

tum cùm profertur aliquod verbum, - aut aliquid mali fit, quod sit aptum ad inducendum alium in peccatum. Adest etiam scandalum *Dæmoniacum*, quod committitur cùm non solum inducitur Proximus ad peccandum, sed etiam ideò inducitur, ut ille Animam perdat, quod proprium Dæmonis est.

24. — *Passigum* est ipsa ruina, sive peccatum, in quod Proximus labitur. Et hoc dividitur in scandalum *Datum*, quod dicitur Pusillorum, eorum nempè, qui propriâ imbecillitate cadunt; et in *Acceptum*, quod *Pharisaicum* dicitur, eorum nempè, qui propriâ malitiâ labuntur.

25. — Hic quæritur 1. An scandalum sit peccatum contrà Caritatem, et contrà virtutem, adversus quam inducitur Proximus ad peccandum. Tres adsunt sententiæ. *Prima* dicit quòd cùm directè intenditur ruina spiritualis Proximi (quod propriè est scandalum Dæmoniacum suprâ explicatum), tunc peccatur contrà Caritatem, aliàs tantummodò peccatur adversus illam virtutem, quæ læditur à Proximo in scandalum inducto. *Secunda* sententia ait, quòd quandò peccatur cum scandalo directo, idest cùm inducitur positivè Proximus ad peccandum, tunc peccatur tùm contrà Caritatem, tùm contrà virtutem; sed si peccatur tantùm scandalo indirecto, prævidendo tantùm Proximi peccatum, quin ad peccatum inducatur, tunc peccatur tantùm contrà Caritatem. *Tertia* sententia, quam nos tuemur cum *Suar. Sot. Lugo, Salmant. Roncag. Tamb.* et aliis, quamque expressè tenet *S. Thomas* (a), dicit quòd tam scandalo directo, quàm indirecto peccatur tam contrà Caritatem, quàm contrà eam virtutem. Contrà Caritatem quidem, quia si nos ex Caritate tenemur, cùm possimus, impedire Proximi peccatum, multò magis tenemur non esse Proximo occasionem illud patrandi. Contrà virtutem verò, quia quælibet virtus cuiusvis prohibet, ne sit causa, aut occasio aliis eam lædendi (b).

---

(a) 2. 2. q. 43. a. 3. — (b) *Lib. 2. n. 24.*

26. — Quæritur 2. An peccet scandali, qui à Proximo rem pravam exquirat, ad quam tamen Proximus est jam paratus (v. g. si quis petat copulam à meretrice)? Nos contrà aliorum sententiam affirmamus cum *Sanch. Cajet. Nav. Bonac. Ronc. Tambur. Sporer*, etc. Ratio est, quia (ut dictum *Tract. III. n. 20.*) etiamsi certa sit sententia quòd actus externus speculativè loquendo nihil malitiæ addat actui interno, tamen in praxi semper actu externè consummato augetur malitia voluntatis, ob majorem complacentiam, quæ regulariter actum externum concomitatur, aut ob majorem diuturnitatem illius complacentiæ; quare qui externè peccat, majorem suæ Animæ affert perniciem. Ideòque qui in hoc coöperatur, semper peccat graviter contrà Caritatem. Undè probabiliter infertur cum *Cardinale de Lugo*, et aliis, non opus esse in peccatis, quæ habent complicem, explicare quisnam fuerit primus ad tentandum; quia tam inducens, quam consentiens in peccato operis semper graviter peccat contrà caritatem; itaque inductio nihil aliud est, quam circumstantia aggravans in eadem specie, quam juxta probabiliorem sententiam cum *S. Thomá* non tenentur explicare in Confessione, ut dicemus de Sacramento Pœnitentiæ (a).

27. — Hoc procedit, cum expetitur res intrinsecè mala; sed si res petita esset indifferens, ut à proximo sine peccato præstari possit, ut esset petere mutuum ab Usurario, aut aliquod Sacramentum à Sacerdote in peccato existente, tunc dicimus quòd cum adest causa necessitatis, aut notabilis utilitatis, licet illam petere; præcisâ autem hâc causâ, postulans etiam peccat graviter, tam contrà Caritatem, quam contrà virtutem; ita *Sanch. Molin. Busemb. Roncaglia, Tamburin. Salmantic.* etc. (b).

28. — Aliquando cum grave incommodum non adest, tenemur derelinquere nostra bona temporalia, et etiam spiritualia, modò ad salutem non sint necessaria, ut evitemus grave scandalum Pusillorum.

---

(a) *Lib. 2. n. 46.* — (b) *N. 47.*



rum. Sed hìc benè advertit *S. Thomas* (a) quòd admonito Proximo, ejus scandalum evadit Pharisæicum, ità ut non teneamur amplius illud evitare (b). An autem, ut evitetur scandalum Pusillorum, adsit obligatio omittendi præcepta positiva, ut auditionem Missæ, Jejunium, etc. Dicimus probabilius affirmandum; quia Præceptum Naturale impediendi scandalum, nempe alterius peccatum (advertendum tamen aliud esse impedire peccatum, aliud impedire admirationem) præferendum est præcepto Positivo. Hoc tamen non intelligitur quoad semper (etiãsi actio non esset de præcepto, sed ex simplici devotione, aut indifferens), sed tantum semel atque iterum; aliàs esset illi gravi incommodo, ad quod non obligat caritas; ità *Cajet. Nav. Sanch. Azor. Less. Salm.* etc. (c).

29. — Peccant graviter scandali Mulieres, quæ pectore immoderate denudato se ostentant; aut saltem usum, ubi non adest, introducunt, licet ea denudatio non sit immoderata; ità *S. Antonin. Nav. Less. Laym.* et alii communiter (d). Etiam graviter peccant scandali illi, qui elucubrant, aut agunt Comœdias notabiliter obscœnas. Et idem dicendum de Pictoribus, qui pingunt, aut in publico exponunt imagines positivè turpes (e).

30. — Dicimus contrà cum *Sanch. Soto, Navar. Molin. Cajetan. Sylvest. Salmantic.* etc. confirmati *S. Augustini* auctoritate (contrà alios) licere minus malum suadere, ut majus evitetur, quod proximus paratus est exequi; quia tunc qui suadet, non procurat malum, sed bonum, suadens minus malum, licet alterius sit speciei (f). Ità etiam licet Domino, aut Parenti non auferre occasionem furandi servis, aut Filiis, qui jam parati sunt ad furandum, ut in delicto comprehensi, melius emendari possint. Ob id permittunt DD. multi posse etiam offerri occasiones furandi, permittendo ut furerentur, ut evitentur delicta futura (g), duce *S. Thomà*,

---

(a) 2. 2. q. 43. a. 7. — (b) *Lib. 2. n. 50. et 52.* — (c) *Ibid. n. 51. et 53. v.* Si ergo. — (d) *Lib. 2. n. 55.* — (e) *n. 56.* — (f) *n. 57.* — (g) *Lib. 2. n. 58.*

*Tom. I.*

qui sic ait ; *Inducere ad peccandum nullo modo licet ; uti tamen peccato alterius ad bonum licitum est* (a).

## PUNCTUM V.

### *De Cooperatione Materiali.*

31. — **C**OOPERATIO materialis communiter admit-  
titur uti licita à DD. cùm justa adest causa. Sciatur  
hàc quòd alia est Cooperatio *Formalis*, quæ evenit  
cum directè cooperatur ad peccatum (ut est in eo,  
qui fornicatur) : aut cùm influit in pravam volun-  
tatem Proximi volentis peccare, ut esset servare  
terga latroni, aut sicario, ut securius furetur, aut  
occidat : Scribere literas amatorias vice Concubinari  
aut afferre dona Concubinæ : accipere dona ab eo,  
qui suæ honestati insidiatur. Hæ et his similes coöpe-  
rationes sunt intrinsecè malæ, quia ipsis datur ansa  
proximo ad peccatum exequendum, aut saltem istius  
prava voluntas fovetur, ideòque nullâ ex causâ, ne  
mortis quidem, excusari possunt à mortali. Alia  
verò est cooperatio *Materialis*, quæ est cùm actio est  
indifferens, et Proximus potest eâ uti sinè peccato, sed  
ille suâ malitiâ eâ abutitur ad peccandum, ut esset  
mutuari pecuniam ab aliquo, qui eam non vult dare  
sinè fœnore : ministrare vinum ei, qui eo abutitur  
ad ebrietatem ; dare claves, qui eis utitur ad fu-  
randum.

32. — Itaque hæ materiales cooperationes possunt  
esse licitæ, si tres conditiones concurrunt ; 1. ut  
actus tuæ cooperationis (ut jam dictum est) sit ex  
se indifferens. 2. Ut ex officio non tenearis impedire  
alterius peccatum. 3. Ut causam justam et propor-  
tionatam habeas sic operandi ; nam tunc Proximi  
peccatum non provenit ex tuâ cooperatione, sed ex  
malitiâ illius, qui abutitur tuo opere ad peccandum :  
Itaque tunc non est actio tua, quæ conjungitur pravæ  
voluntati Proximi, sed ille conjungit suam pravam

---

(a) 2. 2. q. 78. a. 4.

voluntatem tuæ actioni ; Undè fit, quòd actio tua non est causa illius peccati ; sed est tantùm occasio, quam tu non teneris auferre, quandò habes justam causam eam ponendi ; et sic licitum est Cauponi dare vinum ebriaturo, semper ac aliàs grave metueret damnum, ità *Sanch. Tournely ; Bonac. Busemb. et alii commun.* Dictum est, *Causam justam, et proportionatam*, quia quantò proximior est tua actio Proximi peccato, eò major debet esse causa, quæ te excuset. Ad judicandum, quandò causa sit justa et proportionata, antè omnia pro regulâ sit observare quod dicunt DD. quia cum hoc pendeat à Prudentum æstimatione, sententia in hâc materiâ communior erit etiam probabilior, ut dicemus etiam loquendo de gravi materiâ furti *Tract. X. n. 22.* Præterèa cùm agitur de præjudicio Proximì, tenenda est hâc regula, quòd non possumus cooperari damno alterius, nisi quandò damnum quod timemus bonis nostris, sit ordinis superioris, v. g. cùm aliquis tibi minatur mortem, nisi tu coopereris morti sui Inimici, præbendo v. g. ense ; tu non potes eum illi dare, quia non potes positivè concurrere morti alterius, ut liberet te à morte. Ità etiam cùm fur minatur tibi auferre bona tua, nisi coopereris, ut ille surripiat bona alterius, nec potes quidem cooperari. Secùs esset, nisi coopereris, ut ille surripiat illa bona, tu subiturus esses vitæ, aut famæ dispendium, quia tunc cùm in extremâ sis constitutus necessitate, tenetur Proximus ad permittendam tibi illam cooperationem in suorum bonorum jacturam, ne tu vitâ, aut famâ pericliteris (a). Observa etiam super hoc quod dicitur *Tract. X. n. 56.*

---

(a) *Lib. 2. n. 59. et l. 3. n. 571.*

## CAPUT III.

De Religione, et Vitiis ei oppositis.

*De Religione 33. Punct. I. De Superstitione, et præcipuè de Astrologiâ, Somniis, Ensalmis, et Sortibus 34. De Virgâ Divinatoriâ 35. De Vanâ Observantiâ 36. De Pulvere Sympathicâ 37. Punct. II. De Tentatione 38. De Sacrilegio 39. De Simonid, et ejus divisione 40. ad 48. De pœnis Simonid, et absolutione 49. ad 53.*

33. — **V**IRTUS Religionis Princeps est inter virtutes mōrales et definitur : *Est virtus debitum cultum Deo exhibens.* Duo vitia huic virtuti adversantur. Superstitio nempe per excessum, et Irreligiositas per defectum. Superstitio tres continet species, *Idololatriam, Divinationem, et Vanam observantiam.* Irreligiositas quatuor alias continet species, *Tentationem Dei, Sacrilegium, Simoniam, et Perjurium.*

## PUNCTUM I

*De Superstitione.*

34. — **S**UPERSTITIO definitur : *Est vana, seu falsa Religio, indebitum Deo cultum exhibens.* Propterea Superstitio duplex est, *Cultus indebiti, et Rei cultæ.* *Cultus indebiti* est cū Deo exhibemus cultum falsum, ut si laicus vellet Missam celebrare, aut si exponerentur Reliquiæ falsæ, aut si fingerentur falsæ visiones, Revelationes, aut Miracula, aut alia adinventata, ut augeretur devotio : Quæ omnia ex genere suo sunt peccata mortalia. Aut cū Deo cultum supervacaneum exhibemus, ut esset audire Missam à Sacerdote talis Nominis, aut vultu converso ad Orientem (a). Superstitio autem *Rei cultæ* est, cū cultum, qui Deo debetur, exhibemus creaturis. Hinc prohibita est *Idololatria*, qualis est illa Gentium, qui pro Diis homines venerantur, pecudes, herbas, sta-

---

(a) *Lib. 2. n. 59. et lib. 3. n. 571.*

tuas, etc. *Divinatio*, quæ est prædictio eventuum futurorum, ope Dæmonis facta, cum pacto expresso, aut tacito: undè illicita est 1. *Astrologia Judiciaria*, quæ prædicat futura à liberâ Hominum voluntate dependentia. Ad differentiam *Naturalis*, quæ ex motu Planetarum auguratur pluvias, aut sterilitates, aut ex momento nativitatis auspicatur inclinationes, aut temporamenta Personæ, hæc cæteroquin licita est, sed sæpè sæpius est vana et inutilis (a). 2. Ità etiam est graviter illicitum constanter credere *Somniis*, ut quis proprias actiones dirigat, ut futuros eventus prædicat, nisi moralis certitudo habeatur quòd talia somnia sint à Deo (b). 3. Ità etiam est illicitus *Ensalmus Constitutivus*, qui est quædam oratio certis et determinatis verbis constans, ad morbos sanandos ordinata. Et hoc est peccatum mortale, cùm effectus creditur infallibilis, præcipuè si verba sint vana, aut falsa, aut scripta certo peculiari modo. Contrà est licitus *Ensalmus invocativus*, quo à Deo exposculatur sanitas, quin credatur effectus infallibilis (c). 4. Illicitum quoque est *Sortilegium*, seu *Sors Divinatoria*, nempè cùm exposcitur à Dæmone. expressè, aut tacitè revelatio occultorum, aut futurorum sorte aliquem numerum, aut signum accipiendo. Contrà verò est licita *Sors Divisoria*, quæ adhibetur ad bonorum divisionem, aut ad lites præcidendas, aut ad distribuenda officia secularia, inter æqualiter dignos. Sed non licet eâ uti in Beneficiis, aut officiis Ecclesiasticis (d).

35. — Hic adverte omninò illicitum esse usum virgæ bidentis, quam vocant *Virgam Divinatoriam*, ex cujus declinatione inveniuntur thesauri absconditi, metalla, aquarum venæ, aut prædiorum termini translati. Nonnulli admiserunt hoc, ut effectum naturalem; sed quomodò (nos inquirimus) hæc virga potest naturaliter moveri ad intentionem eâ utentis, quandoquidem si aquam quærit, virga inveniens thesaurum non movetur? Præterquàm quòd observatum est, quòd si quis præmiserit protestationem non con-

(a) L. 3. n. 10. v. Quær. — (b) N. 9. — (c) N. 21. — (d) N. 11.

sentiendi concursui diabolico, etsi res conquisita ibi esset, virga immota stetit (a).

36. — *Vana Observantia* est usus alicujus medii improporionati ad obtinendum aliquem effectum, ut est uti inspectione certarum figurarum, aut cæremoniaram, aut signorum, aut certarum orationum tali situ recitarum, aut cum verbis sacris, aut vanis mistarum, aut cum fiduciâ certè prolatarum, ut aliquam scientiam acquirat sinè studio, aut ut liberetur ab aliquâ infirmitate, aut vulnere. Omnes istæ sunt vanæ observantiæ, quæ sunt graviter illicitæ. Et de istis præcipuè interrogandi sunt Milites, Nuntices, Veterinarii, seu jumentorum Medici, Pastores, et Rustici (b).

37. — Advertatur nihilominus hoc, quod dicit *S. Thomas* (c), quòd ubi non adsunt manifesta indicia malitiæ alicujus effectus, in dubio præsumi debet, quod proveniat ex causâ naturali; undè est valdè probabile licere usum Pulveris *Sympatici* admoti super sanguinem effluxum, ut hunc inhibeat ampliùs ex vulnere profluere, modò statim, et in distantia proportionatâ applicetur. Ità nec videtur esse prohibitus usus Corallorum, et quorundam animalium ungularum, ut naturalis fascinatio evitetur certorum, qui eâ noxiâ qualitate scatent, ut aspectu suo aliis nocere soleant. Ceterum in hujusmodi remedium genere, quæ innoxia videntur, satis erit, ut omnis scrupulus auferatur, si protestatio præcedat cuilibet diabolico operi nolle consentire (d).

## PUNCTUM II.

### *De Irreligiositate.*

38. — **I**RRELIGIOSITAS tendit contrà reverentiam Deo debitam. Prima species hujus vitii est *Tentatio Dei*: Hæc potest esse vel Formalis, vel Interpretativa. *Formalis* est quandò aliquis expressè dubitat de aliquâ Divinâ perfectione, et de eâ vult pericu-

(a) *Cont. Tournely to. 2. p. 268. cum etc.* — (b) *Lib. 3. n. 14.*  
— (c) 2. 2. q. 60. a. 4. — (d) *Lib. 3. n. 20. et 22.*

lum facere. Hæc est peccatum mortale; et quando accedit dubitatio positiva, est etiam hæresis. *Interpretativa* est, quando aliquis omittit media naturalia, et vult, quod Deus per miraculum eum liberet ab omni malo; v. gr. si cupit spretis medicinis ab infirmitate curari à Deo; aut si velit, dum ipse in aliquod vitæ discrimen se conjicit, ut Deus ab omni damno eum liberet. Et hæc per se etiam est mortale, nisi quis excusaretur, aut quia aliquo Divino impulsu, aut ab ignorantia ductus illud faceret, aut materiæ levitate, puta si neglectis remediis à levi infirmitate sanitatem à Deo expectaret (a).

39. Secunda species est *Sacrilegium*, quod triplex est, Personale, Locale, et Reale. *Personale*, cum percutitur Clericus, aut Monachus, aut turpiter agitur cum personâ voto castitatis obstrictâ. *Locale*, cum aliquid committitur, per quod polluitur Ecclesia; nimirum si in ipsâ effunditur semen humanum, aut sanguis in aliquâ copiâ. Dubitatur autem an per occultam seminis effusionem polluitur Ecclesia? Alii negant, et non improbabilius; sed alii probabilius affirmant (b). Et idem dicimus de usu Matrimonii, idèque omnes hæ actiones sunt sacrilegia. Ità etiam probabilius sacrilegia sunt omnes tactus, adspectus, sermones impudici in Ecclesiâ habiti (c); observetur quod dicetur super hoc puncto in *Tract. IX. n. 22. et 23.* Hic obiter advertatur nemini quâcumque prædito dignitate, modò non Regali, licere indicare, ut sibi ad Ecclesiam deferatur stratus, secus statim cessandum à Divinis, et Ministri Ecclesiæ ipso facto excommunicationem incurrunt, et Ecclesia tamquam interdicta habenda est. Hoc decretum fuit à S. C. Cærem. quæ ait: » *Proposito in S. C. Cærem. quodam abusu inter alios, qui de recenti in Urbe irrepserunt, eadem S. C. ad eum omnino tollendum die 30. Anni 1701. decrevit* » : *Non licere cuicumque etc. (Personis Regalibus tantum exceptis) ad Ecclesias strata sibi deferri facere; secus cessandum immediate à Divinis: Quod nisi servetur, Rectores, ceterosque Ministros ipso facto excommunicationem incur-*

(a) *Lib. 3. n. 30.* — (b) *n. 36. et 458.* — (c) *n. 458. et 461.*

*rere, eamque Ecclesiam esse pro interdictâ.* (Ità adnotatum reperitur in Bullario Clementis *Xl. part. 3. Decr. 1. Cær.*) Deinde subiungitur: *Et factâ relatione Sanctitas sua* (i. e. præfatus Clemens) *Decretum approbavit, nec non promulgari, atque executioni tradi, et in omnibus Urbis Sacrariorum affigi mandavit die 3. Octob. 1701.* Hoc omne refertur à *Ferraris* in suâ *Bibliothecâ* (\*), qui etiam refert (*ibid.*) vetari pluribus ex Decretis S. R. C. dare intrâ Missam Laicis (etsi Præsidibus) Evangelium osculandum, uti etiam dare illis usum Baldachini, et illos admittere ut assistant in Presbyterio. Ad nostra autem redeuntes dicimus furtum rei Ecclesiis commodatæ, aut in eis repositæ, ut custodiatur, procul dubio esse sacrilegium. Probabile autem est furtum cujuslibet rei profanæ, quæ ad Ecclesiam non pertinet, non esse sacrilegium, sed nobis probabilius videtur esse quidem (a). *Pro loco sacro* intelligitur quilibet locus ab Episcopo ad divina officia, aut mortuos tumulandos destinatus à tecto ad solum (b). *Sacrilegium Reale* est illicita administratio, aut receptio Sacramenti, aut Reliquiarum, aut Imaginum, aut vasium, aut vestium sacrarum, aut alterius rei, quæ consecratur, aut benedicitur, profanatio. *Sacrilegium quoque* est Sacræ Scripturæ verborum abusus, ad turpia, aut detractiones ea detorquendo. *Sacrilegium pariter* est Reliquiarum Sanctorum surreptio, cum dominus est graviter invitatus (c).

40. — Tertia species est *Simonia*, quæ definitur: *Studiosa voluntas emendi pretio temporali aliquid spirituale vel spirituali annexum.* Et ut clariùs explicetur, est malitiosa voluntas, quâ intenditur pretio emi aliquid spirituale, aut spirituali annexum, ut sunt redditus Beneficiorum, vestes sacræ, et etiam labor intrinsecus in administratione Sacramentorum (d). *Simonia quadruplex* est, *Mentalis*, *Conventionalis*, *Realis*, et *Confidentialis*. *Mentalis* est, cum aliquis dat temporale animo obligandi aliquem ad reddendum spirituale, aut contrà, sine ullâ conventionem. *Conventiona-*

---

(\*) *Ferrar. Bibliot. to. 3. Verbo Ecclesia art. V. n. 28. et 29.*  
 (a) *N. 39.* — (b) *N. 460.* — (c) *N. 40.* — (d) *Lib. 3. n. 49.*



*lis* est, cùm intercedit pactum, sed à neutrâ parte executioni mandatum. *Realis* est, cùm pactum effectu completum est (a). *Confidentialis* deniquè est, cùm aliquis renuntiat alteri Beneficium cum pacto, ut in posterùm sibi ipsi, aut alteri illud cedat, aut renuntiet, aut cum onere; ut sibi partem proventuum reddat (b).

41. — Dona, quæ habent rationem pretii in emendo spirituale, nuncupantur *Munus à manu*, *Munus ab obsequio*, et *Munus à linguâ*. *Munus à manu* comprehendit quodlibet temporale pretio æstimabile, ut pactio vendendi, aut mutuandi, etc. delicti remissio, aut solutio (c). *Munus ab obsequio* est quodlibet servitutem præseferens. *Munus à linguâ* est quælibet intercessio, etiamsi sit mediata, quæ pretio digna est. Dare autem aliquid Mediatori ob laborem, aut damnum subeundum, non est ex se illicitum, est tamen periculosum (d).

42. — Simonia altera est juris Divini, juris humani altera. *Juris Divini* est Sacramentorum ceterarumque rerum sacrarum venditio. *Juris humani* est venditio officiorum ad res sacras institutorum, ut sunt officia Sacristæ, Oeconomî, Thesaurarii, Præfecti domûs, Vicedomini, et Advocati Ecclesiæ. Et hîc notandum posse dari simoniam juris humani, quin sit juris Divini (e).

43. — Est etiam Simonia Juris Divini admissio alicujus in Religionem ob bona temporalia: nisi dentur dumtaxat ad conciliandam benevolentiam, aut quia Monasterium esset pauper, aut postulans esset senex, aut infirmus, ita ut ille esset oneri Monasterio. Et propterea dicimus, quod si Monasterium esset opulentum, non licet his præcis rationibus aliquid accipi ab ingredi volentibus, ob suâ sustentationem, exceptis Monasteriis Monialium, quæ semper possunt acceptare dotes prout declaravit Clemens VIII. (f).

---

(a) N. 69. aliàs 67. — (b) N. 90. aliàs 85. — (c) Lib. 3. n. 56. et 57. — (d) N. 64. et 65. — (e) N. 68. et 69. — (f) N. 91. et 92.

44. — Dubitatur 1. An semper sit simonia dare temporale pro spirituali? Juxtà communioem et verioem sententiam negatur, quandò temporale datur non jam ad obligandum, sed ad conciliandam benevolentiam. Nihilominus advertendum est, ut habetur ex Propos. 46. ab Innoc. XI. proscriptâ, certè esse Simoniam dare temporale (præcipuè cùm datur in aliquâ notabili quantitate) ob principalem finem obtinendi spirituale (a). Communissimè autem dicunt *Salmant. cum Cajet. Suar. Less. Laym. Tolet. etc. contra Azor. et alios paucos*, quòd liceat dare aliquid temporale, v. gr. Episcopo, primario ad capitivandam suam benevolentiam, secundario ad obtinendum Beneficium. Ceterum rectè advertunt *Ronc. et ipsi Salmant. cum Sanch. et Bonac.* quòd cùm datur temporale solo intuitu rei spiritualis, vel contrà, tunc facile præsumenda est intentio saltem virtualiter Simoniacâ, ut eruitur ex *Cap. Tuas nos, de Simon.* Excepto, ut ajunt, nisi constet de opposito, vel aliter colligatur ex circumstantiis, nempe ex parvitate muneris, vel ex pietate, aut opulentia dantis (b).

45. — Dubitatur 2. An liceat aliquid recipi ob Sacramentorum administrationem? Nulli dubium est non licere accipere tanquàm pretium rei sacræ, aut laboris intrinseci ipsiusmet administrationis; secus verò extrinseci, v. g. si Sacerdos celebratum iturus esset in locum longinquum, aut in horâ, aut tempore incommodo. Et quamvis non esset labor extrinsecus, licet accipere temporale, non tanquàm pretium, sed tanquàm stipendium sustentationis Ministri, qui occupatur in alterius gratiam, quamvis Minister non esset pauper. Id est commune cum *S. Thomâ (c)*. An autem sit lethale administrare Sacramenta, concionari, assistere in Choro principaliter ob temporale emolumentum. Alii affirmant; sed alii, ut *Sotus, Suar. Silvest. Sanch. Salmant. etc.* communiùs, et probabiliùs negant, eâdem ratione superiùs allatâ, quia stipendium non recipitur, uti pretium rei sacræ, sed tanquàm stipendium debitum

(a) *Lib. 3. n. 51.* — (b) *Eod. n. 51. vers. Ceterum.* — (c) *Lib. 3. n. 55.*

personæ, quæ in proximi gratiam occupatur. Ceterum videtur non posse excusari saltem à veniali, qui spiritualia munia ad bonorum temporalium acquisitionem ordinat (a).

46. — Dubitatur 3. An Beneficiorum venditio sit prohibita etiam de jure Divino? Probabilius *S. Thomas* et alii affirmant. Nihilominus Papa potest à spirituali Beneficii separare temporale, uti sunt fructus, et ita ex suo assensu potest efficere, ut aliquis, soluto aliquo pretio temporali, possit assequi Beneficium (b).

47. — Dubitatur 4. An sit licitum permutare res sacras? Si ambo sunt merè spirituales, putà Missam cum Rosario, etc., utique licitum est eas permutare. Si sunt mixtæ, oportet distinguere cum *S. Thomâ*, et communi. Si temporale subsequitur spirituale, ut fructus subsequuntur Beneficium, tunc illicita est permutatio sine Pontificis permissu, aut saltem Episcopi, ut aliqui asserunt. Secus verò si temporale sit annexum antecedenter spirituali, ut argentum vasis sacris, pannus vestibus sacris, et alia hujusmodi. Hæc benè possunt vendi, et permutari, modò habeatur ratio tantum pretii intrinseci rei (c).

48. — Dubitatur 5. An sit Simonia dare aliquid, ut alter omittat rem spiritualem? Distinguendum, et affirmandum, si ommissio est de re directà à potestate spirituali, et adest obligatio eam ponendi, uti esset ommissio absolvendi, dispensandi, eligendi etc. ita ex *Cap. Presbyter, de Simon.* ubi prohibetur negare propter aliquod lucrum temporale Absolutionem Pœnitentibus, modò illa non esset injusta, aut sacrilega. Negandum verò esse Simoniam, si ommissio esset alicujus actûs spiritualis pendentis à libertate, ut esset ommissio orandi, celebrandi, largiendi eleemosynam; dummodò omittens non teneatur ex justitiâ ad id præstandum (†).

49. — Dubitatur 6. An liceat dare aliquid, ut se redimat à vexatione, ut Beneficium, aut aliquid aliud spirituale assequatur? Duas affert Doctor Angelicus regulas. *Prima* est, quòd si acquisiverit jus in re, et jus est certum, benè potest redimi vexa-

---

(a) *Ibid.* — (b) *N. 70.* — (c) *N. 72.* — (†) *Lib. 3. n. 97.*

tio dando aliquid temporale (non tamen spirituale) (a). Et hoc procedit etiam de vexatione circa possessionem Beneficii pro eo, qui jam acquisiverit jus; nam actio possessionis est merè temporalis (b). *Secunda regula* est, quod si jus est *ad rem*, vexatio nullo potest redimi pretio etiamsi Elector injustè negaret suum suffragium, ut communiter DD. et habetur ex *Cap. Matthæus, de Simon*. Nihilominus excipitur cum *Suar. Castropal. Anacl. et Elbel*, si tu pecuniam tradidisses alicui, qui tantum posset obesse, et non prodesse, ut abstineat tibi nocere, etiamsi ille nullis malis artibus hoc faceret, sed precibus, aut donis ob livorem in te conceptum impedire vellet Electores, quominus tibi Beneficium conferrent, ut rectè dicunt *Suar. Anacl. et Salm.* etc. quia cum sit temporalis talis iniqua vexatio, benè potes eam redimere pretio temporali. Et propterea paucis abhinc annis, cum delatus fuisset ad Summum Pontificem Benedict. XIV. casus, quo cum quidam Sacerdos Diocesis Nusci nominatus fuisset ad Canonicatum in unâ insigni illius Diocesis Collegiatâ, insurrexit quidam laicus, qui potentiâ valebat in Curiâ Episcopali, et poposcit à præfato Sacerdote certam summam non immodicam, aliàs multa crimina ei affigeret, quibus pro Canonicatûs honore decorando, reus in Curiâ sisteret. Sacerdos hoc timore incussus, cum omnium eorum, quæ ab illo opponi sibi intendebantur, culpâ vacaret, promisit se daturum quicquid ille turpiter postulabat, et præstitit; et ita à Canonicatûs consecutione non impeditus fuit. Post multos annos re Romam ab Episcopo successore delatâ, Pontifex dixit, si forsân indigeret, talis provisio convalidatione, se convalidare eam, et decrevit talem Canonicum permansurum in eodem gradu; undè apparet quòd Papa non habuit pro certè invalidâ illam collationem, sed voluit ad securitatem sic agere, quia sic fuit postulatus, ut ageret. Secus tamen dicendum cum *Suar. Anacl. Salmant.* etc. si ipse esset Elector, qui non solum posset obesse, sed etiam prodesse (quicquid dicat *Castropal.* qui tenet

---

(a) N. 98. — (b) N. 99.

posse dari pecuniam tantum ad removendum illius pravum animum); quia illa pecunia de facto semper efficeret, ut deflecteretur erga te illius animus, et consequenter gratiam illius sollicitat ad Beneficii consecutionem. Casu autem, quo Elector fraudibus, et vi moliretur alios Electores subornare, ut ei suum suffragium negarent, tunc communiter dicunt *Les. Soto, Suar. Fill. Sanch. Salm. Croix, Bus.* etc. posse pecuniâ redimi talem injustam vexationem. Et hoc mihi videtur satis probabile, cum (ut ait *P. Mazzotta*) daretur ei pecunia cum expressâ protestatione, quod nihil ab ipso petitur, nisi ut à vexatione desistat (a). Illicitum est autem pecuniam dare Competitori, ne concurrat, si ille iuste potest concurrere (b). Contra licet pecuniam dare, ne eligatur indignus, aut minus dignus (c). Et ita pariter licitum est pecuniam illi offerre, qui injuste renuit Sacramenta ministrare, accedente tamen causâ gravi ea suscipiendi, nam hoc etiam est redimi ab injustâ vexatione (d). *Gerson, Caj. Suar. Less. et Spor.* cum *S. Bon. Vasq. Pont.* et aliis communiter.

50. — Pœnæ verò à sacris Canonibus in Simoniacos inflictæ, sunt sequentes. I. Propter Simoniam pro ingressu in Religionem, Communitas incurrit suspensionem, et Particulares *id præsumentes*, ut loquitur textus (e). excommunicationem Papalem. Sed hæc probabiliter tantum incurritur in Professione; imò multi DD. dicunt illam in desuetudinem abiisse (f). Et hinc advertatur, quod omnes electiones Simoniacæ ad Generalatum, Rectoratum, et ad quodlibet officium spirituale in Religione sunt irritæ, ut habetur ex textu (g).

51. — II. Propter Simoniam in collatione Ordinum (non tamen primæ Tonsuræ) Episcopus ordinans, et Mediatores incurrunt Excommunicationem, et Suspensionem Papæ reservatas, ac Interdictum ab Ecclesiæ ingressu. Ordinati verò præter excommunicationem, et suspensionem ordinum (sed probabiliter

---

(a) *Lib. 1. n. 100. et 102.* — (b) *N. 103.* — (c) *Ibid.* — (d) *D. n. 103. Qu. 5.* — (e) *C. 1. Extrav. de Simon.* — (f) *L. 3. n. 108.* — (g) *Extrav. 2. de Simon.*

eorum tantum simoniacè susceptorum) prohibitum est eis ascendere ad superiores ordines. Hoc tamen non procedit, cum Simonia ab aliis, ordinato inscio, commissæ est (a).

52. — III. Propter Simoniam Realem in Beneficiis irritæ sunt omnes Præsentationes, Electiones etc. Quarè Simoniacus nequit retinere Beneficium, neque fructus ab illo perceptos (b). Et hoc etiamsi Beneficiatus invincibiliter prædictam pœnam, et Simoniam commissam ignoraret, si v. g. patrata fuerit à quodam Tertio, ut habetur ex *Cap. Nobis, de Simon.* Excipiuntur tamen, 1. Si Beneficiatus contradixerit, et postea Simoniam ignorando acceptaverit Beneficium. 2. Si ille Tertius commiserit Simoniam hoc dolo, ut illum redderet inhabilem ad Beneficium. 3. Si pacificè tres annos in Beneficii possessione fuisset, ut communiter DD. Exceptis dictis casibus, recipiens simoniacè Beneficium, præter excommunicationem Papalem per Bullam S. Pii V. *Cum primum* an. 1566., qui Beneficium Ecclesiasticum simoniacè adeptus fuerit, perpetuò fit inhabilis ad ea, et ad quæcumque alia (itè ut etiam per *Extrav. Pii IV. In sublimi* si nollet omittere Beneficium, non posset absolvi); et prætereà privatus existit etiam illis Beneficiis, quæ antea obtinisset. Attamen juxtà communioem, et probabiliorem sententiam, quam tenent *Navar. Suarez, Less. Sanch. Laym. Anacl. Ronc. Croix*, etc. dictæ pœnæ non incurruntur, nisi simonia sit ab utrâque parte completa; et hîc est stilus Curia, ut testantur *Nav.* et alii (c), exceptâ tamen Confidentiali, in quâ sufficit, ut tantum temporale sit præstitum, juxtà Bullam S. Pii V. (d). Et quamvis Simonia sit completa, illæ duæ pœnæ privationis et inhabilitatis non incurruntur, nisi post sententiam condemnatoriam, ut communissimè *Bonac. Castropal. Sanch. Laym. Filliuc.* etc. (e). Nec obstat Bulla Pii V. quia (ut dicunt præfati DD.) illa intelligitur

---

(a) *N. 109. et 110.* — (b) *Extrav. v. de Simon.* — (c) *Lib. 3. n. 106.* — (d) *N. 116.* — (e) *Lib. 3. n. 111. et 112.*

valere pro foro externo, cum ibi dicatur *quicumque convictus fuerit*; saltem in eo sensu recepta est.

53. — IV. Propter Simoniam Confidentialem, præter pœnas impositas adversus Realem, incurritur etiam privatio aliorum Beneficiorum etiam antea obtentorum; sed probabiliter non quidem ante sententiam delicti declaratoriam. Advertatur tamen, quod per Tridentinum *Sess. 24. c. 18.* cum statutum sit, Examinatores Synodales qui ratione examinis aliquid accipiunt ab eis qui ad Beneficia curata concurrunt, tam examinatores accipientes, quam dantes fieri inhabiles ad Beneficia obtinenda, ac non posse absolvi à Simonia, nisi *dimissis Beneficiis*, deducitur, quod præfati ipso facto, et quidem antea omnem sententiam, omnibus Beneficiis, quæ etiam antea collationem Simoniacam obtinuissent, privati existunt.

Denique notandum hic 1. quod præfatæ pœnæ incurruntur tantum propter Simoniam in materiis descriptis, nempe in materiâ Religionis ingressus, Ordinum, et Beneficiorum, non vero in venditione rerum sacrarum, aut Ecclesiasticæ jurisdictionis, aut Capellaniarum non collatarum (a). Notandum 2. quod pretium acceptum pro Simoniacâ collatione Beneficiorum, aut Ordinum, aut Sacramentorum, si excedit quod poterat à Ministro exigere (loquendo de Sacramentorum administratione, ut dictum est n. 45.) pro suâ sustentatione, restituendum est illi, qui illud tradidit antea traditionem rei spiritualis; si autem postea traditum fuisset, tunc, licet probabile sit posse restitui eidem, nihilominus probabilius est cum *S. Thomâ* restituendum esse Ecclesiæ, aut Pauperibus. Quoad autem fructus Beneficii simoniacè acquisiti, isti restituendi sunt Ecclesiæ, et probabile est posse dari Pauperibus, aut Successori in Beneficium, et potest etiam obtineri Compositio à Papâ. Quod autem acceptum est pro admissione in Religionem, non est restituendum, nisi post sententiam, et interim potest retineri pro alimentatione Communitatis (b). No-

---

(a) N. 107. — (b) Lib. 3. n. 114. ad 116.

tandum 3. quòd ab Excommunicatione et suspensione ob collationem Ordinum, vel Beneficiorum, aut ob admissionem in Religionem incursis, si publicæ sint, solus Papa potest absolvere; sed si occultæ, possunt etiam Episcopi juxtà communem sententiam per *Trident. Cap. Liceat 6. Sess. 24. Et Salmant. cum Less. Sa, et Castropal.* dicunt posse etiam Mendicantes, addentes quòd Bulla Pii V. quæ quoad hoc revocavit omnia privilegia Regularium, non est recepta; sed hic nequeo intelligere, quomodò revocatio privilegiorum opus habeat acceptatione, cum in tantum Regulares prius poterant, quia Pontificibus sic placuit; ergo si eis ablata fuit ab eodem jurisdictio, quâ potestate possunt sibi talem jurisdictionem vindicare? Vide dicenda *Tom. III. Tl. XX. n. 17. circa fin.* Sed quicquid sit de hoc, certum est per Clementem VIII. ablatam fuisse Regularibus extrà Urbem, et intrà Italiam facultatem absolvendi seculares à Simoniâ reali, et Confidentiali. Vide *Tom. III. Tract. XX. de Privilegiis n. 101.* Quoad inhabilitatem ad alia Beneficia Episcopus potest dispensare, dummodò crimen Simonie non sit deductum ad forum contentiosum, et modò non sit Confidentialis (a). An autem possit Episcopus dispensare cum Simoniaci ad obtinendum idem Beneficium? Respondetur, quòd si Beneficium (sive sit curatum, sive simplex) scienter fuerit receptum simoniacè, non potest Episcopus dispensare; si autem Simonia commissa fuerit à Tertio, et Beneficiatus receperit Beneficium inscius Simonie, tunc potest Episcopus dispensare, sed non tamen antè renunciationem Beneficii; *Navar. Sanch. Salmant. etc.* Si autem Beneficium est curatum, non potest Episcopus dispensare in illâ vacatione, potest verò in aliâ, *Panorm. Pal. Salmant. etc. (b).*

De *Perjurio* autem, quod est quarta species irreligiositatis, fiet sermo in *Tract. seq. Capit. II.*

---

(a) *Lib. 3. n. 117.* — (b) *N. 118.*



# TRACTATUS V.

## DE SECUNDO PRÆCEPTO DECALOGI.

### CAPUT I.

#### De Blasphemiâ.

*Quandò committitur Blasphemia 1. De maledictione creaturarum 2. De maledicentiâ in Mortuos 3. ad 11.*

1. — **B**LASPHEMIA committitur aut attribuendo creaturæ aliquod attributum Divinum, ut si vocaretur Dæmon Sanctus, etc. aut aliquod convicium in Deum, vel Sanctos, vel in res sanctas, aut in dies sanctos proferendo, ut si quis malediceret alicui Sancto, dicendo: *Malè habeat Sanctus N. Malè eveniat Ecclesie. Maledictum sit Pascha, Sabbatum Sanctum*, etc. quam quidem execrationem vulgò rudes exprimunt per verbum; *Mannaggia*. Etiam blasphemia est dicere: *Deo invito hoc fiet; O Sanguis Christi!* (ira excandescens in Dominum): *Deus non justè operatur*: Et hoc postremum esset etiam blasphemia hæreticalis; itaque si seriò, prolata esset, qui eam audiret infrà mensem teneretur ad denunciandum. Blasphematur etiam facto, v. gr. spuendo versùs Cœlum, conculcando Imagines, Coronas, etc.

2. — Dicere autem *Atta Sancti N.* non est blasphemia, nec etiam *Potta*; nam hoc verbum tantum significat in nostro Idiomate interjectionem indignantis. Nec esset blasphemia dicere *Mannaggia Santagata. Malè habeat Santagata, Sanctusermus, Sanctusmenna*, etc. quandò intelligitur locus, et non Sanctus. Nec item erit blasphemia maledicere creaturis, nimirum igni, vento, pluvix, etc. nisi addatur verbum *Dei*, aut nisi essent eæ creaturæ, quæ speciali relatione referuntur ad Deum, aut in

quibus peculiari modo relucet Divina potentia, prout sunt Anima, Cœlum, etc. Idem dicendum puto de maledictione Mundi, modo non intelligatur Mundus pravus, quomodo accipiebatur à Jesu Christo, cùm dixit: *Si odit vos Mundus: Ego vici Mundum*, etc.

3. — Maledicere *Fidei* alicujus, ex se non est blasphemia, nisi exprimeretur *Fides Christi*, aut *Fides sancta*; quia cæterum nomine *Fidei* potest etiam accipi fides humana. Nec est blasphemia maledicere *Mortuis*, nisi mens specificè ferretur ad Animas Purgatorii, aut nisi malediceret mortuis Sanctis aut Christi. De hoc puncto jam egi in Opere Morali (a): Sed quoniam de hoc puncto usque adhuc ab aliis Auctoribus minimè actum est, lubet hic majore quàm possum claritate de hoc tractare, præcipuè ut satisfaciam cuidam Auctori anonymo, qui quâdam suâ Epistolâ nonnulla objecit.

4. — Itaque affirmo maledicere *Mortuis* naturâ suâ non esse blasphemiam neque ex se, neque relativè ad eos, qui ea verba effutiunt. Primò non est blasphemia ex se, dùm hoc verbum *Mortui* propriè est terminus privativus, qui significat homines vitâ privatos, qui ampliùs non existunt in præsentì, et in hâc suppositione vox *Mortui* non denotat nec Animam, nec Corpus. Quâ de re philosophicè rigore loquendo qui maledicit mortuis, nemini injuriam irrogat, dùm maledicit illi qui existentiam non habet.

5. — Dicit aliquis: Sed hîc vox *Mortui* accipitur non tanquàm terminus *Privativus*, sed tanquàm *Analogus*, nempè quòd possit referri tam ad Corpus, quàm ad Animam Defuncti. Respondeo primò quòd qui sic loquitur, jam loquitur de relatione, quâ mens ad aliquod fertur; sed ego loquor de eo, quod importat ex se vox *Mortui*. Sed dato quod accipienda sit talis vox tanquàm terminus *Analogus*: respondeo secundò, quòd sub hâc voce *Mortui* principaliter, et in recto, ut ajunt Philosophi; venit solum Corpus; quod dumtaxat potest dici mortuum, non autem Anima, quæ non moritur.

---

(a) Num. 130.

Anima enim potest tantum in obliquo intelligi, dicendo v. gr. Anima mortui, ex eo quia aliquando fuit forma Corporis illius, cui dedit vitam. Sed supposito quod vox *Mortuus* principaliter respiciat Corpus, et minus principaliter, et ut melius dicam, improprie denotet Animam; cum aliquis nominat *Mortuos*, ex se loquendo, non intelliguntur Animæ illorum, sed Corpora. Ut intelligantur Animæ, opus est, ut ipse aut mente intendat de Animabus loqui, aut Animas denotent cetera verba sermonis, ut est illud, quod scriptum habetur in libro 2. Machabæorum; *Sancta, et salubris est cogitatio pro Defunctis exorare*. Hoc loco verbum *exorare* jam significat sermonem ad Animas dirigi.

6. — Igitur ex se loquendo maledictio Mortuorum non est blasphemia; quia non refertur ad Animam. Videamus nunc, an sit blasphemia saltem ex relatione mentali eorum, qui eam proferunt. Et hoc etiam negamus; quia illi, qui maledicunt Mortuis, ordinariè à consideratione Animarum ipsorum præscindunt. Hic autem Auctor Epistolæ conviciis me onerat ac impropere quod nesciam terminum *Abstractum* à *Concreto* secernere. *Abstractus*, sic ille me instruit, est qui formam significat à subjecto præcisam, prout est pulchritudo, albedo, etc. *Concretus* verò significat subjectum cum formâ conjunctum, v. g. Homo pulcher, charta alba, etc. Hinc dicit vocem *Mortuos* significare Hominem, qui olim Animâ et Corpore constabat, sed nunc importare Corpus, et Animam disjunctas. Et ex hoc concludit quod *Mortuis* maledicens, non tantum eorum Corporibus, sed Animabus etiam maledicit.

7. — Respondeo: Ego non dico qui *Mortuis* maledicit, eos tanquam abstracta considerat, nempe uti formas sine subjecto: Sed dico quod præscindit à considerando in Mortuo Animam quam olim habuit. Aliud est abstrahere, quod est considerare formam sine subjecto: aliud est præscindere, quod est considerare subjectum præcisum ab aliquâ ejus qualitate aut circumstantiâ, cum quâ potest illud conspici. Certum est, quod homines mortui in præ-

senti non sunt illi ipsi qui priùs existerant in vitâ. Tunc erant tot personæ quæ Animâ et Corpore conjunctis constabant : sed nunc quidem existunt eorum Animæ et Corpora , sed sunt substantiæ separatæ. Adeò ut maledicendo in præsentî Hominibus mortuis , non proindè necessariò maledicuntur eorum Animabus , nisi cùm illæ specialiter exprimuntur , aut subintelliguntur.

8. — Sed esto concedatur Auctori Epistolæ , quod ipse sustinere contendit , nempe quòd maledicere *Mortuis* , idem sit ac maledicere vivis. Quæro ab ipso : ergò qui viventi maledicit , semper peccat mortaliter ? Omnes DD. *Cajetanus*, *Sotus*, *Molina*, *Prado*, *Azor. de Lugo* , et alii apud *Salmant.* (a) cum *S. Thomâ* (b) dicunt tunc maledictionem in Proximum esse peccatum mortale , cùm illa est formalis , nempe ( ut explicat *Cajetan.* ) cùm quis animo pravo Proximo optat malum ( et grave quidem ) , quod illi imprecatur. Secùs verò cum maledictio est materialis tantùm , nempe sine pravo animo prolata ; et tamen in vivente certè adsunt Anima et corpus. Et cur non est mortale ? quia qui maledicit non semper intendit maledicere Proximi Animæ , et injuriam inferre illi substantiæ , in quâ Dei Imago elucet , sed præscindit à respiciendâ Animâ , et ita non peccat lethâliter. Qui maledicit Creaturis rationis expertibus ( docet idem *S. Thomas* in loco citato a. 2. et omnes alii ) , si eas respicit , ut Dei creaturas , graviter peccat , et veram Blasphemiam committit ; secùs verò si præscindit à considerando eas uti tales , et eis maledicit dumtaxat uti creaturis in se consideratis , et tamen omnes illæ sunt Creaturæ Dei. En vide quòd *S. Thomas* jam admittit hanc præcisionem. Ita pariter qui maledicit *Mortuis* , si ipsis maledicit respiciendo eorum Animas , peccat mortaliter ; secùs autem si præscindit , ipsis maledicendo , quin specialem ad eorum animas habeat respectum.

9. — Dicere autem quòd omnes qui *Mortuis* maledicunt , intendunt etiam in Animas invehere , ego et tot alii Confessarii experienciâ docti Pœnitentes de hoc interrogando oppositum experti sumus. Tantò

---

(a) *De Rest. c. 4. n. 27. et 28.* — (b) 2. 2. q. 76. a. 3.

magis quòd qui mortuis maledicunt, eis animus non est Mortuos lædere, sed viventes, quibus eas maledictiones dirigunt ad injuriarum modum. Sed hæc est materia facti; Confessarius de hoc potest se certum facere, et à dubio se liberare, sedulò interrogando Pœnitentes.

10. — Dicere autem quòd, licèt quis intelligat maledicere solis Corporibus Mortuorum, nec potest excusari à mortali, propter respectum quem Ecclesia ergà Defunctorum corpora adhibet, ea thure suffiundo, aquâ benedictâ aspergendo, ac in Sacrà Sepulturâ tumulando. Nescio utrùm hâc ratione possit aliquis sibi persuadere, quòd maledicere Mortuis sit mortale. Brevibus respondeo, et dico, quòd præfatæ functiones non sunt cultûs Religiosi honor ergà Cadavera Defunctorum, sed sunt quædam cæremoniæ quas Ecclesia etiam ergà viventes adhibet. Igitur si honor, qui Defunctis præstatur, præstantior non est eo quod vivis exhibetur, nec injuria erit major. Sed cur (subjungit Auctor Epistolæ) leges severius puniunt in Cadavera sævientes? Respondeo: Puniant non ratione injuriæ majoris, sed animi pravi, qui in eo actu manifestatur, quòd quidem crimen punitur etiam in necantibus Infideles, et Hæreticos. Secùs, si id esset ex se in Defunctorum Corpora contumelia gravis, ejusdem criminis rei essent qui ea incidunt, et frustatim dividunt ad medicas observationes. Ceterùm quod ego concludo, est, quòd maledictio, in Mortuos non est blasphemia, nec peccatum mortale. Et tres Auctores (in Opere allati) qui tantummodò de hâc re scripserunt, idem senserunt. Addo quòd ego, ut cautiùs agerem, scripsi Neapolim ad plures Viros doctos, ubi flos extat Doctorum, et ad tres Congregationes Missionariorum, nempe ad illam P. Pavone, Archiepiscopatus, et S. Georgii, et omnes uno exemplo mihi rescripserunt, meæ sententiæ assentientes. Accedit: Pater Sabbatinus (tunc Pius Operarius, nunc digniss. Aquilæ Prælat) mihi respondit, cunctos Pios Operarios, tam præsentis, quàm antiquos, idem uniformiter sensisse. Insuper tanquàm certum accepi, quòd Nuntius Neapolis, postquàm typis editæ fuissent, tam mea Epistola circà hanc

rem, quàm Epistola mei Adversarii, utramque ad Pontificem Bened. XIV. transmisit, qui R. D. Thomæ Sergio Pio Operario, Consultori S. Officii (qui jam suum obiit diem) controversiam discutiendam demandavit, et quòd ipse Pontifici suam sententiam significavit hanc esse, nempe Maledictionem in Mortuos non esse veram blasphemiam. Et ab alio Pio Operario, qui nunc Romæ degit, mihi affirmatum deinde fuit, quòd Papa cognitâ P. Sergii sententiâ, et perpetuo difficultatis puncto, ostendit se etiam idipsum sentire.

11. — Itaque hoc posito, intelligere nequeo, quomodò fieri potest, ut quidam possint non dubitare saltem, et pro certo habere, et etiam ex pergamis sinè scrupulo prædicare, Mortuis maledicere generaliter loquendo ex se esse mortale, atque veram blasphemiam, quandò omnes DD. et etiam illi qui rigidiorum profitentur sententiam, ut *P. Concina*, et alii docent non esse damnandum de peccato mortali, quod aliquis perspicuus textus Scripturæ, aut evidens non suadeat ratio. S. Raymundus scripsit (a): *Unum tamen consulo, quòd non sis pronus judicare mortalia peccata, ubi tibi non constat per certam Scripturam*. Et S. Antoninus (b) dixit: *Nisi habeatur auctoritas expressa sacre Scripturæ, aut Canonis, seu determinationis Ecclesiæ, vel evidens ratio, non nisi periculose determinatur; nam si determinatur quòd sit ibi mortale, et non sit, mortaliter peccabit contrà faciens, quia omne quod est contrà conscientiam, ædificat ad gehennam, etc.*

## EPISTOLA RESPONSIVA

Adversùs Epistolam Apologeticam scriptam in propugnationem Dissertationis, quæ super abusu Mortuis maledicendi prodiit.

*P*RÆ omnibus indicandum esse duxi, quòd cùm adversus ea quæ super hoc puncto scripseram, quæ-

---

(a) *Lib. 3. tit. de Pœnit. §. 21.* — (b) *Part. 2. t. 1. c. 11. §. 28.*

dam *Dissertatio*, cui brevibus respondi, prius prodiisset, pollicitus fui, cum semel atque iterum iis quæ mihi apponebantur satisfecerim, non amplius circa hoc verbum me fore facturum; tùm ne in infinitum daretur progressus, tùm ne eadem, quæ jam à me scripta erant, repeterem; sed dixi quòd dumtaxat respondere volebam (prout feci) ad duas S. Thomæ *Doctrinas*, quas mihi de novo objiciebat. Et unâ simul significavi in animo mihi statutum esse deinceps nihil amplius super hâc controversiâ scripturum (quâ mihi satis in propatulo res collocata esse videbatur) nisi cum ab *Adversario* meo de veritate prorsus fuisset persuasus: tunc enim nihil mihi difficultatis esset à sententiâ desciscere et id in omnibus per publicam scripturam significare non erubescerem, prout animus meus ab hoc faciendo non abhorruit in aliquibus illis meis opinionibus, quas ubi eas rationis non consentaneas cognovi, libenter revocavi.

Nihilominus post responsionem à me datam, vulgata est altera *Epistola Apologetica* in propugnationem præfatæ dissertationis, in quâ contendebat *Auctor* probare mortuis maledicere per se esse mortale: cui *Epistolæ*, non obstante consilio, quod de non amplius respondendo ceperam, aliâ *Epistolâ* nunc respondere sum coactus. Et hanc dumtaxat hic subjungo, in quâ summam continetur tùm responsio, quam ad dissertationem dederam, tùm responsio ad *Dissertationis* propugnationem.

Reverendissimo Abbati D. Bartholomæo de Marco  
Basiliano.

*Reverendissime Pater, et Domine Colendissime.*

CUM *Dissertatio* quædam super Mortuorum maledictione, ac cum adversus eam brevis responsio mea prodiissent, novissimè typis edita est altera *Epistola Apologetica* pluribus scripta in præfatæ dissertationis propugnationem. Ubi ad manus meas illa *Epistola* pervenit, et accuratè illâ à me lectâ, diù animi pependi, rescriberem nec ne. Ex unâ enim parte consilium de non amplius respondendo susceptum, sar-

tum tectum habere voluissem, ne in infinitum progrederer. Ex aliâ parte expediens videretur nunc de-  
nuò respondere sicut Amici mei ad id faciendum me  
adigunt; tùm quia in priori Responsione error qui-  
dam, à quo me retractare intendo, fortuitò exci-  
dit, licet ille ad rem nostram nihil referat, sicut ex  
hâc alterâ Responsione animadvertes. Tùm quia in  
laudatâ Epistolâ Apologeticâ Adversarius alias novas  
exponit animadversiones, quibus ut ambiguitates aliæ  
de medio tollantur, alterâ Responsione satisfacere  
opus esse duxi. Quapropter ad te hanc alteram res-  
pensionem afferendam curavi, et abs te duo hæc peto:  
Primum ut omni quâ potes animi attentione eam  
perlegas, detrahendo, addendo, corrigendo quicquid  
tibi visum fuerit: Secundum, ut mihi consilium tuum  
candidè aperias, utrùm expedire tibi videtur, ut  
hanc typis excudendam curem, dùm ex unâ parte  
mihi contendere displicet cum viro et aliis ejus sociis  
Ordinis, quem ego maximi facio, atque mirum in  
modum veneror (tametsi mihi compertum est non  
deesse aliquos inter illius Ordinis, fortè eis minimè  
indoctiores, qui meæ adhærent sententiæ). Ex alterâ  
parte à Fidelium cordibus hanc deducere opinionem,  
nimirùm quòd præfata maledictio sit mortale, cùm  
tale non sit, ad Gloriam Dei, qui sibi Animarum  
salutem Gloriæ habet, non parùm conferre censeo.

Parcas mihi, quæso, si non pauca quæ in priori  
Responsione jam notata erant, hic repetita obser-  
vas. Hoc non aliter faciendum esse censui, ut Lec-  
toris antè oculos omnia simul exponantur, dùm legit  
illas animadversiones, quas mihi Adversarius de  
novo objicit. In dissertatione probare aggressus est  
maledictionem in Mortuos esse peccatum lethale, et  
veram Blasphemiam duabus ex rationibus: 1. quia  
corpora fidelium Defunctorum sunt Sacra: 2. quia  
præfata maledictio præscindere non potest, quin ad  
Animas referatur. In responsione ad Dissertationem  
datâ, dixi, quod jam illis objectionibus bis respon-  
deram, propterea ne eadem semper canerem, nolui  
ad omnia quæ apponebantur respondere. Nihilomi-  
nùs duabus *S. Thomæ* auctoritatibus, quæ de no-  
vo afferebantur, dixi me facere non posse quin res-  
ponderem.



ponderem. Primus Textus desumptus est ex 3. p. quæst. 8. art. 2. ubi S. Doctor dicit Christum in fidelium corpora influere jus resurgendi propter Spiritûs-Sancti inhabitationem. Et hoc idem jus Auctor dissertationis probare intendit aliundè, nempè ex ratione Sacramentalis Communionis, quâ Fideles, dum vivunt, reficiuntur; hincque ex hisce duabus rationibus infert mortuorum corpora inter sacra annumeranda esse, adeò ut sacro cultu ex Religionis virtute emanato, veneranda sint. Ast si hæ rationes (respondeo ego) probarent quòd corpora quorumlibet Defunctorum pro sacris habenda sunt, probarent etiam quòd necessario corpora fidelium damnatorum inter sacra annumeranda essent: in iis enim etiam aliquandò habitavit Spiritus Sanctus, et cum Jesu Christo per Eucharistiam concorporata fuerunt. Dicit, quòd illæ qualitates per peccatum postea amittuntur. Igitur subsumo, quoties Ecclesiæ authentico testimonio mihi non constat, Animam illius Gloriâ æternâ frui, ac etiam quoties Ecclesia honorem qui ei debetur ad cultûs sacri rationem non elevat, ut infra explicabimus, mihi fas non est illud corpus pro sacro habere. Præterquamquòd, si corpora Defunctorum Sacra sunt propter Eucharistiam quam receperunt, et propter Spiritûs-Sancti inhabitationem, necessariò dicendum erit etiam corpora viventium Fidelium tamquàm Sacra colenda esse, ita ut quælibet injuria, aut maledictio in Fidelis viventis corpus irrogata, peccatum grave Religioni adversans dicendum sit. Sed hoc est contrà expressam S. Thomæ Doctrinam, ut mox videbimus. Dicere autem Sacra corpora Defunctorum propter Ritus, quibus ergà illa utitur Ecclesia, quia nempè Sacræ Sepulturæ beneficio donat, processionibus et benedictionibus ea decorat, thure suffit, et etiam ob antiquum (ut Adversarius dicit) dudum adhiberi consuetum Sacram Eucharistiam super Defunctorum pectore collocandi: Nescio cur hi ritus actus sacri cultûs dici debeant; cùm compertum sit, seculis superioribus etiam tempore quo ab Infidelium persecutionibus pace Ecclesia fruebatur, Defunctorum Fidelium corpora sepe liri in campis, et viis, prout testatur Thomassinus;

Tom. I.

H

et *Calmet* : Imò plura Concilia prohibuerunt quominus in Ecclesiâ Cadavera sepulturæ darentur. Quod si posterioribus temporibus usus invecus est ut in loco sacro sepelirentur , ( hoc affirmante Sancto Gregorio ) indè processit , ut proximi ex sepulcrorum conspectu recordarentur Defunctorum Animassæpiùs suis precibus coadjuvare : *Hoc prodesse Mortuis* (sunt verba Sancti) , *si in Ecclesiâ sepeliantur* , quòd eorum Proximi , ipso tumulorum conspectu admoniti , pro illis frequentius exorent ; *lib. 3. Dial. cap. 50. 52. et 53.* Et idem dicit Sanctus *Augustinus lib. de Curâ pro mortuis*. Benedictiones autem cum aquâ laustrali , dicunt *Gavantus* , et *Durandus* , ergà Cadavera ideo adhiberi , ut à dæmonum infestatione illa liberentur. Et hæc eadem de causâ illa thurificantur ; ut scribit *Innoc. III. lib. 2. de Myst. Missæ* , c. 17. et ob id idem SS. Eucharistia in Defuncti pectore apponebatur , ut idem S. Gregorius asserit *Lib. 2. Dial. c. 24.* Quamvis hoc denique reprobatum fuerit à Conciliis in IV. VI. et VII. Seculo , ut refert *P. Vestrinus* in suis literis Theologicis *T. 3. Epist. 53.* sicut etiam vetitum fuit Sacram Eucharistiam in Ecclesiarum fundamentalibus lapidibus collocare , aut ad *Emergumenos* , aut ad *Infirmorum* vulnera admovere , sicut pariter sanguine consecrato frontem , oculos , etc. linire , qui apud antiquos Fideles mos receptus habebatur , referentibus S. Cyrillo , et S. Joanne Chrysost. Hæc perspicuum dilucidumque faciunt hos pios actus ( qui à simplicitate potiùs quam à Religione derivarunt ) non judicare sacra esse ea ; circà quæ illi adhibebantur , sed quòd solùm , ad bonos assequendos effectus , quos ex eorum usu sperabant Fideles , adhibebantur.

Sed loquendo de Ritibus , quibus hodiè utitur Ecclesia communiter in tumulandis Cadaveribus , hæc sunt quæ scribit *Spondanus ( Lib. 1. p. 2. cap. 15. sect. 3. De Sac. Cæmet. )* : *Quanta namque sit vis Crucis quâ signantur et ornantur , et Aquæ benedictæ quâ asperguntur , et thuris quo suffiuntur , tum ad alia plura arcenda mala , tam maximè ad fugandos Dæmones , eorundemque ac Magorum præstigia dissolvenda , pronum mihi esset quamplu-*

rimis Patrum testimoniis et exemplis testatissimum reddere. Et in Cap. II. Sect. I. fit suffitus ad Corpora Fidelium Defunctorum, quoniam, qui piè moriuntur sunt Christi bonus odor; et ut insuper significetur, Defunctos reliquisse odorem bonorum operum etc. Per Incensum, ut judicetur eisdem credidisse se per mortem ire ad immortalitatem. Insuper Stephanus Durandus (lib. 1. cap. 9. n. 9.): Porro thurificatio fit ad reverentiam loci, et Divini Officii, etc. Item Joannes Beletto (in Explicat. Divin. Offic. cap. 161.); Cadaver ponitur in sepulchrum; et aqua apponitur benedicta, ac prunæ cum thure. Aqua benedicta, ne ad corpus Dæmones accedant. Thus propter corporis fætorem removendum. Prunæ ad designandum, quod terra illa in usus communes redigi nequeat. Præterea Guilielmus Durandus (in Rationali lib. 7. cap. 35.) Aqua benedicta ponitur, ne Dæmones ad corpus accedant. Thus propter fætorem removendum, sicut ut Defunctus Creatori suo acceptabilem bonorum operum odorem indicetur obtulisse, seu ad ostendendum quod Defunctis prosit auxilium orationis. Ex quo patet omnes præfatos Ritus quos erga Defunctos adhibet Ecclesia, non esse cultum sacrum, quo honorare intendit Cadavera, sed mysticas cæremónias. Nota præterea quod eos denegat Ecclesia iis, qui Excommunicationis aut Interdicti vinculo ligati ex hac vitâ decesserunt, quamvis antequàm Animam afflarent certa poenitentiae ac suæ salutis signa dedissent. Igitur non ideò cum Defunctis eos Ritus adhibet Ecclesia, quia supponit eos esse templa Spiritûs-Sancti, sed quia communionem inter viuentes et Defunctos cupit conservari.

Alter locus S. Thomæ qui mihi objicitur excerptus est ex eadem 3. p. q. 25. art. 6. ubi dicit Angelicus quod Sanctorum Reliquiæ venerandæ sunt, quia fuerunt templum et organa Spiritûs-Sancti, qui in ipsis inhabitavit et operatus est: Et etiam quia aliquandò illa per gloriosam Resurrectionem Jesu-Christi configuranda sunt Corpori. Ex hoc infert Adversarius maledictionem in Defunctorum corpora veram esse blasphemiam, ex eo quia illa jamdudum etiam templa et organa fuerunt Spiritûs-

Sancti. Sed si hæc ratio valeret pro Defunctis (iterum pariter dico) tantò magis valere deberet pro vivis; imò quàm longè fortiùs, viventes enim sunt actu (si in caritate vivunt, prout piè præsumendum est) templa viva et organa Spiritûs-Sancti. Sed S. Thomas 2. 2. q. 75. a. 3. cum communi Theologorum, qui eum sequuntur, Cajet. Sot. Azor. Prad. Serra, Mol. Lugo, Laym. Trullen. et omnes dicunt quòd maledictio sive imprecatio in homines prolata, veniale non excedit, quoties maledictio non est formalis, sed tantum materialis, nempe sinè pravo affectu. Referamus integrum textum Angelici, ne mihi imponatur quòd truncum retulerim: *Maledictio est, per quam pronuntiatur malum contrà aliquem (nota) vel imperando, vel optando. Velle autem, vel imperio movere ad malum alterius, secundum se repugnat caritati, quâ diligimus proximum volentes bonum ipsius. Et ita secundum suum genus est peccatum mortale, et tantò gravius, quantò personam, cui maledicimus, magis amare et revereri tenemur. Undè dicitur ( Lev. 20. ) Qui maledixerit Patri suo, et Matri, morte moriatur. Contigit tamen verbum maledictionis prolatum esse veniale vel propter parvitatem mali quod quis alteri imprecatur, vel etiam propter effectum proferentis, dum ex levi motu, vel ex ludo, aut ex subreptione alia verba proferuntur; quid peccata verborum maximè ex affectu pensantur. Hinc in me Adversarius invehendo, et verba Angelici cum emphasi mihi repetendo, secundum genus suum est peccatum mortale, sic me alloquens excandescit: *Intende, ß non intende?* Ego tamen mihi videor hæc intelligere, et quidem ita, ut nemo aliter quàm ego intelligo, Textum S. Thomæ intelligere debeat, nimirum quòd hominibus maledicere tunc est peccatum mortale, cum maledictio est formalis, quæ tunc dicitur esse talis, cum quis animo pravo optat, ut illis eveniat malum quod imprecatur, aut cum alios inducit ad illis malum ferendum, sicut se explicat Angelicus in a. 1. exemplo Judicis, qui Ministros justitiæ ad pœnam injustam exequendam in Reum injustè movet. Et hoc dicit Sanctus ex se esse peccatum mortale, quia hoc*

*Secundum se* ( ut ipse loquitur ) *repugnat caritati, quâ diligimus proximum, volentes bonum ipsius.* Nam sicut caritas nobis imponit, ut Proximi bonum velimus, ita vetat ne illis malum optemus, et ne alios ad illi malum inferendum inducamus. Loquendo vero S. Thomas de maledictione verbali ( de quâ dumtaxat nos in præsentī casu loquimur ) dicit illam non excedere veniale, aut cū malum quod quis imprecatur est leve, aut deest pravus affectus ( quæ materialis maledictio nuncupatur ) proferendo nempe maledictionem aut joco, aut sinē plenā liberatione. Et hoc deniquē hāc ratione confirmat: *Quia peccata verborum maximē ex affectu pensantur.* Hoc idem docet Cajetanus super cit. q. 76. a. 1. dicens: *Nota ex 1. art. quid sit propriē maledictio, scil. dicere malum, in quantum malum, alicui ex intentione. Et ex hoc oritur quod maledictio distinguitur in maledictionem formaliter, et materialiter; et quod quandōque est peccatum mortale, quandōque veniale; nam maledictio formaliter est ex suo genere mortale, ut patet, materialiter autem si fiat optativē, non est mortale; si verō fieret imperativē posset esse mortale. Et ratio diversitatis est, quia præter intentionem optativē maledicens neminem lædit; quia nec eā intentione nec ex opere Ministri obsequentis, quamvis non ex propriā intentione. Dixi autem ex suo genere, quia propter imperfectionem actūs, sive ex parte objecti, ut si parvum malum optet vel imperet, sive ex parte operantis, ut si ex irā ( vel ex ludo addit S. Th. ) maledicat, quamvis affectu tendat in malum, quia non ex consensu rationis in malum tendit, deficit à perfectā ratione peccati, et per hoc non est mortale.* In sequelā igitur doctrinæ S. Thomæ Cajetanus ex unā parte ait, quod maledictio formalis, nempe *ex intentione*, est de genere suo mortalis, et fit venialis vel propter imperfectionem actūs, scilicet consensūs rationis, vel propter parvitatem mali quod optatur; ex aliā dicit, esse nonnisi venialem maledictionem materialem, nimirum *præter intentionem*, pronunciatam *optativē*, idest modo optativo, sive per verba desiderium exprimentia, sumendo illud *optativē* adverbialiter, ad differentiam

*Tò imperativè, scilicet imperativo modo. Et idem quippè, etsi diverso modo, docet D. Thom. loco citato; ibi enim distinguit maledictionem formalem à materiali; nam primo loco loquitur de formali, nempè cum intentione volendi malum, quod pronuntiatur, dùm ait: Velle autem, vel imperio movere ad malum alterius secundùm se repugnat caritati, quâ diligimus proximum volentes bonum ipsius. Et ita secundùm suum genus est peccatum mortale.* Illud igitur quod S. Doctor repugnare intelligit caritati, et esse mortale secundùm suum genus, non est simpliciter pronuntiare maledictionem, sed illud *velle, vel imperio movere ad malum alterius.* Ergò, S. Thomas tantùm in volendo malum quod pronuntiatur, vel in movendo alios ad malum inferendum, gravitatem culpæ recognoscit. Deindè ad explicandam procedit maledictionem materialem dicendo illam esse venialem si ex levi motu, vel ex ludo proferatur, rationem tradens: *Quid peccata verborum maximè ex affectu pensantur, ut supra dictum est q. 72. a. 2. et in citato a. 2. sic priùs dixerat: Verba, in quantum sunt soni quidam, non sunt in nocumentum aliorum, sed in quantum significant aliquid; quæ quidem significatio ex interiori procedit; et ideo in peccatis verborum maximè considerandum est ex quo affectu aliquis verba proferat.* Aliud itaque est maledicere *optativè* ut loquitur Cajetanus; aliud maledicere *optando*, ut loquitur S. Thomas; *optativè* enim denotat maledicere per verba optativa præter intentionem, *optando* autem intelligit S. Doctor maledicere ex verâ intentione, sicut perspicuè deindè se explicat, dicendo: *Velle autem etc., secundùm se repugnat caritati etc.* Et hoc quidem est maledictio formalis; ac idè graviter culpabilis; et tantùm evadit venialis, ut subdit Angelicus, vel ob parvitatem mali quod optatur, vel ob surreptionem, sive levi motu, quo maledictio proferatur.

Cæterùm quæstio hæc me inter et meum Contradictorem de mero nomine est, nam dato quòd S. Thomas generaliter diceret quamcumque maledictionem de genere suo esse mortalem, attamen S.

*Doctor* pro certo equidem habet, quòd maledicere homini sine pravo affectu, non est nisi veniale. Et non aliud quàm hoc ipse probare quæro. Itaque tam *D. Thomas*, quàm *Cajetanus*, et omnes alii Doctores, cum *S. Augustino* apud eundem *Angelicum* (a), non reputant esse blasphemiam maledicere homini, ex eo quòd homo sit templum Spiritûs-Sancti; nam si hoc tenerent, nequirent dicere maledictionem sine pravo animo esse venialem; maledicere enim Sanctis aut rebus sacris, licèt absit malus animus, semper est mortale. Ex hoc evidenter infertur quòd juxtà *Angelicum*, et communem DD. sententiam rectè considerari potest fidelis persona præcisè ab eo quòd sit templum Spiritûs-Sancti. Et deducitur præterè (adversùs id quod etiam innuit meus Adversariùs) quòd sicuti non est culpa gravis contrà caritatem, et pietatem, maledicere corpori fidelis viventis, si abest pravus affectus, ità non est gravis contrà caritatem, et pietatem, sine pravo animo corpori fidelis defuncti maledicere; quandoquidem juxtà ipsum *S. Thomam*, caritas quâ mortui, qui in gratiâ decesserunt, prosequendi sunt, non est aliud quàm extensio caritatis quam vivis præstare debemus: *Caritas* (ait Sanctus) *quæ est vinculum Ecclesiæ membra uniens; non solum ad vivos se extendit, sed etiam ad mortuos qui in caritate decedunt.*

Sed Adversarius meus dicit, quòd maximum est discrimen inter vivorum, et defunctorum maledictionem, quia in vivo regnat fomes, ac proinde ipse in peccandi periculo versatur, à quo qui decessit in gratiâ immunis est: undè fit (ait) quòd maledictio in vivos potest esse venialis: cum enim sit peccatum contrà caritatem, remoto pravo affectu, potest esse non grave; sed maledictio in defunctos, cum sit peccatum contrà religionem, etiam remoto pravo affectu semper est grave peccatum, ratione injuriæ, quæ Religioni irrogatur, cum corpori sacro maledicitur. Sed ut respondeam

---

(a) 2. 2. qu. 79. art. 4. Object. 1.

iterum, principium ejus perquiramus, undè ille fidelium defunctorum corpora sacra esse autumat. Ipse dixit juxtà *S. Thomæ* doctrinam mortuis maledicere esse grave, quia eorum corpora fuerunt organa Spiritus-Sancti, et quia communionem sacramentalem receperunt. Respondeo igitur. Quoad illud quòd defuncti corpus propter communem, et quia templum fuit Spiritus-Sancti, pro sacro habendum sit, jam superius dixi, quòd hæc ratio probat tam defuncti quam vivi corpora pro sacris habenda esse, quia etiam vivus est templum Spiritus-Sancti. *Membra vestra templum sunt Spiritus-Sancti.* 2. Cor. 6. 19. Sed in vivos (replicabit) quòd fomes adest, qui hominem redigit sub potestatem peccandi. Respondeo. Ergò corpus Adæ antè peccatum erat sacrum? Præterea, potentia ad peccandum non efficit, ut mutetur species sanctitatis corporis. Item nec fomes nec periculum peccandi efficiunt, ut *hic et nunc* vivens non sit templum Spiritus-Sancti: Tantò magis quòd fomes iste nullum reatum aut maculam in animam inducit; nam gratia Redemptoris baptizatis omnes peccati maculas extergit, et cumulatissimè omnia ejus damna reparat. *Copiosa apud eum redemptio.* Ps. 129. 7: *Ubi autem abundavit delictum, superabundavit gratia.* Rom. 5. 20. *Ego veni, ut vitam habeant, et abundantius habeant.* Jo. 10. 10. Undè definivit Trident. (*Sess. 5. in decr. de Pecc. Orig. can. 5.*) per Baptismum animas immaculatas reddi, et fomitem nihil nocere, imò prodesse ad majorem mercedem recipiendam non consentienti: *In renatis enim nihil odit Deus . . . innocentes, immaculati, puri ac Deo dilecti effecti sunt etc. Manere autem in baptizatis concupiscentiam, vel fomitem hæc Sancta Synodus fatetur et sentit: quæ cum ad agonem relicta sit, nocere non consentientibus non valet, quinimò, qui legitime certaverit, coronabitur.* Itaque ratio, quòd sunt Spiritus-Sancti organa, non efficit, ut corpus fidelis vivi vel defuncti sacrum habeatur; aliàs vivis, etiam sine pravo animo, maledicere, semper esset peccatum grave; et oppositum certum est, ut ipse Adversarius admittit. Undè ad aliam rationem (si fortè Adversarius eam reperiât)



confugere opus est, ut probet defunctorum corpora sacra esse. Nec valet dicere quòd maledicendo vivum potest præsindi, eum non considerando, ut Templum Spiritus-Sancti, sed mentem ad alia motiva peculiaria applicando, v. g. ad injurias quibus ab eo affectus est. Et ego subsumo: et cur hæc præcisio effici non potest etiam respectu defunctorum, iis maledicendo ratione habitâ alicujus molestiæ, quâ ab eo affectus sit, sed sine pravo animo? Præterquamquòd (ut scripsimus in primâ Epistolâ) plerumque hæc maledictiones potius in vivorum contumeliam, quàm in defunctorum effutuntur. Sed (dicit) hoc neutiquam effici potest, quia defunctorum corpora sunt sacra; sed hic redit quæstio, quia hoc est quod controversitur; nos enim dicimus nullum defunctorum corpus pro sacro habendum esse, nisi cùm Ecclesia Sanctum illud esse declarat, atque præcipit illud uti sacrum, venerandum esse, elevando venerationem ab ordine humano ad supernaturalem et Divinum, ut mox cum *S. Thomæ* auctoritate videbimus.

Sed replicabit Auctor, quòd juxta eundem *S. Thom. art. cit. ad 2.* Reliquiæ Sanctorum veneratione dignæ sunt, quia hujusmodi corporum animæ Deo actu fruuntur; et quòd propterea defunctorum corpora (ait), licet cultus Dulciæ venerari nequeant, non possunt tamen sperni, cùm sint sacra; piè enim credendum est eorum animas salvas esse. Igitur, respondeo, defunctorum corpora, cùm sint sacra, eis sacer cultus exhibendus est? Sed vellem scire quinam sacrorum cultum eis exhibendus sit? Adversarius fatetur non deberi cultum Dulciæ; sed ego nulum alium reperio qui ab Ecclesiâ aut à DD. assignetur, nec capere possum quòd alia cultus sacri species assignari possit, præter Latriæ, Hyperdulciæ, et Dulciæ. Sed (insurgit) ad quæm cultum reducitur altarium, vestium, et vasorum veneratio. Respondeo, quòd reducitur ad cultum Latriæ, nam hæc res per se nullum cultum merentur; dùm cùm execrantur, non amplius sacro cultu venerantur, sed *relative sive reductivè*; undè eorum cultus reducitur ad cultum Latriæ ratione sacrificii ad quod ordinantur. Ideoque dico quòd cùm Defunctorum corpora cultu

178 *Tract. 5. De secundo Præc. Decalogi.*

Latriæ, vel alio sacro venerari non possint, inter sacra numerari non debent. *P. Suar. (opusc. defens. ffd. Cath. adv. Ang. Sect. errores lib. 8 c. 5. n. 14. circa fin.)* loquendo de veneratione debitâ Sanctorum, et cæterorum defunctorum Reliquiis, dicit: *Imò insuper addo, hanc ipsam consuetudinem (nempe venerandi uti sacras Reliquias Sanctorum) ostendere, longè altiori modo Ecclesiam de Sanctorum Reliquiis sentire, quàm vulgarium hominum mortua corpora soleant reputari.* Occurrit mihi quod etiam S. Gregorius Nyssenus, loquendo de corporibus Sanctorum et cæterorum Fidelium vulgari morte defunctorum, dicit nullam paritatem esse inter honorem qui illis exhibendus est, et illum, qui aliis; nam subjungit quòd corpora aliorum defunctorum omnes horrent, et ab illis fugiunt; sed ad corpora Sanctorum quia sacra sunt quilibet se appropinquare optat, et tactu se credit sanctificari. Afferamus ejus verba, quæ de corpore Sancti Theodori affert (in *Orat. de S. Theod.*): *Corpus S. Theodori ad alia corpora quæ communi, et vulgari morte dissoluta sunt, nec comparandum quidem est... nam cæteræ quidem Reliquiæ abominabiles plerisque sunt, ac nemo lubenter sepulchrum præterit, aut si ex inopinato apertum offendit, prætercurrit. At si venerit in aliquem locum similem huic, ubi hodiè noster Conventus habetur, ubi memoria Justî, Sanctæque Reliquiæ sunt, primum quidem earum rerum quas videt magnificentia oblectatur... cupit deinceps ipsi Conditório appropinquare, Sanctificationem ac benedictionem contrectationem, ejus esse credens.* Hinc notandum quàm alia sit veneratio quam Ecclesia, et Fideles Sanctorum corporibus exhibent, et alia, quâ aliorum defunctorum corpora honorantur.

Quoad venerationem autem debitam corporibus quorum animæ Deo fruuntur; respondemus quòd ratio S. Thomæ non potest valere, nisi pro solis Sanctis ab Ecclesiâ declaratis, de quibus tantum Angelicus loquitur; Sanctus enim Thomas ex ratione quòd animæ Sanctorum Deo fruuntur, procedit ad demonstrandum quòd eorum corpora veneranda sunt. Ad percipiendum igitur quid Sanctus Doctor sentiat,

et quæ sit rei veritas, distinguendæ sunt duæ species cognitionis, quâ nos scimus, et credimus animam alicujus Deo frui; humana una, superhumana, et Divina altera ex Ecclesiæ declaratione. Nunc certum est venerationem illam corporibus Sanctorum, de quibus loquitur Sanctus Thomas, debitam non posse applicari nisi ad illa corpora, quorum animas beatas esse scimus cognitione revelatâ nobis per Ecclesiam, quæ elevat honorem qui eis debetur ex ordine humano ad superhumanum.

Hinc fit non sufficere nobis pro sacro habere aliquem Defunctum, etiam morali certitudine, ut debeat aut possit ejus corpus sacro cultu venerari, sed requiritur ut Ecclesia authenticè nos certos faciat certitudine ipsi divino lumine communicatâ, animam illius defuncti, jam cum Deo in cœlis regnare. Audiamus verba S. Thomæ *Quodlib. 9. art. 16.* Ibi ad objectionem quam præmittit quod non possint venerari Sancti, quia de ipsorum beatitudine moralis certitudo haberi non potest, Sanctus (*ad primum*) ita respondit: *Dicendum quod Pontifex, cujus est Sanctos canonizare, potest certificari de statu alicujus per inquisitionem vitæ, et attestationem miraculorum; et præcipuè (notæ) per instinctum Spiritûs Sancti, qui omnia scrutatur profunda Dei.* Itaque propter quamcumque moralem certitudinem, sed humanam, et naturalem, nos non debemus nec possumus pro sacris habere fidelium defunctorum corpora, nec eis exhibere cultum sacrum, nisi post eorum canonizationem; tunc enim Ecclesia ex illâ notitiâ supernaturali, quam ex Spiritûs-Sancti instinctu habet, sicut dicit Angelicus, transfert venerationem ergâ illud corpus ab ordine humano ad ordinem superhumanum, et Divinum. Idem apparet expressum in Decretis Urbanî VIII. spectantibus ad cultum servorum Dei, non adhuc canonizatorum aut beatificatorum (vide apud *Benedictum XIV. de Canoniz. SS. lib. 2. Cap. XI.*); in quibus præcipuè statutum fuit ut in scribendis vitis, aut gestis talium Dei servorum sequens protestatio Auctoris præmitteretur: *Profi-teor me haud alio sensu, quidquid in hoc libro refero, accipere, aut accipi ab ullo velle, quam quo*

*ea solent quæ humanâ dumtaxat auctoritate, non autem Divinâ Catholicæ Romanæ Ecclesiæ, aut Sanctæ Sedis Apostolicæ nituntur: notentur hæc verba, Quæ humanâ auctoritate, non Divinâ Ecclesiæ etc.* Itaque servorum Dei gesta aliam non habent fidem, et venerationem, quàm humanam; sed cùm eos Ecclesia Sanctos declarat, tunc veneratio ex humanâ ad Divinam extollitur propter Ecclesiæ Divinam auctoritatem. Hinc est quòd ut alicui defuncto cultus aliquis præstetur Sacer, qui superhumanus sit, necesse est, ut principium aliquod, et cognitio superhumana habeatur de sanctitate objecti, mediâ illustratione Divinâ nobis per Ecclesiam communicatâ. Et propterea cùm Sancti jam ab Ecclesiâ declarati sunt, sacra evadunt non tantùm eorum ossa, sed etiam vestes, litteræ, et cætera quibus iis usi sunt; et irreverentia gravis, et sacrilegium esset iis præcisâ necessitate ad profana uti. Quod quidem contra de rebus mortuorum non adhuc canonizatorum, licèt qualemcumque de eorum cœlesti beatitudine haberemus notitiam, id efficere vetitum non est.

Quamquam concedimus quòd cum veneratione possumus Reliquias alicujus defuncti cum sanctitatis opinione apud nos habere, eum invocare, effigiem depingendam curare, et alia id genus efficere, quia hæc cultûs sacri rationem non habent, sed sunt dumtaxat Religionis actus (non autem civiles), quì ut dicit *P. Joann. à S. Thomâ*, auctoritatem cujus mihi Adversarius objicit, et ut etiam docet Bellarminus (*Contr. 4. l. 1. C. 10. n. 4. et 7.*) et Bened. XIV. de Canon. SS. *l. 2. C. 7. et n. 4. et 7.* adhiberi possunt æquè ergà Defunctos, ac ergà vivos. Imò ex hoc infert Bellarminus licitos esse eos actus ergà defunctos adhibere, quia vivis licitè præstari possunt: *Si licet* (sic ille concludit) *honorare viventes, quos credimus Sanctos, cur non mortuos?* Et cùm nonnulli hanc Bellarmini doctrinam carpsissent, et nempè quòd venerari concedebat Sanctos non canonizatos, sic eam vindicavit dicendo, quòd ipse alium non concedebat non canonizatis cultum, nisi illum qui vivis exhiberi solebat, apud Bened. *loc. cit. cap. 9. n. 1.* Dixi actus Religionis, quia alius est actus Religio-

nis, alius est cultus sacer : deosculari manus servo Dei, se ejus precibus commendare, pedes ei lavare, et cætera, hi sunt quidem Religionis actus, quia à Religi ne manant; non sunt autem cultus sacri, cum erga res sacras non exerceantur. Et ita pariter mortuos in loco sacro sepelire, thure suffire, pedes deosculari, Reliquias eorum venerari, sunt quidem cæremoniæ sacræ ac Religionis actus, non sunt autem cultus sacer.

Profectò cæremoniæ sacræ dicuntur, et verè sunt, quia illæ seipsas respiciunt, quæ sacræ sunt prout ab Ecclesiâ præceptæ; sed cultus sacer dici nequeunt, quia cultus objectum erga quod adhibentur respicit; ideòque nunquàm dici potest cultus sacer cum objectum sacrum esse non constat. Præterea sunt utique actus Religionis; et hìc fatcor quòd in meâ primâ responsione (nescio quomodo) error excidit; nam cum dicere deberem thurificationes, et benedictiones, et alias cæremonias, quas erga defunctos adhibere solemus, non esse cultum sacrum, dixi non esse actus Religionis. Affirmo quidem, nee dubito quin Actus Religionis sint; sed non proinde sunt cultus sacri, et per consequens non est quòd propter præfatos actus, qui adhibentur erga defunctos, corpora eorum tanquàm sacra habenda sint, atque ideò possint ea cultu sacro venerari. Propterea Alexander III. *Cap. 1. de Reliq. et SS. venerat.* absolute prohibuit venerari pro Sancto aliquem nisi Ecclesiæ auctoritas accedat : *Cum etiam si per eum miracula fierent, non liceret vobis ipsum pro Sancto absque auctoritate Ecclesiæ Romanæ venerari.* Et quamvis olim pro Sanctis sinè Ecclesiæ declaratione, sed populorum consuetudine aliqui venerabantur; nihilominus respondet Bellarm. loco cit. (*cap. 8. in fin.*) quòd hoc ex tacitâ Papæ approbatione licebat : *Sicut consuetudines aliæ vim habent legis ex tacito consensu Principis; ita Sancti alicujus cultus ex consuetudine introductus, vim habet ex approbatione tacitâ, vel expressâ Pontificis.*

Repono igitur : Ego non dubito quin Ritus quos adhibet Ecclesia erga defunctos sint cæremoniæ sacræ, et Religionis actus, non autem cultus sacer; prout

reverà Rituale Romanum, loquendo de Exequiis ; Ritus qui adhibentur in sepelitione Mortuorum , non jam vocat cultum sacrum , sed tantum *Mysteria Religionis , et signa Christianæ pietatis* , sic dicens : *Sacras Cæremonias ac Ritus quibus Mater Ecclesia in filiorum suorum Exequiis uti solet , tamquàm vera Religionis Mysteria , Christianæque pietatis signa , et Fidelium mortuorum saluberrima suffragia , Parochi summo studio servare debent.* Addo duas alias animadversiones , ex quibus hoc fit clarius. Primò si talis cultus esset sacer , etiam esset cultus publicus , siquidem ille à publico ministro Ecclesiæ adhibetur ; et hoc certum est quod fieri non potest , dùm ipsa Ecclesia prohibet ne cultus publicus cuivis ab eâ pro Sancto aut Beato non declarato exhibeatur. Præterea , dicit S. Franciscus Salesius , quòd cultus sacer defunctis non præstatur nisi in protestationem eorum virtutis excellentis ; et cognitio hujus excellentiæ certa esse debet. Quomodo autem dici poterit quòd Ritus , qui ergà defunctos exercentur , sint cultus sacer , cùm de defunctis (communiter loquendo) non habetur hæc eorum excellentis virtutis cognitio ? Imò pro comperto habetur , quòd inter fideles defunctos non pauci sunt , qui æterno igne cremantur , et interim hi ritus indifferenter ergà omnes praticantur. Igitur dicendum est Ecclesiam tales ritus pro sacro cultu non habere.

Argumentum quoddam prævenio , quod mihi objici posset : si ergò conceditur quòd mortuos venerari sit actus Religionis , eis maledicere proculdubio erit Religioni actus oppositus. Respondetur prius per instantiam : si hoc argumentum valeret pro defunctis , valeret etiam pro vivis , nam venerari servos Dei viventes actibus superiùs descriptis , ut ostendimus , etiam est actus Religionis sive cultus Religiosus ; undè maledicere huic tali servo Dei , etiam præciso animo pravo , esset pariter grave sacrilegium ; sed nemo hoc dicit. Sed responsio directa affertur. Distinguendum atque videndum est ex quo motivo talis actus Religionis proveniat , si provenit ex motivo ipsius objecti , quia objectum sacrum est , contumelia in illud tunc est

peccatum Religioni adversans, et est sacrilegium; sed si actus honoris procedit à pietate religiosâ fidelis, tunc utique erit actus religiosus, quia à motivo religionis procedit; sed maledictio in objectum non erit actus contra religionem, quia non est actus, qui ad objectum sacrum refertur.

Adversarius in Dissertatione admiratur, et imprudentes (ne dicam temerarios) sincerâ fronte appellat eos, qui in Confessionario aut in Suggestu dicunt non esse ex se grave mortuis maledicere. Sed ego, et alii mecum admirantur eos qui sibi scrupulum non faciunt absolutè prædicare hanc maledictionem esse peccatum mortale, atque blasphemiam. Ad hoc ut dicatur quòd actio aliqua non sit peccatum grave, sufficit, ut vera probabilitas habeatur, quòd tale non sit, quemadmodum omnes fatentur, intelligo illam quæ fundamento non tenui innititur, sed tali, ut tuto (juxtà sententiam communem, sepositâ quæstione de probabiliori, et minus probabili) possit teneri, et doceri. Et parvi aut nihili faciunt ad nostram rem duæ illæ doctrinæ, quas mihi Adversarius opponit, S. Augustini unam: *Graviter peccaret in rebus ad salutem animæ pertinentibus, vel eo solo quòd certis incerta præponeret. Lib. 1. de Bapt. cap. 3. Et cap. 5. Si incertum est esse peccatum, quis dubitat certum esse peccatum?* Nam ibi S. Doctor loquitur de eo, qui operatur in dubio circa res ad salutis æternæ necessitatem spectantes, in quâ re quilibet tenetur certum sequi. Præterquamquòd ibi Sanctus sermonem habet de quodam Donatistâ, qui cùm certus esset in Catholicâ Ecclesiâ ritè, et rectè Baptismum conferri; contra dubius erat an rectè in suâ sectâ eum reciperet; integrum textum exhibebo: *Si dubium haberet non illic rectè accipi quod in Ecclesiâ Catholicâ rectè accipi certum haberet, graviter peccaret in rebus ad salutem animæ pertinentibus, vel eo solo quòd certis incerta præponeret.* Et deinde: *Accipere itaque in parte Donatî, si incertum est esse peccatum, quis dubitat certum esse peccatum non ibi potius accipere, ubi certum est non esse peccatum?* Quis dubitat quin iste Donatista certè peccaret? Sed non dicebat S.

Augustinus, quòd qui ex verâ et solidâ probabilitate operatur, cùm dubium non versatur circâ ea quæ ad salutis necessitatem pertinent, prout est Baptismus, et cùm actio non est certè illicita: lex enim dubia non imponit certam obligationem, juxtâ id quod docet Angelicus *Quodlib. 14. de verit. art. 3. Nullus ligatur per præceptum aliquod nisi mediante scientiâ illius præcepti.* Et idem probatur ex *Cap. Cum jure 31. de Offic. et Pot. Judicis deleg. Nisi de mandato certus extiteris, exequi non cogeris quod mandatur.* Idem in *Can. Sicut quædam, distinct. 13.* ubi S. Leo hæc scribit: *In his quæ vel dubia fuerint, vel obscura, id noverimus sequendum, quod nec præceptis Evangelicis contrarium, nec Decretis SS. Patrum inveniat adversum.* Hoc locum habet in quantum asseri potest, quòd aliqua actio non sit graviter illicita. Sed ut affirmetur absolutè aliquam actionem esse peccatum mortale, non sufficit opinio probabilis, nec etiam probabilior: nam probabilior non excludit rationabilem timorem errandi; undè non efficit quòd lex non remaneat dubia, et quòd opinio opposita non possit esse vera, si verè probabilis est: quapropter cùm agatur de Sacramentis, non est licitum sequi probabiliorem cùm opposita est probabilis, licèt minùs probabilis. Ad hoc igitur ut actio aliqua sit graviter illicita, requiritur certitudo, prout docent omnes cum S. Raymundo; qui (*lib. 3. de Pœnit. §. 21.*) scripsit: *Non sis nimis pronus judicare mortalia peccata, ubi tibi non constat per certam scripturam.* Itaque Sanctus monet ne judicetur aliqua actio esse peccatum mortale ubi non constat tale esse; et cùm dicat Sanctus *ubi non constat*, semper reprobare intelligit tamquàm excessum asserere aliquod esse peccatum grave, quoties de illius gravitate non constat. S. Antoninus pariter dixit (*P. 2. tit. 1. cap. 11. §. 28.*) Quòd sine periculo peccandi determinari non possit, aliquam actionem esse peccatum grave, nisi aperta scriptura, aut Ecclesiæ determinatio, aut ratio evidens non habeatur: *Quæstio in quâ agitur (sunt verba Sancti) de aliquo actu, utrum sit peccatum mortale vel non, nisi ad hoc habeatur auctoritas expressa Scripturæ*



aut Canonis Ecclesiæ, vel evidens ratio, periculosissimè determinatur. Quia (ut subjungit) qui determinat sine aliquo ex prædictis momentis, ædificat ad gehennam, conjicit animas in periculum damnationis. Hinc sapientissimè Bened. XIV. in suo opere de Synodo, in plerisque capitibus nihil aliud Episcopos monet, quàm ne unquàm peccati gravis eas damnent opiniones, quæ uti probabiles DD. utriusque partis defendunt.

Adversarius meus cæteroquin usquè eo progressus est, ut conclusionem Theologicam suam opinionem appellet. Ego nolo me ingerere ad decidendum, utrùm ejus opinio pondere, et quo pondere probabilitatis fulciatur, sed nescio an *Conclusio Theologica* dici possit, cùm nullus Scripturæ textus pro illâ habeatur, nec Ecclesiæ definitio extet, nec ratio evidens, nec DD. communis auctoritas, imò nec unius, qui juxtà ejus opinionem scripserit, reperiatur. Adducit ille textum S. Isidori Pelusiot. (lib. 5. Epistolarum, Epist. 491.) *Vivi incessunt etiam mortuos; et hostes fœdus ineunt! Cur igitur, et naturæ leges, et inimicitarum superas terminos, vitâ functo maledicens? Videris enim in cinerem ac favillam linguam acuere; sed primò violas sanctimoniam, cui omnes mortales studeant, oportet. Deindè immortalem habet animam, cujus vindex est oculus Dei pervigil.* Sed in libro, qui apud me est, typis edito Romæ, anno 1629. reperio non ità, sed aliis verbis textum præfatum esse conceptum (pag. 370.) sic enim ibi legitur: *Vivi solent calumniis incessi, cùm jam defunctis etiam hostes conciliantur, et fœdus ineunt. Cur igitur ipse, et naturæ, et inimicitarum terminos transgrederis, dùm vitâ jam functum calumniaris, et lacessis? nam putas quidem te solum adversùs cinerem, et pulverem linguam stringere, sed heus primum ipsum sacrosanctum sepulturæ jus violas, quod tamen nemo non ambit, et habere studet: deindè habet is animam immortalem, cujus oculus ille pervigil, et semper excubans vindex est.* Judicent nunc alii, si hæc auctoritas quid momenti opinioni conferat Adversarii mei, qui defunctorum fidelium corpora omnia tamquàm

sacra veneranda esse contendit. S. Isidorus sacrum appellat Jus sepulcri, non autem corpus defuncti, Sed præterea, Adversarius sibi assentatur omnia sibi favere, Scripturas, Ecclesiæ definitiones, DD. communem auctoritatem, et evidentes rationes, Scripturæ sunt: *Neque maledici regnum Dei possidebunt*, 1. Cor. 6. 10. (*Maledici explicat Calmet*, qui concivium in faciem proferunt, vel de absente obtrectant.) Ecclesiæ definitionem dicit esse disciplinam quâ ipsa utitur in sepeliendis fidelibus. Pro se etiam habet communem DD. auctoritatem, dicendo quod Moralistæ ideò de hâc sententiâ non disseruerunt, quia juxtâ eorum regulas apud ipsos pro certâ habita est. Tandem habet pro se rationes evidentes, quæ illæ utiquè sunt quas ipse in suâ Dissertatione exposuit. An hæc suadeant, nolo meo judicio quæstionem decidere, sed Sapientes omnem controversiam exhauriant.

Cæterum loquendo de meâ sententiâ, ut superioribus paginis retuli, præter tres Auctores ibi citatos, qui de hâc re scripserunt, curavi rem hanc à multis examinandam, et præsertim ab omnibus Congregationibus Missionariorum Civitatis Neapolis, in quibus, quia Missionariorum, Theologiam Moralem præcipuè, omnes profitentur, et ibi (ut omnibus compertum est) selectiores Cleri Neapolitani coadjuvantur viri. Hic Adversarius meus Socratis quemdam Textum in medio asserens, innuit quod non omnes eâ sunt solertiâ præditi, ut sint magistri idonei ad similes enucleandas quæstiones. Concedo quod non omnes sunt magistri; sed cum mihi præfatæ Congregationes totius corporis nomine responsum dedissent, supponendum est resolutiones non à minùs sapientibus, sed à sapientioribus datas fuisse. Præfata quæstio, ut jam priùs scripsi, fuit etiam Romæ ex mandato Benedicti XIV. discussa, et juxtâ mentem ipsius Pontificis, (quam cæteroquin nunquam animo intendi hanc fuisse definitionem ex Cathedrâ) quæstio resoluta fuit: quod peccati mortalis reatu careret. Sed ille scribit quod non tenetur fidem præstare, nec huic examini adhibito, nec resolutioni Romæ datæ. Nec eo unquam meus

appulit animus, ut cogerem eum ad id credendum : sed id ego scripsi, quia vehementia mihi adsunt momenta, ne in dubium id revocem ; dùm mihi testatus est tamquam testis ex propriâ scientiâ, et de visu (ille enim propriis oculis aspexit Pontificis schedulam) quidam Sacerdos, Religiosus, Doctus, et in hâc controversiâ minimè affectus ; propterea-que existimavi alios qui ad utramque sententiæ partem indifferentes sunt, prudenter et non abs ratione id credere etiam posse. Cæteroquin quantum ad me, tantò certius hoc mihi visum est, ut non dubitaverim hoc idem in eodem Opere Morali à me congesto, quod eidem Pontifici dedicavi, et præstandum curavi scribere, et rem uti mihi ille testatus fuit exponere. Quod reliquum est, si meus Adversarius bono fine deductus id scripsit, ego etiam pro certo habeo non inductum fuisse ad id scribendum aliquâ animi adhæsione, aut contendendi lubentiâ (esset quidem optimum, ut postquam ex sæculi laqueis me expedissem, ut in æternæ salutis tuto animam meam collocarem, id aggredi contenderem, quod ad damnationem meam obduceret, et cur ? ut inanem gloriam, meliùs dicam, ut perpetuum dedecus in defendendâ opinione falsâ aucuparer !) sed sine recto, et bono ; ut ex toto peccatis liberarem tam multos, qui habitum contraxerunt ad mortuis maledicendum, et qui non obstante, quòd credant (erroneè, meo iudicio) esse peccatum grave prout eis assertum erat, prosequerentur nihilominus ad eas maledictiones effutiendas. Quod autem meus Adversarius voluerit me appellare *obstinatum et falso zelo impulsum*, hoc omis- sum facio, sciens quoniam *qui iudicat me, Dominus est.* 1. Corinth. 4. 4.

*Ad hæc subjungo Epistolam responsivam ad me rescriptam à Reverendiss. Abbate D. Bartholomæo de Marco Basiliano, (cui hanc Epistolam meam perpendendam misi) viro quidem maximi pro ejus doctrinâ habito, tum apud ipsius Religionem, quæ præstantissimis muneribus eum decoravit, tum etiam quoquoersum Neapolî, et Romæ, etc. Magistro in Sacra Theologiâ, quam ipse per plures annos cum*

*omnium plausu docuit , et 30. aut 40. annos in excipiendis confessionibus exercitato. Ego animi pendebam , utrum huc afferre deberem nec ne sequentem illius Epistolam ; sed mihi consilium datum est , ut duobus ex motivis id efficerem , 1. ut omnibus notum fiat me , ut cautiùs agerem , et ne proprii sensus adhæsiōe deciperer , prout jam me deceptum autumat meus Adversarius , semper solitum fuisse aliorum Doctorum consilium exposcere : 2. ut patefaciam quam tūm de meâ , tām de oppositâ sententiâ , cæteri præstantes viri existimationem habeant. Epistola est sequens :*

*Reverendiss. Padre , Sig. è Padr. Col.*

**D**A molto tempo fa ebbi la consolazione di leggere la sua erudita Dissertazione sopra l'Imprecazione de' Morti , sostenendo che non sia colpa grave il maledirli , siccome tal' è il sentimento mio , e delle persone più saggie , colle quali su di ciò ne ho tenuto spesso discorso. Ora per sua bontà mi manda la Risposta fatta ad un suo Contraddittore , nella quale ho ammirata la sua dottrina , e aggiungendo ragioni a ragioni l'ha resa quasi dimostrativa , nè saprei con qual fondamento il suo Contraddittore difenda , che sia colpa grave , sembrandomi i motivi addotti da lui di niun momento , conforme li lessi in un libretto mandato dal medesimo alle stampe , e che V. S. Reverendiss. gli ha sodamente confutati , e presentemente li confuta. Certamente io non comprendo come possa esset peccato mortale il maledire i Morti. Lodo poi la sua moderatezza in chiamar probabile questa sentenza , che dice non esser colpa grave la bestemmia de' Morti ; dovea più tosto chiamarla moralmente certa , e per conseguenza l'opposta , che si difende dal suo Contraddittore , moralmente falsa , e di debole e tenue probabilità.

Io dunque non ho avuto nè che togliere , nè che aggiungere , nè che mutare della sua dottissima scrittura ; e prego il Signore , che illumini la

mente del suo Contraddittore , e di alcuni pochi Compagni , che fan pompa di trovar la colpa in ogni piccola azione. V. S. Reverendiss. intanto non si arretri di mandar alla luce l'accennata Apologetica Risposta , che ne sarà applaudita , come ne fu in tutte l'altre sue opere. Mi raccomando alla sue orazioni , e facendole riverenza con ogni rispetto le bacio le mani.

Di V. S. Reverendissima.

*Mater Domini* 14. Giugno 1758.

*Umiliss. Servitore obligat. e divotiss.*

Bartolommeo di Marco Abbate.

Subjungo hæc pauca. Præfatus Abbas Reverendissimus , ut scribit , videtur supponere à me opinionem meam dumtaxat uti probabilem haberi. Hoc à me dictum non est ; dixi tantum quòd ad hoc ut affirmari possit culpâ gravi actionem aliquam carere , sufficiens esse quòd probabile sit non esse gravem. Cæterum nolui judicium ferre , utrùm mea sententia sit nec ne moraliter certa , cùm hoc sapientium judicio committam ; sed cæteroquin ego illam plusquam probabilem esse duxi , et duco.

Nuper alia prodiit epistola Adversarii , cui respondere opus esse minimè censemus ; sufficiunt quæ jam respondimus. Si autem fortè putat Adversarius in controversiis , eos remanere victores , qui ultimo loco scribunt , hujusmodi victoriam valde libenter illi concedimus.

## CAPUT II.

## De Juramento.

*Quid est Juramentum, et quænam sint formulæ jurandi* 12. *Quotuplex est Juramentum* 13. *Conditiones juramenti liciti* 14. *An liceat jurare cum æquivocatione* 15. *et* 16. *Qui jurat sinè animo jurandi* 17. *Juramentum non obligat ad illicita* 18. *Quot modis tollitur obligatio Juramenti* 19. *De Adjuratione, et Exorcismis* 20.

12. — **J**URAMENTUM definitur : *Invocatio Nominis Divini in veritatis testimonium*. Jurat igitur qui dicit : *Per Deum ; per Sanctos ; per res sacras : per Creaturas*, in quibus modo speciali relucet Bonitas, aut Potentia Dei, nimirum *per Ecclesiam, Crucem, Sacramentum, Evangelium, Animam, Cælum, Terram, etc.* Sed Juramentum non facit qui jurat per conscientiam, per fidem suam (non intelligendo Fidem Divinam) aut qui dicit : *Vivit Deus ; Deus hoc videt : Est verum, tanquàm Evangelium*. Sed hoc de verbis illis *vivit Deus, Deus hoc videt*, intelligendum est, si verba tantum enunciativè proferantur, ut ajunt *Cajet. Ledesma* etc. apud *Salmant. Tract. 17. Cap. 2. num. 25.* Alioquin, si dicantur invocativè, sunt vera juramenta ; notantque ibi *Salmant.* cum *Azor. Facund. Soto, et Trullench.* Hujusmodi effata ex communi usu accipi ut invocativè dicta, ideoque vera juramenta censi. Si quis autem diceret : *Juro hoc ità esse*, non reputatur verum juramentum, nisi ille qui exposcit Juramentum, petit expressè jurari per Deum, per Evangelium, Sanctos, rem sacram aut per Animam ; et alter post hujusmodi exquisitionem sibi factam jurat ità esse.

13. — Jusjurandum quadruplex est : *Assertorium*, cùm asseritur aliquid : *Promissorium*, cùm aliquid juramento promittitur : *Execratorium*, sive *imprecatorium*, cùm v. g. dicitur : *Deus in me animadvertat, nisi hoc faciam* : *Comminatorium*, cùm v. g. dicitur : *Nisi mihi obedias, per Deum efficiam, ut te pœniteat ; dabis mihi pœnas, etc.* Hinc advertatur

quòd in juramento *Assertorio* graviter peccat, qui asserit falsum. Peccat etiam graviter, qui in *Promisso* jurat sinè animo standi promissis. Dico *sinè animo*; quia si habet animum servandi promissa, sed postea non servat, et res est parvi momenti; tunc valdè probabile est cum *Soto*, *Suarez*, *Azor*. *Sanch. Salm.* non peccare mortaliter (a); quia in juramento invocatur Deus, ut testis voluntatis præsentis, non autem futuræ executionis promissæ. Sed hic dubium fit: Certum est, quod si promissio est gravis materiæ, gravis etiam est culpa eam non implere propter juramentum emissum; cur autem ratione ejusdem juramenti non committatur gravis culpa, si non impleatur promissio materiæ levis, quandoquidem in perjurio parvitas materiæ non admittitur? Sed rectè respondetur à *Salm.* (b) cum *Soto*, *Suar. Castropal.* etc. quòd cum quis promissionem juramento firmatam non implet, non jam committit perjurium, sed peccat ob infidelitatem, quam ergà Deum operatur, despiciendo in materiâ gravi Divinam auctoritatem, quæ adducta est ad promissionem firmandam; at cum promissio est levis materiæ, non reputatur gravis defectio fidelitatis, et contemptus qui fit Divinæ auctoritatis. Id firmatur doctrinâ S. Thomæ, qui sic docet: *Qui aliquid promittit, si habet animum faciendi, non mentitur; si verò non faciat, tunc videtur infideliter agere* (c). Si quis autem juramento promitteret, sed sinè animo jurandi, aut se obligandi, graviter peccaret. Nihilominùs probabiliter non teneretur promissis, saltem non sub gravi; *Sanch. Castropal. Ronc. S. Anton. Salmant.* etc. (d) Juramentum verò *Execratorium* cum in eo non invocatus est Deus, probabile est non obligare sub gravi. Et idem dicendum de *Comminatorio*; Imò si pœna comminata fuerit injusta, juramentum nullo modo obligabit (e). Idedque juramenta Parentum puniendi filios, sæpè-sæpiùs non obligant; quia fiunt aut ob res inutiles, aut calore iracundiæ (f).

---

(a) *lib. 3. n. 172.* — (b) *Salm. tr. 17. c. 2. n. 53. et 54.* — (c) *S. Thom. 2. 2. q. 110. ad 5.* — (d) *n. 273. v. An autem.* — (e) *Lib. 3. n. 134. ad 6. et 143.* — (f) *Num. 186. et 187.*

14. — Juramentum ut sit licitum, tres requiruntur conditiones, nempe Judicium, Justitia, et Veritas. *Judicium* significat, ne ex vanitate juretur, sed ex rationabili causâ. Defectus autem judicii non excedit culpam venialem. *Justitia*, ut res jurata sit justa; quare graviter peccat qui jurat facere rem injustam, licet sit leviter injusta. *Veritas*, ut res, quæ juramento asseritur, sit moraliter certa, saltem aliquo modo (b).

15. — Hic quæritur, an liceat jurare cum *Æquivocatione*? Aliud est mendacium, aliud est *Æquivocum*. *Æquivocum* potest esse pluribus modis, aut cum sermo, aut verbum habet unum sensum litteralem, et alterum spirituales, aut mysticum. *Æquivocum* dicitur etiam Restrictio non purè mentalis, quia purè mentalis est omninò prohibita, uti habetur ex Propos. 26. damnata ab Innoc. XI in quâ generaliter dicebatur licere negare *se fecisse aliquid quod reverà fecit*, dummodò negans intrà se intelligat *aliquid aliud quod reverà non fecit*. *Purè mentalis*, est cum nullo modo Proximus potest animadvertere *æquivocum*. *Non purè mentalis* est cum ex circumstantiis potest Proximus arguere quòd tu loqueris, intelligens intus aliud, quàm propositio ex se significat: v. g. si aliquid sub sigillo scias, potest dicere: *Nescio*; nimirum nescio eo modo, quo possim illud detegere: prout dixit Jesus Christus, nescire tempus novissimi Judicii: *De die illâ nemo scit, neque Filius hominis. Matth. 24.* Intelligendo, quòd nesciebat, uti homo: aut ut melius dicunt *Gotti, Tourn. (c)*, quòd nesciebat, ut revelaret. Sic etiam sentit S. Thomas (d) inquit: *Dicitur nescire diem, quid non facit scire*. Id est, ac si dixisset, nescio ad manifestandum aliis. Et idem sentiunt S. Jo. Chrysost. S. August. S. Hieron. S. Ambros. S. Athanas. S. Basil. S. Hilar. etc. ut testatur *Suarez (e)*. Pariter illud Christi: *Non ascendo ad diem festum. Joan. 7.* Intelligendo manifestè, dum ipse jam occultè se contulit

(a) N. 186. et 187. — (b) Ex n. 145. ad 150. — (c) *Tourn. de Incarn. pag. 349. v. Quo autem* — (d) *S. Thom. 3. p. q. 10. a. 2. ad 1.* — (e) *Suarez tom. 3. in 3. p. q. 10. a. 2.*



tulit ad templum. Cùm ergò justa adest causa, benè possumus licitè respondere, imò jurare cum æquivocatione, sive restrictione non purè mentali, ut communiter dicunt *Soto, Gonet, Palud. Wigandt, Laym. Carden. Holzman. Salmant. Tournely, Croix, Viva etc. (a)*. Adde *Adrianum, Cajet. Riccard. Armil. Tabien. Sylvest. Soto, et Navarr. (b)*. Quia tunc non intenditur decipere Proximum (quod semper est illicitum), sed permittere, ut ipse decipiatur, cùm nec semper teneamur respondere ad mentem interrogantis. Nihilominus hoc non licet in judicio, quia quisquis à Judice interrogatur legitimè, tenetur veritatem dicere; quare qui jurat cum æquivocatione, peccat contrà justitiam legalem (c).

16. — Sed extrà judicium dicunt DD. multi, quod si quis jam confitetur peccatum uni Confessario, interrogatus postea ab alio potest dicere se illud peccatum non admisisse, intelligendo non admisisse, ità ut denuò teneatur illud confiteri. Advertatur tamen hic quòd quilibet tenetur patefacere peccandi consuetudinem, cùm interrogatur à Confessario, uti constat ex *Propos. 58. damnatà ab Innoc. XI*. Ità etiam si quis pauper habet unum panem, requisitus ad mutuandum panem, potest dicere se non habere (d); quia ex circumstantià paupertatis benè possunt alii arguere, quòd ille loquitur in alio sensu, nempe quòd non habeat tantum, ut possit alii dare. In his et similibus tutius erit respondere: *Utinam et haberem!* aut *Et quis hoc habet? Et ubi reperitur panis (e)?*

17. — Si quis jurat sinè animo jurandi, et sinè animo standi promissis, procul dubio peccat graviter. Si contrà jurat cum animo standi promissis, sed sinè animo jurandi, probabile est quòd tantum venialiter

---

(a) *Lib. 3. ex n. 151.* — (b) *Adrian. 4. Sent. qu. de Sig. Conf. Cajet. Opus. 16. Resp. q. 5. Ricard. in 4. Dist. 18. Armil. v. Juramentum n. 16. Tabien. v. Jurare §. 13. n. 14. Sylvest. v. Mendacium q. 6. §. 4. et v. Juramentum 3. qu. a. §. Licet, Soto de Just. l. 5. q. 6. a. 2. Navar. Man. c. 12. ex n. 8. et c. 18. n. 61. et c. 25. a. 94.* — (c) *Lib. 3. n. 155.* — (d) *Lib. 3. n. 163.* — (e) *N. 153. et seq.*

peccat, quia tunc nulla alia adest culpa, quam in vanum Deum nominare. Et idem est, si jurat sine animo se obligandi, quia talis promissio non est verum juramentum promissorium, nec vera promissio, sed potius jurat se nunc habere voluntatem dandi. Si autem jurat sine animo adimplendi, sed vero animo jurandi, tunc peccat graviter, et tenetur ad promissa, licet non habuisset animum se obligandi, quia tunc obligatio oritur ex ipso juramento, quod ob divini Nominis reverentiam obligat ad verificandum quod juratur, modò ille sciat obligationem juramenti, quod reverà non obligat præter intentionem jurantis, ut dicit *S. Thomas* (a).

18. — Juramentum nunquam potest obligare ad faciendum illicitum; et ita nec ad adimplendum inutile, aut quod impedit majus bonum, ut si res esset contrà consilia Evangelica. Advertendum tamen, quòd cum juramentum est factum in favorem tertii, tunc adimplendum est semper ac potest sine peccato. Hinc qui jurat solvere usuras, aut dare bona sua latroni, tenetur ea præstare, licet postea possit compensationem facere (b). Et est probabile etiam cum *Sanch.* et *La-Croix*, quòd tunc potest jurare se daturum fore, subaudita conditione, nisi obtineat à Prælato relaxationem juramenti; itaque eam obtentâ, non amplius tenetur (c). Quòd si promissio irrita facta fuisset à jure ob bonum commune, ut esset promissio facta Concubinæ à Clerico, aut renuntiatio Fori Ecclesiastici, aut juramentum timore extortum pro Religiosâ Professione, aut pro Matrimonio, aut Sponsalibus; tunc planè juramentum est nullum (d). Cæterum omne juramentum intelligitur factum sub sequentibus conditionibus: 1. Si ille, cui promissio facta est, eam acceptet, aut non eam remittat. 2. Nisi status rerum notabiliter mutetur; aut nisi adsit aliqua circumstantia, quæ si prævisa fuisset, juramentum præstitum non esset. 3. Si non cessat causa finalis, ob quam promissio facta est. 4. Si altera pars observat, quod pollicita

---

(a) *Vid. Lib. 5. n. 172. v. Quæritur.* — (b) *N. 174.* — (c) *N. 172. in fin.* — (d) *N. 177.*

est. 5. Nisi superiores prohibeant, quominus promissio executioni detur (a). 6. Si Promissio adimpleri potest sinè gravi damno (b). Hinc si promittis secretum, non teneris ad illud non aperiendum cum gravi tuo damno. Si autem promitteres secretum servare etiam cum periculo vitæ, probabile est, te non teneri (c). Item etiam si promittis te secretum non proditurum in medendo morbis, non teneris illud celare, cum ceteroquin aliquis esset in gravi periculo mortis (d).

19. — Quomodo tollitur obligatio juramenti? 1. *irritatione*, quæ potest fieri à quolibet, cui est potestas dominativa, ut est Pater, Prælatus, Abbatissa, Tutor, etc. Et hoc etiam licet sit in præjudicium tertii, in illis contractibus, quæ ab ipsis superioribus irrita fieri possunt (e). 2. *Dispensatione* aut *Commutatione*, quæ potest concedi ab illis, in quibus residet talis potestas dispensandi aut commutandi vota (f). 3. *Relaxatione*, quæ potest fieri à Prælati Ecclesiasticis cum suis subditis, et etiam à Delegatis, qui possunt dispensare vota (g). Hic notetur 1. quòd jusjurandum datum in tertii beneficium potest relaxari ab eodem tertio, ut docet S. Thomas (h); cum communi. Et hoc (ut dicunt multi DD.) etiamsi jusjurandum sit exhibitum in honorem Dei, cum tota promissio vergitur in tertii utilitatem, v. g. Monasterii, Ecclesiæ, aut Pauperis (i). Notetur 2. quòd ad Irritationem nulla requiritur causa, benè verò pro Dispensatione, Commutatione, et Relaxatione (k). Notetur 3. quòd cum promissio jurejurando firmata est, et à tertio acceptata est, non potest ab alio relaxari, nisi ab eodem tertio, cum intercedit contractus. Undè fit, quòd jusjurandum, sive Votum Perseverantiæ, quod præstat in aliquibus Congregationibus, ut in Venerabili Congregatione Patrum Missionis S. Vincentii à Paulâ, in nostrâ minimâ SS. Redemptoris, non potest ab aliis relaxari, nisi à Papâ, aut Superiore majore Congregationis; tale enim jusjurandum (sive votum)

(a) Num. 180. 187. et 188. — (b) N. 183. — (c) Lib. 3. n. 971. — (d) N. 183. v. Juramentum. — (e) N. 189. — (f) N. 190. — (g) N. 192. — (h) 2. 2. q. 89. a. 9. ad 2. — (i) N. 193. — (k) N. 199.

assumit naturam contractûs , qui intercedit inter subjectum , et Congregationem ; dum Congregatio se obligat ad sustentandum , et ad instruendum illum , et contrâ subjectum se obligat ad inserviendum Congregationi ; et itâ declaravit N. SS. Pontifex Benedictus XIV. in Bullâ *Convocatis* §. 32. sub die 35. Novembris 1748. et idem confirmavit in aliâ Bullâ *Inter præteritos* , §. 5. n. 66. die 3. Decembris 1749. (a). Deniquè notetur quòd promissio jurata , etiamsi sit acceptata à tertio , potest relaxari à Superiore , cùm illa esset in præjudicium sui juris , aut in damnum commune , aut cùm jusjurandum timore extortum esset (b).

20. — Hic etiam Theologi loquuntur de *Adjuratione* , quæ fit , cùm aliquibus adjuratur sive obsecratur Dei Nomine , ut respondeat ; aut ejus Nomine imperatur , ut fit in Exorcismis cum Energumenis , sive à Dæmone vexatis , qui exorcismi benè possunt in privato fieri à quolibet , sed solemniter dumtaxat ab Ecclesiæ Ministris ex licentiâ Ordinarii. Et qui unquàm tali fungitur officio , caveat ne exquirat vana et curiosa , sed utatur præfatis Exorcismis tantum ad evitanda damna , et ad liberandum Energumenum à Dæmonis vexatione (c).

---

(a) *Vide lib. 3. n. 255. v. Notandum.* — (b) *Lib. 3. n. 192.*  
— (c) *Lib. 3. post n. 192.*

## CAPUT III.

## De Voto.

*De animo se obligandi 21. 22. et 23. De materiâ Possibili, et Meliori 24. De voto emisso ob pravam finem 25. De voto non impetrandi dispensationem 26. Nubendi 27. De non vovendo 28. Nonnulla digna notatu 29. De voto conditionato 30. De voto disjunctivo ; et de eo qui immemor voti satisfacit 31. Si tempus elabatur 32. De culpâ in differendo 33. De voto Religionis 34. De materiæ Mutatione 35. De Irritatione 36. et 37. De Commutatione 38. De Dispensatione, et ejus causis 39 et 40. Si votum fuerit emissum in tertii utilitatem 41. Quinam dispensare possunt 42. ad 44. De votis reservatis 45. ad 49. An Papa possit dispensare in votis solemnibus 50.*

21. — **V**OTUM definitur : *Promissio facta Deo deliberata de bono possibili, et meliori.* Explicatur Definitio. Dicitur 1. *Promissio* : intelligitur promissio facta cum animo se obligandi, et quidem obligatione gravi, ad differentiam meri Propositi, quod ex se loquendo ne obligat quidem sub levi. Quare votum emissum sinè animo promittendi, nec se obligandi est omninò nullum. Contra tenetur quidem ad votum qui vult promittere et se obligare, licèt nolit illud adimplere, aut vult promittere et satisfacere, conscius voti obligationis quamvis reflexè ad eam non advertat : nam qui vult antecedens, vult etiam consequens (a). Si quis autem vellet promittere, et non se obligare, dicimus istum peccare, sed juxtà probabiliorem non teneretur ad votum, licèt conscius esset voti obligationis, quia cùm debitum oritur à propriâ voluntate, nemo ligatur, nisi habeat voluntatem se ligandi. Et tale peccatum (subjungimus) regulariter loquendo non esset nisi veniale ; nisi hoc contingeret in profitendo Religionem, aut susceptione Ordinum Sacrorum : nam tunc utique esset mor-

---

(a) *Lib. 3. n. 201.*

tale; *Less. Sanch. Suar. Salm.* etc. (a). Imò si quis ordinaretur sinè animo se obligandi ad castitatem, iste remaneret ad illam obligatus, saltem ex præcepto Ecclesiæ (b). In dubio enim de voluntate se obligandi præsumitur ordinariè illam adfuisse in quolibet voto quod emittitur. Et idem procedit si dubitatur an advertit ad obligationem voti, ex regulâ generali quòd *quilibet actus præsumitur ritè factus*. In dubio verò, an promissio fuerit votum, an propositum, dicimus quòd tunc præsumitur fuisse votum, quandò ille recordatur credidisse se peccaturum, nisi adimpleret quod promisit (c).

22. — Dicitur 2. *Deliberata*, dùm ad voti obligationem primò requiritur perfectus usus rationis. Quare votum Pueri, si illud fuerit emissum ante septennium, non obligat, nisi constet de usu rationis: sed si emissum fuit post septennium, in dubio obligat, quia tunc benè præsumitur adfuisse perfectus usus rationis, juxtà id quod communiter contingit. Et idem dicendum in dubio, an votum fuerit emissum antè, an verò post septennium, ex regulâ mox traditâ, *quòd omnis actus præsumitur ritè factus* (d).

23. — Item requiritur plena et libera deliberatio, quâ velit se obligare voto; idèdque votum emissum ex metu injustè ab aliis incusso ad votum extorquendum, illud est nullum: et non solùm si votum est solemne (quod certum est), sed etiam si est simplex, juxtà probabiliorè (e). Ità etiam nullum est votum, si emissum est ex errore (licèt supino) cùm error fuit circà substantiam, aut circà aliquam circumstantiam substantialem. Imò probabiliter dicunt *Suar.* et *Sanch.* cum *S. Thomâ* (f), quòd quilibet error circà circumstantias accidentales liberat à voto, semper ac votum emissum non esset, si à principio cognitus esset error: *Id liberare* (sunt verba Angelici) *à voti vel juramenti obligatione, quod si à principio notum fuisset, ea fieri impediret* (g).

(a) *N. 202. Qu. II.* — (b) *Lib. 6. n. 809. Dub. 2.* — (c) *Lib. 3. n. 201. Quæst. III.* — (d) *N. 196.* — (e) *Lib. 3. num. 197.* — (f) *In 4. D. 38. q. 1. a. 3. q. 1. ad 1.* — (g) *N. 198. et 226.*

24. — Dicitur 3. de bono *Possibili*, et *Meliori*: Dicitur *Possibili*, quia aliàs non tenet votum. Si autem esset possibile tantum in parte, et materia esset divisibilis, esset validum tantum quoad partem possibilem. Et ita etiam deberet adimpleri principale votum, si accessorium non potest satisfieri; sed contra si principale non est possibile, non est obligatio adimplendi accessorium (a). Item dicitur de bono *Meliori*, dum etiam nullum est votum, cum materia est de bono inferiori, aut indifferenti; nisi accideret quod ex circumstantiis redderetur melius (b).

25. — Quæritur hic 1. An sit irritum votum ob malum finem emissum? Distinguatur: Si finis est pravus ex parte voventis, v. gr. si quis voveret jejunare, ut ex ipso actu voti humanam laudem assequeretur, tunc est validum. Nullum verò erit, si finis est pravus ex parte *rei votæ*, ut si quis promitteret jejunium, ut laudaretur in jejunando, aut ut jejunando expensis parceret. Si autem iste voveret, ut à Deo aliquid temporale obtineret, aut si finis est positus sub conditione, (v. gr. si occideret Inimicum) votum est certè validum (c). Item notetur, quod si quis voveret peccatum licet venialiter, graviter peccaret; quia vellet ut in Dei honorem converteretur quod est illi contumeliæ (d). Et idem dicunt de jurejurando aliquod peccatum committendi; ita *Marchant. Turrian.* et *Elbel* (e); licet persæpè ignorantia excuset Rusticos.

26. — Quæritur 2. An valeat votum non impetrandi Dispensationem? Respondetur affirmativè, dummodò non observetur quod Dispensatio sit utilior profectui spirituali voventis (f).

27. — An valeat votum uxorem ducendi? Ordinariè non valet, licet votum esset ducendi Mulierem pauperem, vel Meretricem, nisi matrimonium iniretur ad tollendum scandalum, aut ut occurratur honori ablato; aut esto quod Homo vellet ducere uxorem, aut nollet adhibere alia remedia,

---

(a) N. 201. — (b) N. 204. — (c) N. 206. — (d) *Lib. 3. n. 205.* — (e) N. 146. v. 5. *Venialiter.* — (f) N. 208.

ut continens fiat, postquàm expertus fuerit suam incontinentiam (a).

28. — Quæritur 4. An valeat votum non ampliùs vovendi? Valet, si quis est nimis pronus ad vovendum cum periculo vota postea non observandi. Undè si postea ipse emittit aliquod votum, peccat, sed votum postea emissum remanet firmum; modò intentionem non habuerit, ut omnia futura vota sint invalida, et hanc intentionem non revocaverit, prout revocata judicaretur, si ipse memor primi voti emisserit secundum (b). Si quis autem emisserit plura vota impossibilia, teneretur ad dignius; et si essent æqualia, ad antèrius juxtà communiorem (c).

29. — Devenièdo ad voti obligationem, plura advertenda sunt, et I. Si materia est gravis, votum obligat sub gravi; sed si quis vellet ad illud se obligare sub levi, probabiliùs est remanere obligatum sub levi (d). Si verò materia est levis, nemo, licèt velit, se potest obligare ad illam voto sub gravi. Quòd si quis voveret quolibet die unius anni aliquod leve opus ponere, eo casu, cùm votum est emissum *per modum unius, ad sollicitandam obligationem* (ut existimatur regulariter in votis realibus), tunc omittendo opus pro tempore, aut in materiâ notabili, graviter peccarèt. Contrà si votum sit emissum *in honorem diei ad finiendam obligationem* (prout existimantur vota personalia, v g. recitandi *Salutationem Angelicam* quotidie), tunc omissiones sunt tantùm venialia (e). II. Hæres ex justitiâ satisfacere tenetur omnibus votis realibus sui Testatoris; et hæc sunt solvenda priùs quàm Legata, sed post debita justitiæ (f). III. Licitum est Patrifamilias emitte re vota realia, licèt aliquâ ex parte (moderatè tamen) læderetur legitima filiorum. Hoc tamen nequit facere in morte, quia tunc debet disponere de bonis juxtà legum dispositiones (g). IV. Non potest Pater obligare filios ad vota emissa eorum nomine. Neque Communitas potest obligare subjectos futuros (h). V. Vota per-

---

(a) N. 209. — (b) N. 209. v. *Quær.* — (c) *Ib.* v. *Notandum.*  
 — (d) N. 213. — (e) N. 212. — (f) *Num.* 214. — (g) *Num.* 215.  
 — (h) N. 216.



sonalia debent satisfieri ab ipsomet qui ea emisit; sed realia possunt satisfieri etiam ab aliis (a).

30. — VI. Circà conditiones votorum, advertendum, quòd si sola conditio est turpis aut impossibilis, votum non tenet (b). Si filius voveret, v.g. jejunare, sub conditione consensùs Patris; ille non peccat, si exorat eum ne consentiat. Peccaret contrà, si dolo obtineret ejus dissensum: sed tunc probabiliùs liber remaneret à voto, quia jam non adimpleretur conditio apposita (c). VII. Qui vovet castitatem sub hâc conditione, v.g. si Deus per annum se liberat à culpâ gravi, et interim labitur: Si scienter labitur, ut liberetur à voto, peccat iste etiam contrà votum: secùs si peccat ex fragilitate (d). VIII. Qui vovet, si ludat, se aliquam pœnam subiturum, sufficit, ut primâ vice se illi subjiciat; sed si voveat non ludere sub tali pœnâ, tunc quoties ludit, toties dabit pœnam; excipe tamen si ludendo penitùs sit immemor voti (e).

31. — IX. Qui facit votum Disjunctivum, et postea eligit satisfactionem alterutrius partis, ad illam tenetur, licet post electionem altera pars redderetur impossibilis. Secùs si altera pars redderetur impossibilis antè electionem; nam tunc ad nihil tenetur, dummodò illi mora non eligendi non fuisset culpabilis. Factâ nihilominùs electione, probabile est quòd semper possit eligere partem quam malit (f). X. Qui vovet audire Missam quotidie, probabiliter die festivo non tenetur audire duas. Qui vovet recitare Rosarium, sufficit ut recitet tertiam partem; et utique satisfacit si cum socio recitet. Qui vovet jejunare quolibet Sabbato, probabiliter non tenetur si eo die accadat Natalis Domini; modo expressè hoc etiam non promiserit (g). XI. Si quis satisfacit operibus voti, quin voti recorderetur, non tenetur ad aliud; quia quilibet habet voluntatem generalem, priùs satisfaciendi operibus debitis, et postea illis ex devotione: ita communissimè *Lessius*, *Sanch.* *Laym.* etc. (h). Et generaliter loquendo qui

---

(a) *N.* 217. — (b) *Ibid.* n. 219. — (c) *Lib.* 3. n. 218. — (d) *Ib.* — (e) *N.* 223. — (f) *N.* 224. — (g) *N.* 224. et 226. — h *Lib.* 3. n. 224. *in fin.*

habet rationes probabiles satisfecisse voto, non tenetur ad aliud, ut dicunt *Lugo, Laym. Ronc. Bossius, Viva, et Salm. Carden. Bardi*, etc. (a). Sed dices: Ille est certè ligatus voto, et dubiè solutus. At hic distinguendum dubium facti à dubio juris. Si quis emisit votum, et deinde dubitat, an facto illud impleverit, tenetur equidem implere; sicut certus de debito, et dubius de solutione, tenetur solvere, quia dubia solutio non æquivalet debito certè contracto. Sed hic sermo est de jure circa factum, nam sicut constat votum fuisse emissum, sic etiam constat jam impletum fuisse opus promissum. Restat igitur dubium juris, an opere impleto de facto, et exstante probabili satisfactione de jure, adsit obligatio satisfaciendi voto? et hic dicimus, quòd factà probabili satisfactione, obligatio juris evasit dubia, et consequenter dubia etiam possessio illius; obligatio autem dubia, quæ adhuc dubiè possidet, nequit inducere onus præstandi rem certam.

32. — Quæritur 1. Si quis vovens jejunare in aliquo die determinato, transacto eo die, an postea teneatur ad votum? Non tenetur si dies est appositus *ad finiendam obligationem*, quod præsumitur ità esse in votis personalibus, ut suprà dictum est. Aliter dicendum si dies est appositus *ad sollicitandam obligationem*, ut præsumitur in votis realibus(b).

33. — Quæritur 2. Quanta temporis dilatio requiritur, ut differens voti satisfactionem, peccet lethaliter? Si votum est perpetuum, ut est votum Religionis, peccat graviter (ut dicunt DD.) si differt sine causâ ultrà sex menses; nam si adolescentulus est, potest ex aliquâ justâ causâ licitè differre etiam ad tres, aut quatuor menses. Si verò votum sit ad tempus, ut sunt vota Peregrinationis, Rosariorum, etc. dicunt *Castrop. Salm. Trull. Garzia, et Croix*, peccare graviter, si differt ad duos, aut tres annos (c). Votum indeterminatum (v. g. quotidie recitandi Rosarium) intelligitur etiam perpetuum (d). In dubio autem an votum fuerit ad annum, an ad men-

(a) *Ibid. et l. 1. n. 76.* — (b) *Lib. 3. n. 220.* — (c) *L. 3. n. 221.*  
— (d) *Ibid. v. Votum.*

sem, sufficit satisfacere minus ut ex *Cap. Ex parte de Censibus* (a).

34. — Quæritur 3. Ad quid tenetur qui vovet Religionem? Si simpliciter vovit Religionem, tenetur eam ingredi; et ad permanendum etiam in eâ; aliter si egrediatur sine justâ causâ, graviter peccaret: nisi intellexisset tantum de eâ periculum facere. Ceterum esset justa causa egrediendi, si ibi inveniret talem vivendi modum, cui suæ vires pares non essent; aut ibi gravem, et longum mœrorem experiretur. Si verò etiam vovisset profiteri, tenetur etiam cum gravi suo incommodo id exequi; modo status Religionis illi penitus intolerabilis non succedat. Advertatur etiam hîc, quòd qui vovisset Religionem, si admissus non fuerit in Monasteria Provincie, non tenetur extrâ eam proficisci. Et si est mulier non tenetur egredi Patriâ, si in eâ adsint Monialium Monasteria (b).

35. — Voti obligatio primò tollitur ex se. ob *materiæ mutationem*, prout si evenerit aliqua nova, aut non prævisa circumstantia, quæ si præcognita fuisset, votum non fuisset emissum, (vide n. 23.); aut si materia redderetur inutilis, aut impossibilis. Quòd si votum potest adimpleri ex parte, et commodè, debet illi satisfieri (c). Secundo tollitur *Superiorum auctoritate*, Irritatione nimirum, commutatione, aut Dispensatione.

36. — *Irritatio* potest fieri ab omnibus qui habent potestatem dominativam, ut sunt Parentes, Tutores, Prælati, Mariti, et alii, ut dictum est n. 19. Et hoc etiamsi vota essent futura, nempe nondum emissâ à filio, pupillo etc. et licet non adesset causa sufficiens irritationis, saltem talis irritatio sine causâ non est culpa gravis (d). Itaque Pater, et Avus paternus in Patris deficientiâ, et etiam Mater (modò non contradicat Pater) possunt irritare omnia vota, tam Impuberum (etiam in dubio an votum sit emissum antè vel post pubertatem), quàm Puberum,

(a) *Ibid.* — (b) *Vide l. 4. ex n. 72.* — (c) *Lib. 3. n. 225.* — (d) *Ibid. n. 228.*

cùm votum est reale, et si Puber sit in ætate minori, modo tunc ætatis non habeat bona propria; quòd si votum esset personale, etiam possunt illud irritare, cùm illud esset in præjudicium domesticæ gubernationis. Idem dicitur de Tutore, et Curatore (a). Notandum quòd quando votum est emissum tempore impubertatis, potest Pater illud irritare, licèt filius sit factus puber, modò filius non ratificaverit, sciens votum fuisse infirmum (b). Imò Prælati Religionum etiam si locales, dummodò à Prælato superiore approbatum non fuerit votum; possunt irritare omnia vota (præter votum transeundi ad Religionem strictiorem) suorum subditorum professorum; vota enim Novitiorum possunt solummodò suspendi. Hoc etiam conceditur Abbatissis (sed non dispensatio) à multis DD. uti sunt *Suar. Banac. Filliuc. Salm.* etc. (c). Advertendum tamen quòd vota emissa antè Professionem, omnia per illam extinguuntur (d). Item Viri possunt irritare omnia vota uxorum, licèt incommodo non essent familiæ, aut Matrimonio, ut valdè probabiliter dicunt *Sotus, Sanch. Prado, Salm.* etc. Et etiam vota exequenda post mortem Virorum, v. g. Religionis, aut Castitatis, ut dicunt *Sanch. Soto, Salm.* contra *Nav. et Cajet.* (e). Vota tamen facta antè Matrimonium, non possunt irritari à Viro, sed tantum suspendi in quantum illi essent incommodo (f). Vota autem Virorum non possunt irritari ab uxoribus, nisi in quantum illi afferrent nocumentum, ut esset votum longæ peregrinationis, et etiam votum non petendi debitum, quod ceteroquin respectu Viri est irritum ex se, uti de materiâ ineptâ (g).

37. — Notandum hic 1. quòd vota subditorum probabilius cum *S. Thomâ* non sunt irrita ex se, sed valida, donec fiant irrita à Superioribus; quia subditi, licèt debeant habere voluntatem Superioribus subjectam, non tamen sunt illâ privati (h).

---

(a) *Lib. 3. n. 220. et 230.* — (b) *Lib. 3. n. 238.* — (c) *Ibid. n. 233. et lib. 4. n. 54.* — (d) *Ibid. n. 237.* — (e) *N. 234.* — (f) *N. 237.* — (g) *N. 135.* — (h) *Lib. 3. n. 231.*

Notandum 2. Superiorem (ut Pater, Prælat, aut Maritus) posse validè irritare vota Subditi, licèt aliquandò ea approbassent; etenim ille non potest, licèt vellet, à se abdicare potestatem quam sibi concedit lex etiam naturalis. Dictum est *validè*, quia irritando illa sine causâ justâ, non excusaretur saltem à culpâ veniali; sed non peccaret graviter: uti dicunt *Soto, Suar. Bonac. Valent. Sporer, Peyrin.* et alii (a).

38. — *Commutatio* autem votorum potest fieri Ecclesiæ autoritate, saltem cùm *Commutatio* fit in opus aliquantò minus, aut dubiè æquale; quia si esset evidenter æquale, dicunt plures AA. ut *Less., Bonacina, Sa, Salm.* etc. probabile esse, quod possit fieri *commutatio* ab eâdem personâ, quæ votum emisit. Sed multò magis mihi arridet opposita sententia negativa, quam tenent *Cajetan. Sanch. Soto, Suarez, Azorius, Laym.* et alii cum *S. Thomâ*, qui ait: *Quia Commutatio est quidam contractus, qui perfici nequit absquè consensu ejus, qui vicem Dei gerit in terris, scilicèt Prælati.* Præterea, quia, posita promissione, magis gratum censetur esse Deo, ut vovens fidelis sit ei præstando rem promissam, quàm aliam æqualem. Contrà verò communiter admittunt DD. licèt posse fieri *Commutationem* ab eâdem personâ, si fiat in melius, quia minus in meliori continetur (b). Et notandum hic 1. quòd si *Commutatio* fiat in opus melius, non requiritur causa, secùs verò si in æquale. Ceterùm pro justâ causâ, sufficet minoratio periculi transgressionis, et etiam sufficet major propensio subjecti; et opus si est dubiè æquale, sufficet notabilis molestia in eo adimplendo. Si autem opus commutatur in minus, est probabile cum *Sanch. Tamb. Candido,* etc. quòd validè, et licèt adimpletur minus, si postea suppletur per aliud opus adjunctum (c). Notandum 2. quòd qui habet facultatem commutandi vota, non potest commutare, nisi in æquale, ita ut non appareat excessus notabilis et manifestus, juxtâ communem

---

(a) *N.* 239. — (h) *N.* 244. — (c) *Ibid. n.* 244. et 245.

sententiam (a). Probabilius est vota realia posse commutari in personalia, et personalia in realia, ut dicunt *Suar. Less. Laym. Castropal. Salm.* etc. (b). Notandum 3. quod, factâ Commutatione voti, semper licet reassumere primum opus, licet commutatio sit facta in melius, dummodo secundum votum non acceptetur tanquam novum, ut rectè dicunt *Castrop. Prado.* etc. (c). Sed si unquam opus commutatum redderetur impossibile, quæritur an debeat reassumi primum votum? Affirmandum, si Commutatio fuerit factâ propriâ electione; secus si autoritate Ecclesiæ: Et id etiam si opus evasis impossibile propriâ culpâ (d). Notandum 4. quod qui habet facultatem commutandi pro aliis (idem dicendum de dispensatione) habet etiam pro seipso, ut docent *Suar. Azor. Sanch. Salmant. Prado,* et alii ex *S. Thomâ*, qui (e) expressè docet Prælatus posse secum dispensare in voto emisso (f).

39. — Pro *Dispensatione* requiritur major causa quam pro Commutatione. Causæ sufficientes Dispensationis sunt 1. Bonum Communitatis, aut Ecclesiæ, aut Familiæ, aut ipsius subjecti, Exemp. gr. si dispensatio judicaretur esse illi majori profectui, ut habetur ex *Cap. Magnæ, de Voto*; aut si ille esset in periculo gravi votum transgrediendi, aut si scrupulis vexaretur. 2. Difficultas notabilis pro adimplendo voto. 3. Imperfecta libertas et deliberatio, v. g. si quis vovisset cum erat impuber, aut impulsu iracundiæ, aut timore intrinseco incussus, puta incendii, naufragii, etc. aut timore extrinseco, sed levi. 4. Si cessat causa impulsiva voti (g).

40. — Notandum 1. quod si reverà adfuit causa justa, sed Prælatus dispensavit malâ fide credendo eam injustam, dispensatio probabiliter est valida, etiamsi concessa sit à Delegato, ut dicunt *Suâr. Pontius, Sanch.* etc. (h). Contrà si Prælatus dispensavit bonâ fide, sed causa certè non erat sufficiens, Dispensatio est nulla juxtâ veriore sententiam;

(a) *N. 247.* — (b) *Ib. Not.* — (c) *Lib. 3. n. 248.* — (d) *N. 249.*  
 — (e) *2. 2. q. 285. a. 8.* — (f) *Cit. n. 249. circa finem.* — (g) *N. 252. et 253.* — (h) *Lib. 1. n. 181.*

observa quod dictum est *Tract. II. n. 53*. Dictum est certè, nam in dubio possessio stat pro valore Dispensationis (a). Si autem causa non esset sufficiens pro Dispensatione, potest illa concedi, adjunctâ aliquâ commutatione (b).

41. — Notandum 2. quòd si votum fuerit emissum in tertii utilitatem, et iste tertius est determinatus, nempè talis pauper, talis Ecclesia, votum non potest dispensari, quoties à paupere, aut à Rectore illius Ecclesiæ acceptatum est. Sed si votum emissum est pro paupere indeterminato, potest dispensari, licèt ab aliquo paupere jam acceptatum fuisset. Et idem dicunt probabiliter multi DD. ut *Cajet. Nav. Viva, Trullench. Henricq. etc.* (contrà *Suar. Sanch. etc.*) de voto facto principaliter in Dei honorem, et secundario in tertii beneficium, habitâ particulari ratione, v. g. ipsius paupertatis, bonitatis, etc. quia tunc pauper non acquirit verum jus ad rem promissam; aut si acquirit, illud acquirit dependenter à Dei voluntate; cui præcipuè promissio facta est (c). Sed advertendum quòd hoc intelligitur de promissis, omninò gratuitis, non autem de mutuis, ut advenit in Votis, et jurejurando Perseverantiæ, quæ fiunt in aliquibus Congregationibus; nam illa tunc assumunt rationem contractûs, sicut superius dictum est n. 19. cum auctoritate Pontificis (d). *Benedict. XIV.*

42. — Notandum 3. Facultatem dispensandi vota residere apud omnes Prælatos habentes jurisdictionem ordinariam in foro externo, ut sunt 1. Papa respectu omnium Fidelium. 2. Episcopi respectu subditorum: sed non Vicarii eorum, nec Parochi, nec Pœnitentarii. 3. Prælati Regulares tam quoad Professores, quàm quoad Novitios; licèt votum emissum esset in sæculo (uti dicunt *Lessius, Sanch. et Busemb.*), saltem possunt suspendere illa, quatenus præjudicant novo vitæ statui (e). 4. Confessarii Mendicantes, qui ex licentiâ suorum superiorum possunt dispensare vota cum secularibus etiam extrâ Confessionem, juxtâ communem, *Lessii, Nav. Pal. Salm.*

---

(a) *Num. 251.* — (b) *Ibid.* — (c) *Lib. 3. n. 255.* — (d) *Ib. v. Notandum.* — (e) *N. 237. v. Quæritur in fine, et 242. ad 54.*

208 *Tract. 5. De secundo Præc. Decalogi.*

etc. (a). Possunt etiam ipsi votum ad strictiorem Religionem transeundi dispensare. Quod concessum est etiam Episcopis, qui cum subditis qui habent votum ingrediendi in aliquam Religionem, in quâ viget observantia, possunt dispensare, ut ad aliam minoris observantiæ se recipiant, *Soto, Less. Sanch. Ledesm. Salm.* etc. (b).

43. — Omnes superiores qui ordinariâ potestate gaudent, possunt certè eam delegare cuilibet Clerico, qui saltem sit primâ Tonsurâ initiatus. Et qui possunt dispensare cum aliis, possunt etiam eo modo cum seipsis, *Suar. Sanch. Less. Bonac. Laym. Caj. Pontius, Castropal.* etc. cum *S. Thomâ 2. 2. qu. 285. a. 8. in fine* (c). Quæritur autem hic, an qui delegatam facultatem habet dispensandi in votis, possit dispensare in juramentis? *Prima* sententia negat, quia vinculum voti differt à vinculo juramenti; et ideò ex Stylo Curix facultas quoad juramenta specialiter conceditur. Ità *Lessius* et *Salm.* cum *Azor. Sanch. Bonac.* et *Ledesmas* (d). *Secunda* verò sententia affirmat, quia juramenta, licèt sint vincula diversa à votis, in ordine tamen ad dispensationem, ut vota reputantur, argumento *L. tantum ff. de Servo corrupto*, ubi: *Dispositum in uno æquiparatorum, censetur dispositum in altero*. Illa autem specialis concessio ex Stylo Curix fit ad majorem cautelam. Ità *Cajetanus, Suarez, Pontius, Castropal. Prado, Aragon. Trullench.* etc. apud *Salmant. Cap. 3. n. 4.* Quamvis autem hæc secunda sententia sit satis probabilis, tamen omninò prima est tenenda, quæ est æquè probabilis; namque, cum obligatio juramenti jam contracta sit certa, et possideat, auferri non valet per dispensationem tantum probabiliter validam.

44. — An autem possit Episcopus dispensare vota Peregrinorum, qui brevì morantur in Diocesi, probabilior sententia est, quòd non possit, nisi per majorem anni partem illic moram faciat. Sed contraria non est improbabilis, ut dicunt *Suar. Pontius, Castropal. Sanch. Salas, Salmant.* etc. quia (ut di-

---

(a) *N. 257. v. Immò.* — (b) *N. 257.* — (c) *Lib. 3. n. 256. v. Quær.* — (d) *Lessius l. 2. c. 42. n. 6. Salm. de Juram. c. 3. n. 3.*



cunt) Peregrini etiam brevì alibi morando, subditi fiunt Episcopi loci, ità ut tenentur legibus illius loci, ubi reperiuntur. Vide quod dictum est *Tract. 11. n. 41. et 42.*

45. — Notandum 4. Dispensationem quinque votorum, nempe Religionis, Castitatis perpetuæ, trium Peregrinationum ad Terram sanctam, Romam ad limina Apostolorum SS. Petri, et Pauli, et Compostellam ad S. Jacobi Templum, esse Papæ reservatam. In casu tamen urgentis necessitatis, et quando non est facilis recursus ad Papam, si in morâ sit periculum gravis damni, vel spiritualis, v. g. violationis voti, scandali, rixarum, vel alterius peccati; vel damni temporalis proprii, aut alieni, nimirum gravis infamiæ mulieris, etc. tunc cum ipsis possunt dispensare, juxtà communem, etiam Prælati inferiores prælaudati (a).

46. — In pluribus verò casibus præfata vota non sunt reservata, et 1. si sunt facta sub levi. 2. si facta sunt ex timore extrinseco, licet levi, quia tunc jam non cum plenâ libertate sunt emissæ. 3. si votum non est perfectum juxtà materiam reservatam, ut in voto castitatis, esset votum non nubendi, non fornicandi, non petendi debitum conjugale; et etiam votum servandi virginitatem, quando vovens non intendit promittere ab continentiam, ab actu venereo, sed solum virginitatis præstantiam servare. Ità nec etiam est reservatum votum castitatis ad tempus, nec votum castitatem aut Religionem vovendi, nec votum suscipiendi ordines sacros, quia hoc non est votum castitatis jam emissum, sed emittendum. Ità nec votum proficiscendi Romam, nisi sit emissum causâ devotionis, et præcipuè ad visitanda SS. Apostolorum limina. Neque sunt reservatæ voti circumstantiæ, ut iter facere pedestre, vel mendicando, aut intrà mensem (b). Nec est reservatum votum disjunctivum, v. g. aut Religionis, aut jejunandi, et hoc etiamsi sit electa pars reservata, uti probabiliter dicunt *Salm.* cum multis aliis, quia etiam post fac-

---

(a) N. 258. v. Not. I. et II. — (b) Lib. 3. n. 258.

tam electionem semper integrum est voventi iterum eligere alteram voti partem (a). In voto autem castitatis post contractum Matrimonium, possunt utique dispensare tam Episcopi, quam Mendicantes, licet votum sit emissum antè Matrimonium (b).

47. — Dubitatur 1. An situt est reservatum votum ità etiam sit reservatum juramentum castitatis? Alii DD. affirmant, quia promissio jurata includit votum, quod nihil aliud est quàm promissio. Sed ab aliis melius respondetur, quòd cum quis intendit se duobus vinculis obstringi, nempe voto, et Juramento, utique remanet ligatus voto reservato; secus verò dicendum si quis voluerit se tantum vinculo Juramenti obligare, volens ut suum propositum, seu promissio non obligatoria, per juramentum fieret irrevocabilis, non quidem voti obligatione, sed juramenti; quod ceteroquin inducit minorem obligationem quàm votum, ut dicit *S. Thom.* (c); Ità *Sanch. Valent. et Lopez.* Et in dubio an iste voluerit se obligare necne ambobus vinculis voti et juramenti; non intelligitur voto adstrictus, ex regulà communiter acceptà à DD. quòd votum dubium non obligat (d).

48. — Dubitatur 2. An cum commutetur votum reservatum, remaneat reservata etiam materia commutata? Alii affirmant; sed est communis sententia opposita, quia licet materia commutata secum afferat eandem obligationem primi voti, nihilominus cum non sit ipsa ex se reservata, neque inducit reservationem, quæ est addicta dumtaxat primæ materiæ (e).

49. — Dubitatur 3. An votum pœnale, aut conditionatum in futurum Castitatis, Religionis, aut trium Peregrinationum sit reservatum; Respondetur cum sententiâ probabiliori *Tolet. Castropat. Prad. Salmant. Sanc.* etc. negativè, quia hujusmodi vota non procedunt ab affectu absoluto ergà virtutem. Secus tamen dicendum, si votum fuerit factum ob merum affectum ad virtutem, et conditio tantum

---

(a) *N. 224. v. Quagr.* — (b) *Lib. 6. n. 989. 990. et 1129.* —  
 (c) *2. 2. q. 89. a. 8.* — (d) *Lib. 3. n. 259.* — (e) *Lib. 3. n. 260.*

apponitur, ut votum valeat eo tempore, quo iudicatur sublatum fuisse impedimentum, quominus possit observari, v. g. cum aliquis voveret Religionem sub conditione si *Mater obierit*: nam ille tunc reverà movetur jam ad votendum à desiderio perfectionis; sed quia non potest illud exequi, ne matrem derelinquat, idè apponit conditionem, quæ in rigore non est conjunctio conditionalis, sed potius adverbium temporis, significans *quando* (a).

5o. — Dubitatur 4. An Papa possit dispensare in votis Clericorum in Sacris, et Religiosorum? Quoad Clericos probabilis est cum *S. Thomà*, et communiori, quòd possit; modò adsit causa urgentissima (b). Dictum est Clericorum, sed non jam Sacerdotum, ut vult communis sententia (c). Et sicut potest cum Clericis, ita etiam probabilis est posse cum Religiosis (d).

## TRACTATUS VI.

### DE TERTIO PRÆCEPTO.

#### CAPUT I.

#### De Obligatione talis Præcepti.

*An tale Præceptum hodiè sit Ecclesiasticum, an Divinum, et an obliget Infideles* 1. Qui peccat die festivo 2. Quis potest instituere Festa 3. Obligatio concionem auscultandi 4. Obligatio concionandi 5. Quinam Pueri, etc. 6.

1. — ANTEQUAM progrediamur ad videndas obligationes particulares, quas hoc tertium Præceptum inducit, plura prænотanda sunt. Et 1. Quòd tertium

(a) N. 261. — (b) Lib. 6. n. 1059. — (c) Lib. 3. n. 808. — (d) N. 256. v. Quæritur.

Præceptum , quoad debitum honorandi Deum in aliquo vitæ tempore per aliquem cultum , illud erat , et est Divinum , et Naturale. Sed quoad tempus præscriptum die Sabbati in Veteri lege , et Dominicâ in Novâ , erat cæremoniale , et nunc est Ecclesiasticum , juxtâ communem. *S. Antonini , Navar. Azor. Suar. Cajet. Sanchez , Salmant. Carden. et aliorum cum S. Thomâ (a) , et Catechis. Rom. (b).* Stante hoc infertur , quòd quamvis Ecclesia non possit generaliter dispensare huic obligationi exhibendi Deo aliquem cultum , potest nihilominus mutare , et etiam dispensare observantiam Dominicæ , et aliorum Festorum assignatorum , ut patet ex *Cap. Licet de Feriis (c).* Et hoc infertur etiam probabile esse vetitum non esse imponere opera servilia infidelibus , qui sunt extrâ , ideòque non subditi Ecclesiæ.

2. — Notandum 2. Quòd juxtâ sententiam etiam communem *S. Thomæ (d) , S. Antonini , Soti , Coninch. Sanch. Salmant. Covar. Bonac. Filliuc. etc.* in hoc tertio Præcepto desideratur , sed non imponitur cultus internus per actus caritatis , et contritionis , ut volunt aliqui. Tantummodò præcipitur cultus externus audiendi Missam , et abstinendi ab opere servili in diebus Festis ; etenim licèt sanctificatio animæ sit finis præcepti , attamen finis præcepti non cadit sub præcepto , ut docet communis sententia cum *Sancto Thomâ (e)* , qui ait : *Non enim idem est finis præcepti , et id de quo præceptum datur.* Et id confirmat *Catechismus Rom. (f)* dicens : *Hoc Legis præcepto externo ille cultus qui Deo à nobis debetur præscribitur.* Et hâc ratione cum laudato *S. Thomâ (g)* , et communi *Nav. Soto , Silvest. Cajet. Suar.* dicimus verum non esse (uti volunt aliqui) die Festo peccantem duplex committere peccatum (h).

3. — Notandum 3. Episcopos posse Festos in honorem alicujus Sancti (non verò Beati) statuere , ut habetur ex *Cap. Conquestus , de Fer.* modò sint consentientes Clerus , et Populus (i).

---

(a) 2. 2. q. 122. a. 4. ad 1. et 4. — (b) 3. p. in præcept. Dec. n. 4. 6. et 19. — (c) *Lib. 3. n. 263. et 265.* — (d) 2. 2. q. 122. a. 4. — (e) 1. 2. q. 100. a. 9. — (f) *De tertio Præcepto n. 1.* — (g) *In 3. Sent. d. 37. q. 1. a. 5. q. 2. ad 1.* — (h) *Lib. 3. n. 274.* — (i) *Ibid n. 266.*

4. — Notandum 4. In diebus Festis (ex se loquendo) non adesse obligationem Concioni interesse, nam in *Cap. Sacerdotes, Dist. 1. de Consecr.* aliud non præcipitur, nisi ut Episcopi, et Parochi in Dominicis, et solemnioribus Festis sermocinentur per se, vel per alios idoneos, et ut in Quadragessimâ saltem ter in hebdomadâ habeant Concionem, cum ibi subjungitur; si ita oportere duxerint. Dictum est, *ex se loquendo*, cæterum Rudes qui Mysteria principalia, aut res necessarias saluti ignorant, utique ipsi tenentur Concioni interesse, aut potius Catechismo (a).

5. — Hic advertere juvat à Tridentino *sess. 5. c. 2. de Ref.* imponi Episcopis, ut concionentur diebus Dominicis, et solemnioribus per se, vel per alios, si ipsi impediti fuerint. Hanc ipsam obligationem (quæ procul dubio est gravis) pariter imponi Parochis legimus his verbis: *Ut plebes sibi commissas pro earum capacitate pascant salutaribus verbis, docendo necessaria ad salutem, enuntiandoque cum brevitate, et facilitate sermonis vitia quæ eos declinare, et virtutes quas sectari oportet.* Ex quo rationabiliter dicunt *Barbosa, Salmant. et Ronc.* graviter peccare Parochum qui per integrum mensem, aut per tres interruptos omittit concionari (b). Hoc tamen procedit de Parochis, non autem de Episcopis, qui ex consuetudine communi legis interprete, non tenentur tam frequenter prædicare, ob tot negotiorum genera, quæ expedire debent, et aliis facile committere nequeunt, ut committi potest munus concionandi: cui jam Episcopis posse per alios, si ipsi impediti fuerint, à Concilio permittitur satisfieri (c).

6. — Notandum 5. Huic tertio Præcepto teneri omnes fideles usu rationis pollentes, qui quidem ordinariè septennio adipiscitur. An autem pueri, qui antè septennium pervenerint ad discretionis ætatem, teneantur? Vide quicquid dictum est *Tr. II. num. 37.*

---

(a) *Lib. 3. n. 308.* — (b) *N. 169.* — (c) *Lib. 4. n. 117. dub. 3. v. Hinc.*

## CAPUT II.

*De abstinentiâ ab operibus servilibus.*

## PUNCTUM I.

De operibus prohibitis in die Festo.

*Opera Servilia, Liberalia, et Communia* 7. *Liberalia facta ob lucrum* 8. *Transcribere* 9. *Pingere* 10. *Venatum, et piscatum* 11. *Opera Forensia* 12. *Nundinæ, Venditiones, et Contractus* 13.

7. — **T**RIA genera operum ab Auctoribus distinguuntur. Opera *Corporis*, quæ à corpore exercentur, et ad corporis utilitatem ordinantur, ut sunt fodere, suere, et similia; et hæc dicuntur servilia; quia à servis dumtaxat exercentur. Opera *Animæ*, quæ ab Animâ principaliter procedunt, et ad mentis culturam spectant, ut legere, studere, sonare etc. et hæc *Liberalia* dicuntur, quia à Liberis solent fieri. Denique opera *Communia*, seu Media sunt, quæ promiscuè tum à servis, tum à liberis exercentur, ut iter facere, venari etc. Itaque Festis tantum opera servilia sunt prohibita, non verò liberalia, et communia (a).

8. — Quare permissum est studere, docere, scribere, canere, sonare, et hujusmodi: et hoc etiam lucri causâ, ut dicunt *Soto, Navar. Suar. Salmant.* (contrâ alios) ex *S. Thomâ* (b) qui sic docet: *Nul- lius spiritualis actus exercitium est contrâ observan- tiam Sabbati, putâ si quis doceat verbo, vel scripto.* Nam intentio agentis non potest operis naturam ex liberali in servile mutare (c).

9. — Itâ pariter probabilius permissum est transcribere scripturas; *Suar. Bonac. Salm. Sa, Castropal.* etc. communissimè, quia tam scribere, quàm transcribere ordinatur ad mentis instructionem.

---

(a) *Lib. 3. n. 172.* — (b) 2 2. q. 112. a. 4. ad 3. — (c) *N. 278.*

Ideòque plures DD. admittunt etiam notas musicales, et computationes exscribere; et etiam characteres typographos ordinare, non autem folia imprimere (a).

10. — Pingere communiùs volunt DD. esse opus servile, hoc enim requirit actionem materiale. Sed opposita sententia non est improbabilis, uti dicunt *Laym. Sz, Castrop. Ronc. Anact. Holzman* etc. dùm pingere (modò non sit labor notabilis in præparandis coloribus, et tabulis edolandis) videtur etiam potiùs opus liberale quàm servile, cùm magis in eo mens operetur, quàm manus. Saltem est dubium sitne liberale an servile. Et si non est liberale, saltem est opus commune, cùm id exercitium tam à liberis, quàm à servis factitetur. Sculpterè autem nemo dubitavit quin sit ars servilis (b).

11. — Venari autem sclopeto, vel reti, alii tenent esse servilia; sed communior, et probabilior sententia negat, licèt lucri gratià id ageretur. Servile potiùs videtur piscari, cùm magna defatigatio adesset; aliàs non opus fuisset Pontificis dispensatione in halecium piscatione, ut habetur *Cap. 3. de Feriis*. Piscatio autem si moderato labore fiat, probabilìus excusatur ex consuetudine, ut dicunt *Castrop. Filliuc. Sanch. Holzman* etc. (c).

12. — Præter opera servilia in Festis sunt prohibita etiam Forensia; sub horum nomine intelliguntur primò omnes actus, qui ad Forum spectant circà causarum decisiones, ut sunt citatio Partium, compilatio processûs, examen Testium, sententiam proferre, aut eam executioni mandare. Hujusmodi igitur opera prohibentur in Festis; modò necessitas aut pietas aliter non expostulet, ut præscribitur *Cap. ult. de Feriis*. At verò non est prohibitum excommunicare, dispensare, aut aliud jurisdictionis exercitium, quod judiciali strepitu non indiget (d).

15. — Sub nomine Forensium intelliguntur 2. prohibita Nundinæ, modò non fiant de rebus ne-

---

(a) *Lib. 3. n. 279.* — (b) *N. 280.* — (c) *N. 283.* — (d) *N. 284. et 287.*

cessariis usui quotidiano, ut sunt cibi, et potationes; et etiam candelæ, calceamenta, et similia, quorum pretium est determinatum. Cæterum hodiè ex consuetudine permittuntur Nundinæ universales, (et alicubi etiam particulares) et ita etiam aliarum rerum venditiones, exceptis iis quæ in publicis officinis venduntur, ut dicunt *Nav. Sanch. Castrop. Salmant. La-Croix* etc. nam hæ tamen prohibitæ sunt à lege Canonicâ ratione scandali (a). Item permittunt DD. etiam Mercatoribus vendere aliquid clausis januis, cum emptores pro tunc iis valdè indigerent (b). Ità etiam ex consuetudine pluribus in locis permittuntur (saltem ex licentiâ generali Ordinarii) contractus locationum, permutationum, negotiationum, et hujusmodi, quæ strepitum judiciale non requirunt (c).

## PUNCTUM II.

De casibus quibus permittuntur opera servilia die Festo.

*Excusant* I. *Dispensatio Papæ, aut Episcopi, aut Parochi* 14. II. *Consuetudo* 15. III. *Pietas* 16. 17. IV. *Caritas* 17. V. *Necessitas* 18. *ad 21. An propter magnum lucrum etc.* 22. *Ut evitetur otium* 23. VI. *Utilitas* 24. VII. *Parvitas materiæ* 25. *Qui imponit opus decem servis, etc.* 26.

14. — **H**Æ causæ sunt I. *Dispensatio Papæ* pro totâ Ecclesiâ, aut Episcopi pro suâ Diocesi, aut Vicarii Capitularis, sede vacante, (non autem Vicarii Episcopi); modò adsit justa causa, loquendo de Festis communibus; aut Prælati Regularis respectu suorum Religiosorum, aut Domesticorum. Parochi possunt etiam dispensare (etiam præsentè Episcopo) in casu particulari, sed tantum ad tempus, et in iis in quibus consuetudo permittit eis dispensare,

---

(a) N. 285. et 286. — (b) *Lib. 3. n. 303. in fin.* — (c) N. 286.



dispensare , nempè in jejunio , et laborando die Festo , ut communiter testantur *Suar. Sanch. Viva, Salm. Spor.* etc. (a).

15. — II. *Consuetudo*. Propterea excusantur qui vehuntur sella gestatoria ab hominibus conducti (b). Ducere vehicula , vel animalia rebus onusta , *Roncagl. Viva, Salm. Mazzotta* (c). Irrigare olera , vertere aut separare segetes (d). Ità etiam ex consuetudine permissum est die Festo animalia occidere , et ea excoriare , cùm die præcedenti id fieri nequit , ut accidit in frequentioribus Civitatibus , non autem in oppidis , nisi esset tempore æstivo , aut plura Festa concurrerent. Ità etiam ex consuetudine permittitur molere frumentum (e). Et ità pariter licitum est cibos parare , et coquere , licet superflui sint , *Azor. Castrop. Viva, et Mazzotta,* etc. (f). Ità etiam calceamentis novis aliquem calcæare , et barbam tondere ; ità circà barbam tondendam aliqui DD. dicunt adesse consuetudinem ubique ; alii dubitant. Cæterùm probabiliter dicunt alii universaliter permitti Rusticis tonderi in Festo ; quia hic dies tantum illis , ut tonderi possint , vacat ; et dicunt etiam posse excusari Tonsores , si eis renuentibus tondere diebus festivis , notabilis lucri jactura facienda esset (g). Plures Auctores dicunt dubiam consuetudinem non posse excusare , bene verò probabilem , prout si attestaretur ab aliquo Doctore eximio : Ità *Salm. Salas, Granado, Viva, Mazzotta* etc. (h). His positis mihi lubet hîc afferre quid S. Carolus Borromæus in 1. et 3. Conciliis Mediolanensibus pro venditoribus rerum victui necessarium , et Pontifex Bened. XIV. cùm esset Archiepiscopus Bononien. (i) tam pro dictis venditoribus , quàm Barbitonsoribus statuerunt , ut præscriberetur hora , quâ claudendæ essent hujusmodi Tabernæ ; propterea præfatus Pontifex jussit affigi Tabellam horarum , quibus pro temporum varietate ad signum campanæ majoris , statim illæ claudi deberent. O

---

(a) N. 288. — (b) n. 275. — (c) n. 276. — (d) N. 290. — (e) n. 277. — (f) N. 198. — (g) Lib. 3. n. 190. — (h) Lib. 3. n. 290. v. *Notandum.* (i) *Notificat.* 43.

utinam hoc ubique ab Episcopis fieret ! utique non viderentur homines pœnitùs suæ salutis tam immemores , ut vix semel in anno , et quasi inviti ad Sacramenta accedant , nunquàm verbo Dei , quod est Christi ovium alimentum , ab eis audito.

16. — III. *Pietas*. Quà de re permittuntur opera quæ proximè spectant ad cultum Divinum , ut campanarum pulsatio , statuarum delatio in Processionibus , et etiam (saltem ex consuetudine) Altaria , et Ecclesias ornare , hostias coquere , templa verere , molem funerariam , vel ad Sanctissimi Sacramenti expositionem erigere. Conficere autem tabulata ad invisendas Processiones non licet in Festo , nisi quandò nullum aliud tempus suppeteret (a).

17. — Hic dubitatur an liceat laborare in festo ad solam pietatem , ut pauperum vestes suere , Ecclesiæ agros colere , aut eas ædificare , aut lapides pro illius ædificio adferre. Alii hoc permittunt , quia in *Cap. Conquestus , de Fer.* jam permittuntur opera forensia , si necessitas , vel pietas suadeat ; propterea idem putant posse dici de operibus servilibus , in æquiparatis enim , *ubi currit eadem ratio , eadem est legis dispositio*. Alii tamen probabilius id negant , nisi adsit actualis , et gravis necessitas , aut nisi adsit licentia Episcopi ; quia opera prædicta tantum remotè concurrunt ad cultum Divinum. Cæterum dicunt *Salmanticenses* cum *Suar. Soto , Cajet. Castropal. Sanch. Bonac. Trullench.* etc. quòd nostrâ hâc tempestate cùm Loca Pia quasi omnia egeant , benè posse exerceri prædicta opera , ut eis succurratur (b). IV. *Caritas* ; ideòque permittuntur agi causæ pauperum , eis opitulari , etc. (c).

18. — V. *Necessitas* , propria vel aliena animæ , vel corporis , si nimirum sine gravi incommodo , aut detrimento aliquid omitti non possit. Ideòque possunt excusari servi , et famuli , etc. si coacti à Dominis laborare metu gravis incommodi , v. gr. ne dimittantur , sine spe faciliter , et brevè inveniendi , cui serviant. Idem dic de uxoribus , et filiis coactis à Patre ad laborandum. *Suar. Azor. Pal. Salmant.* etc. (d). Ità etiam excusantur pauperes ,

(a) *V.* 395. — (b) *N.* 103. — (c) *N.* 294. — (d) *Lib.* 3. n. 296.

quibus die Festo laborandum est pro seipsis ad suū, et familiæ alimentationem, ac pariter, ut resarciant vestes proprias, aut Consanguineorum (a).

19. — Ratione etiam necessitatis permittitur laborare Pharmacopolis, vitri, et ferri conflatoribus, laterum, et calcis coctoribus, et quibuscumque quorum opus semel cæptum non potest interrumpi sinè damno (b). Ideòque etiam permittitur equos calceare itinerantium, reficere vomeres eorum quibus aliter die sequenti cessandum esset à labore, reficere vias, et pontes fontes etc. (c). Ità pariter licitum est Sartoribus (si aliud non suppetat tempus) vestes suere pro nuptiis, aut Funeribus, et similibus; putà si exterus indigeret vestibus juxtà loci ubi reperitur decentiam, aut si alii expectarent vestes promissas, quas si non exhiberent, ipsi magnum detrimentum subituri essent. Idem valet pro calceamentariis (d).

20. — Permittitur etiam Pistoribus publicis panem conficere diebus Festis, tàm ob consuetudinem, quàm ob populi necessitatem; dùm semper adest periculum, ne ob quamlibet panis penuriam populus commoveatur. An consuetudo permittat omnibus indiscriminatum hisce diebus panem conficere, meritò *Tamburinus* dubitat, nisi accideret concursus plurium Festorum, et panis antea coctus edendo minùs aptus redderetur; aut si panis esset necessarius pro illo die. Et idem dicimus de *Pastillis*, sive artologanis (e).

21. — Ità pariter, ut evitetur damnum, permittitur colligere fruges, aut fœnum, et (saltem ex consuetudine) etiam fructus, quamvis non necessarios usui illius diei: ut melius serventur, præcipuè si est periculum pluvix imminens, ideòque in multis regionibus solent colligi quibuscumque diebus olivæ, castanæ, aut alii fructus silvestres. Communiter licent quælibet opera, quæ sunt necessaria usui quotidiano familiæ, ut verrere domum, lectos sternere, utensilia culinaria lavare, etc. (f).

---

(a) N. 297. — (b) N. 300. — (c) *Ibid.* — (d) n. 303. — (e) N. 299. — (f) n. 298. v. *Permittunt.*

22. — Dubitatur 1. An jactura magni lucri possit excusare laborantem die Festo? Multi negant ut *Salmant. Roncaglia*, etc. quia dicunt aliud esse damnum pati, aliud lucrum non facere. Sed multi alii DD. etiam graves, ut *Suar. Castrop. Cajet. Sanch. Navar. Armilla, Holz. Bonac. Viva, Elbel, Mazotta*, etc. probabiliter excusant, quia ex *L. un. C. de Sentent.* lucrum non facere magnum æquiparatur gravi damno. Saltem hâc in circumstantiâ dici potest Præceptum Festorum, quod est humanum, cum tanto incommodo haud obligare (a). Eademque ratione multi DD. excusant etiam à Sacro; ita *Suar. Castrop. Mazotta*, etc. Contrà tamen nescio approbare opinionem nonnullorum dicentium, posse Sabbato proficisci aliquo venatum, licet prævideat Dominicâ omissurum Missam. Aliter tamen dicunt multi AA. de eo qui proficisceretur die Jovis: et aliter de iis qui ex officio iter agunt, aut merces vehunt (b).

23. — Dubitatur 2. An liceat laborare in Festo ad evitandum otium? Alii DD. id negant; alii affirmant, uti *Laym. Silv. Sa, Mazotta*, etc. quando quis aliàs esset in periculo peccandi; nam (dicunt) si excusat necessitas, quæ corporis commodum respicit, tantò magis debet excusare necessitas, quæ animæ bono conducit. Hanc sententiam puto probabilem in solo casu quo tentatio non possit alio modo superari, nisi se labori applicando; sed hic casus nescio an moraliter possit accidere saltem erit rarissimus (c).

24. — VI. Excusat *Utilitas Publicæ lætitiæ*, aut splendoris; quapropter licet in victoriis, natalitiis, vel adventibus Principum Theatra constituere, vestes conficere, ignes accendere etc. modò hæc præveniri non potuissent; dùm consuetudo permittit hujusmodi res, cùm sint signa lætitiæ moraliter necessaria ad populi pacem (d).

25. — VII. *Parvitas materiæ* excusat saltem à mortali. Sed hîc quæritur 1. Quænam in hoc sit gra-

---

(a) *Lib. n. 301. cum Castrop. tr. 3. de Leg. d. 5. p. 3. §. 2. n. 3. et Suar. eod. cit. l. 6. c. 7. ex n. 9.* — (b) *n. 301. v. Ob eamdem.* — (c) *n. 302.* — (d) *n. 304.*

*Cap. 3. Punct. 1. Quomodo huic oblig., etc. 221*

vitas materiæ? Alii ponunt tres horas, sed hæc opinio est nimis laxa. Alii unam horam, et hæc est nimis rigida; alii communiùs duas horas, et multi alii aliquid ampliùs, nempe duas cum dimidiâ, ut *Valentia*, *Granado*, *Henriq. Bassus*, *La-Croix*, etc. cum *Viva*, qui asserit hanc esse communiozem: imò *Viva*, et *Mazotta* dicunt excusare etiam longius hoc temporis spatium, si intercedat aliqua necessitas, quæ alioquin non sufficeret ad excusandum (a).

26. — Quæritur 2. An peccet graviter Dominus qui imponit decem servis laborem mediæ horæ? Si labor impositus eodem tempore exercetur, ex communi sententiâ non peccat graviter. Dubium restat an si successivè? Alii volunt peccare mortaliter; nihilominùs communior est opposita cum *Sanch. Bonac. Salmant. Roncag. Trullench. Viva*, etc. quòd non excedit veniale; et est satis probabilis, nam huiusmodi Dominus, non potest ampliùs peccare, quàm ipsi servi, quorum nemo pro eo labore peccat graviter. Secùs esset si Dominus eidem servo præciperet pluries infrà eundem diem laborare, quia illæ plures vices coalescunt ad constituendam materiam gravem (b). Advertatur hic denique quòd in operibus forensibus gravitas materiæ, non tam desumitur à quantitate temporis, quàm à quantitate operis.

CAPUT III.

*De obligatione audiendi Sacrum.*

PUNCTUM I.

Quomodò huic obligationi satisfaciendum est.

*De intentione 27. De attentione 28. Qui dùm audit Missas, recitat Officium, etc. 29. Qui celebrat 30. Qui confitetur 31. Qui dormitat, aut colligit elemosynas. 32. De materiæ parvitate 33. Qui audit duas dimidias Missas 34. De loco undè audiri potest Missa 35. De Oratoriis, et ubi potest Episcopus celebrare 36. et 37. Utrùm Episcopus possit dispensare ad celebrandum in domibus privatis 38.*

27. — Hoc præceptum audiendi Missam omnibus Festis habetur ex *Can. Omnes Fideles*, et *Can.*

(a) n. 305. — (b) *Lib. 3. n. 306.*

*Missas, de Consecrat. dist. 1.* Et obligat omnes Fideles usu rationis utentes. Ad satisfactionem hujus præcepti duo requiruntur *Intentio*, et *Attentio*. Requiritur 1. *Intentio*, nempe ut quis intendat Missam audire; nam non satisfaceret præcepto, qui assisteret solo fine Ecclesiam visendi, amico præstolandi, etc. aut vi detineretur; dico *vi*, quia si quis interesset Sacro timore à Patre, vel Magistro in eum incusso, jam satisfaceret debito suo, quamvis peccaret ob pravam voluntatem Missam omittendi si posset. Prætereà sufficit intentio adimplendi opus præceptum, et nihil refert quod non habeatur intentio satisfaciendi præcepto; quare qui jam adfuisset Sacro, utique præcepto satisfecit, licet fuisset immemor diei festivi (et idem dicitur de Voto, Jurejurando, Pœnitentiâ Sacramentali; modò opus promissum in voto, aut impositum pro pœnitentiâ non applicetur ad alium finem) (a). Imò satisfacit licet habuisset expressam intentionem non adimplendi præceptum juxtà communissimam, et probabiliorem *Suar. Lessii, Sanchez, Castropal. Tournely, Pontas, Valentia, Vasq. La-Croix Salmant.* (b). Ratio, quia qui voluntariè jam exequitur opus præceptum, necessariè etiam satisfacit præcepto. Nec obstat paritas quæ à contrariis adducitur, nempe quòd sicut qui debet alteri centum, et conscius debiti centum illi donat, non remanet liber à debito; ità non remanet liber à præcepto, qui præcepto satisfacere non vult. Nam responsio patet: in debito pecuniæ (idem de debito voti) obligatio dependet à propriâ voluntate, quare benè potest aliquis, non obstante solutione, velle ligatum remanere; sed in casu nostro, obligatio audiendi Sacrum dependet ab Ecclesiæ voluntate, undè non potest homo ex se illam sibi imponere, adeòque dùm adimplet præceptum, non potest non adimplere.

28. — Requiritur 2. *Attentio* (saltem virtualiter et in confuso) nimirum ut advertat et attendat ad assistendum, ut debet, Sacrificio quod peragitur. Quare non satisfacit certè, qui assistit dormiendo, aut sensibus abreptus, aut nesciens quod fit. Quæs-

---

(a) n. 163. — (b) *Lib. 2. n. 164. et fusius l. 4. n. 176.*

tio est inter DD. an in assistendo Sacro requiratur attentio interna? Multi AA. negant, uti *Suar. Les. Lugo, Coninch. Sylvest. Medina, Hurtado, Henrig. Renzi, Croix*, et plures alii, dùm dicunt quòd, ut Missæ Præcepto satisfiat, non esse nēcesse orare, sed sufficit præsētia morali adesse, intendens illā Deo cultum exhibere. Sed communior sententia cum *S. Thomā, Laym. Bonac. Sporer, Salmant.* et aliis pluribus vult esse necessariam attentionem internam, attendendo aut ad Deum (nimirum ejus Bonitatem, Amorem etc.) aut ad Sacrificii Mysteria, aut ad verba et actionem celebrantis; sufficiendo ceteroquin (ut dicunt communiter) ut in principio habeat intentionem internè attendendi, et eam non revocet voluntariè, et advertenter se distrahendo: dico *advertenter*, quia si quis voluntariè se distrahit, non advertens quòd distrahitur à Missā (idem valet de Horis Canonicis), etiam satisfecit; quia iste licèt voluntariè distrahatur, non tamen voluntariè distrahitur à Missā. Hanc secundam opinionem puto esse probabiliorē et quidem consulendam, contrariam verò non judico improbabilem; saltem stante auctoritate tot DD. qui eam tuentur, redditur res valde dubia, an adsit hæc Ecclesiæ lex obligans Fideles ad Missæ assistentiam etiam cum internā attentione (a).

29. — Ceterum communiter admittunt, quòd satisfacit Missæ qui conscientiam examinat, ut confiteatur, aut aliquem librum spiritualem legit (non autem Historiarum licèt spiritualium) (b): aut recitat horas Canonicas, vel Pœnitentiam persolvit, aut aliam orationem debitam facit; quā eodem tempore potest duobus præceptis satisfieri, quandò res præceptæ non sunt ad invicem incompatibiles, ut communissimè *Suar. Bonac Castropal. Sanch. Filliuc. Sa, Busemb. Salmant.* etc. contrā pauciores (c). Itā etiam satisfaciunt, qui Missæ inservientes se parant, ut res Altari necessarias afferant putà vinum, hostias, thus etc. cùm eadem res ad idem Sacrificium pertineant;

---

(a) *Lib. 3. n. 313.* — (b) *n. 314.* — (c) *n. 309.*

sed hoc intelligitur modò ab Ecclesiâ non egrediendum erit, aut saltem per multum tempus (a).

30. — Probabile etiam est Celebrantem posse aliam Missam audire, quæ unâ simul celebratur, quia dùm ipse celebrat jam orat. Sic etiam probabiliter satisfacit, qui dùm Missæ assistit Ecstasim patitur, quæ à sensibus eum abalienat, quia Anima tunc ad Deum attendit.

31. — An satisfaciat qui audiendo Sacro confitetur? multi DD. affirmant, modò poenitens tunc attendat Missæ, ita *Castropal. Reginal. Molfes. Hurtad. La-Croix, Elbel, Pigler* etc. dicens, quòd per Confessionem honoratur Deus; Et idem dicunt de Confessario audiente Confessiones. Sed nos contrarium sentimus cum *Lugo, Tambur. Bonac. Escob. Salmant.* ratione quia qui confitetur tanquàm reus sistit, non autem, ut offerens Sacrificium cum Sacerdote. Nihilominus dicunt *Lessius*, et *La-Croix* absolutè, benè satisfacere Servum aut Famulum, cui nullum aliud tempus vacaret ad consistendum, nam pro isto præsumitur Ecclesiæ conniventia.

32. — Satisfacit etiam, aut saltem in materiâ gravi non delinquit qui in audiendo Sacro (aut in horis Canonicis recitandis) dormitat, modò advertat ad id quod fit (b). Probabiliter etiam satisfacit qui circumiens Ecclesiam colligit eleëmodynas, modò ad Missam attendat. Qui verò confabulatur per partem notabilem Missæ (quicquid dicat *Busemb.*) cum communi dicimus, quòd non satisfacit, quia confabulatio destruit attentionem etiam externam, quòd impedit præcepti satisfactionem (c).

33. — Quæritur 1. Quæ sit parva materia in præcepto audiendi Sacrum? Alii putant esse parvam materiam omittere usque ad Evangelium exclusivè. Multi *inclusivè* prout *Az. Lugo, Suar. Laym. Castrop. Sa, Holzman, Elbel, Salmant.* etc. etiamsi omitteretur *Credo*, ut dicit *Lugo* cum aliis. Prima sententiâ est communior et probabilior, sed secundam non puto improbabilem, quia Missa juxtà *S. Isidorum* ab offertorio olim incipiebat. Commune

---

(a) *Ibid.* — (b) n. 316. — (c) n. 317.



vero est cum *Suar.* et aliis, non esse grave omittere ea quæ præcedunt Epistolam, et quæ post Communionem subsequuntur, etiamsi utrumque omittatur. Commune contrà pariter est esse gravem omissionem à Consecratione ad *Pater noster*, etiam exclusivè; aut omittere Consecrationem, et sumptionem. An autem sit grave omittere Consecrationem vel Sumptionem? Alii communius affirmant, imò dicunt esse grave, licet omittatur Consecratio unius speciei. Multi alii nihilominus cum *Lugo*, *Suar.* *Hurt.* *Fagund.* *Escob.* *Tamb.* *Elbel*, etc. negant; nam, uti dicunt, non constat essentiam sacrificii consistere in Consecratione (sicut communius volunt), aut in Sumptione (uti vult *Ledesma*, *Pignatelli*, et alii cum *Alberto Magno*); Attamen nos probabiliorē putamus primam sententiam, tanquàm probabilius habentes essentiam Sacrificii in utrâque simul consistere, nempe in consecratione, et in sumptione (a). Dicunt autem aliqui Auctores, quòd cum sit probabile essentiam Sacrificii Missæ in solâ consecratione consistere, idè etiam probabile sit, quòd si aliquis veniret post Consecrationem ultimæ Missæ, reliqua audire non teneatur. Sed dicimus oppositum tenendum cum *Continuatore Tournely*, et *P. Zacharia* in *La-Croix* (†). Ratio, quia cum sit satis etiam probabile, quòd essentia Sacrificii in Sumptione consistat, dicimus illum benè obligari ad reliquam Missæ partem audiendam: qui enim implere nequit præceptum impositum certè, tenetur saltem si potest implere probabiliter, nam huiusmodi onus satisfaciendi præcepto probabiliter, cum non possit satisfieri certè, inclusum est in præcepto certè satisfaciendi; cum enim præceptum stet in possessione, debet ipsum impleri ut meliùs impleri potest.

34. — Quæritur 2. An satisfaciat qui duas medias Missas audiat à duobus Celebrantibus? Qui eodem tempore has partes audit, utique non satisfacit, uti patet ex Propos. 53. damnatis ab Innoc. XI. Sed si successivè, multi admittunt satisfieri, ut *Navarr.*

---

(a) *Lib.* 3. n. 305. — (†) *Cont. Tourn.* to. 3. p. 353. et *P. Zachar. ap. La-Croix lib.* 3. p. 1. n. 608.

*Laym. Soto, Bonac. Sa, Castrop.* etc. quia talis assistentia, non jam physicè, sed moraliter jam terminatur ad unam Missam integram: Itaque illæ duæ medietates sufficiunt ad unitatem obsequii ab Ecclesiâ præcepti. Hanc non negamus esse probabilem, saltem extrinsecè; sed longè probabiliorem putamus contrariam cum *Suar. Lugo, Azor. Coninch. Tamb. Sporer* etc. si audiatur pars usque ad Consecrationem inclusivè ab uno Sacerdote, reliquam verò ab alio; quia hæ duæ partes nequeunt constituere unum integrum Sacrificium. Secùs dicimus si assistere tam Consecrationi quàm Sumptioni ejusdem Sacerdotis (a).

35. — Quæritur 3. In quo loco satisfit præcepto de audiendo Sacro? Respondetur in quâlibet Ecclesiâ publicâ, etiamsi non sit Parochialis, prout hodiè certum est ex communi consuetudine. Et jam satisfacit qui audit Missam in Choro post Altare, aut per aliquam fenestram quæ prospectat Ecclesiam, etsi Sacerdos non videatur, dummodò saltem per alios advertatur quod fit. Et licèt adsit post parietem, aut columnam Ecclesiæ, et etiam extrâ Ecclesiam, modò uniatur cum populo, qui est intrâ Ecclesiam. Admittunt alii (et non improbabiler) cum *Lugo, Escobar, Mazzott. Spor. Elbel, Dicast. et Gob.* et non dissentit *Tournely*, posse satisfieri huic præcepto ex aliquâ fenestrâ Domûs, licèt via intermediet, modò prospiciatur Altare, et distantia sit parva, quia sic etiam moraliter assistitur. Admittunt *Lugo, et Escob.* distantiam 30. passuum, sed hæc merito non admittitur à *Tamb. et Gob.* (b).

36. — Dictum est *Ecclesiâ publicâ*, nam in Oratoriis privatis non satisfaciunt Præcepto omnes ii qui ibi adsunt Missæ, nisi sint Domini, aut illorum conjuncti, qui habitant eandem domum, et vivunt illorum expensis (etsi aliqui DD. admittunt satisfacere fratres, et uxores eorum, etiamsi habeant mensam particularem, et separatam), aut servi qui ab iisdem Dominis aluntur, quamquàm isti degant extrâ Domum, ut admittunt *Pelliz. Quarti, Diana, La-Croix, Castrop. Tamb. et Mazzotta* (contrâ *Barbos.*

---

(a) n. 311. — (b) *Lib. 3. n. 312.*

Cap. 3. Punct. 1. Quomodo huic oblig., etc. 227

*Lezan.* etc.) Sed non satisfaciunt Familiares qui non sunt necessarii, uti loquitur Indultum (a), et tantò minùs extranei, ut sanxit Clemens XI. adversùs quorundam opinionem (b).

37. — Circà Oratoria privata plura hìc advertenda. Et 1. non posse in iis celebrari in quibusdam Festis principalibus, et hæc sunt *Pascha*, *Pentecostes*, *Natalis Domini*, *Epiphania*, *Feria V. in cœnâ Domini*, *Ascensio*, *Annunciatio*, et *Assumptio B. Mariæ V.*, *Festa SS. Petri et Pauli*, et *Omnium Sanctorum*. Ità ex Decret. S. C. Sed hæc limitatio non intelligitur pro Oratoriis concessis infirmitatis causâ (c). 2. Pontificem Benedict. XIV. in Bullâ *Cùm duo nobiles*, anno 1740 declarasse, non posse celebrari Missam in Oratoriis privatis, nisi actu assistat saltem unus illorum, quibus directè concessum est indultum (d). 3. Per eundem Pontificem in Bullâ *Magno*, sub die 2. Junii 1751. declaratum esse, attentâ formulâ Indultorum, in prædictis Oratoriis privatis non posse celebrari nisi unam tantùm Missam, cùm jam explicatum sit, verbum *una Missa* idem sonare ac *unica* (e). 4. Non licere ministrare Sacramentum Pœnitentiæ in Oratoriis privatis sinè licentiâ Episcopi, et præcisâ justâ causâ, expressum est in citatâ Bullâ *Magno* §. 20. An autem requiratur licentia Episcopi pro ministrandâ Eucharistiâ? Alii negant; sed comuniùs affirmant, et reperit, quòd præfatus Pontifex Benedictus XIV. in Epistolâ Encyclicâ ad Episcopos Poloniæ, datâ eodem die 1. Junii 1751., prohibuit communionem ministrari in Oratoriis privatis sinè licentiâ Episcopi. 5. Hoc procedere de Oratoriis privatis concessis à Papâ privilegio aliquas personas donare volente, non autem de illis auctoritate Episcopi erectis, et designatis ad sacros usus in Seminariis, Conservatoriis, Hospitalibus, et etiam in domibus privatis, modò in istis ingressus pateat à viâ publicâ; nam in hujusmodi Oratoriis, seu Capellis

---

(a) *Lib. 3. n. 319.* — (b) *Vide l. 6. n. 356. V. N. III.* — (c) *L. 6. n. 259. v. Ex quo, ex alio Decr. quod affert P. Zacharia ap. Croix l. 6. p. 2. ad n. 271.* — (d) *Lib. 3. n. 219. v. Probabilem.* — (e) *Ibid. v. Dices.*

quilibet potest celebrare, et Missæ præcepto satisfacere in quibuslibet anni diebus, quia hæc sunt verè Ecclesiæ publicæ. Et idem currit pro Oratoriis Religiosorum, et pro iis, qui in domibus Episcoporum, aut Cardinalium eriguntur <sup>(a)</sup>. Episcopi autem possunt celebrare, et celebrare facere se præsentibus in omnibus domibus (etiam extrà Diocesim) ubi reperiuntur causa Visitationis, aut itineris, aut moræ extrà Diocesim à jure, vel à S. Sede ob aliquam peculiarem causam permissæ; Ità habetur ex Bullâ *Apostolici Ministerii* Innoc. XIII. confirmatâ à Benedictio XIII. et extat in appendice Conc. Rom. (l).

38. — An autem Episcopi possint dispensare, ut aliquandò celebretur in domibus privatis; Respondetur, quòd licèt hodie per Trident. *Sess. 21. in Decr. de Celebr. Miss.* et luculentiùs in Decr. Clementis XI. ablata sit Episcopis potestas, quam primitùs per *Can. Missarum*, *11. de Consecrat. Dist. 1.* habebant celebrandi, et celebrare faciendi etiam in domibus laicorum; Nihilominùs valdè probabilis, et communissima est sententia cum *Nav. Suar. Lugo, Castrop. Vasq. Coninch. Salm. Croix*, etc. quòd hoc intelligitur de licentiâ perpetuâ per modum habitûs, non autem de licentiâ ad tempus per modum actûs intercedente aliquâ justâ causâ particulari, et transitoriâ infirmitatis, aut alterius rei. Nonnulli DD. admittunt hoc tantùm pro aliquibus vicibus in anno; sed alii, ut *Holz. Elbel*, et *Pasqual.* concedunt, quoties occurrit aliqua causa specialis, dicentes, solum vetitum esse Episcopis per modum habitûs, et quoties Dispensato lubet eâ licentiâ uti, et hoc etiam approbatur à *Gallemart* in citat. loco Trid. et non irrationabiliter <sup>(c)</sup>.

## APPENDIX

### De Oratoriis privatis.

**O**PERÆ pretium est hìc adnotare formam Brevium Pontificiorum, quibus concedi solent Oratoria pri-

---

<sup>(a)</sup> *Lib. 6. n. 357.* — <sup>(b)</sup> *Lib. 6. n. 358.* — <sup>(c)</sup> *Lib. 6. cit. n. 359.*

*Cap. 3. Punct. 1. Quomodo huic oblig., etc. 229*

vata ; hæc igitur est : » Clemens XIII. tibi N. N.  
 » Diœcesis Neapolitanæ, qui ( ut asseris ) ex nobili  
 » genere procreatus existis , ut in privato domûs  
 » tuæ solitæ habitationis Oratorio in Civitate N. exis-  
 » tentis, ad hoc decenter ( muro extructo ) ornato,  
 » ab omnibus domesticis usibus libero , per Ordina-  
 » rium loci priùs visitando , et approbando , ac de  
 » ipsius Ordinarii licentiâ, ejus arbitrio duraturâ ,  
 » unam Missam pro unoquoque die, dummodò in  
 » eâdem domo celebrandi licentia , quæ adhuc du-  
 » ret, alteri concessa non fuerit , per quemcumque  
 » Sacerdotem ab eodem Ordinario approbatum se-  
 » cularem, seu de superiorum suorum licentiâ Re-  
 » gularem, sinè tamen quorumcumque jurium Pa-  
 » rochialium præjudicio , ac Paschatis Resurrectionis,  
 » Pentecostes , Nativitatis D. N. JESU CHRISTI, nec  
 » non aliis solemnioribus festis diebus exceptis in  
 » tuâ, et familiæ tuæ, nec non hospitum tuorum  
 » nobilium præsentîâ celebrare facere valeas. Non  
 » obstantibus etc. Volumus autem quòd Familiares  
 » servitio tuo tempore dictæ Missæ actu non neces-  
 » sarii ibidem Missæ hujusmodi interessentes , ab  
 » obligatione audiendi Missam in Ecclesiâ diebus  
 » festis de præcepto minimè liberi censeantur ». *Da-  
 tum Romæ etc.*

Nunc examinemus sigillatim dictas clausulas, qua-  
 rum I. *Tibi Diœcesis Neapolitanæ*. Hic quæritur,  
 an qui habuit Privilegium, cùm transferat domici-  
 lium in aliam Diœcesim, possit ibi uti Privilegio?  
 Multi affirmant, ut *Barbosa, Pasqual. La-Croix*;  
 cum aliis (a); nam dicunt hoc Privilegium non loco,  
 sed personæ concessum ob suam nobilitatem; adeò-  
 que stante eâdem causâ in aliâ Diœcesi, adhuc et  
 Privilegium perseverat. Addunt postea *tò tibi Diœ-  
 cesis Neapolitanæ*, non laxativè apponi, sed demon-  
 strativè, i. e. *Tibi qui es Diœcesis Neapolitanæ*; et  
 hoc eo fine ne ab alio, qui forsan sit eodem nomine  
 appellatus, Privilegium usurpari queat. Hoc tamen  
 non obstante contrarium tenendum cum *P. For-*

---

(\*) *Barb. de Jur. Eccl. lib. 2. c. 8. n. 16 Pasq. de Sacra Miss. q. 629. La-Croix l. 6. p. 2. n. 269. cum Sylv. Bonac. et aliis.*

tunato a Brixia (a), qui secundum se multos Auctores adducit. Ratio, quia nunc temporis in Exemplaribus Brevium hujusmodi privilegii, secus ac fiebat antiquitus, nomen Civitatis respicit non Personam tantum, sed etiam eadem Oratoria, cum dicatur : *In privato domus tuæ solitæ habitationis Oratorio in Civitate N. existentis* ; et quandoque apponitur etiam nomen Diœcesis. Sicuti ergo Privilegium quoad personam, sic etiam ad locum limitatur. Præterea, ut benè ait *P. Brixienſis* (b) mox laudatus (et asserit hanc esse comm. sententiam), quamquam hoc dubium esset, strictè tamen interpretandum est ; etenim generaliter loquendo, Privilegia favorabilia sunt latè interpretanda ; non autem illa derogantia Juri communi, uti est Privilegium de Oratorio privato ; contra *Tambur.* sententiam (c). Vide quod dicemus de Privilegiis *Tom. III. Tract. XX. n. 7.*

Clausula II. *Qui (ut asseris) de nobili genere procreatus existis.* Igitur animadvertendum, cum non verificatur conditio nobilitatis, Privilegium utique nullum esse, dum illa est apposita uti causa finalis (d). An autem sufficiat nobilitas habita ex privilegio ; vel dignitate, seu gradu acquisito ? Quidam admittunt (e) ; sed negatur à *P. Fortunato à Brixia* asserente requiri propriè dictam notabilitatem habitam ex nativitate. De reliquo semper in hoc locus à loco est distinguendus.

Clausula III. *Ut in privato domus tuæ solitæ habitationis Oratorio in Civitate N. existentis, ad hoc decenter (muro exstructo) ornato, ab omnibus domesticis usibus libero.* Hic quæritur, an Privilegio donatus illo uti possit, cum per parum temporis domi suæ ruri exstructæ immoratur ? Affirmant *Pignat. et Pasq.* sed meritò id negat *Ronc.* (f) attentis verbis : *In privato domus tuæ solitæ habitationis.*

Notetur hîc 1. Per verba *muro exstructo*, uti probabiliter dicunt quidam AA. (g). non signari

(a) *A Brixia de Orat. domest. pag. 62.* — (b) *Brix. loc. cit. cap. 3. Annot. 1. pag. 91.* — (c) *Tamb. Meth. cel. Miss. lib. 1. c. 6. §. 4. n. 31.* — (d) *Vid. Tamb. loc. cit. §. 4. n. 5.* — (e) *Pasq. et Cleric. cum Pignat. cons. 98. n. 100.* — (f) *Ronc. de Sac. Missæ c. 5. q. 3. v. Quarto* — (g) *La-Croix l. 6. c. 2. n. 266. et Tamb. loc. cit. n. 8.*

opus esse ut quatuor adsint parietes, sed sufficere tres, et pro quarto ut apponatur tapes, aut tela, quæ claudatur, aperiaturve cum opus erit. Juxtà usum autem Neapoli receptum, scio pro hujusmodi privatis Oratoriis ab Archiepiscopo approbari Armaria lignea; attamen sentio semper observandum Decr. S. R. Congr. die 3. Decemb. emanatum 1661. ubi dicitur: *Habens Indultum erigendi Oratorium in propriâ domo, si voluerit ibi ædificare Altare ligneum, non indiget facultate Apostolicâ, dummodò Altare cum sacro lapide parieti colligatum amovibile non sit, et Altaris portatilis imaginem non præ se ferat.* Notandum 2. quoad verbum, *ornato*, quòd locus Oratoriis ità aptari debet, ut omnes fatentur, ut distinguatur ab aliis profanis usibus destinatis. Imò benè ait Pasqual. in hujusmodi Oratoriis ornamenta splendidiora antè alia quæ in Ecclesiis adsunt, esse apponenda, quia Ecclesiæ ex se exigunt venerationem. Notandum 3. quoad verba: *Ab omnibus domesticis etc.*, id quod dicunt DD. nimirum quòd sicut in Ecclesiâ quis dormire potest, comedere, et similia, tantò magis hæc permittuntur in Oratorio (a); et uti hæc agendo in Ecclesiâ absque necessitate venialem culpam non excedit, modò non fiant per modum habitûs, ut inquit Suar. cum aliis (b); idem à fortiori dicendum est de Oratorio privato. Casu tamen quo per modum habitûs Oratorium tamquàm locus profanus haberetur, volunt DD. (c) locum illum ineptum fieri, et Privilegium cessare; saltem, ut ajunt alii, (d) novæ eget Ordinarii approbationis. An autem super Oratorii tecto dormire non liceat, aut aliæ actiones profanæ, negant AA. ferè communiter (e), dicentes id omittere esse solùm convenientiæ, non verò præcepti; dùm qui dormit super tecto Ecclesiæ extrà Ecclesiam dormit. Verum tamen est

---

(a) *Sa v. Eccles. num. 3. et Tamb. n. 8.* (b) *Suar. de Relig. to. 1. l. 3. c. 5.* — (c) *Pasq. q. 618. n. 8. cum aliis.* — (d) *Tamb. ex Castropalao.* — (e) *Ronc. de Sacr. Mis. c. 5. q. 3. v. Primo, cum Pignat. et Croix n. 466. cum Quarti, et Tamb. num. 9. v. Illud ex Sanc. et Glossâ in c. un. de Cons. Eccl. in 6.*

in suâ Diocesi S. Carolum Borromæum vetuisse. Ceterum inquit P. *Gatticus* (a) hoc permitti posse in aliquâ domo, ubi aliter ex angustia provideri non potest.

Clausula IV. *Per ordinarium loci prius visitando, et approbando, ac de ipsius Ordinarii licentia, ejus arbitrio duraturâ.* Notetur hîc Ordinarium, cum semel approbaverit Oratorium, non posse impedire quominus ibi celebretur, ut decisum legitur apud *Barb.* (b). Hoc tamen intelligitur, cum desit justa causa, nam cum adest, benè potest celebrationem suspendere vi verborum, *Ejus arbitrio duraturâ.*

Clausula V. *Unam Missam pro unoquoque die, dummodò in eâdem domo celebrandi licentia, quæ adhuc duret, alteri concessa non fuerit.* Jam superius dictum est n. 37. per verba, *unam Missam*, intelligi *unicam*, ut declaravit Benedictus XIV. in Bullâ *Magno*. Per verba autem, *dummodò in eâdem domo etc.* advertatur, quòd etsi unus ex Dominis Oratorium obtinuisset in suis diætiis, sed ejusdem domi, invalidè alter Dominus Privilegium intraret.

Clausula VI. *Per quemcumque Sacerdotem ab eodem Ordinario approbatum secularem, seu de superiorum suorum licentiâ Regularem.* Notandum hîc non opus esse approbatione speciali ad celebrandum in Oratoriis privatis, hodiè enim ordinariè solent ibi Sacrum facere Sacerdotes vi cujusdam approbationis, quæ ex consuetudine (c) adest.

Clausula VII. *Sinè tamen quorumcumque Jurium Parochialium præjudicio.* Ob hanc Clausulam nequeunt in Oratoriis privatis denunciari Matrimonia, et similia. An autem possit ministrari Sacramenta Pœnitentiæ, et Eucharistiæ vide quod dictum est n. 37. in fine.

Clausula VIII. *Paschatis Resurrectionis, Pentecostes, et Nativitatis D. N. J. C. nec non aliis solemnioribus festis diebus exceptis.* Advertendum cum

---

(a) *Gattic. de Orat. dom. c. 33. n. 6.* — (b) *Barb. in Trident. Sess. 22. Decr. de observ. in cel. n. 19.* — (c) *Tamb. l. c. n. 23.*



**Gavanto** (a) sub Paschatis, et Pentecostes nomine primum tantum diem comprehendi. Quinam alii dies comprehendantur in verbis, *solemnioribus festis diebus*, dictum est n. 34. iterum iterumque citato.

Clausula IX. *In tuâ, et Familiæ tuæ, necnon Hospitum tuorum nobilium præsentia celebrare facere valeas.* Superius etiam notatum est (n. 37.) per verba, *in tuâ, et Familiæ tuæ præsentia*, intelligi quòd celebrari non potest, quin adsit aliqua ex illis personis quibus principaliter est concessum Indultum, ut declaravit Bened. XIV. Sub verbo autem *Familiæ* veniunt omnes Consanguinei, saltem usque ad quartum gradum, modo eamdem incolant domum, et vivant Privilegio donati expensis, ut volunt Doctores communiter (b).

Clausula X. *Volumus autem quòd Familiæres ser-  
vitio tuo tempore dictæ Missæ actu non necessarij  
Missæ hujusmodi interessentes, ab obligatione au-  
diendi Missam in Ecclesiâ diebus festis de præcepto  
minimè liberi censeantur.* Ut igitur servi gaudeant  
Privilegio requiritur 1. ut non modò vivant ex-  
pensis Domini, sed etiam ut actu serviant, ut ha-  
betur ex *Cap. Sicut nobis, de verb. sign. in 6.* 2. Non  
sufficit quòd continuè serviant Domino, sed requi-  
ritur actualis eorum necessitas tempore Sacri Tenet  
*Pign. (c).* Servos utiles etiam posse quodammodò  
necessarios reputari, saltem ait *P. Gatticus*, si sunt  
necessarii ad decus Domino competens: sed *Brix.*  
negat utrumque ex principio superius dato, Privi-  
legium nempe hoc strictè esse interpretandum,  
tanquàm derogans Juri communi; tantum admittit  
cum *Gattico* unum servum, qui moraliter necessa-  
rius reputatur ad ea, quæ occurrere possunt tem-  
pore Missæ.

Quæritur, an gaudeant Privilegio Servi qui vivunt de salario Domini, sed habitant extrà illius domum? Alii negant; sed communiùs alii (*d*) affirmant; et

(a) *Gav. p. 1. tit. 10. §. Sciendum.* — (b) *Pignat. cons. 98. n. 95. Pasq. qu. 669. Ronc. de Sacr. Mis. c. 5. q. 3. v. Sexto, Croix l. 3. p. 1. n. 626. P. à Brixid p. 8. contrà Peliz. et Tamb.* — (c) *Pign. loc. cit. n. 107.* — (d) *Peliz. Manual. tract. 8. c. 2. sect. 2. q. 22. Mazzotta, Gattic. Cast. Quarti, et alii apud Croix l. 6. p. 2. n. 272. contrà Bon. Barb. Leg. etc. ap. Croix*

non improbabiliter, modò continuè serviant in Domo Heri, et actu, ut dictum est, sint necessarii tempore Missæ.

## PUNCTUM II.

Quæ excusant ab auditione Sacri.

*Excusat impotentia, qualis est Infirmorum, Excommunicatorum, Vinculis detentorum, Custodum, etc. 39. De servis, filiis, et uxoribus coactis etc. 40. Excusat grave incommodum 41. Excusat usus 42. An propter scandalum, etc. an propter grande lucrum, aut ut confiteatur possit ommitti Sacrum 43.*

39. — **E**XCUSAT à præcepto audiendi Sacrum quævis impotentia sive realis, sive moralis, quæ grave afferret damnum, aut incommodum spirituale, vel temporale propriæ personæ, aut proximo. Quare 1. excusantur Infirmi, qui, si domo egrediantur, grave nocumentum, aut dolor, aut valetudinis procrastinatio timetur. In dubio potest Infirmus iudicio Medici, aut Superioris, aut viri prudentis acquiescere, et etiam proprio, si jam potest ipse prudenter judicare; et quandò agitur de gravi damno, etiam perseverante dubio Infirmus probabiliter excusatur; nam in tali dubio prævalet jus naturale conservandi salutem (a). 2. Excusantur Excommunicati, et Carceribus detenti, qui non tenentur absolutionem; vel libertatem procurare, ut sacro adsint, ut volunt multi DD. Sed ego non excusarem, ut meliùs dicunt alii, si de facili sine gravi incommodo possent absolutionem, aut libertatem obtinere; aut si ipsi ideò eam obtinere non curent, ne tali præcepto se obstrictos reddant (b). 3. Excusantur qui custodiunt Castra, Urbem, gregem, domum, infantes, vel pueros, quos domi relinquere sinè periculo, et secum conducere sinè Templi perturbatione nequeunt; Item illi qui probabiliter timent, ne in carcerem detrudantur, si ad Ecclesiam pergant, et illi qui necessariò debent assistere

---

(a) *Lib. 3. n. 325.* — (b) *ibid. v. Excommunicatus.*

infirmis, ut medicinas, et cibum tempore opportuno illis ministrent, aut eos nequeunt derelinquere, quin molestiâ magnâ afficiant (a).

40. — Excusantur. 4. Servi, si necessaria foret eorum opera, ut dominorum grave incommodum evitetur. Debent nihilominus hujusmodi servi procurare (si possunt) ut adsint Sacro cum suo incommodo levi, etc. v. g. auferendo aliquid à somno, citius foras egrediendo, etc. Si autem eorum opera non esset necessaria eo tempore, quo audiendum sit Sacrum, non excusantur, nisi in casu, in quo gravem indignationem, aut grave incommodum timeant, v. g. ne dimittantur, ac de facili et statim alium Dominum non possent invenire. Idem dicendum de filiis à parentibus, et de uxoribus à viris coactis ad omittendum Sacrum, aut ad laborandum in Festo; ipsi enim excusantur, si timeatur gravis indignatio (b).

41. — Excusantur 5. Navigantes, et itinerantes, si ex auditione Sacri grave damnum passuri sint (c). Excusat notabilis distantia ab Ecclesiâ. In hoc pensandæ sunt circumstantiæ personæ, temporis, et loci, sed regulariter putant *Suar. Castr. Filliuc. Salm. Trull. Croix, Mazz.* et alii, excusare distantiam trium milliarium, aut iter pedestre unius horæ cum quadrante; et minus si plueret, aut ningeret, aut adesset alia causa excusans (d).

42. — Excusat 6. usus juxtà locorum consuetudinem domo non egrediendi sex hebdomadas post partum, vel mensem tempore luctûs ob mortem viri, et etiam sororis, aut filiæ, ut dicunt *Suarez*, et *Mazzotta*. Sed illæ personæ, quæ jam domo exeunt, illæ ob has causas non excusantur à sacro. Nullâ autem ratione potest licita reputari illa consuetudo (ut meliùs dicam abusus) quâ puellæ, ne in publicum exeant, ab auditione Sacri se abstinant. Excusantur tamen Mulieres, quæ vestibus, aut servis, aut sociis se decentibus carent; sed istæ tenentur, si possunt, valdè manè, aut in aliquâ Ecclesiâ, ubi populus non frequens Sacro adest. Idem dicitur

---

(a) n. 326. — (b) n. 327. — (c) n. 328. — (d) n. 329.

de puellâ inhonestè prægnante. Aliqui DD. excusant puellam, si tantum una Missa celebranda esset, et inter eam proclamationes illius Nuptiarum faciendæ essent; sed hoc non potest admitti, nisi in iis locis, ubi talis esset usus, aut puella magno rubore suffundenda esset; quod quidem rarò accidit<sup>(a)</sup>.

43. — Potest 8. excusari Mulier si sciat, quòd turpiter concupiscatur. Sed dicimus, quòd illa non teneretur ideò abstinere à Sacro, nisi semel, aut bis <sup>(b)</sup> Denique potest probabiliter excusare jactura magni lucri, ut in simili dictum est n. 22. Et ità etiam possunt excusari Muliones, Redarii, Molitores, qui ut Sacro adessent, magnum damnum, aut jacturam lucri extraordinarii subituri essent <sup>(c)</sup>. Ità etiam potest excusari, qui omitteret Sacrum ut impediret aliquod grave peccatum, aut damnum; aut ut confiteatur, qui secus esset diutius permansurus in peccato mortali. Sed non licet Missam omittere, ut faciat aliquod opus non præceptum, licèt altioris meriti <sup>(d)</sup>. An autem Peregrinus teneatur ad audiendum Sacrum in Festo in loco, ubi est de præcepto, licèt ibi tantum diem moretur, vide quid dictum est *Tract. II. n. 41*.

Hic obiter notandum Benedictum XIV. in Brevi, *Cum sicut*, dato 22. Decemb. 1748. in Regnis Neapolis, et Siciliarum permisisse opera servilia in Festis, exceptis *Dominicâ Paschalî, et Pentecostes, et omnibus aliis Dominicis*; item *diebus Circumcisionis, Epiphaniæ, Ascensionis, Corporis Christi, et ejus Nativitatis*; item *Purificationis, Annunciationis, Assumptionis, Nativitatis, et Conceptionis B. V. Mariæ Immaculatæ*; item *diebus SS. Petri et Pauli, omnium Sanctorum, et Patroni principalis cujusque Civitatis aut loci Diæcesis*. In aliis autem Festis indulget Fidelibus teneri tantum ad Sacrum audiendum.

---

(a) n. 330. — (b) n. 331. — (c) n. 331. — (d) *Ibid. v. Non excusatur.*

# TRACTATUS VII.

## DE QUARTO PRÆCEPTO.

### CAPUT I.

#### De Filiorum obligatione.

*De amore ergà Parentes 1. De Reverentiâ 2. De Obédientiâ 3.*

1. — **F**ILII tenentur ergà Parentes (itâ etiam Subditi ergà Superiores) Amorem, Reverentiam, et Obedientiam præstare. Quare peccant graviter I. contrà *Amorem*, et quidem pluribus modis, 1. Si ab eis abhorrent, aut illis malum grave optant (in quo dupliciter peccant, contrà pietatem, et contrà justitiam). 2. Si injustis modis eos impediunt, ne testamentum conficiant. 3. Si eos sine justâ causâ gravi molestiâ afficiunt. 4. Si non subveniant in gravi necessitate temporali, aut spiritali, præcipuè si negligunt, ut illi in articulo mortis Sacramenta suscipiant (a).

2. — II. Peccant graviter contra *Reverentiam*, 1. Si percutiant eos etiam leviter, aut ostendant velle eos percutere. 2. Si gestus eorum contumeliosè exprimendo, derisui eos habeant. 3. Si maledica, aut convicia in eos coràm effutiant, appellando illos *Amentes*, *Ebrios*, *Bestias*, *Latrones*, *Veneficos*, *Scelestos*. Vocare autem eos *Senes*, *Ignaros*, *Stupidos*, etc. non debent absolutè damnari de peccato mortali, nisi tunc, cùm illi graviter contristarentur (b). Dictum est *coràm*, quia si Filius Parenti illuderet, aut mala imprecaretur, sine pravo animo, et clanculum, nescirem eum damnare de peccato mortali (c).

---

(a) *Lib. 3. n. 333.* — (b) *Ibid. n. 334.* — (c) *Citat. n. 434. v. Absolutè.*

3. — III. Peccant graviter contrà obedientiam, 1. Si ipsis invitis ducunt uxores indignas cum Familiæ dedecore (observetur quod dicitur de Sponsalibus *Tom. II. Tract. XVIII. n. 10.*) 2. Si furentur in materiâ gravi bonæ domûs; quocirca observetur quod dicitur loquendo de furto *Tract. X. num. 32.* Peccant 3. Si non obediant Parentibus in rebus gravibus et justis, ac per ipsos jussis (præcepto expresso, et seriò, ut dicunt *Roncaglia, Holzman, et Sporer*) v. g. ne ludant ludis perniciosis, ne domo exeant nocte, ne cum mulieribus, aut cum malis sociis versentur, etc. (a). Dictum est in rebus justis, quia circa status electionem Filii non tenentur Parentibus obedire, ut docet *S. Thomas* (b): *Non tenentur nec Servi Dominis, nec Filii Parentibus obedire de Matrimonio contrahendo vel Virginitate servandâ.* Quarè Parentes (ut dicemus Capite sequenti) si impediunt Filios, quominus statum eligant, aut cogunt eos ad suscipiendum aliquem statum invitos, peccant graviter.

## CAPUT II.

Ad quod tenentur Parentes, et Fratres.

*De alimentis, Legitimâ, et Dote; Decisio quatuor Rotarum 4. De educatione; si Pater impedit vocationem, aut cogit ad aliquem statum, aut ingredi Monasterium 5. Ad quid tenentur Fratres 6.*

4. — **P**ARENTES ad duo potissimum tenentur, ad procurandam Filiis conservationem, et educationem. Circâ *Conservationem* ipsi peccant 1. Si bona sua dilapident, ita ut impotentes reddantur ad ministranda Filiis (licet essent spurii) alimenta necessaria, aut si negligant eis modo quo possunt illa procurare. 2. Si injustè privant eos in morte Legitimâ, aut in vitâ recusent constituere Patrimonium Filiis, qui ad Ordines sacros promoveri cupiunt, aut negent dotem

---

(a) n. 335. — (b) 2. 2. q. 104. n. 5.

Filiabus, licèt ipsis invitis illæ nupserint, cùm jam annum 25. excesserint. Si autem antè illam ætatem nupserint, diversæ adsunt opiniones; sed probabilior mihi videtur illa *Sanch. Molin. Salm. Trullench.* etc. qui dicunt Patrem saltem teneri ministrare alimenta, licèt se indignis nupserint (a). Respectu autem Patris, ait *Sanch. Boss.* cum *Glossâ* in *Cap. Admonere* 33. q. 4. et cum *Surdo* illum teneri alimenta non filio modò, sed etiam ejus Uxori etsi ipsam duxerit absque dote, et contrà voluntatem Patris (b). Præterea ajunt *Azor.* et *Merenda* (c) cum *Baldo*, et *Jasone* Patri alendum esse Filium, etiamsi iste consumsisset in vitiis partem sibi priùs datam. Hic adnotetur *Decisio* 4. *Rotarum S. Cons. Neapol.* quòd Pater non potest domo filios expellere, licèt foris vellet eis ministrare alimenta; et contrà quòd Filii nihil possint prætere de à Patre si velint extra domum habitare, nisi hoc facerent causâ virtutis (d). Quandò autem Pater possit, vel non, Filios exhæredare, vide quod dicemus *Tract. X. n. 238.* cùm loquemur de contractibus.

5. — Circà *Educationem*, 1. peccant Parentes si negligunt Filios in rebus Fidei, et Salutis instruere vel per se, vel per alios. 2. Si eis scandalum afferant, blasphemias, vel verba obscœna proferendo, etc. et præcipuè si secum in lecto decumbere faciant, aut permittant pueros, et puellas simul dormire. 3. Si de excessibus eos non corripuerint, et præcipuè si aliquid furati sint. 4. Si non curent, ut filii Sacramenta suscipiant, et Festa, Jejunia, etc. observent. 5. Si permittant, ut illi cum scandalosis versentur, et præcipuè si non impediant quominus Sponsi suarum Filiarum ad domum accedant. 6. Si impediant Filios quominus aliquem vitæ decentem statum assumant: v. g. Matrimonium sibi competens (e); observetur circà hoc quod dicetur *Tom. II. Tr. XVIII. n. 17.* cùm sermo fiet de Sponsalibus. Tantò magis peccant,

---

(a) *Lib. 3. a. 336. v. 3. Pater.* — (b) *Sanch. l. 4. de Matr. Tr. 26. n. 21. Boss. de effect. Matr. p. 2. n. 95. etc.* — (c) *Azor. p. 2. l. 2. cap. 4. q. 12. Merenda contr. lib. 4. cap. 34. n. 6.* — (d) *Ibid. n. 338.* — (e) *Lib. 6. n. 849. circa fin. v. Conveniunt.*

si Filios à statu Religioso sinè causâ avertunt (a) ; observetur quid dicetur *Tract. XIII. num. 25. 7.* Peccant contrà si cogant filios ad nuptias ineundas cum certis personis ; modò non adsit aliquâ gravissima causâ , putà si aliquod Matrimonium multùm conferret ad aliquam grandem inimicitiam sedandam , aut ad solandos Parentes gravi necessitate oppressos ; ità dicunt *Bellarmin. Laym. Sanch. Petrocor. Tolet.* et alii communiter cum *Sancto Thomâ* ; sed hoc intelligitur semper ac filius statueret ducere uxorem (b). Ità etiam peccant , si adigant filios ad Ecclesiasticum statum , vel Religiosum , aut filias ad Monasteria ingredienda. Et hìc advertatur , quòd juxtà Trident. *Sess. 25. cap. 18.* incurrit excommunicationem quicumque adigit puellam ad profitendum in aliquo Monasterio , ad suscipiendum habitum , et etiam ad illuc ingrediendum , licèt solo fine educationis , uti tenemus cum *Suar. Nav. Bonac.* etc. contrà *Sanch.* sic intelligendum Concilium citato loco (c). Contrà dicimus non incurrere censuram illos Parentes , qui simpliciter suaderent suis filiabus Monasterium ingredi , ut ait *Barbosa* , cum *Rodrig.* et alii contrà *P. de Alexandro de Monialibus* , qui non rectè supponit hoc esse quamdam coactionem metu reverentialem ; nam reverà aliud est ingredi timore incusso à Patre , aliud est ex voluntate Patris , etiamsi adjungeret preces modò istæ non sint nimis instantes , adeò ut probabilis timor incuteretur , ne Pater secum indignetur (d). Cùm autem Concilium exceperit casus in jure expressos , probabiliter *Suar. Bonac. et Filliuc.* permittunt posse cogi puellas , ad ingrediendum Monasterium in pœnam alicujus delicti , vel ne cadant in aliquam impudicitiam , uti deducitur ex *Cap. Significavit* , et *Cap. Gaudemus de Convers. conjug* (e). Imò ego nescirem id culpâ damnare , cùm si domi detineretur puella , esset in periculo dandi , aut recipiendi scandalum ; tunc enim videtur finis legis Concilii cessare non solùm negativè , sed etiam contrariè

---

(a) *Lib. 3. n. 335. et l. 4. n. 77.* — (b) *Lib. 6. n. 850.* — (c) *L. 7. n. 212. v. Quoad.* — (d) *Ib. dub. 2.* — (e) *Lib. 7. n. 212. d. 2. in fin.*



trariè juxtà id quod dictum est *Tract. II. n. 69.* (Observe quæ fusiùs dicentur super hanc excommunicationem *Tom. II. Tract. XIX. n. 29.*) Præterea hic advertatur cum eodem *de Alexandro* quòd excommunicantur etiam qui sine justà causâ impediunt puellas Professionem emittere, aut habitum suscipere in aliquâ Religione; et etiamsi impedian ei ingressum in Monasterium, uti probabiliùs tenent *Suar. Bonac. et Filliuc. adversùs Sanchez, et Castropal. (a).*

6. — Quoad fratres, etiam isti tenentur (cùm possint) alimenta suis fratribus, et dotes sororibus ministrare, et non tantùm in necessitate extremâ, sed etiam gravi, ut communissimè docent *Azor. Barbosa, et Salmant. cum Trullench. Fagnan. Menoch. etc.* Dicunt tamen hi AA. quòd fratribus, et sororibus uterinis non ad aliud tenentur quàm ad alimenta (b).

### CAPUT III.

Ad quid tenentur Domini Servi, et Conjuges.

*Obligatio Dominorum, præsertim circà salarium 7. Obligatio servorum. Si permittunt furari. Si discendant contrà pactum 8. Salarii præscriptio 9. Compensatio 10. et 11. Viri obligatio 12. Mulieris obligatio, præsertim de sequendo viro 13.*

7. — I. **Q**UOAD Dominos, peccant hi, 1. Si in causâ sunt; cur servi non satisfaciant præcepto Festorum, et annualium Sacramentorum. 2. Si eis denegent, aut differant salarium. 3. Si eos non corrigant, cùm blasphemant, aut scandalum præbent. 4. Si eos sinè justâ causâ. antè tempus conventum ejicient, et tunc tenentur integrum salarium promissum eis solvere, ex L. *Qui operas* 38. et L. 16. ff. *locati*. Sed hoc intelligitur post sententiam: nam si servus ex expulsionem nihil damni passus fuisset, tunc non debet Dominus obligari ad integrum salarium,

---

(a) *Ib. dub. 3. v. Insuper.* — (b) *Lib. 3. n. 340. v. Notandum.*  
*Tom. I.* L

sed ad medietatem, et aliquid ampliùs (a). Si autem servus infirmetur per sex menses, ad nihil tenetur Dominus juxtà communiorem *Lugonis*, *Molinæ*, *Laym. Croix*, etc. (quicquid dicat *Antoine*); dummodò illic non adsit contraria consuetudo. Et ne tenetur quidem ad expensas infirmitatis, ut probabiliter tenet *Lugo* contrà alios; modò servus non esset in gravi necessitate (b).

8. — II. Quoad servos dicimus, quòd peccant isti, 1. Si famulatus desunt, aut si domino, ut debent, non obediunt. 2. Si permittunt Dominos damnum pati cùm impedire possent, et damnum provenit ab extraneis, ad restitutionem tenentur; si verò fieret à domesticis, juxtà communiorem, et probabiliorē *Lessii*, *Lugonis*, *Azorii*, *Molin. Holzman*, *Salmant.* (contrà *Pontium*, et alios) peccarent contrà caritatem, cùm commodè possent impedire damnum, non autem contrà justitiam: dummodò illorum bonorum cura non sit illis præcipuè commissa (c). 3. Peccat servus, si antè statutum tempus discedat sinè causâ. Sed eo casu non potest Dominus illi negare totum salarium quod ei debetur pro ratâ famulatûs præstiti; satis tamen erit, si ei solvet dimidium, aut paulò minùs; ità dicunt *Azor. Filliuc. Silvest. Salmant. Trullench. Fagund.* etc. (d) Si verò discessit ob infirmitatem, aut aliam justam causam, potest totum stipendium tempori correspondens famulatus exhibito exigere, et tunc nec supplere tenetur opera, à quibus tunc cessavit (e).

9. — Notandum hic 1. Servo post duos annos, quam discessit (juxtà Bullam Sancti Pii V. apud *Salmantic.* de 4. Præcepto num. 134.) imò post duos menses (juxta Decretum S. Concilii Neapolitani) non posse ampliùs dari actionem in salarium; sed hoc intelligitur in Judicio, quia in conscientia benè potest illud prætere, imò compensare, modò pro Domino non stet præscriptio triennalis, legitimè facta cum titulo, et bonâ fide

---

(a) *Lib. 3. n. 342.* — (b) *Ibid. v. 3. Herus*, et n. 864. — (c) *L. 3. n. 344.* — (d) *Ib. n. 345.* — (e) n. 346.

(a), juxtà id quod dicitur *Tract. X. num. 11.* cùm de Præscriptione erit sermo.

10. — Notandum 2. Quòd si servus famulatus fuisset sinè salario determinato, et Dominus nollet ei satisfacere, benè potest sibi compensare, saltem quoad infimum pretium, semper ac Dominus solitus fuisset solvere illud aliis, aut si jam aliis soluturus esset. Aliud verò est de illis Pueris, pro quibus rogantur Nobiles, ut eos inter suos familiares adscribant, vel cooptent, quibus ex consuetudine solent dari tantum alimenta (b).

11. — Notandum 3. Quòd non potest servus operas suas sibi compensare, si ipse eas majori pretio dignas existimet, quàm est quod accipit, cùm proscripta sit hæc Propositio 37. ab Innoc. XI. quæ dicebat: *Famuli domestici possunt occultè heris suis subripere ad compensandam operam suam, quam majorem judicant salario, quod recipiunt.* Nihilominus rectè dicunt *Viva*, et *Salmant. Less.* et *Molina* (quicquid dicat *La-Croix*) hoc non procedere, cùm servus necessitate coactus convenisset de salario notabiliter minore justo; quia tunc, sicut Dominus teneretur solvere justum, ita servus potest sibi compensare (sed non ultrà infimum); dummodò (ego subjungo) herus pro eodem pretio minore justo non invenisset sinè justitiæ læsione quàm ei famulatus fuisset. Præterea dicunt *Sotus*, *Navar.* *La Croix*, *Corella Filguerra*, etc. quòd tunc servus non potest majus salarium exigere, quandò proprio libito angeret operas debitas, non autem quandò eas augeret ex voluntate expressâ, vel tacitâ Domini. Tunc tamen dicunt *Viva*, *Croix*, et *Cardenas*, quòd non potest servus ex se facere compensationem sinè consilio peritorum, aut alicujus Theologi valdè docti. Contrà tenent *Salm.* quòd si compensatio esset evidenter justa, et abesset periculum hallucinationis, quia res de se patens esset, tunc potest servus juxtà infimum pretium compensationem sibi facere. Et dicunt quòd præfata propositio idèò damnata fuit, quia nimis generaliter loquebatur (c).

---

(a) *L. 3. n. 346.*—(b) *L. 3. n. 348.*—(c) *n. 523. et 524.*

12. — III. Circà conjuges , peccat vir ; 1. Si male habeat uxorem verberibus , aut contumeliis sinè justâ causâ ; potest autem cæteroquin in eam animadvertere , justâ accedente causâ ( ut esset præsertim causâ honoris ) , dummodò animadversio esset competens statui , et conditioni uxoris , ut dicunt *Busemb. Elbel* , et *Gob.* aliàs dupliciter peccaret. 2. Si uxori est impedimento , quominus satisfaciât præceptis. Si verò tantum ei impediret ea , quæ sunt consilii , nimirum frequentiam Sacramentorum , dicunt *Bonac. Sayr. Busemb. Filliuc.* etc. quòd si impediret sinè causâ , tantum venialiter peccaret , non autem graviter , nisi sibi constaret , quòd ex ipsis uberiores fructum illa perciperet (a). 3. Si negat , aut negligit ei procurare alimenta , intelligitur injustè : nam justè potest ea negare , si mulier discedit ab illo sinè causâ , aut si illa adulterasset , ut dicunt *Sanch.* et *La-Croix* , cum *Castropal.* (b). Quoad dotem tamen propter adulterium non potest vir sibi abdicare illam antè Judicis sententiam ; licèt , ut dicit *Croix* , cum *Castrop.* contrà *Sanchez* , possit uxori repetenti dotem opponere exceptionem adulterii (c).

13. — Peccat verò uxor. 1. Si non obedit viro in eo , quod justum est ( præsertim in non reddendo debito conjugali ) ; et si domesticam gubernationem sibi assumit , modò vir ad eam habilis non sit , aut sit profusus in prodigendis rebus suis. 2. Si de rebus communibus impenderet plùs quàm solent sui ordinis aliæ uxores. Observa quod dicatur *Tract. X. num. 33. de Furto.* 3. Si ad secundas nuptias transiens non servat filiis prioris conjugii bona , quæ à primo viro accepit , quorum tantum usus sibi competit , ut habetur ex *Authenticâ* , *Ex testamento* , et *Authent. In donatione* , *C. de secundis Nupt.* 4. Si injustè renuit sequi virum , qui mutat domicilium , licèt sine sufficienti causâ , et etiam si in longinquas partes profisciscatur , ubi diutiùs ei morandum sit , quia si brevè redeundum esset , nec mulier tenetur ire , nec vir eam conducere , sicut etiam nec vir tenetur , si

---

(a) *L. 3. n. 356.* — (b) *Sanch. de Matrim. l. 10. D. 8. n. 25. et Croix lib. 6. p. 2. n. 714.* — (c) *Ibid.*

magnâ impensâ opus esset, ad secum illam conducendam. Ità *Sanch. Tolet. Filliuc. Salmant.* et alii communiter (a). Contrà non tenetur Mulier sequi Virum, 1. Si talis esset conventio inita in sponsalibus, et nulla accessisset nova et gravis causa, tunc non animadversa, ut dicunt *Castrop. Navar. Sanch. Salmant.* etc. (b). 2. Si vir vellet eam conducere ad malum finem. 3. Si illa in itinere deberet se exponere gravi periculo mortis, aut alterius gravis damni. 4. Si vir vellet peregre proficisci, ut dicunt *Nav.* et alii communiter (c). An autem uxor teneatur sequi virum exulantem? alii negant, sed probabilius affirmant *Sanch. Bossius*, et alii (d).

## CAPUT IV.

Ad quid tenentur Pastores animarum.

I. *De Residentiâ. Dispositiones Concilii* 14. *Si resides inutiliter* 15. *Bona fides non excusat à restitutione* 16. *De licentiâ requirendâ ab Episcopis* 17. *Ubi residendum sit Papæ, Cardinalibus, Episcopis, et Parochis*, 18. *Excusant Caritas, Necessitas, Obedientia, et Utilitas* 19. *An sufficiat licentia oretenus, an tacita, an præsumpta* 20. *Si addatur causa pro absentia, sed desit licentia* 21. *An omnes fructus restituendi sint* 22. *Et cui* 23. II. *De Sacramentorum administratione* 24. *ad* 27. *An tempore pestis, etc.* 28. III. *De Celebratione Missæ* 29. IV. *De Correctione* 30. *ad* 32. *Debet impedire, quominus clericalem habitum suscipiant, et denegare Fidem indignis* 33. *Debet inquirere, etc. et præcipuè schedulas Communionis, Matrimonii impedimenta* 34. V. *De Concione, et Doctrinâ Christianâ* 35. *et* 36. *Quæ gravioris momenti, ut annuntientur* 37. *ad* 44. *Aliæ obligationes Parochi, nempe* 1. *Exemplum* 2. *Assistere Moribundis* 3. *Eleëmosyna* 4. *Examinare obstetrices, etc. circa Baptismum* 45. *et* 46.

14. — **P**ARÓCHI multis oneribus devinciuntur, sed quinque præcipuè, I. Tenentur ad residentiam. II.

(a) *L. 6. n. 977.* — (b) *L. 3. num. 353.* — (c) *L. 6. num. 977.* — (d) *L. 3. n. 353.*

Ad Sacramentorum administrationem. III. Ad celebrandum Missam pro Populo. IV. Ad corrigendum. V. Ad prædicandam, et instruendum. De omnibus singillatim. Et 1. quoad Residentiam antè omnia advertendum quod fuit declaratum, et dispositum à Tridentino *Sess. 22. de Refor. cap. 1.* super hoc. Itaque Concilium 1. sufficienter declarat (ut communi DD. sententiâ intellectum est) omnes Episcopos, et præsertim cæteros omnes Curatos teneri de jure Divino ad residendum in loco, ubi cura exercenda est, dùm ibi Pastores dicuntur de jure Divino teneri pascere oves non solum Sacramentis, et Verbi divini prædicatione, sed etiam exemplo, cui non potest satisfieri, nisi per residentiam, quâ præsertim se ostendunt. 2. Statuit quoad Episcopos (quod procedit etiam de Parochis) ne à Diocesi discedant, nisi una ex sequentibus causis ità postulet, nempe Caritas christiana, vel necessitasurgens, vel debita Obedientia, vel evidens Ecclesiæ, aut Reipublicæ utilitas, approbanda tamen à Papâ, vel à Metropolitano, etc. (Benedictus XIV. tamen eam approbationem in Bullâ *Grave* soli Papæ reservat), pro idendo tamen, quantum fieri poterit, ne suâ absentiam oves aliquid patiantur detrimenti. Conceduntur cæteris Episcopis tres menses, quibus possunt abesse, sed ex æquâ causâ, et sinè gregis detrimento, de quo eorum conscientiam onerantur: hortantur tamen residere in suis Cathedralibus temporibus Adventûs, Quadragesimæ, Nativitatis Domini, Paschæ, et Pentecostes. Quoad Parochos dicitur, quod ipsi nequeunt Ecclesias derelinquere ultrâ menses duos, modò non adsit gravis causa procul morandi, sed tunc non nisi ex licentiâ *in scriptis* ab Episcopo obtinendâ. Imò etiam illis duobus mensibus non possunt Parochi discedere, nisi Episcopus approbaverit causam, et idoneitatem Vicarii, quem semper tenetur substituere Parochus cum discedit. 3. Declarat, et statuit omnes Pastores non residentes præter peccati mortalis reatum, pro ratâ absentiam non facere fructus suos ex curâ provenientes, et teneri *aliâ etiam declaratione non secutâ* ad illos restituendos vel fabricæ Ecclesiæ, vel loci Pauperibus, quâcumque compositione remotâ.

15. — Hoc supposito, dicimus I. cum *P. Viva* eandem culpam, et restitutionis obligationem incurri à Pastoribus absentibus, ac ab inutiliter in Ecclesiis residentibus; Et hoc tùm ex lege naturali: fructus enim dantur Pastoribus ratione utilis residentiae, non autem personalis tantùm; tùm quia Concilium expressè eos obstringit ad talem utilem residentiam, dùm dixit, *ubi injuncto sibi officio defungi teneantur*; Et novissimè luculenter hoc declaravit laudatus Pontifex Benedict. XIV. in præfatâ Bullâ *Grave* dicens, Residentiam non esse veram, nisi sit formalis, nempe cùm debito officio satisfit. Et notant *Barbosa*, et *Salmant.* cum *Vasq.* et *Garzia* afferentes Declarationem S. C. non reputari residere illum Parochum, qui duos menses per se non exercet munera principaliora, nempe Concionem, et Sacramentorum administrationem (a).

16. — Dicimus II. Parochum (aut Episcopum) non residendo, quamvis bonâ fide credat habere justam causam, etiam teneri ad restitutionem (quicquid dicant *Viva* et *Garzia*); et eâdem ratione superiùs assignatâ, dùm Pastor tenetur residere, non solum lege positivâ, sed etiam naturali ratione contractus inter Pastorem, et Ecclesiam initi, propter quem illi dantur fructus; undè non potest hos sibi retinere, semper ac (licèt sinè malâ fide) muneris sui partes non adimplet. Tantò magis quòd Benedict. XIV. in Bullâ *Ad universa* an. 1746. declaravit expressè, Episcopos absentes ultrà tres menses ab Ecclesiis sinè legitimâ causâ, et expressâ licentiâ Papæ, Transgressorum poenas incurrere, inter quas, uti dictum est, præcipua est poena, ut non faciant fructus suos (b).

17. — Dicimus III. licèt à Concilio requiratur licentia Episcopi tantùm prae absentia Parochi ultrà duos menses, nihilominùs Parochum non posse derelinquere Parochiam, neque per illòs duos menses, tametsi justam habeat causam, nisi Episcopus eam approbet, et nisi etiam (quod magis interest) approbet substitutum sufficiens (c). Cæterùm si unquam

---

(a) *L. 4. n. 127. d. 3.* — (b) *L. 4. n. 127. d. 2.* — (c) *L. 4. n. 113. dub. 2.*

accideret aliqua necessitas discedendi, quæ moram non pateretur, tunc benè permittitur Parocho discedere, modò sit pro brevi tempore, et Vicarium idoneum pro se substituat. Ità DD. communiter cum Decr. S. C. Debet tamen tunc Parochus certiozem facere saltem Episcopum de hâc suâ absentia, ut saltem licentiam obtineat pro alio tempore, quo abesse deberet, modò brevè reversurus non esset. Prætereà hujusmodi absentia admittit materiæ parvitatem, ut communiter dicunt *Castropal. Anach. Roncag. Barb. Holzman*, etc. Alii dicunt esse parvitatem materiæ moram unius hebdomadæ; multi alii etiam duarum, ut *Tournel. Cabassut. Sanchez, Roncaglia*, etc. (semper intelligitur, si substituat alium). Sed in Concilio Romano sub Benedicto XIII. (tit. 25. cap. 6.) prohibitum fuit Parochis abesse à curâ suâ ultra biduum sinè licentiâ Episcopi, aut ipsius Vicarii; rumor tamen communis est etiam à doctis viris divulgatus, quòd talis Synodus non fuisset in nostro Regno acceptata. *La-Croix* excusat à culpâ gravi Parochum, qui abesset duos menses sine licentiâ, sed cum causâ, et sine gravi damno gregis, dicens quòd talis absentia non reputatur à Concilio gravis, et pro se citat *Barbosam, Nav. Bonac.* et alios. Sed huic opinioni nescio acquiescere, dùm Concilium (ut dictum est) statuit ut Episcopus in tali absentia non solùm approbet causam, sed etiam Vicarii idoneitatem ob periculum quod contingere potest, quòd non idoneus substitutus possit magno damno esse gregi duos menses ei præsidendo (a).

18. — Queritur 1. Ubi debent residere Pastores? Papa et Cardinales Romæ. Episcopos, ut dicunt *Fagn. Salm.* etc. residendum in Cathedrali: nos verò cum *Cabass. Bonac. Holzman*, quòd possit residere in quodlibet loco Diocesis et hoc non potest hodiè revocari in dubium post Bullam Benedicti XIV. quæ incipit *Ubi primum* anno 1740. in quâ sic declaratum est: *Personalem in Ecclesiâ vestrà, vel Diocesi servetis residentiam.* Confirmando cæte-

---

(a) n. 123, v. Cæterum.



roquin, quod priùs expresserat Trident. his verbis *Obligari ad personalem in suâ Ecclesiâ, vel Diœcesi residentiam*. Parochus autem debet manere domi Ecclesiæ suæ, si adest; sin minùs, in aliâ domo in restricto Parochiæ existente, saltem moraliter; unde ipse commodè Ecclesiæ servitio præstò esse possit, et quò sui Parochiani facile accedere possint, ut Sacramenta suscipiant. Ideò dicunt *Bonac. et Salm.*, non judicari residere illum Parochum, qui longè à Parochiâ habitaret tribus milliaribus, nec duobus, ut rationabiliter dicit *La-Croix*. Imò non sinè ratione addit idem Auctor cum 4. aliis, non sufficienter residere Parochum, qui licèt inter limites Parochiæ habitaret, tamen non facile oves ad eum accurrere possunt (a).

19. — Quæritur 2. Quo sensu accipiendæ erunt quatuor causæ superius descriptæ à Tridentino? Et I. pro *Caritate* christianâ intelligitur, quando Pastori aliò proficiscendum est ad lites componendas, et præsertim interpotentes, aut ad liberandam aliâ Ecclesiam ab hæresi, aut ab aliis enormibus sceleribus. II. pro *Necessitate* urgenti intelligitur, si Pastori illic imminet mortis peculiare periculum; et præcipuè pro Parochis decrevit S. C. quòd ob talem causam potest Parochus per sex menses abesse, relicto ibi Vicario ex licentiâ Episcopi, quæ potest prorogari ad aliud temporis spatium, sed elapso anno debet induci ad renunciandam Parochiam. Loquendo autem de supradicto periculo, non intelligendum periculum commune, ut esset pestis (ut DD. communiter sentiunt, et S. C. declaravit), inimicorum invasiones, et hujusmodi; sed intelligitur periculum particulare respectu Parochi ipsiusmet (aut Episcopi) v. g. quia ab inimicis vexatur, aut quia spæ valetudini aer nocivus est, modo infirmitas non sit perpetua, et absentia non gravi detrimento futura sit gregi, alioquin aut Pastori residendum est in loco Curæ, aut abdicanda est Cura; observetur, quod super hoc præcipuè de Episcopis sancitum est à Benedicto XIV. in Bullâ

(a) *L. 4. n. 124.*

*Ad universæ edita anno 1746. (a). III. Pro Obedientiâ* debitâ intelligitur, si Parochus, aut Episcopus abesset, ut Papæ, aut Ordinarii mandatis obsequeretur propter bonum Ecclesiæ, aut Reipublicæ, aut quamcumque aliam causam gravem, ut dicit *Tournely*, dummodò absentia sit brevis; si enim diuturna est, requiritur necessitas boni communis. Et hic adverte quòd Episcopus non potest sibi assumere Parochum in Vicarium, aut Visitatorem etc. et apud se retinere, ut declaravit S. C. Sed hoc limitant *Castrop. Barbosa, Azor. et Vasq.* si nullus alius inveniretur (quod rarissimè accidit) qui supplere posset. IV. Pro *Utilitate* evidente Ecclesiæ, aut Reipublicæ intelligitur, quandò contingit Pastorem abesse, vel ut Synodo assistat, vel se, aut suos, aut Ecclesiam in negotio gravi apud Regium Tribunal defendat, ut dicunt *Soto, Bonac. Vasq. Ronc. et Salm.* cum Decisione Rot. Rom. Hoc tamen intelligitur semper ex licentiâ, et modò adsit alius, qui assistere possit. Et benedictus XIV. dicit in citatâ Bullâ, quòd si agatur de lite propriæ Familiæ, non concedendam Episcopis aliam licentiam præter menses conciliares (b).

20. — Quæritur 3. An licentia, quam obtinere debet Parochus, valeat, si data sit oretenùs tantùm? Affirmant *Lessius*, et alii dicentes scripturam tantùm requiri quoad forum, non autem quoad validitatem. Contrà id negant *Sanch. et Castropal.* qui dicunt à Concilio requiri licentiam in *scriptis pro formâ*, uti loquuntur, aliàs nullius esset roboris. Sed cùm hoc non constet, putant *Viva*, et *Croix* probabilem esse *Lessii* opinionem. Imò *Coninch. et Raginald.* admittunt etiam licentiam tacitam Episcopi cum consensu de *præsenti*. Addit *Mazzotta* sufficere etiam licentiam præsumptam de *futuro*, seu interpretativam. Sed *La-Croix* dicit hanc à nemine admitti. Et S. C. declaravit præfatam licentiam debere esse expressam (c).

---

(a) n. 125. v. Sic pariter. — (b) n. 125. — (c) L. 4. num. 123 dub. 1.

21. — Quæritur 4. An Parochus (aut Episcopus) teneatur ad restitutionem fructuum, foris morando sine licentiâ, sed ex causâ certè justâ? *P. Viva* ait (a) Parochum tunc peccare contrâ jus positivum, sed non contrâ naturale, ex quo infert non teneri nisi post sententiam ad fructuum restitutionem. Sed huic opinioni nescio acquiescere, dùm Concilium vult respectu Parochorum pro tempore absentiae (superius ut dictum est) non solum probandam causam, sed etiam substitutum, qui sufficitur. Et quoad Episcopos declaravit Benedictus XIV. (ut dictum est n. 16.) comprehendi sub nomine Transgressorum eos, qui derelinquunt Dioceses ultra *tres menses absque legitimâ causâ et expressâ Pontificis licentiâ*. Et animadvertendum, quod Transgressores juxta Concilium, et Bullam Benedicti, in poenam non solum damnati sunt ad fructuum restitutionem, sed etiam ad eos non acquirendos, dùm ibi dicitur: *non facere fructus suos*. Hinc etiam ex lege positivâ mihi videntur teneri ad restitutionem fructuum, quos perceperunt non suos; cùm enim delinquant in Ecclesiâ derelinquendâ sinè licentiâ, fructus acquirere non possunt (b). Saltem (dico ego) est dubium, an in tali casu possit Pastor suos facere fructus prædictos, et in dubio justi tituli nemo potest justè rerum acquirere dominium, ut dicitur *Tract. X. n. 42.* cùm agemus de Dominio (c). Cæterùm nescirem condemnare Parochum illum, qui ex causâ evidenter justâ discederet, et Oeconomum idoneum aliàs jam approbatum ab Episcopo, et qui actu jam reperiretur in Parochiæ servitio, relinqueret.

22. — Quæritur 5. An Parochus delinquendo in Residentiâ teneatur ad omnium fructuum temporis absentiae correspondentium restitutionem? Affirmat *Navar.* ex eo quia Concilium indefinitè obligat ad restitutionem. Nihilominus probabiliter dicunt *Barb., Bonac. et Viva* cum *Vasq.* et communi, ut asserit, teneri tantum ad eam partem, quæ residentiae oneribus respondet, dùm fructus non tantum ad hoc

---

(a) *Opusc. 3. q. 3. a. 3. n. 7.* — (b) *n. 127.* — (c) *L. 3. n. 669. et 761.*

dantur, ut hæc onera sustineantur, sed etiam ob alia, nempe ob Horas Canonicas, Missam, etc. Quare cum Concilium non expresserit contrarium, præsupponitur in hoc se remisisse naturali rationi, quæ dictat neminem privandum totâ mercede, qui jam parti onerum assumptorum satisfecit. (a).

23. — Quæritur 6. Cuinam restituendi sunt fructus à Pastoribus non residentibus? Cæteri Beneficiati, si omittunt recitare Horas Canonicas, possunt restituere pauperibus cujusvis loci (aut fabricæ Ecclesiæ, aut domûs Beneficii); sed Pastores non residentes, uti præcepit Trid. *Sess. 23. c. 1.* debent eos applicare omnino *fabricæ Ecclesiæ, vel pauperibus loci*. Nec sufficit eos applicare Animabus Purgatorii illius Regionis, Missas, aut alias preces offerendo: nam reverà Animæ defunctorum nequeunt amplius dici illius Regionis. Dicit tamen *Pl Viva* cum *Lesio*, quod benè possit Paroehus sibi illos applicare, si verè pauper sit; dummodò id non efficeret in fraudem, nempe si deesset Residentiæ animo sibi applicandi restitutionem faciendam; *fiaus* enim *nulli patrocinari debet*. Prætereà posset Parochus fructus sibi retinere, si pauperes ei illos donarent, sed postquàm ad eorum manus illi pervenerint; antea enim pauperes non possunt illos remittere, cum ipsi non acquirant dominium illorum fructuum, nisi ipost traditionem sibi factam (b).

24. — II. Parochi, aut alii Curati per se ipsos tenentur ad Sacramentorum administrationem. Quoad Sacramentum Pœnitentiæ attinet, Parochus tenetur illud administrare non solum tempore Præcepti, et in casibus gravis necessitatis, sed toties quoties (ut communiter *Lugo, Azor. Busemb. Salm. Holzm.* etc. contra *Silvest.* et pauciores) Pœnitentes confiteri etiam ex devotione petunt; nisi (ut rectè excepit *Adversa*) illi intempestivè, et nimis frequenter velent audiri; aut nisi essent alii Confessarii, et ipse esset legitimè impeditus (c). Undè dicunt *La-Croix*,

---

(a) *I. 4. n. 127. d. 2.* — (b) *L. 4. n. 128.* — (c) *L. 6. num. 58. et n. 623.*

Gobat. *Concina*, et *Salm.* peccare illum Parochum, qui redditur morosus, et difficilis ad audiendas Confessiones, præsertim si fuerit accitus ab infirmis, quibus ut præcepit S. Carolus Borromæus statim, et quâlibet horâ accurrere debet. Si tamen Curatus semel atque iterum extrâ necessitatem renueret alicujus Confessionem audire, probabiliter dicunt *Suarez*, et *La-Croix*, cum *Arriaga* (contrâ *Bonac.*) non peccare graviter, dummodò non adesset aliqua urgens necessitas, v. g. Jubilæi, Festivitatis sollemnis, ut limitat *Adversa* (a). Si autem Parochus haberet OEconomum ab Episcopo approbatum, non tenetur cum tanto rigore Confessionibus audiendis vacare; sed ei animadvertendum est quòd certus debet fieri OEconomum idoneum esse tam quoad scientiam, quàm quoad mores, aliàs rationem Deo ipsi redditurus est de omnibus damnis, quæ ob ejus ignorantiam, et pravos mores eveniunt. Semper expediens erit (obiter hic notamus) ut Parochus interdum arcessat Confessarios externos propter animas verecundas, præsertim si eo Concionator Quadragesimalis non solet accedere ad audiendas Confessiones.

25. — Quoad Communionem pariter communiter dicunt DD. teneri Parochum ad eam subministrandam, quoties rationabiliter, et opportunè de eâ expostulatur, dùm Pastor non solum debet prospicere, ut ejus oves Præcepta adimpleant, sed etiam, ut iis auxiliis præmuniatur, quæ eorum profectui conferre possunt. Hinc sancitum fuit ex Decreto S. C. anno 1679. approbato ab Innoc. XI. Pastores (Episcopos nempe aut Parochos) licèt ex justis causis possint Communionem taxare alicui subditò in particulari, non posse tamen præscribere dies Communionis pro omnibus generatim, sed debere in hoc remitti judicio Confessariorum (b) Cìrcà Viaticum quandò possit, et debeat dari, observa quòd dicetur in *Tom. III. in Appendice II. de Assistentiâ Moribundorum §. 14. n. 11.*

26. — Tenentur quoque Parochi curare, ut pueri Communionem Paschalem suscipiant, cùm illius

---

(a) *I. 5. n. 623.* — (b) *L. 6. n. 253. et 254.*

capaces sunt, nempè (regulariter loquendo) cùm pervenerint ad decimum usque ad duodecimum annum, ut dicunt *Lugo, Castr. Salin. Dicastil.* etc. aut saltem usquè ad quartumdecimum, uti dicunt *Suar. Laym. Wigandt, Antoine, et La-Croix.* Sed S. Carolus Borromæus in Nonâ Synodo Diœcesanâ præcepit suis Parochis, ut habiles redderent Communioni omnes pueros decennes; et quidem Parochi postea difficiles se præbent ad Communionem dandam pueris duodecim annos natis; sed cur? Ne sibi assumant onus eos instruendi. Proh quot Parochi hanc suam obligationem negligunt, quæ utique levis minimè dicenda est!

27. — Quoad Extremam - Uctionem sub gravi tenentur Parochi ad eam ministrandam iis, qui exposcunt. Et animadvertant, quod docet Catechismus Rom. (*part. 2. cap. 6. n. 9.*) *Gravissimè peccant, qui illud tempus Ægrotos ungendi observare solent, cùm, omni salutis spe amissâ, vitâ, et sensibus carere incipiunt.*

28. — An autem Parochi tempore pestis teneantur residere, et Sacramenta ministrare cum periculo vitæ? Quod ad Residentiam spectat, communiter docent DD. ad eam teneri cum S. Thomâ, qui ait (a) : *Ubi salus subditorum exigit Pastoris præsentiam, non debet Pastor gregem deserere propter aliquod periculum imminens.* Excipit tamen S. Doctor casum, quo Pastor possit sufficienter per alios providere, sed non loquitur de tempore pestis. Ceterum habemus apud *Fagnanum* (b). Gregorium XIII. declarasse tempore pestis omninò teneri Parochos residere; et alio Decreto (ut refert *Fagnanus* ibidem) declaravit teneri etiam Episcopos residere, cum potestate tamen (ut dixit) residendi in aliquo loco tutiori Diœcesis, et illius prospicere necessitatibus. Quoad Sacramentorum administrationem, approbando Decretum S. C. Concilii ann. 1576. ita declaravit; *Parochum suis Parochianis peste laborantibus*

---

(a) 2. 2. q. 185. n. 5. — (b) *In cap. Clericus de Cleric. non resid. num. 38.*

teneri ministrare dumtaxat Sacramenta ad salutem necessaria, nempe Baptismum, et Pœnitentiam. Cùm igitur dixerit *dumtaxat*, declaravit Parochos liberos esse ab obligatione ministrandi Communionem, et Extremam Uctionem peste laborantibus. Imò subjunxit, quòd possint ipsa Sacramenta Baptismi, et Pœnitentiæ per alios idoneos ministrare, se ipsos servando ad audiendas Confessiones benè valentium, qui aliàs ab ipsis abhorrent, si viderent eos accedere ad morbo decumbentes (a). Advertunt tamen *Suarez, Holzman, Concina, Castropal. Sporer*, et alii communiter, quòd si peste laborans (modò sensu careat) multò abhinc tempore non sit confessus, et probabiliter Parochus putaret illum esse in peccato mortali, tunc tenetur etiam cum periculo vitæ eum Extrema-Uctione munire (b).

29. — III. Parochi, aut alii Curati Seculares, aut Regulares, (et eò magis Episcopi) tenentur orare, et celebrare Missam, non solùm ut populus ei intersit, sed etiam applicare fructum pro illo singulis Dominicis, et Festis, ut novissimè statuit Benedictus XIV. in Bullâ *cum semper* an. 1744. declarans hoc valere etiamsi Curatûs congruam non haberet (*licet* verba Bullæ, *congruis redditibus destituatur*) et quamvis alicubi adsit consuetudo immemorabilis in contrarium. Et si Parochia vacaret, facultatem dedit Episcopo assignandi Oeconomum congruam portionem fructuum, ut ipse pariter in Festis possit celebrare pro populo. Tribuit pariter facultatem Episcopis dispensandi cum aliquo Parocho, qui aliter non posset vivere, ut possit applicare in Festis pro dantibus sibi eleemosynam, cum onere supplendi diebus ferialibus pro Populo. Hic autem dubium fit, de quo apud nullum Auctorem invenio mentionem fieri, an Parochus infirmus, cùm nequeat Missam per seipsum celebrare pro Populo, teneatur per alium? Plures Doctos in hoc consuli; Alii negarunt, dicendo hanc obligationem includi in generali onere, quod omnes Pastores habent orandi pro suis Gregibus; et cùm obligatio orandi sit merè per-

---

(a) L. 6. n. 233. — (b) L. 6. n. 729.

sonalis, sicut Parochus impeditus orare non tenetur orare per alium, ita impeditus celebrare non tenetur celebrare per alium. Sed ego cum aliis censeo oppositum tenendum, quia Parochus non solum tenetur celebrare pro Populo, sed etiam Missam Populo applicare, ut declaravit Benedictus XIV. an. 1744. in sua Bullâ, *Cum semper* (vide in suo *Bullar. tom. 4*). Id est juxta effata S. Pauli ( *Hebr. 5. 1.* ) : *Omnis namque Pontifex ex hominibus assumptus pro hominibus constituitur in iis quæ sunt ad Deum, ut offerat dona et sacrificia pro peccatis.* Et denique idem confirmat *vers. 3.* dicens : *Et propterea debet, quemadmodum pro populo, ita etiam et pro semetipso offerre pro peccatis.* Obligatio autem Pastoris orandi pro Populo est equidem personalis, sed obligatio applicandi Populo fructum Missæ est simul personalis (quia si potest celebrare per seipsum, nequit celebrare per alium) et etiam realis, cum sit una ex obligationibus muneri Pastoris annexis, prout dictum fuit in Concilio Tridentino *Sess. 23. de Reform. Cap. 14.* ubi mandatum fuit Sacerdotibus curam habentibus Animarum Missas celebrare *tam frequenter, ut suo muneri satisficiant.* Onus autem hoc offerendi Missas pro Populo est ex præcepto Divino, ut expressit idem concilium *cit. Sess. 23. Cap. 1.* ubi dicitur : *Cum præcepto Divino mandatum sit omnibus, quibus Animarum cura commissa est, oves suas agnoscere, pro his sacrificium offerre, verbique Divini prædicationes etc.* Illud autem præceptum Divinum habetur apud *Joan. (22. 17.)* : *Pasce oves meas.* Sicut igitur tenetur Pastor oves suas pascere prædicatione, Sacramentorum administratione, correptione etc. sic etiam tenetur pascere applicando eis fructum Sacrificii : quapropter, sicut Pastor impeditus prædicare, vel Sacramenta administrare, tenetur prædicare, et administrare Sacramenta per alium : ita impeditus applicare per seipsum Populo Missam, tenetur per alium applicare Sacrificii fructum qui est pasculum utilius, quo Populum juvare potest.

Si autem Parochi, et omnes quibus curæ Animarum commissa est, tenentur in Dominicis, et Festis præceptis Missam celebrare, et applicare pro Populo,



tantò magis ad id tenentur Episcopi, uti principales Pastores Animarum. Non autem ad hoc tenentur quotidie; nec obstat textus in *Cap. Quoniam, ult. de Privil.* ibi enim dicitur, quoad Episcopos, quotidiana celebratio Missæ, vel auditio, esse tantum de decentiâ, non verò de obligatione; hæc sunt verba textus: *Quoniam Episcopi, eorumque Superiores, se habent diversis ex causis à suis Ecclesiis, et Diœcesibus absentare frequenter, nec semper possunt commodè ad Ecclesias accedere pro Missâ celebrandâ, vel audiendâ in ipsis, sinè quâ eas transire non decet (nota non decet) absque causâ rationabili ullam diem: Præsenti Constitutione indulgemus eisdem, ut Altare possint habere viaticum, et in eo celebrare, ac facere celebrare, ubicunque, absquè interdicti transgressione illis permittit celebrare, vel audire Divina.*

Notandum demùm hîc obiter, quòd Benedictus XIV. in Bullâ suprâ relatâ, *Cùm semper*, declaravit insuper, Missam Conventualem, quæ à Clero Ecclesiarum quotidie cantatur, non posse applicari pro populo, sed omninò applicandam esse pro Benefactoribus in genere cujusque Ecclesiæ, quâcunque consuetudine non obstante (a).

30. — IV. Parochi, et tantò magis Episcopi tenentur etiam cum periculo vitæ ad corripiendos subditos, qui in peccato mortali existunt, aut in proximo periculo labendi in illud, et non solum in eorum extremâ necessitate, sed etiam in gravi semper ac fulget emendationis spes, ut communiter docent *Suar. Bonac. Valent. Coninch. Salmant.* etc. cum *S. Thomâ 2. 2. q. 175. a. 5. (b)*. Addimus cum *Cajet. Sanch. Castrop. Diana, Ronc. Holzm.* et aliis communissimè (contrà paucos) ad id teneri Pastores non solum ex Caritate, sed etiam ex justitiâ, propterea enim à Communitate stipendium recipiunt, ut ipsi pro viribus curent impedire vitia cujuslibet suæ ovis, ideòque, cùm deliquerint graviter in eo debito justitiæ, remanent etiam obligati ad fructuum restitutionem (c).

(a) *Vide in nostrâ Morali l. 6. n. 325. et 326. l. 3. num. 359.*

(b) *L. 3. n. 360. v. Parochi. -- (c) L. 3. v. sed Dub. I.*

31. — Et cùm ab aliquo potente reperitur aliquod scandalum dari, cui Parochus non posset occurrere, debet ille Episcopum certiores facere, ut de remedio occurrat. Et si forsàn Episcopus in hoc negligens esset, debet Parochus ad secularem Potestatem recurrere, si subditus laicus esset, aut alia remedia opportuna tentare, et non debet hoc negligere ob quemcumque humanum respectum, aut timorem. In summâ hoc est, quod Evangelium clamat, quòd *bonus Pastor animam suam dat pro ovibus suis*. Cùm in regione reperiuntur notabiles morum dissolutiones, quibus nullum occurrit remedium, Parochus tenetur curare, ut Missio eò adveniat (ille Parochus, qui Missionem non curat, suspicionem ingerit suorum morum; boni enim Parochi non præmittunt quarto aut quinto quoque anno Missionem arcessere). Denique ubi nihil intentatum reliquit, ut consuleret malo, etsi generaliter loquendo non esset præcisa obligatio faciendi correctionem, cùm nulla subest spes profectus, non debet ideò Parochus eam omittere; et etiam eam identidem repetat peccatoribus obstinatis, saltem in casu, quo periculum non subesset aliquod grave damnum subeundi; inserviet saltem illa correctio ad hoc, ne Parochus ab aliis subditis malè audiat, cùm videant scandalum durare, et Pastorem obdormiscere; præterquam quòd correctio inserviet, ne alii in exemplum inducantur in peccatis sordescere, cùm vident neminem adesse, qui eos corripiat aut exprobet.

32. — Et Pastor non solum tenetur peccata et scandala jam incepta auferre, sed etiam illa quæ facile postmodum excitari possunt, impedire. Præ ceteris præcipuè debet impedire, quominus sponsi accedant ad domum sponsarum: nam quamvis initio non accedant cum pravo fine, nihilominus experientia docet, quòd in huiusmodi occasione quasi omnes sponsi postea in peccata labuntur, et secum in illa trahunt etiam Parentes, qui permittunt eos versari cum sponsis. Quare debet Parochus omnibus modis curare, ut impediatur hæc spiritualis ruina duarum familiarum ex hac causâ proveniens, quæ ruina persequerabit usque dùm Matrimonium contrahetur, præ-

sertim si sponsalia jam sunt inita. Ideòque cuilibet Parocho elaborandum esset, ne verba sponsorum acciperet, nisi paulò ante Matrimonium contrahendum; cum experientiâ observemus, initis sponsalibus, totum illud temporis spatium inter nuptias intercedens esse tenipus peccatorum.

33. — Ad hæc, debet Parochus apud Episcopum impedire, ne habitus Clericalis conferatur Adolescentulis, aut pueris, qui suis moribus non sunt aliis exemplo, aut saltem indolem Ecclesiasticam non præse ferunt; nam si ipsi tacent, et sinunt eos induere habitum Clericalem, illi postea adolescerent in otio, et exui habitum erubescerent, per fas et nefas, quanquam vitiis onusti, niterentur ordinari, et Religioni magnæ essent pernicipi, cui in principio facile Parochus potuisset occurrere; post verò desperabitur remedium. Et ideò Clericos, qui jam initiati reperiuntur, curet saltem instruere, et per semitas vitæ devotæ dirigere, ut boni Ecclesiastici evadant. Igitur quàm rationem reddituri sunt Deo illi Parochi, qui fidem faciunt, illos ordinandos Sacramenta frequentare, et bonis esse moribus, quos sciunt nec esse assiduos in Sacramentorum susceptione, nec aliis bono exemplo, sed potius scandalo fuisse! Quid miserius esse potest, quàm cernere Clericos, qui vix bis, aut ter in anno confessi sunt et communicaverunt, Parochi fides audacter præsentare quâlibet hebdomadâ, aut bis in mensem fuisse confessos, et communicasse! De hujusmodi Parochis, qui has fides præstant, dicendum est defecisse à Fide, nam certè de omnibus flagitiis, quæ committunt isti, sic sinè Dei vocatione promoti, et de omnibus iis, quorum ipsi aliis causa sunt, Parochus sibi Deum vindicem facit, cùm Episcopi in hoc Parochis omnem fidem committunt. Sed Episcopi diligentiores non quiescunt in Parochorum attestationibus in hâc materiâ tanti momenti, undè salus populi pendet, nec Parochus coram Deo excusabitur, si fidem facit ex aliorum attestatione, nisi de eo, quod testatur circa Sacramentorum frequentiam, et bonos mores, plùs quàm certus fiat.

34. — Non tantùm tenentur Parochi ad correctionem faciendam, et ad impedienda peccata, et scan

dala, quæ vident, sed etiam ad diligentius inquirendum, an in Regione adsit aliquis subditus, qui in aliquo peccato versetur, et suo muneri non satisfaciat; Parocho enim commissæ est salus uniuscujusque ovis. Ità communiter docent DD. *Cajetanus*, *Laym. Soto*, *Salmant.* et alii cum *S. Thomâ* (a). qui ait: *Qui habet specialem curam alterius, debet eum quærere ad hoc, ut corrigat de peccato* (b). Præsertim invigilare debet, ut subditi omnes præcepto Paschali satisfaciant, sine personarum acceptatione; proptereàque cavere debet ne schedulas Communionis committat alicui Clerico. Elapso jam tempore Paschali, diligenter debet inquirere de iis, qui fortè non adimpleverint Præceptum (c): et debet eos monere, qui si non resipuerint, deferat ad Episcopum, ut Excommunicatione, aut interdicto saltem in illos animadvertat. Hoc quidem aliqui Parocho efficiunt cum personis popularibus, connivent autem et sopore torpentur cum aliis majoris existimationis. Quot istorum in Missionibus reperiuntur, qui per multos annos omiserunt Præcepto satisfacere, quin de hoc Parochus verbum quidem admonitionis cum eis impenderit! Prætereà cum aliquod Matrimonium contrahendum erit, debet inquirere, si aliquod subsit impedimentum, et si probabiliter putant subesse, tenetur suam eis negare assistentiam, et nuptias suspendere, donec saltem certior fiat Episcopus, ut ipse quid faciendum decideret, ut communiter *Sanchez*, *La-Croix*, *Ledesma*, *Vega*, et alii cum *Lugo*, qui cum *Coninch.* addit, quod si Ordinarius sciat aliquod impedimentum occultum, debet Matrimonium prohibere, licet hoc privatâ scientiâ noscat, et nequeat probare (d).

35. — V. Parocho tenentur Instructiones, et Concioniones facere Quoad Instructionem debent instruere, et docere plebem Mysteria Fidei, quæ sciri et credi debent, et quæ necessaria sunt ad salutem, prout sunt; 1. quatuor Mysteria principalia, nimirum esse

(a) 2. 2. q. 15. a. 1. --- (b) Vide l. 3. n. 360. D. II. --- (c) *Barb. de Offic. Par. c. 2. n. 7. et Segneri Paroch. instruct. cap. 23.* --- (d) *L. G. n. 54.*

unum Deum, et hunc esse omnipotentem, sapientissimum, Creatorem, et Dominum Universi, misericordem, et amabilem super omnia, præcipuè verò esse justum Remuneratorem bonis, et malis; Item Mysteria Trinitatis, et Incarnationis, ac Mortis Jesu Christi. 2. Sacramenta necessaria, quæ sunt Baptismus, Eucharistia, et Pœnitentia; cetera saltem cum suscipienda sunt; et dispositiones necessarias, ut hæc suscipiantur. 3. Articulos symboli Fidei, et hos interpretim Virginitatem Mariæ Sanctissimæ: Sessionem Jesu Christi ad dexteram Patris, nimirum ipsum in Cœlo esse in æquali gloriâ cum Patre: Resurrectionem Mortuorum in finali Judicio à Jesu Christo faciendâ: Unitatem Ecclesiæ Romanæ, in quâ tantum reperitur salus; et tandem æternitatem Paradisi, et Inferni. Quæ omnia quilibet Fidelis tenetur scire sub gravi. 4. Præcepta Decalogi, et Ecclesiæ. 5. *Pater noster*, et *Ave Maria*; et actus Fidei, Spei, Amoris, et Contritionis. Itaque sicut graviter peccat, qui negligit hæc scire (et quidem non tantum quoad voces, sed etiam quoad sensum), ita etiam graviter peccat Parochus, ut communiter DD. si per se, vel per alios idoneos (ipso legitimè impedito, ut loquitur Concil. Trident. *Sess.* 5. *c.* 2.) non curat ea docere saltem quoad substantiam suos subditos Pueros, et Adultos, qui ea ignorant. Hinc cum animadvertunt Parentes, aut Dominos non curare, ut filii, aut famuli intersint Doctrinæ Christianæ, tenetur cum Episcopo de opportuno remedio consilium capere, qui ut habetur in Trid. *Sess.* 24. *c.* 4 potest etiam per Censuras Ecclesiasticas ad id parentes cogere. Boni Pastores adnotatos tenent pueros, ut sciant quis eorum desit suas in hoc adimplere partes. Imò ait *La-Croix l. 2. q. 149. et l. 3 p. 2. n. 767.* si adessent alii rudes, qui adire Ecclesiam nequeant, quia custodiunt domum, aut greges, cum in gravi necessitate spirituali reperiuntur debere Parochum eò proficisci, ad eos instruendos cum *quantocumque suo incommodo*, ut loquitur præfatus Auctor. Saltem nos dicimus, cum hoc ei maximæ molestiæ futurum foret ob horum rudium multipliciter, curet saltem eos instruere tempore præcepti Paschalis, aut cum

accedunt ad suscipiendum Sacramentum Confirmationis, aut ad contrahendum Matrimonium. Expedi-  
etiam, ut exploret Magistros, et Magistras, an possint  
recte docere Pueros, et Puellas Doctrinam Christia-  
nam, et media conducentia ad in timore Dei vivendum.

36. — Quoad Concionem, Parochus tenetur ad  
concionandum omnibus Dominicis, ut præcepit Tri-  
dent. *Sess. 5. c. 2. de Ref.* (circa quod vide *Tract.*  
*VI. n. 5*). Sed hîc advertendum per Tridentinum  
non solum impositum esse Parochis pascere greges  
verbo Divino; sed etiam eos pascere pro captu eo-  
rum, facilitate sermonis, ut percipiant, quod præ-  
dicatur. Cum enim verum sit quod fides sicut diffun-  
ditur, ita conservatur prædicatione, *Fides ex auditu*;  
parum aut nihil proderunt populis conciones illæ,  
quæ non sunt conformes modo, quem tenuit Jesus  
Christus, et Apostoli secuti sunt, qui prædicarunt  
non in *persuasibilibus humanæ sapientiæ verbis*, sed  
in *ostentatione Spiritûs, et veritatis*, ut fatetur *S. Pau-*  
*lus*. Ideoque meritò *V. P. M. Avila* non Christi Mi-  
nistros, sed proditores vocabat eos Concionatores,  
qui ex vanitate prædicant, ut laudes assequantur;  
Et *P. Gaspar Santius* dicebat, quod isti sunt, qui  
magis Ecclesiam persequuntur, dum sic prædicando  
causa sunt, cur multæ animæ pereant, quæ per  
Conciones ad Apostolorum normam salvarentur.  
Vana verba, periodi contorti, et sonantes, descrip-  
tiones inutiles, dicebat *S. Franciscus Salesius*, sunt  
pestis concionis; cujus unicus finis esse debet volun-  
tatem Auditorum ad bonum movere, non autem inu-  
tiliter intellectum pascere; sicuti experienciâ doce-  
mur, hujusmodi exornato stylo concionandi Animas  
vitam non mutare, quia Deus cum vanitate non  
concurrit. Et hoc dictum sit de omnibus Conciona-  
toribus, qui cum vanitate prædicant, sed præcipue  
de Parochis, quibus Tridentino loco citato hæc præ-  
scribit: *Archipresbyteri quoque, Plebani, et quicun-*  
*que curam Animarum obtinent per se, vel per alios*  
*idoneos, si legitime impediti fuerint, diebus saltem*  
*Dominicis, et Festis solemnibus plebes sibi commissas*  
*pro sua et earum capacitate pascant salutaribus verbis.*  
Notentur verba illa, *pro earum capacitate*. Quare

certè transgrediuntur Concilii præceptum illi Pastores qui stylo sublimi ultrà populi captum prædicant.

37. — Hic etiam juvat advertere nonnulla, quæ valdè expedit ut Parochus in concionibus populo sæpè sæpiùs inculcet. Et 1. quòd ad emendationem non sufficit peccatum fugere, sed etiam oportet fugere occasionem peccati. Et loquendo de sponsis, qui versantur in domibus sponsarum, dicat tam ipsos, quàm illarum parentes, qui hoc permittunt: non posse absolvi, nisi removeant prædictam occasionem. 2. Adurgeat homines ne Tabernas adeant, eis patefaciendo innumera peccata, quæ illic, præter ebrietates, committi solent, nempe blasphemix, rixæ, scandala, obscœnitates, domesticæ discordiæ, subtractiones victûs à fami iâ, etc. 3. Sæpè declamet in vitium (quod est generale, præcipuè in Villis) loquendi inhonestè in campis, et in officinis, tantò magis si loquatur coram pueris, et puellis, et aliis diversi sexûs. Propter hos pravos sermones quot juvenes depercutunt! Et hortetur de hoc Parentes, Dominos, et Magistros officinarum, ut invigilent ad corrigendos, et ad puniendos suos filios, aut famulos, qui ità obloquuntur, præsertim tempore vindemiæ. 4. Instet ad demonstrandam sacrilegii enormitatem, qui confitentur, et communicant, omisso aliquo peccato in Confessione ob ruborem, et ut horror concipiatur, curet sæpè sæpiùs narrare aliquod terribile exemplum eorum qui sacrilegè confessi sunt ob ruborem, et postea infelici exitu perierunt, et poterit propterea ad manus habere libellum *P. Vegæ*, cui titulus: *Casi della Confessione* etc.

38. — Insinuet 5. necessitatem doloris, et propositi pro Confessione, etiam si ille sit de solis venialibus, hortando, ne quis accedat ad Absolutionem, nisi verè doleat saltem de aliquo peccato veniali eorum, de quibus se accusat, aut nisi materiam certam vitæ antea actæ exponat, cujus se verè pœnitet, ut valida fiat Confessio. At quoniam rudes parùm capiunt quomodò debeat esse hic dolor, sæpè explicet, quòd quisque Pœnitens, ut validè confiteatur (sive dolor sit Contritionis, siye Attritionis) debet ità pœnitere sui peccati, ut illud odio habeat, et detestetur super omnia mala.

39. — Hortetur 6. ut in iræ motibus, pro blasphemando, et imprecando, assuescant dicere: *Malè habeat peccatum meum; malè vertat Dæmoni*: aut *Domina mea adjuva me; Domina mea concede mihi patientiam*. 7. In horrorem ponat superstitiones sive vanas observantias, quæ solent adhiberi ad curandos morbos, aut ad cognoscendos fures, etc. 8. Inculcet parentibus, ut in filios animadvertant, præsertim dum sunt pueri, cum blasphemant, aut furantur, etc. Insuper invigilet ad observandum, et sciscitandum cum quibus illi versantur, et interdicat, ne cum malis sociis comitentur, aut personis diversi sexûs familiariter utantur. Prætereà ne in proprio lecto filios cubare faciant, vel nimis parvos ne suffocentur, aut ætate provector (putà si 6. annos excesserint) ne illi scandalum patiantur, et tantò minùs permittant mares, et femellas in eodem lecto dormire.

40. — Hortetur 9. persæpè suos Auditores, ut tentationes internas (præcipuè impuritatis) arceant invocando SS. Nomina Jesu, et Mariæ Hoc est maximum remedium adversùs tentationes. 10. Instet jugiter ad hortandum, ut cum quis in mortale prolapsus est; statim contritionis efficiat actum, quo Gratiam amiſſam recuperare possit, cum proposito quantociùs confitendi; et ab eis deducat hanc Dæmonis fraudem, nempè quòd tam Deus parcit uni, quàm duobus peccatis; cum contingere possit, quòd Deus expectet post primum, et post secundum suo auxilio eos destituat.

41. — 11. Doceat actus quos quilibet facere debet cum à cubitu surgit, nempè Gratiarum actionem, Oblationis, et Supplicationis, ter *Ave* recitando in honorem Mariæ SS. et proponendo vitare omne peccatum, et illud præsertim in quod sæpiùs labi solitus est, Divinam Matrem supplicando ut ab illo eum liberet; et hortetur omnes Matres, ut hoc praticari faciant quolibet manè à suis filiis. In concionibus significantes Parentes teneri ad curandum ut filii Sacramenta frequentent; ea enim non frequentando facile à Dei gratiâ excident, et huic tanto damno Parentes consulere debent. Dicant etiam, quòd ipsi peccant si sine justâ causâ filios à Matrimonio aut à



à Religione avertunt, aut eos ad Matrimonium invitos cogunt, sicut contrà peccant filii qui Matrimonio junguntur, Parentibus justè dissentientibus: vide quod dicimus de sponsalibus *Tom. 11. Tractat. XVIII. n. 10*

42. — 12. Cùm verum sit, ut suprà diximus, quod Parochus non solùm tenetur impedire malum, sed etiam ad promovendum bonum, hortetur populum ad visitationem SS. Sacramenti, et Beatiss. Virginis. Hanc visitationem potest ipse in communi cum populo obire, ut moris est in pluribus Regionibus. Et dicat, quòd qui ad Ecclesiam convenire nequeunt, saltem è domo hanc faciant. Maximè insinuet, ut Congregationem homines frequentent, et omnes communionem, præviâ præparatione, et subsequentibus gratiarum actionibus per actum Fidei, Amoris, Oblationis, et Petitionis, docendo eos modum practicum, quo fieri debent.

43. — 13. Curet sæpè, ut populus singulari studio Mariæ SS. devotionem prosequatur, insinuando quanta sit ejus potentia, et misericordia ergà suos devotos. Idcirco insinuet, ut recitent Rosarium in communi quotidie unà cum familiâ, ut jejunent sabbato, et celebrent Novenas septem Festivitatum, quas ex Altari annunciet Populo, quoties aliqua Novena accidit. Expediet propterea, ut sabbato ille conciunculam faciat, narrando aliquod exemplum Beatiss. Virginis, et semel in anno celebret aliquam Novenam solemniorem cum sermone, et expositione Venerabilis, et propterea uti poterit inter cæteros libro, quem typis edidi, cui titulus: *Glorie di Maria*, ubi collectam reperiet materiam, et exempla. Felix ille Parochus, qui suas oves ferventes tenet ergà devotionem Mariæ, nam illæ Virgine opitulante recte vivant, et Advocatam in vitæ exitu potentem experientur.

44. — Tandem potissimùm insinuet usum petitionis, nempè ut sæpè se Deo commendent, ab eo præsertim sanctam perseverantiam postulando propter Jesu, et Mariæ amorem: sæpius explicando quòd Divina Gratia, et præcipuè donum perseverantiæ, non obtinentur, nisi petantur: *Petite, et accipietis*. Et

*Tom. 1.*

M

publicet sæpè illam magnam Jesu Christi promissionem, quòd quicquid Patrem petierimus in ejus nomine, Pater dabit nobis : *Amen amen dico vobis, si quid petieritis Patrem in nomine meo dabit vobis. Joann. 16. 23.* Insinuet etiam instanter usum orationis Mentalis, et curet faciendam in Ecclesiâ unâ cum populo quolibet die, aut saltem quolibet die festo : docendo etiam modum quo fieri potest domi. Modus practicus Orationem Mentalem faciendi ponetur in fine *Tomi III. in Appendice I. De Directione Animarum Spiritualium.* Sed hîc mihi concedatur conceptum animi dolorem foras aperire. Froh magnam infelicitatem ! Quàm pauci sunt illi Parochi, et Confessarii, qui curam hanc sibi suscipiunt insinuandi suis pœnitentibus hoc tam magni momenti exercitium orationis Mentalis, sive Meditationis, sine quo valdè difficile est animam posse perseverare in Dei amicitia, et impossibile est in viam perfectionis se immittere Si aliqua attentio in hâc re adhiberetur, quot animæ viderentur in Dei amorem accendi ! Sed hoc quis non operatur, ne sibi aliquid incommodi suscipiat : alius ne stimulos suæ exprobrantis conscientiaë sentiat in suadendo aliis bonum, quod ipse negligit. Summa hæc est, quòd curæ hoc non est, quia parum diligitur Jesus Christus. O si Parochi, et Confessarii multum diligerent Jesum Christum, à quot efficerent, ut amaretur, et eos ab inferno liberarent ! Igitur exorandus Dominus est, ut, si velit amari ab animabus, faciat se amari à Sacerdotibus.

45. — Præter descriptas obligationes, quæ sunt principales, supersunt aliæ Parocho, quæ etiam non sunt minores. 1. Tenetur ipse cæteris esse bono exemplo. Pastor enim est illa lucerna *lucens, et ardens*, quæ in Evangelio describitur, ardens zelo sancto in interno, et lucens bono exemplo in externo. Secus ipse prædicet, et moneat alios pro viribus, quantum velit, ad incedendum per virtutum semitas, nisi ipse præcedat exemplo, subditi ne fidem quidem præstabunt iis, quæ ipse dicit ; nam homines *magis oculis, quàm auribus, credunt*, ut loquitur Concil. Urcellense (*Tract. 3. de Offic.*

*Cler.*) 2. Debet sedulò assistere moribundis, et præsertim peccatoribus habituatis, qui peculiari assistentiâ magnopere indigent. Verum est, quòd Parochus potest hanc assistentiam committere aliis Sacerdotibus, sed non debet fidere cuilibet Sacerdoti; nam in hâc occasione assistendi moribundis possunt accidere scandala non mediocris damni. 3. Tenetur succurrere pauperibus ex Parochiæ redditibus, qui supersunt, deducto tamen suo, et etiam suorum (si ipsi verè sunt pauperes) alimento. Observetur in hoc quod dicitur *Tract. XIII. Cap. II. Punct. II. de Beneficiatis*. 4. Tenetur diligenter examinare obstetrices, si ipsæ sciunt quod ipsas oportet scire ad conferendum Baptismum infantibus in casu necessitatis, et habetur in Rituali Rom. *de Bapt. pueris*; nam talis casus sæpè potest eis accidere, idèoque sub gravi ipsæ tenentur scire administrare Baptismum, ut dicunt *S. Antoninus, Reginald. Adversa* etc. (a). Præterea Parochus debet observare circa Baptismum, quod præscribit Parochis Rituale Rom., nimirum 1. Ut notent in libro distincto nomina Baptizatorum, parentum, et Patrinorum. 2. Ut admoneant Patrinos de cognatione, et de eorum obligatione contractâ. 3. Ut admoneant Matres, et Nutrices, ne secum accumbere faciant pueros. Nihilominus adnotant *Barbosa, Anacl. et Tournely*, et alii communiter, talem obligationem cessare, si omne periculum cessaret, v. g. si lectum fuisset spatiosum, et puer cæteroquin ob frigus quiescere non posset, et mulier soleret suum situm dormiendo retinere (b).

Notandum ultimo, quòd Benedictus XIV. in Const. 9. edita die 13. Dec. 1740. incipiente, *Ad Passiones* etc. Bullar. tom. 1. mandat in virtute S. Obedientiæ omnibus Parochis, sive Rectoribus etc. ut singulis feriis sextis horâ tertiâ post meridiem in omnibus Ecclesiis Cathedralibus, et Parochialibus campanam pulsare faciant, ut Fideles lucrari possint Indulgentiam centum annorum, recitando flexis genibus quinque *Pater*, et *Ave*, et orando juxtâ intentionem Pontificis.

---

(a) 2. 2. q. 184. a. 6. — (b) *Suppl. q. 36. a. 1. ad 3.*

46. — Tandem à bonis Parochis pendent boni mores, et salus populorum. Si in Regione bonus Parochus adest, ibi videbitur florere devotio, Sacramentorum frequentia, oratio mentalis, et bonum exemplum; sin autem Parochus erit pravus, tota Regio vitiiis, et scandalis redundabit.

## PUNCTUM II.

### De Episcopi muneribus.

I. De Ordinatione 47. *Ordinandi debent probari in spiritu* 48. *ad* 51. *Et in doctrinâ* 52. *De Seminario ad id instituto* 53. II. *De Parochorum delectu* 54. *Quæ istis Episcopus insinuare debet. Hic sermo fit de Puellarum Congregatione* 55. *De Confessoriorum electione, Sermo fit de Academijs* 56. *De Congregationibus particularibus Ecclesiarum* 57. *Debet invigilare super Missarum celebratione* 58. III. *De Visitatione* 59. *et* 60. IV. *De Curâ Monialium* 61. V. *De Residentiâ* 62. VI. *De Correctione* 63. VII. *De Eleëmosynâ* 64. *De Missâ, de Aditu patefiendo ad se concurrentibus, et de exemplo præcipuè circa mansuetudinem, paupertatem, orationem, etc.* 65. *et* 66.

47. — **P**LURIBUS aliis oneribus præ Parochis Episcopus tenetur. Præ cæteris I. circa Ordinationes Clericorum tenetur eligere in Altaris Ministros, dignos dumtaxat, et excludere indignos, S. Franciscus Salesius contremiscebat, dum hanc obligationem perpendebat, ideòque Sanctus neminem ad Ordines admittebat, quem bona vita non comitabatur, nulla in hoc habitâ ratione commendationum, nobilitatis, nec doctrinæ subjecti; dum doctrina, quæ malam vitam sociam habet, majori detrimento est, quia vitio auctoritatem adducit. Undè fiebat, quod paucos promovebat, prout hodiè factitant boni Episcopi; cum pauci sunt, ut veritatem fatear, qui Sacerdotio initientur ex verâ vocatione, et ut gloriam Deo præstent; et hinc fit, quod pauci Sacerdotes sunt, qui boni evadant, et utiles animabus.

Dicebat ipsemet Sanctus non esse Ecclesiæ necessarios multos Sacerdotes, sed bonos.

48. — Duo debet Episcopus examinare in iis, qui ad Ordines anhelant, Spiritum, et Doctrinam. Circà Spiritum, et mores, parùm tutus est ille Episcopus, qui Attestationibus Parochorum confidit. Hæ plerumque fiunt ob humanos respectus. Nec Episcopus potest tantum acquiescere soli bonitati negativæ Ordinandi, ut dicit *S. Thomas*, nempe quod nihil sciat mali de illo, sed oportet ut ejus bonitatem positivam cognoscat, tales notitias habendo, ut sufficientia præsentent indicia, quod ille vero Spiritu Ecclesiæ sit donatus. Dicit *S. Paulus* (1. ad Tim. 3.) oportere Sacerdotem (qui etiam sub nomine Episcopi comprehenditur à SS. Patribus, ut à *S. Ambrosio*, *S. Joanne Chrysostomo*, *S. Thomâ*, et aliis) non esse Neophytum, nimirum, ut explicat Angelicus, *non solum ætate, sed etiam perfectione*. Quare ait Trident. *Sess. 23. c. 12.* eos tantum debere assumi ad Ordines sacros, *quorum probata vita senectus sit*, significans eos bono habitu debere esse dotatos, et debere esse senes in virtute, juxtà illud Sapientiæ: *Ætas senectutis vita immaculata*, 4. 9. Propterea Episcopi zelantes non firmare solent supplices libellos, nisi prius secretò certi facti fuerint de eorum morum probitate à pluribus personis fide dignis, quæ noscunt subiectum. Advertatur hoc attentè, quia hoc est medium valdè efficax, imò necessarium Episcopo, ut tutam faciat suam conscientiam in Ordinationibus, quas habet. Ex his enim secretis cognitionibus Episcopus potest certus fieri non solum si Clericus ludis, insolentiis, pravis consuetudinibus sit aliis scandalo, sed etiam si positivè vitam spiritualem agit; Ecclesias, Orationem, Sacramenta frequentando, si solitariè vivit, aut saltè cum bonis sociis comitetur, si studio dat operam, si modesto habitu, et sermone incedit, et hujusmodi. Et si forsan notitiam habeat de scandalo positivo alicujus, tunc non debet sibi satis esse ordinariam probationem exigere, sed multorum annorum resipiscentiam observare debet: cùm suspicio rationalis tunc suboriat,ur,

quòd omne ab eo simulatione fiat, ut Ordines assequatur.

49. — Juxtà primævam Ecclesiæ disciplinam ei, qui in unum mortale lapsus fuisset, aditus ad Ordines penitus præcludebatur, ut testantur S. Hieronymus, S. Isidorus, et alii. Deindè aliquibus post sæculis excludebantur perpetuò ab Ordinibus saltem illi, qui ob aliquod grave facinus diffamati fuissent. Concedimus hâc nostrâ tempestate tantum rigorem non ubique practicari; nihilominus certum est (ut suprâ vidimus) nullum posse admitti ad Ordines, qui priùs in virtutibus probatus non sit, et præcipuè in diurnâ continentia, quam ordinati in sacris profiteri debebunt. Habemus in *C. Nullus dist. 25.* ex S. Gregorio: *Nullus debet ad ministerium Altaris accedere, nisi cuius castitas antè susceptum ministerium fuerit approbata*, lib. 1. Epist. 42. Et requirit S. Pontifex, ut huiusmodi probatio habeatur à multis annis dicens: *Ne umquàm ii, qui ordinati sunt, pereant, priùs aspiçiantur, si vita eorum continens ab annis plurimis fuit.* Hanc eandem probationem requirit Trident. *Sess. 23. c. 13.* dùm præscribit Ordines sacros non conferri, nisi iis, qui in minoribus Ordinibus probati sunt, nimirum quorum bonæ vitæ experientia habeatur.

50. — Summa igitur hæc est, quòd non potest dubitari, quin Episcopus graviter peccet admitiendo ad Ordines sacros indignum; indignus autem est quicumque sufficientem probationem non dedit de suâ positivâ bonitate. Rationem affert S. Thomas dicens (a) ad Ordinem sacrum requiri majorem sanctitatem, quàm ad statum Religiosum, quia per sacrum Ordinem deputatur ad dignissima ministeria. Et alibi (b), *Sicut illi, qui Ordinem suscipiunt, super plebem constituuntur gradu Ordinis, ità et superiores sint merito sanctitatis.* Itaque juxtà S. Thomam sicut Clerici per Ordinem sacrum, quem suscipiunt, elewantur ad gradum superiorem super

---

(a) 2. 2. q. 184. a. 6. — (b) *Suppl. q. 36. a. 1. ad 3.*

Populum Christianum, ità debent reperiri superiores merito sanctitatis. Ideòque asserit quòd opus habent eo gratiæ gradu acquisito (intelligitur certè de gratià non *gratis datà*, scilicet de illà, quæ nos gratos Deo facit, quia hoc solum meritum sanctitatis producit) quæ eos dignos reddat, ut inter Jesu Christi Ministros annumerentur; *Et ideò præexigitur gratia, quæ sufficiat ad hoc, quòd dignè connumerentur in plebem Christi.* Deindè concludit Sanctus quòd non sufficiet Episcopo ordinanti, ut aliquem ad Ordinem sacrum promoveat, si nihil mali sciat, sed etiam debet esse certus de probitate Ordinandi: *Sed ampliùs exigitur* (sunt Angelici verba) *ut secundùm mensuram Ordinis injungendi habeatur certitudo de qualitate Promovendorum.* Et ad hanc rem adducit auctoritatem S. Dionysii, qui dicit, neminem in Ministrum Divinorum (sicut est Sacerdos) audere assumi, nisi per diuturnum habitum se Deo conformem cognoscat: *In Divino omni non est audendum ducem fieri, nisi secundùm omnem habitum suum factus sit Deiformissimus, et Deo simillimus.*

51. — Præterea, sicut peccaret Ordinandus, si probitate positivà carens, nempe habitu bonæ vitæ jam acquisito, vellet in sacris Ordinibus initiari, saltem ob periculum, cui se exponit non sustinendi onus, quod suscipit ferendum, et præcipuè cœlibatûs, sine Dei vocatione, quam certè tunc non est præsumendum habere; ità tantò magis peccaret Episcopus, qui eum ordinaret, si suæ emendationis non præcederet diuturna probatio. Ait S. Thomas (a); *Ordines Sacri præexigunt sanctitatem, undè pondus Ordinum imponendum parietibus jam per sanctitatem desiccatis.* Adducit S. Doctor similitudinem fabricæ, dicere volens, quòd quemadmodum parietes recenter elevati pondus grave sustinere nequeunt; ità iis, qui paulò antè mores mutarunt, et adhuc ab humore vitiorum purgati non sunt, non est imponendus sacer Ordo, qui secum affert

(a) 2. 2. q. 189. a. 1.

debitum perpetuæ continentiæ, et vitæ exemplaris, quam Ministrum Altaris decet. Itaque Episcopus sacrum Ordinem indigno conferens, duplici titulo peccat: peccat quia suo muneri deest, et peccat quia coöperatur omnibus peccatis, quæ ille committet, et causa erit, ut alii etiam peccent. Hoc idem innuit S. Paulus (1. *Timot.* 5. 22.) cùm dixit: *Nemini citò manum imposueris, neque communicaveris peccatis alienis.* Super quem textum postea dixit S. Leo: *Quid est communicare peccatis alienis, nisi talem effici ordinantem, qualis ille est, qui non meruit ordinari?*

52. — Hactenus circa Spiritum, transeamus nunc ad doctrinam, quæ requiritur in eo, qui sacris Ordinibus initiari postulat. Ignorantia in Ecclesiis non solum sibi, sed etiam aliis nocet; et quod pejus est, ignorantia in Sacerdotibus est malum, cui nullum remedium invenitur, ut dicebat S. Franciscus Salesius, aut quia semper incapaces persistent, aut quia accepto Sacerdotio, difficulter cogi poterunt ad studendum. Debet ideo Episcopus maximè curare, ut inspiciat, an qui postulat promoveri, sit benè edoctus, et an sit studii cupidus: dùm qui studii non est amator, nunquam idoneus erit Ecclesiæ, imò necessariò erit pravius, nam (ut dici solet) otium est pater vitiorum. Propterea Prælati non sibi satis habeat examen quod plerumque solet fieri circa requisita ad Ordines, et super alias res consuetas, quas Ordinandi discunt in aliquo liberculo, sed postquam ordinati sunt, remanent indocti, uti erant antea. D. Fabricius de Capuâ felic. rec. Archiepiscopus Salernitanus in suis Ordinationibus, et præsertim Sacerdotum, suos Ordinandos examinari faciebat super totâ Morali. Scio etiam alium Prælatum (Episcopum Vigilantem), qui etiam à Clericis circa Moralem examen exigebat, unicuique Ordini assignando, tractatus quos scire debebant; itaque ad Sacerdotium ascendentes totâ morali ita callebant, ut ad Confessiones audiendas quisque idoneus reperiretur. O utinam et omnes Episcopi has semitas tenerent, non audirentur utique tot conquestus, uti plerumque audiuntur, quod non invenitur cui Con-



fessarii officium committatur ! Sed dicet aliquis , Concilium Tridentinum non exigere tantam scientiam ab Ordinandis. Sed respondeo , quòd non prohibet è contrario Concilium , quominùs Episcopus id exigat à suis Ordinandis ( ut loquuntur PP. ) , cùm videt talem esse suæ Diœcesis necessitatem. Tùm etiam Concilium tantùm statuit , quòd si talis scientia desit , ad Ordines nemo promoveatur , non autem præcepit , ut qui tali scientiâ præditus esset , ab Ordine repelli non possit. Sed loquendo etiam juxtà Tridentinum Concilium *Sess. 23. c. 14* dicit quòd promovendi ad Sacerdotium *ad populum docendum . . . ac ad ministranda Sacramenta diligenti exâmine comprobentur.* Quibus Innoc. XIII. in Bullâ *Apostolici Ministerii* pro Hispaniâ latâ , et è Benedicto XIII. pro toto Orbe distensâ , aliam benignam interpretationem ( ut testatur *Lambertini* postea Benedictus XIV. *Notif. 2. n. 16. et 36.* ) dare non potuit , quàm ut Ordinandi saltem Morali Theologiâ callerent.

53. — Quapropter Episcopo incumbendum est , ut Seminarium optimâ directione constitutum habeat , ab hoc enim ( statuendo ut nemo Ordines ambiat , qui saltem tres aut quatuor annos ibi commoratus non sit ) postea seliguntur Parochi , Confessarii , et ceteri Sacerdotes ; et ita poterit Diœcesim suam cultam reddere. Dixi *Seminario optimâ directione constitutum* , alioquin Seminarium esset majori perniciæ juventuti , et Diœcesi. Juvenes qui Seminarium ingrediuntur ( quantavis diligentia adhibeatur ) non omnes erunt Angeli : multi non afferunt eò spiritum ; sed ibi acquirere debent illum. Igitur si Seminarium erit malè directum eveniet quòd etiam illi , qui tanquàm Angeli ingrediuntur , paulò pòst tempore Dæmones evadent , et ipsi suæ vitæ contagione , contaminant totas suas Regiones. Quare Episcopus si ob redituum tenuitatem , aut ob aliquem alium defectum non posset suum Seminarium de bonis Ministris providere , tenetur penitùs illud extinguere , nisi velit Deo tot criminum et scandalorum rationem reddere. Oportet igitur , ut Seminarium optimâ disciplinâ floreat tam in Spiritu , quàm in literis. Quod ad spiritum attinet , 1. In Regulis constitutum sit ut

274 *Tract 7. De quarto Præc. Decalogi.*

nunquam desit meditatio, ut Missæ quotidie intersint, ut adsit Lectio spiritualis, visitatio Sacramenti, conscientiæ examen, silentium extrâ tempus solatii: et hoc omne servetur quotidie. Item quâlibet hebdomadâ confiteantur, et communicent, aut saltem bis in mense, arcessendo bonos et plures Confessarios, et etiam alios extraordinarios pluries in anno. Item quolibet mense sit unus dies solitudinis spiritualis, in quo aliquis Pater bono spiritu dotatus faciat sermonem; ac fiant quolibet anno exercitia spiritualia: oporteret etiam statuere, ne tempore feriarum Seminaristæ domos adirent: nam tunc (præcipuè tempore vindemiarum) isti intermittunt omnia exercitia spiritualia, et illo mense, aut bi-mestri cum foris vivunt, quantum boni acquisiverunt, amittunt, et regrediuntur in Seminarium vitiis et peccatis onusti. 2. Debet Episcopus procurare bonum Pastorem, qui sit zelo plenus, et experienciâ exercitatus, qui sit sagax ad suspicandum de unoquoque, et de quâlibet actione, et vigilans ad discurrendum per Classes, et defectus indagandos, sæpè Præfectos interrogando, et etiam aliquem fidiorem Seminaristam, qui præventus sit in quâlibet Classe, ut sibi referat defectus, quos animadverterit. 3. Debet procurare Præfectos moribus probatos, qui nunquam à suis Classibus absint, nec familiaritatem peculiarem permittant Seminaristas inter se habere; et animo forti sint in corripiendo, et fideles sint in referendos apud Rectorem quâlibet hebdomadâ delinquentes. 4. Expedit, ut Episcopus persæpè adeat Seminarium, et semel, aut bis in anno particulare scrutinium faciat, interrogando quemvis Seminaristam, an adsit aliquod inconueniens. 5. Præ cæteris debet invigilare Episcopus super pueros, qui in Seminarium recipiuntur, operam dando, ne ingrediatur aliquis, qui dudum exemplo bono non fuerit, secretas informationes de illorum moribus inquirendo. Satis est habere paucos et bonos, quàm multos et imperfectos, qui suæ vitæ turpitudine etiam bonos contaminent. Deindè utendum est stricto rigore miseratione omni postpositâ cum incorrigibilibus, et cum aliquo, qui scandalum positivum præbuerit, v. gr. impuritatis, tumultuatio-

nis, furti, etc. Hujusmodi Seminarista vix primâ vice tolerandus esset post diuturnam, et exemplarem animadversionem. Sed tutius consilium est cum statim à Seminario expellere, quia talis ovis contagione inquinata potens est totum Seminarium corrumpere. In hac re Caritatem adhibere non est Caritas, sed tyrannis, et injustitia, quia Episcopus ex justitiâ tenetur damnum commune evitare. Quod ad scientias attinet, maximè interest, ut Episcopus curet sedulò instruendos juvenes in linguâ latinâ, aliter in ceteris scientiis parùm proficient, et parùm intelligentibus latinitatem parùm gratum erit studere. Curet etiam, ut addiscant Philosophiam (et præcipuè logicam, sed meliorem) et Theologiam Scholasticam, et Dogmaticam. Sed præ ceteris in Diocesibus non numerosis necesse est, ut Seminaristæ omni sedulitate incumbant Morali, ut habiles fiant ad audiendas Confessiones, et Episcopus possit eorum operâ uti, cùm oportebit. Aliàs cum è Seminario profecti sunt, non ampliùs student, et inutiles Ecclesiæ remanebunt. Expediet etiam, ut exerceantur Seminaristæ nunc unus in docendis pueris doctrinam Christianam quâlibet hebdomadâ, nunc alius in aliquâ Conciunculâ colloquiis, etc. Ità ipsi et alii ergà Exercitia Apostolica pro tempore, cùm egressi fuerint à Seminario, amore inflammarentur. Ideòque utilissimum est instruere Seminaristas circà talia exercitia. Qui vellet alia circà bonum regimen Seminarii, potest observare meum parvum libellum, quem ad hòc typis dedi.

54. — Tenetur II. Episcopus ad eligendos bonos Parochos, et bonos Confessarios. Quoad Parochos, jam compertum est præferendos esse digniores. Etiam in Beneficiis simplicibus probabilius sententia cum *S. Thomâ* et aliis (a) requirit præferendos esse digniores, quia hoc exposcit utile commune Ecclesiæ. Sed quoad Parochialia certum est ex Trident. Episcopum teneri ad eligendum digniorem, spectatâ qualitate concurrentium, nempe consideratis prudentiâ, ætate, meritis, sed maximè scientiâ, et vitæ probitate. Quoad scientiam potest benè Episcopus se conformare Examinatorum

---

(a) *Lib. 4. n. 93.*

judicio ; sed sua præcipua diligentia sit, ut ipse cognoscat de vitæ probitate, inquirendo notitiam à diversis. In dubium revocanda non est maxima S. Francisci Salesii, quin in curis Animarum præferendi sunt sufficienter docti doctoribus, qui spiritu sunt inferiores. Et S. C. de Parochorum electione (*ap. Pias pag. 328. n. 19.*) sic decrevit : *Præferendus est minùs doctus (modo idoneus) quando ejus mores sunt approbati, doctiori, cujus vita ignoriatur.* Pro certo habendum Parochum probum uno mense utiliorem esse Populo, quàm Parochus doctior, sed minùs probus toto anno.

55. — Tenetur etiam Episcopus se informare ab aliis, an Parochi dent operam docendo pueros Doctrinam Christianam, an prædicent, et an prædicent ad Tridentini præscriptum. De hoc debet Prælatatus sæpè admonere Parochos, ut parvulis frangant panem Verbi Divini, hortando etiam eos, ut in concionibus contentur insinuare res, quæ ad usum conducunt, v. gr. quomodo repellendæ sint tentationes, quid dicendum, cùm occurrunt res adversæ, aut cùm injuriis quis afficitur, et hujusmodi. Item perquirant Episcopi, quâ diligentia Parochi, et Confessarii incumbant in audiendas Confessiones. In aliquibus locis Parochi, et Confessarii assistunt etiam Choro ; sed quid accidit? Accidit quòd dùm populus est magis frequens in Ecclesiâ, illi pergunt in Chorum, et populus per plures menses differt confiteri : ad hoc Episcoporum est remedium asserre. Item perquirant, an Parochi sint diligentes, ut pueri capaces decem annos circiter nati communicent, ut suprâ dictum est. Item, an seduli sint ad colligendas schedulas Communionis Paschalis, ut videant, an omnes præcepto satisfecerint : Si Orationis Mentalis exercitium perseveret, an visitatio Sanctissimi Sacramenti, et Beatæ Virginis fiat in communi in Ecclesiâ, ut in multis Regionibus in usu est. Et magni refert, ut curet Episcopus introduci hunc usum, ubi non est, et restaurari, ubi intermissus est ; et confirmari, atque augeri, ubi reperitur. Commendet quoque assistentiam Moribundis, et Congregationibus secularium. In pluribus locis nostris Missionibus introduximus Congregatio-

nes Puellarum. Hæ ità disponuntur; Congregentur ju aliquâ Ecclesiâ omnes Puellæ sexdecim annos et infra natæ, quolibet die Dominico vesperi: ibi Sacerdos notâ probitate ad hoc designatus, præter Doctrinam Christianam, exhibeat brevem et simplicem sermonem, aut instructionem suprâ Orationem Mentalem, aut circâ modum suscipiendi Sacramenta, aut circâ aliquam virtutem illi ætati convenientem, et postremò assignet devotiones, quæ praticari debent ab illis in illâ hebdomadâ, et præter Regulas, quæ præscribuntur, Sacerdos sæpè in memoriam reducat earum, ut non omittant recitare quotidie Rosarium, visitare Sanctissimum Sacramentum, saltem ex propriâ domo, conscientiam examinare, Sacramenta frequentare saltem semel in hebdomadâ, ut modesto ornatu ostendantur, et hujusmodi. Hæ Congregationes, sive collectiones Puellarum, causant postea bonum summum, quia si ipsæ postea nubent, faciliter docebunt filios ea, quæ ipsæ factitarunt, et Familiæ integræ sanctificabuntur.

56. — Præterea maxima debet esse Episcopi diligentia in seligendis Confessariis. A Confessariis pendet directio Conscientiarum omnium subditorum, et unus Confessarius, qui sit ignarus, aut moribus pravis, potest totam Regionem perditam facere. Non debet igitur Episcopus aliquem probare, quin prius certum fiat de ejus probitate, et doctrinâ, examinando eum super Morali. Nonnulli Episcopi facultatem audiendi Confessiones præbent indistinctè omnibus Concionatoribus Quadragesimalibus, et omnibus aliis qui in aliis Diocesisibus jam probati fuere. Sed alii Episcopi scrupulum sibi faciunt de hoc, et meritò, cum postea observantur tot mala, quæ oriuntur ab hujusmodi Confessariis cæco ductu approbatis. Si Prælatus cupit habere Confessarios, quorum operâ uti possit sine scrupulo, præter Congregationes casuum Moralium, quæ solent fieri in multis Diocesisibus, curet statuendas in quâlibet Regione Academias Moralis bis aut ter in hebdomadâ, notum faciendo, ab eo nullum admissum iri ad audiendas Confessiones, qui saltem per annum non interfuerit hujusmodi Academiis, quæ maximè utiles (ne dicam necessariæ) sunt illi,

278 *Tract. 7. De quarto Præc. Decalogi.*

qui vult in hâc scientiâ esse versatus, dùm ita meliùs dubia disceptantur, et doctrinæ magis in memoriâ figuntur.

57. — Optimum consilium esset etiam, si Episcopus curaret in locis grandioribus suæ Diœcesis Congregationes particulares statui Sacerdotum, et Clericorum magis vitæ spirituali addictorum, ubi se exercerent quâlibet hebdomadâ in praxi audiendarum Confessionum, aut Moribundis assistendi, aut celebrandi Missam et aliquandò se exerceant in aliquâ orationiculâ (vulgò *Sensimento*) faciendâ, colloquio, sermone, aut instructione. Hi congregati verò habebunt suas peculiâres regulas, v. gr. veste talâri semper vestiendî, aleis non ludendi etc. ut Populus de eis venerationem concipiat. Nihil refert hos paucos esse, imò expedit multos non esse, ut cautiores et magis addicti in operibus caritatis se servant. Et Episcopi diligentia erit sempereos ad id inflammare, ac etiam de eis benemereri, saltem dando eis Conciones Quadragesimales, aut alias conciones, etiam mittendo eos ad aliquam Missionem, aut Exercitia spiritualia faciendâ; hortando eos semper, ut stylo simplici et populari concionentur, si cupiunt fructum ex concionibus afferre.

58. — Item, ut benè advertit *Roncaglia* cum *Quarta*, et *Pasqual.*, Episcopus sub gravi tenetur invigilare, ut sui Sacerdotes Missam celebrent debitâ attentione et gravitate à tanto Sacrificio requisitâ sine verborum, et cæremoniarum conculcatione, ut impiè cum communi scandalo secularium à nonnullis, ne dicam plerisque Sacerdotibus, factitatur, quæ quidem conculcatio, cùm est notabilis (ut necessariò evenit), certè est peccatum mortale, ut dicetur loquendo de Eucharistiâ *Tom. II. Tract. XV. n. 84.* ubi considerabitur ex proposito hoc punctum: Sed quod ad Episcopos attinet, declaratum est in Trident. *Sess. 22. Decr. de observ. in Celebr. Miss.* eos teneri (et quia materia est gravis, certè gravis est obligatio) prohibere in suis Diœcesibus, quominus tali irreverentiâ Missæ celebrentur; *Decernit S. Synodus* (sunt verba Concilii), *ut Ordinarii locorum ea omnia prohibere sedulò curent, ac teneantur, quæ . . . irreverentia (quæ ab impietate vix seiuncta esse potest) induxit.*

59. — III. Maxima etiam esse debet cura Episcoporum in non negligendâ Visitatione oppidorum, quam Tridentinum districtè præcipit Episcopis in *Sess. 25. c. 4. de Ref.* ubi dicitur; *Episcopi propriam Diocesim per se ipsos, aut si legitime impediti fuerint, per suum generalem Vicarium, aut Visitatorem, si quotannis totam propter ejus latitudinem visitare non poterunt, saltem majorem ejus partem, itâ tamen, ut tota biennio per se, vel per Visitatores suos compleatur, visitare non prætermittant.* Et subjungitur: *Studeant quàm celerrimè cum debitâ tamen diligentâ visitationem persolvere.* O quot perturbationibus occurritur à Prælato, circumeundo, et propriis oculis res inspiciendo! Impossibile est benè Diocesim gubernare per alios, quàm per proprium Pastorem. S. Carolus Borromæus licèt bonis Ministris provisos fuisset, non omittebat ipse personaliter adire, et gravi incommodo visitare etiam Regiones remotiores suæ Diocesis. Ipse ut aliquoties adiret aliquod Oppidum cum visitatione reptans per lutulenta et nivosa loca iter fecit, et percurratur ejus vita, ut observetur, quantum ille operatus sit, et quantum suis Visitationibus profecerit. De S. Francisco Salesio narratur etiam, ut aliqua loca visitaret necesse sibi fuisse per semitas adeò difficiles, et asperas progredi, ut plantas pedum decorticas haberet, adeò ut per plures dies pedibus insistere nequiret. Aliquandò contigit ei super foliis dormire, et se roganti, ne vitam suam periculo exponeret, Sanctus respondebat: *Me vivere non est necesse; sed est necesse, ut muneri meo satisfaciam.*

60. — In istis autem visitationibus debet Episcopus efficere, ut suæ oves Pastoris vocem audiant. O quàm plusquàm aliorum proprii Pastoris vox movet! S. Carolus in visitatione solebat bis, aut ter indè concionari. Item debet examinare pueros, ut videat quomodò instructi sint; et itâ potest consulere Parochorum negligentiam, eos corripiendo, et etiam substituendo aliquem Oeconomum ad docendos pueros doctrinam Parochi impensis, saltem ad aliorum exemplum; item incumbat, præsertim in oppidis, in examinandos Sacerdotes in cæremoniis Missæ; et

suspendat à celebratione sine ullâ misericordiâ eos , qui uti debent , iis non callent. Potest etiam Episcopus ad examen revocare Confessarios approbatos , et ex justâ causâ etiam Parochos ; vide *Tom. II. Tract. XI. l. n. 75*. In primis debet scrutinium personale adhibere de omnibus Sacerdotibus Regionis unumquemque secretè interrogando , primò de suis muneribus , ut ei insinuet quod oportebit , et deindè de aliorum defectibus , et præsertim Parochi , et Confessoriorum , verbi gratiâ , quomodò suo muneri dant operam , cum quibus versantur , etc. Nonnulli Episcopi vigilantes apud se habent libellum memorialem , ubi qualitates bonas , aut malas uniuscujusque Ecclesiastici adnotant. Hæc monumenta possunt inservire sexcentis rebus bonis , et præcipuè , ut Parochorum electionem , Confessoriorum , aliorumque Ministrorum sibi certam faciant. Et postremò interroget de abusibus , scandalis , et discordiis , quæ in Regionibus serpunt. In istis visitationibus curet ad fervorem erigere Congregationes Secularium , ac eas de auxiliis opportunis providere assignando Concionatorem , ac Confessarium , si istis carent. Et tunc potest etiam particulares Congregationes Sacerdotum Missionariorum superiùs adnotatas instituere. Expediret etiam , ut in istis visitationibus Episcopus in Confessionali sederet sin ut Confessiones exciperet , saltem ut auscultaret aliquam personam , quæ illum in secretò alloqui vellet. Deniquè non prætermittat in visitatione Confirmationis Sacramentum adminisrare. Et compertum est apud omnes , graviter peccare illum Episcopum , qui diutiùs differt hujus Sacramenti administrationem , quia privat suas oves tanto bono. Quare dicunt *Castrop. Salm.* et *Croix* non excusari à mortali , si per 8. aut 10. annos saltem non circumit ( et suis expensis si consuetudo aliud non ferret ) Regiones saltem principales Diœcesis tale Sacramentum administraturus , modò hoc sibi non esset moraliter impossibile.

61. — IV. Episcopo curæ esse debent Monasteria Monialium ; quocirca 1. invigilare debet sedulò , ut Puellarum profiteri cupientium voluntatem exploret , quandoquidem major harum pars Religionem ingre-



diuntur non Dei vocatione, sed Parentum impulsione; et hinc fit postea, ut vitam ibi ducant inquietam, et introducant laxitates in Communitatem, cum damno communi, 2. Tempore visitationis, quæ quolibet anno fieri debet in Monasteriis sibi subjectis juxta Clem. *Attendentes de statu Mon.* (circa autem visitationem Monasteriorum exemptorum quoad Clausuram vide *Tom. III. Tract. XX. de Privileg. n. 82.*) debet ille particulare scrutinium adhibere, secreto sigillatim Moniales audire, ut cognoscat si in Monasterio adsit aliquod scandalum, aut morum dissolutio. Sit nihilominus cautus, ne partialis videatur alicui factionum, quæ forsán vigent in Monasterio. Audiat omnes, et postea de opportunis provisionibus prospiciat. 3. Non sit facilis ad extraneis veniam colloquendi cum Monialibus dandam. Suadeat sibi affectiones multoties non in principio contrahi, sed temporis progressu, et diuturnâ consuetudine, et unica animorum cum exteris adhæsió potest esse scandalo, et ruinæ toti Monasterio. Et si Monasterium extrâ suam residentiam esset, Episcopus admoneat Vicarium, cui hoc curæ est, ut nimis sit parcus et circumspectus in dandis hujusmodi licentiis. 4. Curet pariter pluries in anno in dandis Confessariis extraordinariis, saltem ut remedium afferatur Confessionibus nullis, aut sacrilegis, quas nonnullæ Moniales apud ordinarios faciunt; nec credat hos casus esse valdè raros; nec in hoc attendat Monialium postulationem, quia quæ magis indigent sunt magis difficiles ad requirendum extraordinarium. Et cum eum assignet, unamquamque obliget ad illum adeundum, si non ad confitendum, saltem ad colloquendum, uti statuit Benedict. XIV. in suâ Bullâ, *Pastoralis curæ*, qui explicando verba Tridentini *Sess. 25. c. 20.* Qui (Confessarius extraordinarius) *omnium Confessiones audire debet*; sic ait: *Extraordinario Confessario singulæ se assistant, ad Sacramentalem Confessionem apud ipsum peragendam, sive ad salutaria monita accipienda. . . ne aliæ censerentur necessarias habuisse causas, ob quas ad extraordinarii opem confugere coactæ essent, aliæ verò ab hujusmodi necessitatibus immunæ judicarentur.* Convenit etiam, ut Episcopus

sinè præcisâ necessitate non inducatur ad confirmandos ultrâ triennium Confessarios ordinarios. Postremò curet, ut singulis annis dentur Exercitia Spiritualia ab aliquo Sacerdote exemplari, et peritò communitatum disciplinâ : dico hoc, quia secus potest accidere, quòd potiùs damnum, quàm utile percipiatur.

62. — V. Episcopus (ut suprâ dictum est) tenetur ad residentiam, sed strictiùs Parocho, ille enim est illius gregis principalis Pastor. Episcopo in ejus ordinatione consignatur annulus, ut illum gerendo consideret non esse ampliùs sui juris, sed Ecclesiæ suæ sponsæ, ut perpetuò dùm vivit ei assistat. Conceditur tamen à Concilio Episcopis posse abesse tres menses ex causâ à Diœcesi; sed notetur quod Benedict. XIV. in Bullâ *Universæ*, declarans hanc causam (quæ à Tridentino nominatur *aqua*) dicit eam non debere esse futilem, nec ob vanum solatium : *Animi levitas, oblectationum cupiditas, aliæque fuitiles causæ excluduntur*, sunt verba Pontificis. S. Carolus cùm extrâ suam Diœcesim esse cogeatur, catenis (ut legitur in ejus vitâ) obstrictus esse videbatur ob vehemens desiderium, in quo erat citiùs redeundi. Cardinalis Bellarminus, licet à Papâ coactus Romæ morari, et extrâ Ecclesiam suam Capuanam, sed ob bonum Ecclesiæ universalis, sibi non videbatur ipse tutus in conscientiâ, ideòque se Episcopatu abdicavit.

63. — VI. Episcopus tenetur ad corripiendum, et ad scandalis occurrendum strictiùs quàm Parochi, tùm quia ipse est principalis Pastor, tùm quia majore auctoritate suâ potest malis consulere, invocando etiam, si opus est auxilium Principis secularis, uti fit à multis bonis Episcopis, et quidem voti sui fiunt compotes. Hoc est illud grave onus, quod Episcopi etiam Sancti mirum in modum formidant. Episcopus Neriti Sanfelix fel. mem. dicebat : *Quomodo somnum capere possum cùm scio aliquam ex ovibus meis Dei gratiâ carere?* Verum est tale officium odio esse non paucis, et Episcopo, ut benè eo fungatur, conciliandæ sunt sibi maledictiones, aversiones, et etiam vitæ pericula, sed bonus Pastor animam suam dat pro ovibus suis. Dicebat idem Episcopus Sanfelix : *Epis-*

copum in acceptando Episcopatu præparare se debere, aut ad esse inquisitum, aut venenatum, aut damnatum. Ut rectè occurratur scandalis, opus est, ut Episcopus attendat assiduè ad inquirendum, et non tantum à Parochis, vel à Vicariis foraneis, qui multoties ob humanos respectus, aut ne videantur negligentes, tacent; sed etiam perquirat ab aliis Sacerdotibus zelantibus, quos ubique locorum Diocesis ad id destinatos habeat, ut ab ipsis certior fiat de omni quod sciunt. Et cum ad se adeunt Parochi, et Vicarii, curet statim coram se admittendos, et citò expediendos, ut postea sint faciles ad redeundum, et ne excusationem asserant, se non posse tandiù expectare.

64. — VII. Episcopus tenetur ad largiendas eleemosynas. Ecclesia redditibus Episcopatum non instruit ut suo libitu profundat Episcopus, sed ut pauperibus succurrat; patrimonium pauperum est Mensa Episcopalis. Sanctus Gregorius ait Eleemosynam esse primum opus Misericordiæ, quod Pastor suo gregi præstare debet. O quot malis potest Episcopus Eleemosynis prospicere! Quot sponsi vivunt in peccato, quia eis non suppetit modus Matrimonium perficiendi! Quot pueri ob paupertatem dormiunt una cum parentibus, aut mares cum puellis in eodem lecto cum tantâ animarum pernicie! Ideòque boni Episcopi curant perquirere à Parochis de necessitatibus, quæ adsunt, et eis imponunt, ut se certiores faciant, quoties aliquod occurrit. Scio æquidem Doctores (a) dicere posse beneficium servare fructus superfluos suæ sustentationi (intelligitur semper ac pauperes in gravi necessitate constituti non sunt) ut eos impendat in emendis redditibus pro Ecclesiâ, aut ut in posterum aliis majoribus necessitatibus provideat; scio etiam Episcopos sanctos non legare nummos, aut prædia empta, sed æs alienum. Dedecet Episcopum, dicebat S. Carolus, ut fama audiatur, quod ipse nummos in arcâ retineat. Et Sanct. Thom. de Villanovâ dicebat quod si moriendo nummos reliquisset, se pro damnato habiturus esset.

---

(a) Lib. 5. n. 491. Qu. IV.

65. — Omitto deniquè sermonem facere de aliis Episcopi muneribus, v. g. de Missâ, quam ipse etiam plusquàm Parochus, tenetur in festis pro suis ovibus applicare. De accessu quem ad se patentem assiduè tenere debet subditis etc. et præcipuè Parochis, et Vicariis foraneis, quos statim ad suâ præsentiam admittere tenetur; nec non rationem exquirere à Vicario Capitulari de omnibus quæ fecit, ut præcipit Trident. *Sess. 24. c. 16. de Reform.* Sed omittere non possum, quin aliquid dicam de bono exemplo, quod ipse cunctis exhibere debet. Si Pastor cupit, ut oves ad montem ascendant, opus est, ut præeat ipse. Episcopus est illa lucerna à Deo super candelabro posita, ut luceat omnibus, qui sunt in domo Domini. Igitur oportet, ut dixit S. Paulus Tito, Prælatum omnium virtutum, quas in suo grege videre cupit, se exemplum ostendere. Sit exemplo *Mansuetudinis*, beneficia cum potest ingratum et inimicis, à quibus vexatur, rependendo. Perspicua exempla habemus, quæ nobis reliquerunt S. Carolus, S. Franciscus Salesius, et nuperrimè Emilius Cavaliere Episcopus Trojæ, de quo erat proverbium: *Qui ab Episcopo Cavaliere vult beneficiis affici, oportet ut de ipso malè mereatur.* Sit exemplo *Paupertatis*; verum est quod Episcopus quin justitiam lædât, potest impendere quantum suam decentem sustentationem decet, sed in cunctis deberet efficere, ut sancta paupertas splendeat. Paupertas in habendâ familiâ moderatâ; tot tantum sibi famulentur, quot suæ merè necessitati satisfacere sufficient. Paupertas in vestitu, et in modestâ ac simplici domûs suppellectili; Episcopus enim, qui Palatium sumtuosâ suppellectili, quâ laici oblectantur, ornatum habet, non utique ædificationem præ se fert populo. Sanctus Carolus è domo suâ omnia aulæa, tapetia, paramenta, et curiosas imagines penitus dimovit. Paupertas in mensâ frugali; et pro comperto habeatur, quod nihil aliud poterit magis Ecclesiastici apud vulgus existimationem conciliare, quàm frugalitas in victu: *vivere autem de Altari, non lucrari concessum est.* Can. 1. Dist. 44. Et Trident. jubet, quod *molestâ suppellectili, et mensâ, ac frugali victu contenti sint.*

Sess. 25. c. 1. Ità pariter exemplo sit *Orationis*; Cardinalis de Aretio consultò descendebat in Ecclesiam oraturus antè SS. Sacramentum, ut alios exemplo suo moveret. *Mortificationis*, abstinendo à quibusdam solatiis Prælatum non decentibus. *Solitudinis*; ad sæcularium consuetudines nisi ex necessitate non accedendo. *Modestie*; mulierum commercia aufugiendo, et cùm necesse sit, maximâ cautelâ cum eis agendo. *Zelo*; operam dando, ut in omni privato sermone de Deo eloquia immisceat, uti S. Carolo moris erat, dùm sibi cum quibuscumque agendum erat.

66. — Dixi, loquendo de Parochis, à bonis Parochis pendere subditorum salutem. Nunc dico à bonis Episcopis pendere salutem totius Diœcesis; nam Episcopus promovet bonos Clericos, bonos Sacerdotes, eligit bonos Confessarios, et bonos Parochos: suo bono exemplo, et vigilantîâ multùm confert, ut in probitate suâ illi perseverent, et ità universè in Diœcesi pietas vigere videtur. Proptereà in hâc materiâ de Pastorum debito fusiùs egi, quàm in aliis, quia in hâc agitur de bono, vel damno communi, quod omne in Pastorum bono, vel malo ductu positum est.

## TRACTATUS VIII.

### DE QUINTO PRÆCEPTO.

#### CAPUT I.

##### De occisione sui ipsius.

*Quandò licet vitam periculo exponere* 1. *et* 2. *De puerorum eviratione* 3. *De ebrietate* 4. *An liceat inebriari pro medicinâ* 5. *An ut evitet occisionem* 6. *An liceat inducere proximum ad se inebriandum, ut impediatur eum à majore malo* 7. *Quæ culpæ imputantur Ebrio, et de peccatis in causâ* 8.

I. — **N**EMINI directè, et ex proposito sinè auctoritate, aut inspiratione Divinâ (quâ nonnulli

Martyres mortem sibi ipsi sinè culpâ intulerunt) seipsum interficere permittitur. Itâ pariter non licet positivè gravi vitæ periculo se exponere; quare peccant Funambuli (qui super fune ex locis altis ludos repræsentant) et alii, qui venena sorbent, aut à viperis se mordere faciunt cum mortis periculo (a). Dictum est *directè*, quia *indirectè* aliquandò ex justâ causâ licet exponi periculo, ut communiter docent DD. (b). Hinc dicunt posse, immò debere militem perseverare in suo loco, licèt prævideat mortem passurum, et hoc est commune. Dicunt 2. licere cibum amico cedere in penuriâ, aut tabulam in naufragio, etiamsi jam eam apprehendisset; itâ *Toletus*, *Less. Silv. Lugo*, *Salm. Prad. Busemb. Victoria*, et alii communius, contrâ *Soto*. et *Laym.* et est valdè probabile; quia aliud est sibi mortem inferre, et aliud est omittere vitam tueri, quod est licitum ex justâ causâ, et hoc expressè docet *S. Thomas* (c) dicens: *Tradere seipsum morti propter amicum est perfectus actus virtutis, undè hunc actum magis appetit virtuosus, quàm vitam corporalem* (d). Dicunt 3. licere in casu incendii se præcipitem dare ex fenestrâ semper ac apparet spes mortem imminentem evadendi; itâ *Laym. Less. Lug. Fill. Bus. Salm. Spor et Elbel*, qui hoc permittit etiam reo morti, aut carceri perpetuo damnato (e). Dicunt 4. *Bonac. Lugo, Less., Salm. Trullenc.* etc. licere navi ignem applicare etiam cum periculo vitæ evidenti, ne cum damno communi in manus inimicorum veniat (f). Dicunt 5. *Laym. Busemb* et *Mazzotta*, quòd licèt aliqua virgo non possit se ipsam occidere, posse tamen se exponere mortis periculo, ne violetur; et hoc non videtur improbable tùm ob amorem, qui castitati debetur, tùm ob periculum peccati, quod semper adest in tali occasione (g). \*

2. — Licet 6. Reo non fugere cum possit, et etiam se Judici præsentare, ut puniatur, quamvis mortè

---

(a) *L. 3. n. 369.* — (b) *Ibid. n. 369.* — (c) *3. Sent. D. 29. a. 5. ad 3.* — (d) *Lib. 3. n. 366. et 971. v. Hoc.* — (e) *n. 367.* — (f) *n. 367. Qu. II.* — (g) *Ibid. est. Qu. II.*

multandus sit. Imò dicunt *Vasquez*, *Bonac.* et alii, quòd posset reus etiam se occidere, si Iudex eum carnificem sui ipsius constitueret; sed hoc communius negant *Suarez* cum *S. Thomá* etc. dicendo occisionem sui ipsius esse intrinsecè malam. Cæterùm communiter permittitur reo scalam ascendere, col- lum securi aptare, cùm tales actiones sint remotæ ad mortem (a). 7. Licitum est, imò laudabile Car- thusianis à carnibus abstinere etiam cum periculo vitæ, ut probabilius dicunt *Sanchez*, *Busemb. Salm.* etc. Sed si comederent in tali periculo (modò sal- tem probali) non peccarent, ut dicunt *Azor. Med.* et *Vict.* Imò si nullum alium cibum haberent, quàm carnem, eâ vesci tenentur (b). Dicunt 8. licere pœ- nitentiis, et jejuniis virtutis amore se mortificare, licèt vita per multos annos imminuenda foret, modò pœnitentiæ non sint immoderatæ (c). 9. Licet paulò antè mortem ob humilitatem se humi collocandum facere, ut moris est apud Monachos Trappenses; *Busemb.* cum *Vasq.* Insuper dicunt communiter *Sotus*, *Bonac. Salm.* etc. neminem teneri vitam ser- vare (nisi necessaria esset bono communi) mediis extraordinariis et valdè doloriferis, v. g. tibiam sibi incidendam, lapidem è vesicâ extrahendum permit- tere. Ità etiam dicunt *Less. Sanch. Escob. Turrian. Salm. Busemb.* etc. non teneri virginem ægotantem manus Chirurgi in verendis subire, ut suæ infir- mitati occurratur; potest tamen id sinere. Tenetur autem permittere, ut curetur, ab aliâ foeminâ (d).

3. — Contrà verò, sicut non licet se occidere ità nec sibi membrum mutilare, nisi ad servandam vitam. An autem sit permissum pueros evirare ad servandam eis vocem; negant *Laym. Lugo, Bus. Salmant.* cum communiori: sed alii affirmant cum *Trullench. Satonio, Elbel, Mazzotta, Pasquat. et Tamburin.* dummodò puer consentiat, et præciso vitæ periculo, tùm quia, ut dicunt, vocis conser- vatio in iis, qui sunt pauperes, videtur esse bonum magni momenti, quod fortunam, et statum præ-

---

(a) L. 3. n. 369. --- (b) n. 370. --- (c) n. 371. --- (d) n. 372.

stantiora offert; tùm etiam quia eunuchi videntur esse utiles bono communi, cùm illi suo cantu conferant, ut populi cum devotione in Ecclesiis detineantur; tùm deniquè quia id quotidie fit, et tolleratur à Prælatiis (a).

4. — Ad hoc quintum Præceptum spectat ebrietatis prohibitio, quæ est culpa gravis cùm perfecta erit; imò omnia mala probabiliter prævisa ab ipso, quæ committuntur, suæ culpæ imputantur: Sed advertendum est, ebrietatem, ut docent *S. Thomas*, et *S. Antoninus*, tunc dici perfectam, et graviter culpabilem, cùm quisvis advertenter, et voluntariè omni usu rationis se vino privat, dùm in hoc consistit malitia ebrietatis (juxtà *S. Thomam*) ut homo volens, et sciens privet se usu rationis (b). Ex quo infertur 1. non peccare graviter, qui eò non pervenit, ut careat ratione totaliter, sed remanet potens (licet caput vacillet) ad bonum, et malum discernendum; ità *Cajet. Laym. Tolet. Wigandt, Holzm. Salm. Etbel* et alii communiter (c). Infertur 2. cum *S. Thomá*, et aliis communiter non peccare graviter qui bibendo non judicat illà potionem, licet immoderatà, posse inebriari; dicit *S. Doctor* loco cit. non esse mortale ebrietatem, cùm accidit quod aliquis percipiat potum esse immoderatum, non tamen æstimet inebriare potentem. Nihilominus in hoc debet adverti cum eodem *S. Thomá*, et aliis, quòd si quis frequenter expertus sit se inebriare eandem quantitatem bibendo, tunc non excusatur à mortali: sicut etiam (addo) non excusatur, si tantam quantitatem sumit, quam advertit jam potentem esse ad inebriandum, etiamsi postea ad somnum capiendum se recipiat, quia jam actionem intrinsecè malam ponit.

5. — Queritur 1. An liceat se inebriare, cùm hoc esset necessarium, ut ab aliquo morbo mortali se liberet? Multi id permittunt, ut *Lessius, Castr. Laym. Tolet. Ronc. et Salm. cum Silvio, Crjet. Silv.* etc. dicentes comedere, et bibere tunc esse grave, cum hæc sunt immoderata, sed immoderatum dici

non

(a) *Vide l. 3. num. 374. -- (b) 2. q. 150. art. 2. --- (c) l. 5. num. 75.*



non posse id quod est necessarium ad vitam conservandam. Alii verò negant, ut *Tourn. Petrocor. Felix Pot. et Holzm.* dicentes voluntariam usûs rationis privationem esse intrinsecè malam. Nos autem sic dicimus : bibere vinum directè ad finem se inebriandi est intrinsecè malum, et non potest permitti; ideòque esset illicitum inebriari ad sensus sopiendos, ne dolorem ob aliquam incisionem, aut carnis adustionem sentiat : non autem cùm vinum sumeretur tamquàm remedium ad expellendos, aut corrigendos humores melancholicos, sicut licet matri (ut dicemus n. 23.) medicinam sumere, ut occurrat morbo, licèt per accidens fœtus animati expulsio eveniat (a).

6. — Quæritur 2. An liceat alicui inebriari ad evitandam mortem, quam alii sibi minantur, nisi ebrietur? Multi affirmant, *Less. Bonac. Castropal. Laym. Busemb.* etc. dicentes quòd in tali casu rationis privatio non intenditur, sed permittitur, ut dictum est in casu antecedenti. Sed probabiliùs negant *Azor. Wigandt, Tourn. Holzm. Salu.* etc. qui rectè dicunt quòd in casu antecedenti ideò non licet ebrietatem permittere, in quantum periculum est intrinsecum, qualis est morbus, qui expelli desideratur : sicut non est permissum matri fœtum expellere, ne occidatur à parentibus, cùm hoc sit intrinsecè malum, prout habemus ex Propositione 34. ex proscriptis ab Innoc. XI. Et ità docet Sanctus Augustinus *serm. 232. de Tempor.* ubi loquendo de eo, qui ab aliis cogeretur ad inebriandum dicit : *Etiam si tibi diceretur, aut bibas, aut morieris, melius erat, ut caro tua moreretur, quàm per ebrietatem anima moreretur* (b).

7. — Quæritur 3. An liceat inducere proximum ad se inebriandum, ut impediatur, quominùs majus malum committat, v. g. sacrilegium, homicidium? Alii negant, sed non videtur improbabilis sententia *Lessii, Medinae, Gob.* et aliorum, qui permittunt ob id quòd dictum est *Tract. IV. n. 30.* ubi dictum est cum *Soto, Sanch. Cajet. Mol. Nav.*

---

(a) N. 76. — (b) cit. n. 76. Qu. II.  
Tom. I.

*Castr. Bonac.* licitum esse suadere alicui peccatum minus (licet alterius speciei) ut liberet eum à peccato majore, quod committere est determinatus (a).

8. — Quæritur 4. An imputentur ebrio ad culpam omnia mala, quæ in ebrietate committit? Resp. si ebrietas non est voluntaria, quippè nec etiam peccata erunt mala quæ ex illâ sequerentur. Si verò est voluntaria, certè erunt peccata omnia mala prævisa, et etiam quæ moraliter prævideri debuerant. Hinc prævisa reputantur mala, quæ ebrii ordinariè committere solent, vel quæ aliquis antea ex aliis ebrietatibus novit committere, et etiam omnia peccata ad quæ se noverit propensum, cum enim in ebrietate, omisso rationis usu, natura necessariò operetur, facillè ipsa prorumpet in ea vitia ad quæ propendet. Contrà verò non reputantur prævisa alia mala, quæ casu eveniunt. Ità *Caj. Azor. Less.* et *Salm.* cum aliis (v). Rectè autem advertunt *Lessius*, et *Salm.* (c) cum aliis, quòd gravitas peccatorum quæ in ebrietate committuntur, accipi debet juxta mensuram advertentiæ, et voluntarietatis illorum in causâ, scilicet in ebrietate. Quod autem sentiunt *Salmanticenses* cum *Soto* n. 30. et 31. ubi distinguunt et dicunt mala operis, ut occisio, fornicatio, etc. hæc imputari; non autem mala oris, ut contumeliæ, blasphemias, et perjurias: quia, ut dicunt ea verba prolata ab usu rationis experte, sunt purè materialia, tamquam prolata à psittaco, undè non habent malitiam formalem. Huic opinioni accedo circà contumelias ergà homines, quia reverà cum illæ prolatae sunt ab ebrio, non habentur dedecori, modò ille non patefaceret aliquod infame delictum; non verò circà perjurias, et blasphemias, quia hæc licet materialiter prolatae, semper sunt Deo injuriosæ; et si illæ non sunt voluntariæ in actu, sunt voluntariæ in causâ.

---

(\*) *N. 77. v. Quær.* — (b) *Cajet. 2. 2. 9. 150. a. 4. Azor. l. 7. 4. 6. Less. l. 4. c. 3. n. 25. Salm. tr. 25. de V. Præcept. cap. 2. ex n. 26.* — (c) *Less. loc. cit. et Salm. n. 33.*

## CAPUT II.

### De occisione Proximi.

*De occisione ex publicâ auctoritate* 9. et 10. *Ob propriam defensionem* 11. *Confutatur super hoc puncto opinio cujusdam Neoterici* 12. *De occisione Tyrannorum, an unquàm liceat?* 13. *De honoris invasore* 14. *Bonorum* 15. *Pudigitæ* 16. *Ob Proximi defensionem* 17. et 18. *An liceat prævenire aggressorem?* 19. *De Adultero etc.* 20. *De innocentis occisione* 21. *De Abortu* 22. *An incurrant excommunicationem prægnantes?* 23. *De dubiâ fœtus animatione* 24. *An mater possit sumere pharmacum cum periculo abortûs?* 25. et 26.

9. — **N**EMINI licet hominem occidere, nisi auctoritate publicâ, vel ob defensionem propriam. *Auctoritate publicâ* possunt certè occidi rei condemnati, et etiam proscripti (vulgò *Fuorgiudicati*), modo inveniantur in loco Principis proscribentis. Cæterùm nesatellitibus quidem licet sontem occidere profugum, aut obstantem, licèt sit jam mortis damnatus, nisi de hoc habeatûr speciale Principis mandatum. Hoc mandatum cæteroquin potest dare Princeps, quandò reus jam esset condemnatus, aut convictus, aut sufficienter diffamatus de aliquo capitali delicto, et si fugere permetteretur, timeri possent ab eo mala majora, ut dicunt *Layman*, *La-Croix*, *Elbel*, et alii. (a). Contrà non potest Princeps præcipere occisionem rei in carcere detenti, et non adhuc morti damnati, quamvis scientiâ privâtâ constaret eum morte dignum esse; dummodò (limitant *Salman*) ejus delictum non esset notoriûm, aut periculum esset seditionis, si moraretur eum supplicio necare, aut Principi esset dedecorî, si ille juridicè damneretur (b).

10. — Hic duo notanda sunt. *Primum* est, quod non possunt Clerici, licèt potestate laicali gaudeant,

---

(a) *Lib. 3. n. 376. et 380. v. Decius.* — (b) n. 377.

damnare aliquem morti, nisi expressam Papæ dispensationem obtineant. Cæteroquin Episcopi qui dominio temporali dominantur in aliquâ Regione in causis sanguinis benè possunt suam potestatem laicis committere; ità *Bonac. Trullench. et Salm.* cum *S. Thomâ (a)*. Secundum est, quòd iudex sub gravi tenetur concedere damnato tempus confitendi, et etiam communicandi (modò non timeatur aliter grave damnum); nam tunc urget præceptum Divinum, cùm reverà reus sit in articulo mortis; itàque ille potest communicare etiam non jejunos, ut dicunt *Suarez, Lugo, Navarrus, Salmant.* etc. Si autem reus animo obfirmatus nollet confiteri, factâ ei monitione, potest executioni sententia mandari, *Bonac. Trullench. Salm.* etc. (b).

11. — Insuper ob propriam defensionem licet injustum aggressorem interficere, modò fiat cum moderamine inculpatæ tutelæ, nempè si non inferatur proximo damnum majus illo, quod necessè est ad vitandum proprium. Hoc omni lege Humanâ, et Divinâ permissum est, ut dicunt *S. Thomas (c)*, *Catechism. Roman.* (d), et DD omnes, et habetur expressè in *Cap. Si verò, 3. de Sentent. excom.* ubi dicitur; *Cùm vim vi repellere omnes leges omniaque fura permittant.* Quidam Auctor Rigorismi amicus asserit, *S. Augustinum*, et *S. Thomam* tenuisse non licere hominem occidere, neque ob defensionem propriæ vitæ; sed prorsùs errat, nam *S. Thomas loco citato* pluries expressè docet id esse licitum; dummodò (ait) non intendatur homicidium; sed tantùm propria defensio; et sic *cit. art. 7. ad 1.* explicat intelligendum esse *S. Augustinum*. Nec obstat dicere quòd præferenda sit vita spiritualis proximi vitæ temporali propriæ; quia hic ordo caritatis (ut respondent *Petrocor. Lessius*, et alii DD. communiter) tunc locum habet, cùm vita propria est absolutè necessaria salutì spirituali proximi, qui in extremâ necessitate manet (v. g. si puer manet in periculo proximo sinè Baptismo moriendi, tunc adest obligatio vitam fundendi, ut ille

---

(a) *Lib. 3. n. 378.* — (b) *cit. n. 378.* — (c) *2. 2. q. 74. a. 7.* — (d) *De V. Præc. n. 8.*

baptizetur), non autem cùm aggressor voluntariè seipsum conjicit in periculum damnationis ; tunc enim ejus prava voluntas non potest aliis auferre jus quod habent propriam vitam tuendi (a).

12. — Sed quidam *Neotericus*, *Eusebius Eraniste* in sua defensione doctrinæ S. Thomæ circa Tyrannorum occisionem *Epist. I. pag. 54. num. 111.* occasione hujus materiæ progreditur ad discutiendum, an liceat viro privato injustum Aggressorem interficere, conaturque probare ex eodem S. Thomâ illicitum esse privatis Aggressores interficere, etiam ad propriam vitam servandam. Oportet igitur Angelici sententiam perpendere. S. Doctor 2. 2. p. 74. a. 7. scribit, aliquem actum plures effectus habere posse, unum in intentione, alium præter intentionem. Ex actu autem propriæ defensionis, duo possunt effectus sequi, conservatio propriæ vitæ, et occisio Aggressoris ; hinc autem S. Thomas dicit, quòd actus qui fit ad vitam servandam, licitus quidem est ; sed potest illicitus reddi ; si improporcionatus sit ad finem tuendæ vitæ, prout esset, si quis pro suâ defensione majorem vim adhiberet, quàm opus esset. En Angelici verba : *Potest tamen aliquis actus ex bonâ intentione proveniens illicitus reddi, si non sit proportionatus fini. Et ideò si aliquis ad defendendum propriam vitam utatur majori violentiâ, quàm oportet, erit illicitum. Si verò moderatè violentiam repellat, erit licita defensio. Nam secundùm jura vim vi repellere licet cum moderamine inculpatae tutelæ. Nec est necessarium ad salutem, ut homo actum moderatæ tutelæ prætermittat ad evitandam occisionem alterius, quia plus tenetur homo vitæ suæ providere, quàm vitæ alienæ. Sed quia occidere hominem non licet, nisi publicâ auctoritate propter bonum commune, ut ex supradictis patet; illicitum est quòd homo intendat occidere hominem, ut seipsum defendat, nisi ei qui habet publicam auctoritatem.* Ex his postremis verbis, *Illicitum est quòd homo intendat occidere hominem, ut seipsum defendat*, infert præfatus Eusebius Eraniste, S. Thomam docere, quòd homo ita se conti-

---

(a) Lib. 3. n. 380.

nere debet intrâ limites justæ defensionis, ut nullam ipse nec minimam voluntatem habeat interficiendi Aggressorem, quamvis ad propriam vitam servandam id oporteret. Undè concludit quòd ut tale homicidium sit inculpabile ex parte Petiti, illud contingere deberet per merum accidens, ità ut Invasor maneret occisus, quin ulla voluntas Petiti in occisionem illam partem haberet. Et sic ait intelligendum esse illud S. Thomæ, *Illicitum est quòd homo intendat occidere hominem*. Ferè eodem modo se explicat *Juveninus*, dicens tunc Defensorem esse à culpâ immunem in tali homicidio, *cùm id contingit ex ipso Aggressore, qui irruit in Defensoris Ensem*; ità ut Aggressor decedat non jam ex vulnere inflicto à Defensore, sed ex vulnere illo quod ipsemet Aggressor à seipso sibi infligit, Petitem aggrediendo, sive ut alius Auctor ejusdem opinionis exprimit: *Si ex seipso Aggressor se transfigit ense Defensoris*.

Sed hoc dico, non esset quidem *vim vi repellere*, sed esset velle repellere vim sine vi. *Vim vi repellere* importat, quòd Petitus talem opponat vim, quæ correspondeat, ac sit proportionata ad repellendam vim Aggressoris. Idque satis innuit S. Thomas inquiens, tum illicitum esse actum defensionis, cùm non est proportionatus ad finem: *Potest tamen actus illicitus reduci, si non sit proportionatus fini*. Deindè subdit: *Et ideo si aliquis ad defendendam propriam vitam utatur majori violentiâ, quàm oportet, erit illicitum*. Adverte verba, *Si utatur majori violentiâ, quàm oportet*; tunc igitur Petitus immoderatè, et culpabiliter se defenderet, si uteretur majori violentiâ, quàm opus esset. At, inquit, si Aggressor ensen jam impugnat ad feriendum, quomodò posset dici licitum esse Petito vim vi repellere, si ille aliud non posset agere, quàm manus adhibere, vel ense uti tantùm ad repellendos ictus Aggressoris quin eum lædere posset? Hæc defensio quippè est valdè improporcionata ad vim invasoris repellendam. Quis non dicet, quòd defensio hæc conjuncta esset cum periculo moraliter certo subeundæ mortis? Valdè enim difficile est, imò moraliter impossibile, quòd Defensor, si fugere, aut abscondi non valeat, mortem hoc

modo evadere possit. Adde quòd S. Thomas , ut legitur sub initio citati articuli 7. referens legem Exodi absolute admittit licitum esse Aggressorem interimere pro vitæ propriæ defensione ; sic enim ait : *Sed contrà est , quòd Exodo 22. dicitur : Si effringens fur domum , sive suffodiens inventus fuerit , et accepto vulnere mortuus fuerit , percussor non erit reus sanguinis. Sed multò magis licitum est defendere propriam vitam , quàm propriam domum. Ergò etiam aliquis occidit aliquem pro defensione vitæ suæ , non erit reus homicidii.* Notentur verba Exodi , et S. Thomæ , *Percussor , Occidit* ; ergò tam Scriptura , quàm S. Doctor admittunt esse licitum *percutere et occidere* inimicum pro tutelâ vitæ ; at si Petitus nullo modo lædat Invasorem , et homicidium per merum accidens evenit , eò quòd Invasor ipsemet sibi mortem infert , se impellens in ensem Defensoris , tunc nequit dici *Occisor* , aut *Percussor*. Sed S. Thomas inquit : *Ergò etiam aliquis occidit aliquem pro defensione vitæ suæ , non erit reus homicidii.* Ergò S. Thom. pro tuendâ vitâ absolute permittit occidere Aggressorem , adhuc eum vulnerando , occidere enim importat positivè hominem ferire : ensem tantum agere ad ictus Hostis repellendos , cum solo periculo quòd ipse Invasor se transfigat ense Petiti , non est occidere , neque ferire , sed tantum permittere , vel occasionem præbere , quòd inimicus ex seipso se feriat et occidat ; at S. Thomas dicit : *Si occidit , non est reus homicidii.*

Remanet autem explicare , quomodo intelligatur illud S. Thomæ : *Illicitum est , quòd homo intendat occidere hominem , ut seipsum defendat.* Cajetanus illud , *non intendat* , sic interpretatur , nempe quòd occisio non sumatur pro *Medio* propriæ defensionis , sed tantum pro defensionis *Effectu*. Sed hæc interpretatio nimis subtilis videtur Dominico Soto , unde Sotus ait *cit. lib. 5. qu. 1. art. 8.* quòd semper ac finis est licitus , licitum etiam est eligere medium necessarium ad talem finem obtinendum : *Qui justè (ait) vult finem , justè velle potest et medium cum eodem fine necessariò connexum.* Idcirco addit , quòd cum Defensor suum Invasorem interficit , alio medio carens

296 *Tract. 8. De quinto Præc. Decalogi.*

ad mortem evitandam, tùm eum occidendo non censetur, quòd illius mortem intendat, sed tantùm suì defensionem: *Ceterùm, cùm quis invaditur, quocumque modo occidat Invasorem, quia nullà alià viâ potest illius manus evadere, non censetur intendere hominis occisionem, sed tantùm suì defensionem.* Eodem quasi modo Sylvius S. Thomam explicat dicens: *Si aliud spectes, quàm te defendere, malumque evadere, vindicta est, non mera defensio.* Huicque explicationi adhærent Du-Hamel, et P. Concina *loc. cit. n. 8.*

Sed instat Eusebius Eraniste dicens: S. Thomas docet, *illicitum esse quòd homo intendat occidere hominem, ut seipsum defendat, nisi ei qui habet publicam auctoritatem.* Ergò eis, qui publicâ auctoritate carent, semper illicitum est hominem necare. Attamen advertendum, quòd S. Thomas non dicit illicitum esse viro privato hominem occidere, sed quòd *intendat occidere.* Quapropter respondemus, quòd illi qui publicam auctoritatem habent, non solùm hominem occidere possunt, sed etiam illius occisionem intendere. Privatis autem nunquàm licitum est intendere occisionem Aggressoris, sed tantùm eis permissum est Aggressorem occidere in necessitate propriæ vitæ servandæ, quo casu non mortem Hostis, sed tantùm suam defensionem intendunt. Cæterùm Angelicus Doctor Canonum venerator maximè fuit; Canones autem, ut vidimus, nimis apertè declarant licitum esse Aggressorem interimere ad propriam mortem evitandam: explicandus igitur est S. Thomas, ne dicatur ipse sacris Canonibus adversari, et ideò Auctores superiùs laudati quærunt textum S. Doctoris explicare, et aptè explicant, quomodò ejus verba intelligi debent.

Nulli dubium, quòd potiùs velle mortem sufferre, quàm occidere Aggressorem, ne ille occisione pereat in æternùm, est actus servilis caritatis, et perfectionis, estque conformis Evangelii consilio; modò (ajunt Sotus, Concina, et alii) Defensor non inveniatur, cùm invaditur, gravatus mortali peccato: *Consilio*, sed non præcepto; opinio enim quòd illicitum sit Aggressorem necare etiam in necessitate



evadendi mortem ; non solùm est contrà sententiam communem ( ut vidimus ) Theologorum ; sed eam Salo-  
nius vocat etiam *temerariam* , et Dominicus Soto ( *loco citato* ) appellat *errorem manifestum* ; atque P. Con-  
cina n. 7. ait rationabiliter sic loqui Sotum , quo-  
niam talis opinio destruit jus ab ipsâ naturâ in ho-  
minibus insitum propriam tuendi vitam : Quippè  
*opinio hæc* ( sunt verba Concinaë ) *quamquàm pro-*  
*ferre videatur caritatis Evangelicæ imaginem , tamen*  
*jura omnia pervertit ; et certè jus illud ipsi naturæ in-*  
*situm conservandi propriam vitam omninò convellit.*  
Præterea addit Concina , quod per illam opinionem  
ordo Providentiæ pervertitur ; en ejus verba : *Pro-*  
*videntiæ item ordinem* ( hæc opinio ) *perturbat , quâ*  
*permittitur , ut iniquorum temeritas hominibus vitam*  
*eripiat. Accidit opinionem hanc ministrare arma per-*  
*versorum malitiæ ad bonorum cædem , adque flagi-*  
*tiorum quorumvis executionem : quæ omnia , ut de*  
*medio tollantur , nihili facienda est sceleratorum vita.*  
Idem priùs scripsit Comitulus , *Lib. 4. q. 10. n. 10.*  
brevioribus verbis : *Opinio* ( contraria ) *arma certa*  
*ministrat injustitiæ , cædi bonorum , rerum publicarum*  
*eversioni , tyrannidi vitiorum.*

Objicitur ab Adversariis illud S. Augustini in  
*Epistolâ 47. aliàs 154. ad publicolam* , ubi dicitur ;  
*De occidendis hominibus , ne ab eis quisquam occi-*  
*datur , non mihi placet consilium nisi forte sit miles ,*  
*aut publicâ functione teneatur , ut non pro se hoc*  
*faciat , sed pro aliis , acceptâ legitimâ potestate , si*  
*ejus congruat persona.... Dictum est , Non resistamus*  
*malo , ne nos vindictæ delectet , quæ alieno malo ani-*  
*imum pascit.* At sapienter huic respondet Du-Hamel  
( *tom. 2. de Præcept. V. cap. 2. in fine* ) dicens : *Aug-*  
*ustinus non de eo loquitur , qui se defendere coactus*  
*hos necat , ubi non est alia ratio expediendæ salutis ,*  
*sed de homine qui hominem improbum occidit , ne ab*  
*illo ipse et alii occidantur.* Inquit , *Ne ipse et alii occi-*  
*dantur : ergò S. Doctor non loquitur de injusto Ag-*  
*gressore , sed de homine impio , à quo Occisor suam*  
*aliorumque mortem formidabat.*

Præterea objiciunt , id esse contrà ordinem cari-  
tatis , quâ tenemus spiritualem vitam proximi præ-

ferre nostræ temporali vitæ, juxtà dicta *lib. 2. num. 27. Sed hæc caritatis lex* (rectè respondet P. Concina) *tunc solùm obligat, cùm nostra temporalis vita modicum necessarium fuerit ad spirituales Proximi salutem. Porro qui me impetit, suâ culpâ id facit, atque adeò mea vita haud est necessaria illius saluti, cùm ipse desistere possit ab iniquâ aggressionem. Ità P. Concina, et ità expressè docet etiam S. Thomas 2. 2. q. 25. art. 8. ac præsertim id sufficienter declaravit in citatâ q. 64. art. 7. ubi dixit, prout jam notavimus: Nec est necessarium ad salutem, ut homo actum moderatæ tutelæ prætermittat ad evitandam occisionem alterius, plus tenetur homo vitæ suæ providere, quam vitæ alienæ.*

Prudenter autem addit P. Concina, quòd si petitus sit valdè timoratæ conscientiæ, in eo sperari potest, quòd talis defensio cum occisione Aggressoris sit immunis à culpâ; contrà verò, si vir ille sit non magnæ virtutis, difficulter innoxia erit; nam in praxi difficulter invasorem à quo impetitur sine spiritu vindictæ interimet, intendens tantum propriæ vitæ defensionem, non autem mortem Adversarii; Idcirco S. Augustinus sapienter monebat: *Non resistamus malo, ne nos vindicta delectet.* Sed aliud est dicere, quòd in praxi viri modicæ virtutis, occidendo Aggressores suos; rarò à peccato immunes erunt, aliud dicere, numquàm esse licitum injustos Invasores velle occidere; quamvis id esset necessarium ad propriam vitam tuendam, nam hujusmodi nimis rigida et irrationabilis opinio illaquearet conscientias, non solùm iniquorum qui saltem speculativè loquendo non peccant, putantes licitè posse suos Aggressores perimere ad propriam mortem vitandam, sed etiam plurimum timoratorum, si credere tenentur non posse Aggressores lædere; etiamsi injustè illi aggredierentur, nec alia via pateret ad vitam servandam.

13. — Hic autem videndum, an liceat unquàm Principem Tyrannum interficere? Prætermittendum, quòd duplici modo Princeps potest esse tyrannus, in *Titulo*, et in *Regimine*. Tyrannus in *Titulo* est ille, qui sinè ullo jure per vim occupat Statum aliquem ex-  
poliando de eo legitimum dominum: aut is, qui,

injustè occupato alieno Statu , deinde pacificè illum possidet. Tyrannus verò in *Regimine* est ille, qui justo titulo Regnum possidet, sed injustè illud regit, plures injustitias, et immanitates exercendo. His expositis, aliqui Auctores, sed pauci, pravæque auctoritatis, insipienter dixerunt, licitum esse interimere tam Tyrannum in Titulo, quàm Tyrannum in Regimine. Alii verò negant occidi posse Tyrannum in Regimine quantumcumque Regnum tyrannicè gubernet; ac etiam Tyrannum in Titulo, cum ille, etsi injustè Regnum occupasset, postea tamen illud pacificè possidet. Contrà autem dicunt licitum esse interficere Principem, qui injustè per vim Regnum occupavit, et per vim prosequitur illud possidere, repugnantibus Regniculis, qui tantum timore affecti ægrè ei subduntur. Sed nos dicimus privatis hominibus semper esse illicitum interficere Tyrannum tam primæ, quàm secundæ speciei. Ratio, quia subditi ex Divino præcepto venerari, et obedire tenentur suis Dominantibus, quamvis injustis, et perversis, prout docet S. Petrus : *Servi subditi estote in omni timore Domini, non tantum bonis et modestis, sed etiam discolis.* 1. Petr. 2. 18. Undè D. Aug. scripsit, Dominum dare *Regnum terrenum piis, et impiis, sicut ei placet.* Semper igitur ac Princeps est in possessionem Regni, obligantur subditi tenere eum tamquàm proprium dominum; ait enim S. Thomas, quòd licet aliquis injustè usurpatus fuisset alterius Statum, si postea subditi ipsum ut dominum recognoscerent, aut antiquus dominus vel alius Princeps amborum superior ei dominum Regni ultrò concederet, tunc legitimus dominus illud evaderet : *Qui per violentiam dominium subripit, non efficitur Dominus; et idem cum facultas adest, potest aliquis tale dominium repellere; nisi postmodum dominus verus effectus sit vel per consensum subditorum, vel per auctoritatem superioris.* S. Thom. 2. sent. dist. 44. q. 2. ar. 2. Quamobrem cum usurpator multipliciter possit justus Regni dominus fieri, ideò subditi semper parere debent suis actualibus dominantibus; ad ipsos enim minimè pertinet judicare, an illi legitimè aut illegitimè Statum possideant.

Et subditi hujusmodi Dominantibus obedientiam negare nequeunt, tanto minùs eos vitâ et possessione Regni privare possunt. Subditorum est obedire, non judicare de Principe, qui Deo solummodò subjacet circa res sui domini, nec ab aliâ terrenâ potestate dependet. Si subditi de titulo aut possessione Principis judicium ferre possent, nunquàm deesset eis, qui pravo animo affecti sunt, prætextum invenire ad se concitandos adversùs Principem. Scripsit Azorius : *Hæc sententia de licitâ occisione Tyranni in titulo, quamvis tot Auctorum testimonio comprobetur, mihi tamen dubia est. Quamvis enim evidentia patrati sceleris probationem non postulat, requirit tamen sententiam. Insuper quamvis hujusmodi Tyrannus jus et titulum non habeat in Regno, facto tamen habet possessionem à quâ dejici non potest, nisi priùs audiat et judicetur.* Optimæ sunt rationes, quas hic Auctor profert ad opinionem reprobandam, quòd Tyrannum in titulo tollere è vitâ liceat; nemo enim, nec Princeps, nec privatus potest vitâ, rebusque suis expoliari, quin priùs audiat, aut saltem à suo legitimo Judice damnetur. Subditi autem nunquàm jus habere queunt ferendi judicium in ipsorum actualem dominum. Sed minùs rectè fassus est dicendo, *Hæc sententia dubia mihi est*; dicere debebat, improbabilis, falsa, falsissima mihi est, juxtâ id quod priùs scripserat P. Alphonsus Salmeronus tom. 13. p. 14. in *Epist. Apost. Diss. V.* ubi sic dixit : *Cùm mandatum sit nobis indistinctè obedire Principibus etiam discolis, iis parendum est; in his tamen quæ non sunt contrâ Dominum. Atque insuper, quòd etiamsi Princeps injustè Regnum usurpatus fuisset, eum ut Dominum existimare debemus ob eandem quippè rationem, quia ad privatos minime pertinet de Juribus Principis judicare : Cùm non sit ergò privati judicare de Principibus, etsi illi Regnum non justè occupaverint, et regnent ex parte suâ, justè tamen sub ejus tyrannide plectitur Populus.*

Sed alia adest ratio magis urgens et ampla, propter quam nunquàm licet Principem vitâ privare, tametsi injustè Regnum occupasset, et injustè possideret. Objiciunt Auctores contrarii : Sed qui reg-

num alienum sinè aliquo titulo occupat, et sinè ratione aliquâ possidet, non est illius neque dominus, neque Princeps, sed fur, et usurpator. Sit utique (respondeo) fur, usurpator, et non Princeps, nec dominus, postulo: estne ille, homo ut alii? et si est homo nequit ipse privari vitâ, aut bonis ab iis qui jus non habent eum vitâ aut bonis expoliare. Communis est SS. Patrum doctrina, quòd nulli privatæ personæ licet unquàm occidere hominem, quamvis privatum, et quantumcumque iniquus ille sit, nisi publicam habeat auctoritatem, aut nisi id necessarium sit ad propriam vitam tuendam, ut diximus in præteritâ quæstione; Sed loquendo de publicâ auctoritate, certum est axioma illud à S. Augustino traditum: *Qui sinè aliquâ publicâ administratione maleficum occiderit, velut homicida judicabitur. Lib. 1. Cap. 26. in med.* S. Thomas autem de hoc rationem reddit dicens: *Occidere malefactorem licitum est, in quantum ordinatur ad salutem totius communitatis.* 2. 2. q. 64. a. 3. Deindè subdit quòd occidere malefactores solis permittitur Principibus, qui publicam auctoritatem habent, quibusque cura communis boni commissa est: *Curam autem communis boni commissa est Principibus habentibus publicam auctoritatem, et idèò eis solùm licet malefactores occidere et non privatis personis.*

Si ergò illicitum est subditis interficere Tyrannum in Titulo, quamvis ipse absque ullo jure Regnum occupasset, licetque illud injustè possideret, tantò magis erit illicitum mortem machinari Principi existimato Tyranno in Regimine, qui justo titulo possidet Regnum. Item si privatis, eò quòd publicâ auctoritate carent, vetitum est perimere hominem quantumcumque impium, quantò minùs proprium Principem interficere licebit? Falsum autem omninò est, in Communitate Subditorum quandam adesse auctoritatem Superiorem, et à Principe independentem, ità ut casu quo Princeps perversè Regnum gubernet, tota Communitas eum Regno et vitâ expoliare possit. Nimis perniciosum in hâc re fuit principium Joannis Gersonis, qui ausus est asserere, quòd Monarcha potest legitimè à totâ Natione judicari,

si Regnum injustè regat ; dicebat enim , quòd cùm Natio sit totum Regni respectu ad Principem , qui est tantum pars , apud ipsam necessariò debet Suprema auctoritas existere. Principium ( inquit ) , non tantum falsum , sed perniciosissimum ; nam hoc modo duæ in Regno essent Supremæ Potestates , undè enormissima evenirent Schismata , Regnique desolatio. S. Thomas aliam non recognoscit auctoritatem Supremam ; nisi illam , quam habent Principes , quibus cura communis boni tribuitur : *Cura communis boni commissa est Principibus habentibus publicam auctoritatem. Quapropter etsi Princeps perversus , ac Populus gravosus esset , tenetur tamen Populus obsequium obedientiamque illi præstare , cùm subditi nunquam jus habere possint de rebus gestis Principis judicare , et tantò minus eum damnare ad vitam , aut Regnum amittendum.*

Præterea perpendi debet , quòd si hujusmodi casus accideret , quòd Princeps à suis subditis trucidaretur causâ mali regiminis , quodnam malum esset majus , illud nempè quod Princeps patrabat , aut illud quod ejus mors inferret , quæ tali modò eveniret ? Postquam subditi sic temerè contrà eorum Principem concitati fuissent , atque impiè manus suas in ejus sanguine inquinassent , quot rixæ , schismata et civilia bella statim insurgere inter eos ipsos inspicerentur ? insuper quot rapinæ , quot sacrilegia , quotque strages ? sublato enim à Populo subjectionis fræno , et reverentiæ ergà Regem , omnes illi qui pravo animo sunt affecti , quibusnam flagitiis seipsos non traderent abscisso jam timore publicæ justitiæ ? idque dicere voluit S. Thomas ( *opusc. 20. de Regim. Princ. l. 1. c. 6.* ) ubi scripsit : *Esse hoc multitudini periculosum , et ejus Rectoribus , si privatâ præsumptione aliqui attentarent Præsidentium necem etiam tyrannorum.*

Hinc est , quòd licèt Imperatores Gentiles , impii , et Ecclesiæ persecutores fuissent , attamen quia ipsi Imperium possidebant , Deus præcepit , ut in omnibus rebus licitis obedientia ipsis præstaretur. Undè scripsit Lessius ( *de Justit. et Jure l. 2. c. 9. Dub. 4.* ) : *Princeps etsi tyrannicè regat , tamen manet Superior ;*

undè Scriptura jubet, nos in rebus licitis parere Principibus ethnicis tamquam superioribus, etsi maximi essent Tyranni, utpote qui Ecclesiam persequerentur et ad impietatem cogerent; ergò non potest à subdito interfici. Idem scripsit Molina (*de Justit. etc. tom. 4. tract. 3. D.6.*) Aliquis est Tyrannus, quin licèt sit verè Dominus Reipublicæ, in quâ tyrannidem exercet, iniquè tamen eam administrat: Tyrannum hoc modo nefas est Privatis interficere. Idem scripsit Gregorius Valentia (*tom. 3. disp. . . qu. 8.*): Tyrannum perpravum, et communitati exosum, legitimæ alioquin auctoritatis usum in gubernando, nulli Particulari licet occidere. Idem scripsit Cardinalis Toletus (*Instruct. l. 5. c.6. n. 16.*): Tyrannum administratione, qui habet quidem verum titulum, sed tyrannicè tractat Subditos, non licet occidere; et asserere contrarium damnatur ut hæreticum in Concilio Constantiensi. Idem scripserunt Cajetanus 2. 2. q. 64. ar. 3. Soto l. 5. qu. 1. ar. 3. Prado cap. 20. qu. 1. §. 3. n. 21. Tapia lib. 5. q. 7. art. 3. num. 2. Bonac. D. . . q. ult. sect. 2. p. 3. n. 2. cum Silvestro, Bannez, et Serra in loco cit. D. Thomæ. Idem scripsit Suarez in *Defens. Fidei* l. 6. c. 4. dixitque hanc sententiam non solùm communem, sed certam esse: *Diximus Principem propter tyrannicum regnum, vel propter quævis crimina non posse ab aliquo privatâ auctoritate justè interfici. Assertio est communis et certa; conformis est præceptis Petri* (*Epist. 1. cap. 1.*): Subditi estote omni creaturæ propter Deum etc. Magis verò in specie definita est, et contraria ut hæretica damnata in Concilio Constantiensi Sess. 15. En Propositio quæ tanquam hæretica in præfato Concilio proscripta fuit: *Quilibet Tyrannus potest et debet licitè et meritorie occidi per quemcumque Vassallum suum, vel subditum etiam per Clanculares insidias, et subtiles blanditias, vel adulationes, non obstante quocumque præstito juramento, seu confœderatione factis cum eo, non expectatâ sententiâ vel mandato Judicis cujuscumque.* Sess. 15. At quale remedium adest, si regimen Principis esset excessivè tyrannicum? remedium quod suppetit, ait S. Thomas, est ad Deum recurrere, ut auxi-

lium præbat. *Quod si omnino contra Tyrannum auxilium humanum haberi non potest, recurrendum ad Regem omnium Deum, qui est adiutor in opportunitatibus.*

Præterea scribit doctissimus Dominicus Soto (*lib. 5. qu. 1. art. 8.*): *Si is qui adoritur, sit Rex, Princeps, vel alia persona valdè utilis Reipublicæ, et persona quæ invaditur sit abjecta et vilis, cujus nihil intersit Reipublicæ, tunc subeunda est mors personæ invasæ, omittendæque defensio; intellige cum nece Principis. Hæc sententia non placet P. Danieli Concina, dicenti unumquemque de jure naturæ et caritatis magis amare propriam, quàm alienam vitam. Sed hoc non obstante sententia Soti placet mihi, et probabilissima videtur; ratio est, quia quisque privatus commune bonum omni suo bono temporali præferre tenetur, omneque temporale pati detrimentum ad damnum gravissimum Communitatis vitandum, atque hoc gravissimum damnum profectò Communitas sufferret, ut suprà consideravimus, si Princeps à propriis subditis interficeretur. Licitum quidem est necare injustum Aggressorem privatum cum moderamine inculpatæ tutelæ, si nullum patet effugium evadendi mortem. Sed quod procedit respectu vitæ Privatorum, locum non habet respectu vitæ Regnantium. Valdè enim diversa ratio habenda est inter Privatorum, et Principum vitas, Reges sunt *Uncti Domini*, ideòque ipsorum personæ sacræ, eorumque vitæ pretiosæ, ac nimis necessariæ sunt ad pacem Populorum, bonumque publicum servandum. Si occiditur injustus Aggressor, damnum ipsi soli evenit, non autem Reipublicæ, imò ejus mors bono communi proderit, ut insolentia Temerariorum reprimatur; at si Princeps per manus suorum subditorum vitâ privetur, malum (ut suprà perpendimus) commune evadit; et immensum, propter innumera flagitia; deordinationes, et sophismata, quæ propterea deinde sequentur.*

14. — Et hæc ratione dicunt etiam *Navar. Azor. Molin. Less. Vasq. Layman, Lugo, Ronc. Tapia, Carden. Filliuc.* et alii plurimi cum *S. Antonino*,



et *Silvestro* (a) contrà paucos, licere nobili laico occidere, non in vindictam, sed tantum ad defendendum se ab eo qui graviter offendere vellet eum in honore, et non jam solis verbis (quà verbis potest verbis occurrere, v. g. respondendo illum mentiri etc.), sed etiam factis, v. g. calcibus, colaphis aut similibus injuriis gravibus; quibus tamen semel illatis non potest amplius compensari, repercutiundo, quod quidem non licet, uti habetur ex *Propos. 30. ex damnatis ab Innocentio XI. quia tunc non esset defensio, sed vindicta. Quare post illatam injuriam non est amplius licitum ferire percutientem, nisi ad impediendas novas percussiones, quæ præter contumeliam graviter corpus læderent, et nullus alius occurreret modus, quo ab illis se defendat. Dicunt viro Nobili laico, quia non licet hoc plebeis, nec Clericis, aut Religiosis, cum illos fuga non dedecet: ideoque tenentur fugere, semper ac sine vitæ periculo possunt (b). Cæterum etiam respectu Secularium hæc sententia quoad praxim parum aut nihil deserviet, quia in praxi, ut sapienter censet *Sylvius*, impossibilis, aut valde rarus erit casus, quo eam licebit uti. *Etiamsi* (ait *Sylvius*) *honor sit bonum præstantius quam divitiæ, aut nullum, aut rarissimum arbitramur esse casum, quo pro defensione solius honoris licet Aggressorem interficere* (c).*

15. — Eadem ratione communiter affirmant *S. Anton. Suar. Soto, Cajet. Less. Bonac. Lugo, Rona. Salm* et alii, licere etiam occidere furem rei magni momenti, semper ac admonitus fur ne rapiat, vel ut relinquat illam, nisi occidi vellet, ille obstinatè recusaret. Hujus sententiæ certè est *S. Th.* (d), qui ut probaret licere vitam cum occisione Aggressoris tueri, affert textum *Exod. 22. 2. : Si effringens fur domum, seu suffodiens fuerit inventus, et accepto vulnere mortuus fuerit, percussor non erit reus sanguinis. Et postea subjungit Sanctus : Sed multò*

(a) *S. Antonin. 3. p. t. 4. c. 3. Sylvest. v. Bellum num. 4.—*

(b) *Lib. 3. n. 381. — (c) Sylvius in 2. 2. q. 64. a. 7. q. 6.—(d) 2. q. 64. a. 7.*

### 306 Tract. 8. De quinto Præc. Decalogi.

*magis licitum est defendere propriam vitam, quàm propriam domum.* Et probatur etiam ex *Cap. Dilecto, de Sent. excomm. in 6.* ubi declaratur licere defendere bona gladio tam temporali, quàm spirituali (a). Dictum est tamen *rei magni momenti*, quia non sufficit valor non solum unius aurei (nempe ducati), ut dicebat Prop. 31. ex damnatis ab Innoc. XI. sed nec etiam octo aut decem aureorum. Dicunt *Molina, Vasq. et Salm.* esse eam magnam summam cujus amissio est ei notabili damno. *Cardenas* dicit summam 40. ducatorum esse magnam respectu uniuscujusque. Sed *Viva*, et *Elbel* putant illam esse magnam summam hoc casu, quâ solâ ablatâ, deesse alicui sustentatio pro se, et suis. Nec opinioni nonnullorum DD. assentio. posse Nobilem se defendere armis à fure, qui sibi vellet vi auferre aliquid etiam minimum ob respectum injuriæ, quia hæc in tali occasione non videtur adeò gravis, ut possit dari fur morti, ut benè dicunt *Diana*, et *Salm.* (b). Contrà juxta sententiam probabiliorē *Lessius, Lug. Vasq. Busemb. Tanner. Malder.* (contrà *Salm. Bonac.* etc.) licitè potest dominus occidere furem, qui vult impedire eum, quominus rem ablatam reaccepiat (sed valoris suprâ jam descripti) cum aliùs modus eam recuperandi non occurrit; nam tunc fur est verè Aggressor (c), et hoc quod permittitur Laicis ad suorum bonorum defensionem, licere etiam Clericis et Religiosis; dicunt communissimè *Lugo, Becan. Lessius, Tanner. Salm. Elb. Busem.* etc. et probatur ex citato textu *Cap. Dilecto* (d). Nec isti tunc incurrunt irregularitatem (e). Et illam defensionem, quâ potest dominus se tueri per seipsum, potest etiam adhibere per suos servos; *Nav. Lugo, Laym., Sporer, Salm. Elbel.* etc. (f).

16. — Si autem licet occidere bonorum Aggressorem, tanto magis licet se defendere à pudicitia Aggressore, cum nullum aliud medium subest, ut dicunt DD. communiter. Et quamvis postquàm pa-

---

(a) *Ibid. num. 389.* — (b) *Ibid. Quær. 2.* — (c) *cit. num. 383. Quær. 3.* — (d) *L. 3. n. 384. et l. 1. n. 41.* — (e) *L. 3. num. 389.* — (f) *L. 3. n. 385.*

tratum est, non liceat Aggressoris ulcisci; nihilo-  
minus rectè advertit *Lugo*, licere (et ego addo etiam  
expedire) ut mulier oppressa (dummodo hoc faciat  
immediatè post injuriam acceptam, non tamen ob  
vindictam) procuret insultare eum, qui injuriam  
sibi intulit, pugnis, alapis (et etiam, ut dicunt  
alii, aliquo vulnere, non tamen gravi nec pericu-  
loso) ut cognoscatur quæ sit sua constantia, et mo-  
lestia concepta, et ità ille iterùm non audebit se  
vexare (1).

17. — Quemadmodum licet vitam propriam de-  
fendere sic etiam vitam Proximi innocentis etiam  
morte injusti Aggressoris, ut docet *S. Thomas* (b),  
et alii communiter. Nec obstat dicere quòd Proxi-  
mus potest cedere defensionì vitæ suæ: quia licet  
possit ille cedere juri se defendendi, non potest  
tamen cedere vitæ suæ, cujus dominus non est.  
Magistratus, et etiam Satellites ad id stipendio  
conducti ex justitia tenentur innocentium vitam  
defendere, et etiam cum periculo vitæ propriæ cum  
agitur de bono communi, ut esset publicos latro-  
nes interficere; ità *Lessius*, et *Salm.* Dicunt autem  
*Salm.* cum *Navar. Bonac.* et etiam privatos teneri  
innocentis Aggressorem occidere, si possunt, sinè  
gravi incommodo: sed probabilius id negant  
*Lessius*, et *Lugo*, quia in praxi hominem occidere  
non potest esse sinè magno horrore, quale est ma-  
nus sanguine humano fœdare. Excipiunt tamen DD.  
si aggressus esset necessarius bono publico, aut esset  
suus Pater, Filius, aut Frater (c).

18. — Ità etiam dicunt communissimè *Lessius*,  
*Filliuccius*, *Bonac. Lugo, Salm. Trullenc.* etc. licere  
occidere Aggressorem pudicitiae, aut honoris Proxi-  
mi, si ille factis velit eum offendere, ut dictum  
est n. 12. Sed quoad pudicitiam hoc non intelligitur  
quando Mulier expressè aut tacitè assentitur; ex-  
cepto tamen, si illa esset tibi conjuncta, et tu non  
posses tuo dedecori consulere, nisi Aggressorem  
vulnerando. (d) Ità etiam dicunt *S. Antoninus, Less.*

(a) *L. 3. n. 386.* — (b) *2. 2. q. 60. a. 6. ad 2.* — (c) *l. 3. n. 387.*  
— (d) *Lib. 3. Ibid. n. 391.*

### 308 *Tract.8. De quinto Præc. Decalogi.*

*Navar. Bonac. Lugo, Molina, et Salm.* licere innocentis bona magni valoris tueri morte Aggressoris, cum aliud medium non extat; nam in omnibus istis casibus ratio in principio adducta semper valet, nempe quod ordo caritatis in præferendâ vitâ Proximi bonis temporalibus, locum habet quando Proximus in extremâ necessitate positus est, non autem quando ille voluntariè subijcere vult se periculo suæ mortis. (a) Advertantur hîc Propositiones damnatæ 18. ab Alex. VII. et 30. 31. 32. et 33. ab Innoc. XI.

19 — Quæst. I. est, an liceat aliquandò Aggressorem vitæ occidendo prævenire? Duplex est sententia, sed istæ *Soto, Azor. Covarr. Ronc. Busemb. Salm.* etc. conciliantur, dum dicunt quod si quis moraliter sit certus inimicum determinatum esse ad se occidendum, v. g. pro certo habet jam ad hoc arma parasse, aut commisisse Sicario suî occisionem, tunc benè potest prævenire, si alio modo insidias et mortis periculum aufugere nequit. Secus autem si de hoc tantum aliqua suspicio aut dubium sibi subortum esset; dum justum non est inimicum vitâ orbare ob simplicem dubium timorem (b). Ceterum quoad praxim spectat, difficillimus erit casus, et ferè moraliter impossibilis, quo licitum esse possit Aggressorem prævenire, difficillimè enim ille, qui aggressionem timet, poterit habere certitudinem futuræ aggressionis, nisi præveniat necando Aggressorem.

20. — Quæstio II. An liceat Adultero, ut defendat vitam suam, occidere virum qui in se invadit? Adulter tenetur certè fugere, si potest, nam in tali casu etiam Nobili non est dedecus fugere; saltem non est dedecus grave. Sed si sine vitæ periculo fugere non posset, alii DD. reum homicidii, si occidit, faciunt; alii non. Nos distinguimus cum *Suarez, Layman, Cistrop. Coninch. Salm. Ronc. Sporer*, etc. ità: Si ille prævidit proximum periculum aggressionis viri, et audenter velit suam pravam intentionem exequi, tunc non potest ab ho-

---

(a) N. 393. — (b) n. 387.

micidio et irregularitate excusari, quia tunc adulterium est proximum periculum homicidii, ut dicimus de Censuris *Tom. II. Tr. XIX. n. 8.* Secus autem si periculum esset remotum, ut si Adulter cum cautela procederet (a).

21. — Quæstio III. An aliquandò liceat innocentem occidere? Directè nunquàm licet; sed in certis casibus licet indirectè. 1. Si Tyrannus minatur Civitatis excidium, nisi innocens occidatur, non licet jam eum occidere, sed permissum est eum Tyranno tradere, si ipse se præsentare renuit, ut probabilius dicunt *Molina, Less. Layman, Lugo, Filliuc. Busemb.* contrà *Sotum* etc., quia tunc ille ut evitet commune damnum, tenetur se præsentare; quâ de re cùm id recusat, fit reus, et tanquàm reum potest Respublica eum tradere (b). 2. Si quis equo sedens fugiendo nequit mortem evadere ab inimico persequente, nisi morte pueri qui in angusto calle reperitur, potest ille quidem occidere; modò puer sit baptizatus; *Sanch. Less. Lugo, Fill. Salm. Prado*, et alii communiter (c). 3. Licet in bello formata bellica versùs inimicorum stationes dirigere, licet innocentes mortem passuri essent; *Less. Busemb.* etc. (d).

22. — Quæstio IV. An liceat esse causam abortûs? Abortum ex proposito procurare, certè est semper illicitum, licet foetus esset inanimatus; quia si nullius vitæ nocetur, saltem nocetur naturæ generationis. Et hìc advertendum est Sixtum V. in Bullâ *Effrænata* præter pœnas privationis privilegiorum Clericalium, et beneficiorum, et inhabilitatis ad ea recipienda, imposuit excommunicationem Papalem *ipso facto*, et irregularitatem omnibus iis scienter abortum foetus (animati, vel inanimati) procurantibus cooperatione, consilio, aut favore. Sed postea Gregorius XIV. Bullâ *Sedes Apostolica* 1591. restrinxit præfatam excommunicationem et irregularitatem dumtaxat ad abortum foetus animati (e), et facultatem dedit Episcopis et aliis ab ipsis ad id deputatis specialiter,

---

(a) *Lib. 3. num. 398.* — (b) *num. 393.* — (c) *Ibid. et n. 599.* — (d) *cit. n. 393.* — (e) *l. 3. n. 395.*

absovendi ab hâc excommunicatione ; id tamen non excludit quin ab eâ possint absolvere etiam alii, quibus Episcopus generalem facultatem concedit absolvendi ab omnibus casibus à Papâ sibi reservatis, ut dicunt valdè probabiliter *Bonacina*, *Elbel*, *Sporer* (a) An ab eâ possint absolvere Regulares, vide *Tom. III. Tract. XX. num. 100* Sed hic notandum 1, quòd cùm in Bullâ Sixti dicatur *scienter*, non incurrunt excommunicationem et irregularitatem illi qui ex ignorantia crassa sunt causa abortus, ut communiter DD. (b); vide de Censuris. Notandum 2. varias esse opiniones circa tempus quo fœtus judicandus sit animatus (c), sed communissima vult fieri animationem post dies 40. à conceptione, si proles est mas, post 80. si est fœmina; ita *Silvest. Azor. Elbel, Busemb et Salm.* cum *S. Thomâ*, (d). (qui extendit usquè ad 90. dies pro fœminis); et hanc sententiam, ait *Continuator Tournely* (e), esse ferè omnium Theologorum, et addit p. 419. in fine cum *Navarro*, *Sylvio* hanc teneri à Sacrà Pœnitentiariâ cùm agitur de pœnis, et irregularitatibus.

23. — Sed hic dubitatur 1. an incurrant excommunicationem Mulieres prœgnantes, quæ sibi abortum procurant? Multi affirmant cum *Bonac. Viva, Spor.* etc. ex eò quòd in Bullâ Sixti (§. 5.) dicitur *ac Mulieres ipsas quæ poculi scienter sumpserint* Sed est valdè probabilis et ratione intrinsecâ probabilior sententia negans cum *de Lugo, Avila, Lezana, de Leone, Salmant.* etc. quia prædicta verba Bullæ intelliguntur tantum de pœnis temporalibus, non verò spiritualibus; et hoc deducitur ex verbis sequentibus §. 7. ubi dicitur: *Insuper ut hujus delicti gravitati non solum temporalibus, sed etiam spiritualibus pœnis prospiciamus, omnes qui vel quæ uti principales, vel ut sociam ad tale facinus, opem, consilium, favorem dederint, etc.* Et istis solum cooperatoribus videtur imposita fuisse excommunicatio, non autem prœgnantibus, dùm illæ hic non exprimuntur sicut antecesserunt in aliis pœnis expressæ sunt, Nec excommu-

(a) N. 397. — (b) n. 395. — (c) n. 394. Qu. III. — (d) in 3. d. 3. q. 5. a. 2. — (e) tom. 3. pag. 451.

nicatio hic imponitur omnibus abortum procurantibus, sed dumtaxat principalibus sive sociis præbentibus auxilium, consilium, aut favorem: Quòd intelligi non potest de muliere, de quâ dici non potest quòd ipsa sibi met præbeat auxilium, aut consilium, etc. ( ).

24. — Fit dubium 2. An incurrat irregularitatem qui abortum procuravit in dubio, fuerit nec ne animatus? Affirmant *Salm. Viva*, ex *Cap. Ad audientiam*, de *Homic.* et aliis Textibus similibus, ubi dicitur in dubio an in homicidium concurrerit, vel ne, habendus esset pro irregulari. Sed sententia huic adversa quam tenent *Præpos. Giball. Maja, Pelliz. Marchant. Verde, Tambur. Elbel, Diana, Sporer*, et alii cum docto *Auctore Instruct. pro Confessariis Nov.* mihi videtur certa. Et ratio videtur esse convincens, quia ex unâ parte habemus in *Cap. Is qui, de sent. excom.* irregularitatem non incurri, nisi in lege expressa sit. Ex alterâ, in nostro casu nullibi expressum est, quòd hæc irregularitas incurratur; nam quamvis in allegatis textibus irregulares declarati fuerint aliqui de quibus dubitabatur an fuerint vel ne causa homicidii, tamen certum erat quòd homicidium patratum fuerat; sed in nostro casu, cum sit dubia foetus animatio, dubium est etiam homicidium. Itaque nos sumus in casu, cui non reperitur expressè ab aliquâ lege imposita irregularitas. Secus contrâ est dicendum de iis, de quibus dubitatur an suâ operâ concurrerint nec ne in abortum (b). Si autem dubitaretur de concursu tantum verbali, mandato aut consilio, patrato, observa quod dicitur de irregularitate *Tom. 11. Tract. XIX.* Et quòd hic dicitur de irregularitate, erit dicendum de excommunicatione Sed quoad irregularitatem, dispensatio à nemine nisi à Papâ obtinenda est. An autem Episcopus possit dispensare cum iis qui abortum procurarunt, circa inhabilitatem ad obtinenda beneficia; affirmant *Elbel, Sporer*, et *Roncagl.* contrâ *Anaclet.* (c). Vide quod dictum est *Tract. 11. n. 58.*

---

(a) *L. 3. n. 395. Qu. V.* — (b) *Lib. 3. num. 366.* — (c) *num. 395.v. Quoad.*

25. — Dubitatur 3. (redeundo ad quæsitum propositæ quæstionis IV.) an liceat matri medicinam sumere directè ad expellendum fœtum inanimem? In hoc ex unâ parte certum est ex se loquendo, non licere (ut principio dictum est) directè fœtus etiam inanimis expulsionem procurare (modò jam non esset certè corruptus) quâcunque ex causâ, quamvis mater ceteroquin esset in mortis periculo, aut propter Parentes ex suâ prægnatione injuriâ affectos, ut irrationabiliter permittebat Propositio 34. damnata ab Innoc. XI. aut propter periculum quod mater in aliis partibus experta sit, ut dicunt cum communi sententiâ *Sanch. Azor. et Petrocoren.* Ex aliâ parte certum est apud omnes licere remedium præstare matri, directè ad medendum ejus morbo, licèt cum periculo abortûs, cùm morbus est mortalis. Hoc posito, multi DD. dicunt in eo casu licere fœtum expellere, qui certè non sit animatus, etiam directè, quia tunc (ut dicunt) habetur fœtus tanquàm vitæ matris aggressor. Alii DD. contrâ communis hoc negant. Sed rectè hic ait *Busemb.* Quid refert opinione oppositâ uti de directâ expulsionem, cùm juxtâ omnes potest sinè culpâ fœtus indirectè expelli? (a).

26. — Dubitatur 4. an liceat matri prægnanti de fœtu animato medicinam sumere directè, ut convalescat, sed cum prolis periculo? Cùm moraliter certum judicetur quòd moriente matre, moriatur etiam proles, nulli dubium est hoc licere. Difficultas versatur cùm aliqua spes affulget quòd moriente matre, possit proles supervivere et baptizari. Hoc permittunt etiam in tali casu *Holzm. Prado, et Salm.* dicendo quòd obligatio vitam temporalem fundendi ut vita æterna Proximi procuretur, tunc adest, cùm Proximi salus spiritualis est certa, non verò cùm est dubia. Sed huic opinioni ego nescio acquiescere, quia aliud est debere se exponere morti ad Proximi salutem obtinendam, et hic regulæ adversariorum (nempe quòd salus Proximi debet esse certa) locus datur; aliud est ob defendendam propriam vitam positivè proximum

---

(a) *Lib. 3. n. 394. v. Quær. igit. I.*



proximum æternæ mortis periculo exponere; cùm enim æquale est periculum tam matris, quàm prolis moriendæ sinè baptismo, certum mihi videtur quòd ordine caritatis spectato, magis evitandum est periculum prolis, quàm matris: quare puto omninò tenendum cum *Petrocorense*, *Elbel*, et *Tournely*, (qui citans *Silvium*, *Comitolum*, et *Habert*, vocat communem hanc sententiam) præbere medicinam matri cum periculo fœtus animati licere in eo solo casu, quo nulla spes appareat rationabilis de prolis vitâ, ut possit baptizari post matris mortem; nam tunc tantum videtur non obligare caritas matrem (in extremâ necessitate positam), ut abstineat à medicinâ, ob solam remotissimam spem quæ haberetur de vitâ prolis. Quapropter *Salmanticenses* dicunt Medicos non debere adeò scrupulosos esse in præbendis medicinis Mulieribus prægnantibus, quia rarissimus est casus, imò moraliter impossibilis, ut sentiunt *Sanch. Lugo*, et *Ronc.* quòd si mater moriatur, proles supervivat: Et idem confirmarunt plures Medici docti, quos ego consuli de hac re; cùm enim mater aliquo morbo mortali laborat, humores corrumpuntur, et alimentum prolis contaminant, adeoque proles moritur probabilissimè, dùm (et forsitan antecedenter) mater moritur (a). Nihilominus est qui mihi testatur non semel accidisse, quòd ob peritiam Chirurgorum statim ac mater spiritum exhalaverit, inciso matris utero, proles viva extracta fuerit, et baptizata. Non autem licebit matrem incidere cum periculo probabilis mortis; ut baptizetur proles, etiamsi adesset ejus assensus. Si tamen periculum matris esset remotum ob peritiam Chirurgi, tunc posset incidi, et ipsa teneretur incisionem perferre. An autem ex tali incisione possit infans ad Baptismum pervenire, sine periculo gravi matris, videant experientiam callentes; mihi enim hoc difficile videtur (b).

---

(a) *Lib. 3. n. 394. v. In II. et n. 400.* — (b) *Lib. 6. n. 106. v. Omninò.*

## CAPUT III.

## De Duello et Bello.

*Punct. I. De Duello; Propositiones damnatæ à Benedicto XIV. 27. Quando Duellum erit licitum Pœnæ in duellantes 28. Punct. II. De Bello. An liceat Bellum movere cum opinione probabili 29. An liceat inimicos fidei in auxilium vocare 30. An Miles possit bellare in dubio justitiæ 31. Quæ actiones in Bello liceant 32.*

## PUNCTUM I.

*De Duello.*

27. — **D**UELLUM est pugna inter duos aut plures ex conducto præcedenti de loco, die, et armis. Duellum non est licitum nec ad veritatem indagandam, nec ad lites finiendas, nec ad objecti criminis purificationem, et tanto minùs ad timiditatis notam ( ut permittebat Propos. 2. damnata ab Alex. VII. ), aut ignominia vitandam, licèt tantum apparenter fieret; ità tenendum cum communi contrà alios. Et advertendæ hìc sunt 5. Propositiones novissimè damnatæ à Benedicto XIV. Anno 1752. in Bullâ *Detestabilem*, et sunt sequentes. I. *Vir militaris qui nisi offerat, et acceptet duellum tanquàm formidolosus, timidus, abjectus, et ad officia militaria ineptus haberetur, indeque officio quo se suosque sustentat, privaretur, vel promotionis aliàs sibi debitæ, ac promeritæ spe perpetuò carere deberet, culpâ et pœnâ vacaret, sive offerat, sive acceptet duellum.* II. *Excusari possunt etiam honoris tuendi vel humanæ vilipensionis vitandæ gratiâ, duellum acceptantes, vel ad illud provocantes, quandò certò sciunt pugnam non esse sequuturam, utpotè ab aliis impediendam.* III. *Non incurrit ecclesiasticas pœnas contrà duellantes latas Dux vel Officialis militiæ acceptans duellum ex gravi metu amissionis famæ, vel officii.* IV. *Licitum est in statu hominis naturali acceptare, et offerre duellum*

*ad servandas cum honore fortunas, quandò alio remedio eorum jactura propulsari nequit. V. Asserta licentia pro statu naturali applicari etiam potest statui Civitatis malè ordinatæ, in quâ nimirum vel negligentia, vel malitiâ Magistratûs, justitia apertè denegatur.*

28. — In duobus casibus tantum Duellum erit licitum. I. Ad finiendum bellum commune, et justum cum minori damno; aut, ut aliqui dicunt, ad servandum honorem Exercitûs ab inimicis oppressi. II. Si inimicus determinatus est ad te occidendum, et ex suâ petulantia tibi arma concedit ad te defendendum; nam tunc pugnatio tua est vera defensio, modò pugnam aufugere non valeas (a). Tres verò sunt pœnæ quas Trident. (Sess. 25. c. 19.) imposuit Duellatoribus: 1. Infamia cum bonorum confiscatione. 2. Privatio sepulturæ Ecclesiasticæ quoad eos qui in conflictu decedunt, licet Sacramentis antè mortem præmuniti fuerint, ut ex cit. Bullâ *Detestabilem*. 3. Excommunicatio Papalis ipso facto incurrenda tam ab ipsis Duellatoribus, quàm à Patrinis, consilium dantibus (modò consilium fuerit efficax, ut notat *Elbel*), et insuper à præsentibus favorem aut locum, et etiam à spectatoribus, non quidem ab illis qui per transitum ibi reperiuntur, sed ab iis qui datâ operâ assistunt, ut explicavit Gregorius XIII. in Bullâ *Ad tollendum*, sic dicens, *ex composito spectantes*; imò addunt communiter *Tourn. Salmant. Elbel*, et alii, comprehendi propriè solos socios Duellatorum, aut eos qui suâ præsentia illos ad pugnam acuunt (b). Quocircà advertenda sunt 1. prædictas pœnas, et excommunicationem non incurri, nisi ob Duellum strictè acceptum, nempe præmeditatum (ut dictum est) cum designatione loci, temporis, et armorum (licet cæteroquin sinè Patrinis conficeretur, ut declaravit Gregorius XIII. in cit. Bullâ); secùs verò si pugna ex inopinato accideret, licet Gladiatores ex rixæ impetu ad locum magis aptum se recipere, ut communiter DD. (c). 2. Quamquàm ex

---

(a) *Lib. 3. n. 400.* — (b) *L. 3. n. 401.* — (c) *n. 401.*

verbis Concilii, videatur requiri, ut Duellum sit scitum, tamen ex Bullâ Clementis VIII. *Illius vices*, etiamsi Duellum non sequitur tamen tam principales quàm omnes alii cooperantes excommunicationem incurrere (a). Notandum 3. Si Duellum non est notorium nec ad forum deductum, Episcopos posse absolvere à præfatâ excommunicatione ex *Cap. Liceat*, Trident. *Sess. 24.* Sed non jam Regulares, nisi Romæ, et extrâ Italiam (b).

## PUNCTUM II.

### *De Bello.*

29. — **T**RES conditiones requiruntur, ut Bellum sit justum; auctoritas Principis supremi; intentio recta de bono communi: et causa justa et gravis. Quæritur 1. An liceat inferre Bellum cum sola probabili opinione? Tres adsunt sententiæ. *Prima* affirmat cum *Azor. Sanch. Filliuc. etc.* dicens, quòd sicut permittitur Privatis litem movere cum solâ probabili opinione, ità et Principibus Bellum movere concedendum est: saltem ad obtinendam partem Regni quod contenditur, cum nullus adsit Judex supremus qui hanc litem decidere potest. *Secunda* cum *Bannez, Prado, et Ledesma*, requirit saltem probabiliorem, eò quia, prout eo casu Judex debet rem privato adjudicare, licet non sit in rei possessione, ità Princeps, cum nullus adsit Judex competens, potest Bello potiri eo, quod prætendit. *Tertia* sententia docet non posse Bellum inferri, si non constat certè de jure quod ad illud habet, dum pro regulâ generali acceptum est (ut dictum est *Tract. 1. n. 18.*) Possessorem bonæ fidei non posse re expoliari, nisi constet quod injustè retineat; ita de Bello loquendo dicunt *Castrop. Laym. Holzm. Vasqu. Sal. Montesin. Villal. Salmant.* qui pro certâ habent hanc sententiam; et *Tambur.* qui ut improbabilem habet contrariam. Hæc tertia sententia, spectatâ intrin-

---

(a) *L. 7. n. 220.* — (b) *ibid. Not. 5.*

secâ ratione, mihi videtur longè probabilior. Cæterùm ajunt *Roncagl.*, et *Salmant.* quòd cùm Bellum regulariter tot damnorum Religionis, et tot scelerum causa est, saltem in praxi valdè difficulter potest videri justum esse Bellum inferre sinè certo jure ad Regnum, quod ab alio Principe possidetur (a).

30. — Quæritur 2. An liceat Principi Catholico in Bello justo Infideles, aut Hæreticos, ut sibi auxiliantur, advocare? Alii absolutè negant; alii verò absolutè affirmant; alii denique cum communi, ut *S. Antonin.* *Suar.* *Silvest.* *Bonac.* *Castropal.* *Coninch.* *Busemb.* etc. dicunt probabilem esse secundam sententiam semper ac nulla damna Religioni futura sint; sed quia in praxi inevitabilia sunt, ideò dicimus cum *Mol.* *Sporer.* *Salmant.* *Diana*, etc. in praxi omninò primam esse sequendam (b).

31. — Quæritur 3. An miles possit bellare in dubio de Belli justitiâ? Distinguendum: si ipse est subditus, benè potest, imò tenetur, ut dicunt communiter DD. ex celebri illo textu *S. August.* allato in *Can. Quid culpatur*, dist. 23. qu. 1, ubi dicitur posse miles justè pugnare usquedùm non est certus Bellum esse injustum: *Si utrùm fit* (contrà præceptum Dei) *certum non est*, sunt verba S. Patris. Ratio est quia subditus tenetur obedire ubi peccatum certum non est, ut diximus *Tract. I. n. 18.* Qui verò non est subditus non potest in militiam descendere, nisi sit certus de ejus justitiâ; quia nemo potest cooperari ad spoliandum aliquem re quam possidet, nisi sit certus quod injustè ille eam possideat. Et idem dicendum de militibus salario conductis, modò antè Belli illationem conducti reperirentur (c). Notandum hìc peccare milites qui ab exercitu, cùm adhuc spes victoriæ erepta non sit, aut à Castris sinè justâ causâ decedunt (d).

32. — Quæritur 4. Quænam actiones sint licitæ in bello justo? 1. Licet occidere inimicos, et eorum bona arripere. Innocentes tamen non licet directè occidere, benè tamen eos expoliare bonis, si ipsi sunt Partes Reipublicæ inimicæ, et alio modo haberi

(e) *L. 3. n. 404.* — (b) *ibid. n. 406.* — (c) *n. 408.* — (d) *n. 410.*

318 *Tract. 8. De quinto Præc. Decalogi.*

victoria non potest, ut dicunt *Mol. Bellarm. Laym.*, etc. Verùm bona Ecclesiastica deberent restitui, si adhuc extant (a). 2. Licet Ecclesias demoliri si inimici pro defensione iis utantur. 3. Licet uti insidiis et stratagematis; non autem puteos veneno inficere, aut aliud efficere quod prudenter caveri non possit. 4. In aliquo casu, sed raro ex urgentissimâ causâ potest à Duce juberi Civitatem dari diripiendam, ut dicunt *Laym. Fill. Sa*, etc. 5. Licet captis in bello fugere semper ac possunt. 6. Licet bona inimici dampnificare (quod dicuntur *Repressaliæ*), modò adsit Principis præceptum, et constet de injuriâ à Civibus Reipublicæ inimicæ illatâ, et non excedatur justa compensatio (b). De bonis in Bello arreptis immobilia ad Principem spectant, mobilia verò ad arripientes, nisi consuetudo sit contraria (c).

---

## TRACTATUS IX.

### DE SEXTO PRÆCEPTO DECALOGI.

#### PUNCTUM I.

De Tactibus, Aspectibus, et Verbis turpibus.

*An detur parvitas materiæ in Delectatione carnali, aut sensibili* 1. et 2. *De Tactibus* 3. *De Choreis* 4. *De muliere permittente se tangi* 5. *An Puella oppressa teneatur clamare* 6. *An possit unquam permittere sui violationem* 7. *De Aspectibus* 8. *De Verbis* 9. *de audientibus verba turpia* 10.

**P** ECCATUM contrà hoc Præceptum est materia maximè ordinaria in Confessionibus, et est vitium quod replet Infernum animabus; quare plura de hoc Præcepto singillatim disseremus. Monemus autem, ne

---

(a) l. 3. n. 409. — (b) n. 410. — (c) n. 411.

hæc, nisi à Confessoribus legantur, aut ab iis Sacerdotibus, qui ad audiendas Confessiones se capaces efficere cupiunt; imò rogamus istos, ne legant in hoc, aut alio libro de hâc materiâ (quæ solâ lectione suâ mentem inficit) nisi post omnes alios Tractatus, et cùm jam ad administrandum SS. Pœnitentiæ Sacramentum proximi sunt.

2. — Antè omnia advertendum, quòd in materiâ luxuriæ (quidquid aliqui dicant de levi attrectatione manûs fœminæ, vel de intorsione digiti) non datur parvitas materiæ; ità ut omnis delectatio carnalis, cum plenâ advertentiâ et consensu capta, mortale peccatum sit. Hinc damnata fuit ab Alexandro VII. Propos. 40. quæ dicebat *non esse mortale osculum habitum ob delectationem carnalem et sensibilem, quæ ex osculo oritur*. Et sic etiam reprobanda est opinio admittentium parvitatem materiæ in delectatione sensibili, nempè si vir delectetur de contactu manûs fœminæ, tamquàm de contactu panni serici; quia in hoc saltem adest proximum periculum incidendi in delectationem carnalem (a). Benè tamen advertit *Continuator Tournely* (b) aliud esse agere propter delectationem, aliud cum aliquâ delectatione naturali, quæ de se consurgit ex qualitatibus corpori annexis, quia in eâ potest quidem dari parvitas materiæ, putà in Medico qui ex necessitate Mulierem tangit; modò (addendum) curet ille non sistere in tali delectatione; eamque tangendo detestetur; aliàs jam ageret propter delectationem, quæ licet naturalis sit, tamen (ut diximus) non est sejuncta à proximo periculo transeundi in carnalem, si ex proposito quærat. His positis, procedamus ad loquendum de singulis luxuriæ speciebus. 1. De non consummatis. 2. De naturalibus consummatis. 3. De consummatis contrà naturam.

3. — Et I. De *Tactibus*. Extrà Matrimonium mortales sunt omnes tactus, oscula, et amplexus ob delectationem carnalem exerciti, omnes enim ejusdem sunt naturæ quàm actus consummatus; undè explicandum in Confessione, an habiti sint cum

---

(a) *Lib. 3. n. 415. et 416.* — (b) *Tom. 3. pag. 507.*

eodem, an cum diverso sexu, et an cum personâ conjugatâ, aut sacrâ. Et sic pariter mortalis est tactus propriorum genitalium, maximè cum commotione spirituum, nisi fiat ex necessitate; si autem ex curiositate vel levitate fiat, poterit esse tantum veniale, modò tamen sit obiter, ac sinè morâ, et absque commotione spirituum, aut scandalo, aut periculo delectationis. Tactus autem verendorum alterius corporis, maximè si sint nudi, et fortiùs si diversi sexus, etiam secluso affectu venereo habiti, vix unquàm excusantur à mortali. Excipe tantum nisi fiant ob necessitatem, putà à Chirurgo, dummodò ipse in delectationem non consentiat. Tangere autem genitalia brutorum, per se non est lethale, sed tactum hujusmodi usque ad pollutionem, meritò *Bonac. Holzman, Croix*, etc. contrà aliquos, non excusant à mortali, cum sit actio valdè incitans ad venerem (a).

4. — Choreæ si fiant à laicis, et modo honesto, sinè inhonestis gesticulationibus aut periculosis, non sunt per se illicitæ, ut loquitur *D. Antoninus* cum aliis (b).

5. — Mulier, aut adolescens non peccat, si permittat se pudice juxtà morem tangi, nisi (excipe) ei constet de pravo affectu tangentis, possitque tunc resistere sinè suâ infamiâ, aut scandalo aliorum, ut docent *Cajet. Azor. Sa, Bonac. Busemb.* etc. Peccat verò si non obsistat tactibus impudicis, aut osculis morosis, vel furtivis (c).

6. — Hic dubitatur 1. An Puella oppressa teneatur clamare si oporteat, ad se liberandam à turpitudine? Alii ut *Navar. Soto, Bonac.* etc. si ipsa resistit omni modo quo potest, etsi clamando periculum ei imminet infamiæ, eam excusant, nisi sit in periculo consentiendi; nec obstare dicunt illud Deuteronomii 22. 23. ubi damnatur Puella, quia non clamavit, eò quòd (ut ajunt) tale præceptum perinebat ad externum judicium, in quo præsumebatur. Puella non clamans consensisse. Alii verò ut *Cajet.*

---

(a) *Lib. 3, n. 417. ad 420.* — (b) *Ibid. n. 429.* — (c) *Lib. 13. n. 430.*



et *Salm.* cum aliis, affirmant, et hæc quidem sententia ut tutior consulenda est (licet opposita non sit damnanda, maximè si proximum non adsit periculum consensûs) (a).

7. — Dubitatur 1. An mulier teneatur potiùs mortem pati vi repellendo Invasorem, quàm sui violationem permittere? Negant *Tolet.* *Sotus*, *Navar.* *Holz.* etc. modò voluntate resistat, absitque periculum consensûs. Sed hæc opinio in praxi non videtur probabilis, quia mulier, quiescendo in tali congressu, nimis difficulter poterit se eximere à periculo consentiendi in illum (b). An autem et quomodò liceant tactus inter Conjuges, aut Sponsos? Vide quæ dicentur de Matrimonio *To. II. Tr. XVIII. n. 42.*

8. — II. De *Aspectibus*. Aspicere verenda personæ diversi sexûs, difficulter excusatur unquàm à mortali, nisi fortè aspectus fiat è loco valdè longinquo, et ità obiter ut nullum periculum delectationis adsit. Et etiam loquendo de verendis personæ ejusdem sexûs, non excusarem à mortali virum morosè, et delectabiliter aspicientem pulchrum adolescentem nudum. Censeo tamen cum *La-Croix* (quicquid dicant *Salmant.*) simplicem aspectum turpem, sinè desiderio tactuum, nunquàm inducere speciem personæ quæ aspicitur, nimirum consanguineæ, sacræ, aut conjugatæ; species enim incestûs, sacrilegii, vel adulterii non contrahitur, nisi per tactum quo pietas, vel jus conjugii violatur (c). Aspicere concubitus humanum sinè dubio est lethale; brutorum verò, valdè periculosum, undè nulli permittendum nisi tantùm illis quibus incumbit animalia conjungere ad generationem; modò absit in ipsis periculum consentiendi in turpia (d). Aspicere autem partes minùs honestas. Mulieris, sed non turpes, nempe brachia, crura, aut pectus, non semper est per se mortale; sed si aspectus sit deliberatus, et diuturnus, aut si aspiciens sit ad venerem proclivis, difficillimè à mortali excusabitur; et idem sentio de

---

(a) *N. 430.* — (b) *l. 3. n. 368.* — (c) *l. 3. n. 421.* — (d) *418. in fine.*

### 322 *Tract. 9. De sexto Præc. Decalogi.*

eo qui vultum Mulieris pulchræ morosè inspicit , saltem si inordinato affectu eam diligit (a). Aspicere picturas obscenas ex merâ curiositate , dicunt AA. non esse mortale , si absit periculum turpis delectationis , sed vir morosè aspiciens pudenda muliebria depicta nuda , vel levi velo tecta , nescio quomodò à mortali excusari possit (b). Qui autem pingunt vel exponunt huiusmodi imagines , gravissimo peccato scandali delinquant , cùm ipsæ valdè adolescentes ad libidinem provocant (c). Et idem puto dicendum de iis qui eas domi retinent expositas omnium aspectui.

9. — III. De *Verbis* , Verba , obscæna non sunt mortalia , si proferantur ex irâ aut joco , prout solent Messores , Vindemiatores , et Muliones. Secùs si verba sint nimis lasciva , aut si proferantur cum ipsarum rerum turpium delectatione , vel cum audientium scandalo ; quod ut plurimum adest , si huiusmodi verba dicuntur coram puellis aut pueris , et maximè si quis se jactat de aliquo peccato turpi : in quo se jactans tripliciter ordinariè peccat , 1. quia gloriatur de re malâ , 2. quia magnum præbet scandalum , 3. quia de facili se complacet de peccato patrato (d). Insuper hîc sedulo notandum cum *Salm.* et *Roncagl.* ex *D. Thomâ* , non esse sinè gravi periculo diuturnum colloquium cum puellâ inordinatè dilectâ (e).

10. — Audientes autem verba turpia , aut turpes comœdias tantùm ob curiositatem , aut ob vanum solatium , possunt aliquandò excusari à mortali ; nisi adsit delectatio turpis , vel illius periculum , quod faciliè ferè semper aderit in adolescentibus , vel aliis parùm timoratæ conscientiæ (f). Aut nisi adsit scandalum : et idè meritò docet Bened. XIV. (g). Clericos , et Religiosos non posse comœdiis turpibus interesse sinè scandalo gravi. Et etiam meritò *Holzman.* et *La-Croix* propter scandalum aliorum damnant de mortali eos qui pecuniâ aut plausu cooperantur ad huiusmodi comœdias notabiliter turpes ; eosque qui

---

(a) L. 3. n. 422. et 423. — (b) *ibid.* n. 424. — (c) n. 429. v. 10.  
 — (d) L. 3. n. 426. — (e) n. 422. in fin. — (f) L. 3. n. 426. et 427.  
 — (g) de Synodo l. 11. cap. 12.

eas impedire tenentur, aut commodè possunt, et non impediunt; ac fortius qui illas representant (a) Gravissimè quoque peccant qui libros componunt incitantes ad turpia, vel ad inhonestos amores (b). Hactenùs de actibus luxuriæ non consummatis, nunc videamus de speciebus turpibus consummatis.

## PUNCTUM II.

De actibus turpibus consummatis naturalibus.

*De Fornicatione* 11. *An permittendæ Meretrices* 12. *An fornicatio Sponsorum sit diversæ speciei* 13. *De Stupro* 14. *De Raptu* 15. *De Adulterio* 16. *De incestu* 17. et 18. *Si Dispensati coëant, etc.* 19. *De Sacrilegio* 20. ad 23.

11. — I. **D**E *Fornicatione*. Fornicatio est coitus inter solutos ex mutuo consensu. Concubinatus autem non est aliud quàm continuata fornicatio habitata utorio modo in eadem, vel aliâ domo. Quandò verò Concubinarii possint vel ne absolvi, vide quæ dicuntur infrà de iis qui sunt in occasione proximâ *Tom. III. Tract. ult. Punct. I.* De pœnis autem Concubinariorum, et præsertim Clericorum vide (c).

12. — Dubitatur hìc 1. An permittendæ sint Meretrices? Alii affirmant ex *D. Thomà*, quia plura graviora crimina alioquin evenirent. Sed probabilius negant *Navarr. Roncagl. Guttierrez*, et alii; quia permittendo Meretrices innumera peccata jam patrantur, et contrà, mala graviora non evitantur. Cæterum sedulò omninò advertendū, quòd esto in magnis Urbibus Meretrices permitti possent, nunquàm tamen permittendæ in Oppidis aut Civitatibus parvis (d).

13. — Dubitatur 2. An fornicatio Sponsorum diversam induat speciem peccati? Alii id affirmant de utroque sponso; alii tantum de Sponsâ; alii verò satis probabiliter de utroque negant, ut *Pontius*,

---

(a) cit. n. 427. et 428. — (b) *ibid.* — (c) l. 3. n. 442. — (d) *Ib.* n. 434.

*Sanchez*, *Laym. Lugo*, *Salm. Trullench. Covarr. Ledesma*, *Elbel*, etc. quia uterque Sponsus licet se obliget ad Matrimonium ineundum, neuter tamen aliquod jus tradit alteri in corpus suum, ita ut nequeat illo ad suum arbitrium uti sine alterius injuriâ (a).

14. — II. De *Stupro*. Stuprum est defloratio virginis ipsâ invitâ, et ideò præter fornicationis malitiam habet, etiam injustitiæ. An autem virgine consentiente sit speciale peccatum? Affirmant *Navarr. Azor.* etc., sed communiùs negant *Less. Sanch. Bonac. Busemb. Salm. Barbosa*, etc. Potest tamen aliundè esse specie diversum, nimirum ratione dedecoris familiæ, mœroris parentum, aut rixarum. (b). Ad quid verò teneatur Stuprator, vide dicenda de *VII. Præc. Tract. X. ex n. 91.*

15. — III. De *Raptu*. Raptus committitur, cum abducitur fœmina aut maseulus libidinis causâ, illatâ vi personæ illius, vel iis quibus ipsa subest, nempe parentibus, aut tutoribus (c). Ad quid autem teneatur Raptor, vide de Matrimonio *Tom. II. Tract. XVIII. num. 76.*

16. — IV. De *Adulterio*. Adulterium est copula habita cum personâ conjugatâ, estque speciale peccatum injustitiæ, etiamsi adsit consensus mariti, ut constat ex *Propos. 50. damnata ab Innoc. XI.*, quia per adulterium irrogatur injuria non solum ipsi, sed etiam proli, et generationi humanæ. Hinc sentiunt *Lugo*, et *Lessius* (d) quòd in adulterio, dissente marito, duplex adest injustitia, sed *Viva* (e) cum *Cajet.* et *Turriano* tenet unicam tantum adesse injustitiam contrà bonum generationis, eò quòd per adulterium infertur injuria marito non ut personæ privatæ, sed ut marito; ac ideò ad ipsum spectat consulere proli bono, cui nequit ipse cedere, sicut nequit quis consentire, ut membrum ei ab altero mutiletur. Qui sodomiticè cognoscit uxorem, ex communi sententiâ committit adulterium, et debet ex-

(a) *Lib. 3. n. 447. et vide l. 6. n. 847.* — (b) *l. 3. num. 443.* —

(c) *n. 444.* — (d) *Lugo de Pœnit. D. 16. n. 218. et Less. c. 7. Dub. 3.* — (e) *In Propos. 50. damn. ab Innoc. XI. n. 10.*

plicare, peccasse nefandè cum propriâ uxore (a). Ad quid autem teneantur adulteri, si proles ex adulterio nascitur; vide de Rest. *Tract. X. num. 101.*

17. — V. De *Incestu*. Incestus est congressus cum consanguineâ vel affine, ex copulâ licitâ usquè ad quartum gradum, ex illicitâ usquè ad secundum. Hic dubitatur 1. An incestus cum consanguineâ differat specie ab incestu cum affine? Affirmant probabiliter *Lessius*, *Salm. Roncagl. Croix*, etc. quia in consanguinitate vinculum est ab identitate sanguinis, in affinitate autem est à copulâ, undè diversa videtur difformitas. Alii verò, ut *Sotus*, *Cajet. Sanch. Lugo*, etc. probabilius negant, quia uterque incestus ex eodem motivo pietatis vetatur; et consentit *D. Thomas* (b) dicens, *Ejusdem rationis inconvenientiam facit consanguinitas, et affinitas*. Omnes autem incestus inter affines ex communi sententiâ sunt ejusdem speciei, excepto incestu inter Privignum, et Novercam, interque Socerum, et Nurum (c).

18. — Dubitatur 2. An omnes incestus cum consanguineis sint ejusdem speciei? Tres sunt sententiæ omnes probabiles. Prima cum *Cajet. Pontio*, *Soto*, *Navar. Castrop.* etc. affirmat, excepto primo gradu in lineâ rectâ; quia (ut dicunt) commixtio conjugalitatis inter alios consanguineos tantum ab Ecclesiâ est vetita, non verò à naturali jure, per quod specifica diversitas solummodò constituitur. Secunda sententia cum *Suarez*, *Vasq. Laym.* etc. tenet omnes gradus usquè ad quartum speciem diversam incestus constituere, quia major debetur reverentia proximiori gradui quàm remotiori. Tertia demum cum *Lessius*, *Lugo*, *Sanch. Roncagl.* etc. dicit tantum primum gradum, tam in lineâ rectâ, quàm in transversali constituere diversam speciem; quia sentiunt commixtionem inter fratres, et sorores ab ipsâ naturâ esse vetitam (d). Certum autem est quòd incestus inter cognatos spirituales, et legales (ratione scilicet adoptionis) sunt diversæ speciei, quàm inter consanguineos et affines (e).

---

(a) — *L. 3. n. 446.* — (b) 2. 2. q. 154. art. 9. — (c) *Vide lib. 6. n. 469.* — (d) *Lib. 6. n. 470.* — (e) *Lib. 3. n. 450.*

19. — Dubitatur 3. An cognati, obtentâ, et executâ dispensatione ad Matrimonium ineundum, committant incestum si antè conjugium fornicentur? Adest duplex probabilis sententia. Alii communiùs negant, ut *Sanch. Lugo, Cajet. Armilla, et Vega*; quia; sublatâ prohibitione Matrimonii, cessat ratio incestûs. Alii verò, ut *Major et Gallego* affirmant, quia impedimentum propinquitatis ablatum est tantum ad nuptias contrahendas, non autem ad fornicandum (a).

20. — VI. De *Sacrilegio*. Sacrilegium est, cum violantur sacra per actum venereum. Potest igitur sacrilegium committi circa personam, locum, et rem. Et I. circa *Personam* fit, si quis peccat habens votum castitatis, vel cum habente illud. Hinc Sacerdos peccans cum aliâ personâ sacratâ duplex committit sacrilegium. Contrà vero Religiosus, qui est etiam Sacerdos, castitatem lædendo probabilius unum sacrilegium committit, tùm quia Sacerdos probabilius tantum ratione voti Ordini Sacro annexi tenetur ad castitatem (ut dicemus in *Exam. Ord. num. 59.*); tùm quia talis etiamsi teneretur ad castitatem ex solo præcepto Ecclesiæ, tamen adhuc contra Religionem peccaret, cum Ecclesia tantum ex motivo Religionis castitatem præcipit (b). Sacerdos autem inducens suo consilio laicum ad fornicandum, committit sacrilegium si ex affectu ad libidinem inducit: secùs si ex alio pravo fine (c).

21. — II. Circa *Locum*, committit sacrilegium qui fornicatur in loco sacro, nempè intrâ Ecclesiam, aut Cæmeterium, non autem in atrio Ecclesiæ, Monasterio, aut Oratorio privato non benedicto ab Episcopo (d). Dubitatur hîc 1. an copula maritalis, aut occulta habita in Ecclesiâ sit sacrilegium? Adest triplex probabilis sententia. Alii negant de maritali, ut *Alensis, Pontius, Sa*; etc. Alii negant de occultâ, ut idem *Pontius, Tolet. Vasq. Azor.* etc. Alii verò communiùs et probabilius de utrâque affirmant, quia per utramque irreverentia irrogatur Ecclesiæ, et Ecclesia polluitur; tametsi, cum crimen sit occul

---

(a) *Lib. 3. n. 452.* — (b) *Lib. 3. n. 454. ad 456.* — (c) *m. 457.*  
 — (d) *Lib. 3. n. 460.*

tum, non est obligatio à Divinis Officiis abstinere ; ità *Suar. Sanch. Less. Holzman, Croix, Bonac. Salm.* etc. Attamen iidem AA. meritò excusant conjuges copulantes in Ecclesiâ, si ipsi sint in morali necessitate coeundi, putà si sint in periculo incontinentiæ, vel si diù in Ecclesiâ permanere debeant. Quomodò autem intelligendum illud *diu* ; alii putant decem dies ; alii verò probabiliùs mensem, aut saltem 20. dies. At si conjuges judicent per mensem esse in Ecclesiâ mansuros, advertunt *Sanchez, Salmant.* et alii, eos ab initio copulari posse (a).

22. — Dubitatur 1. an omnes actus externi impudici habiti in Ecclesiâ, nempè tactus, aspectus, aut verba sint sacrilegia ? Negant *Cajet. Návarr. Bonac.* etc. eò quòd tantum per seminis effusionem Ecclesia polluitur. Sed probabiliùs affirmant *Suarez, Sanchez, Molina, Salmant.* etc. quia his actibus, licèt non violetur Ecclesia, tamen jam illi irrogatur irreverentia. Actus verò interni sive cogitationes non sunt sacrilegia, nisi sint de peccando externè in Ecclesiâ (b).

23. — III. Circa *Rem* demùm committit sacrilegium, qui abutitur rebus sacris ad turpia. Idem dicendum de Sacerdote qui turpiter peccat indutus ad Missam, aut gestando Eucharistiam, aut statim post Communionem, v. g. infrà mediam horam (c). Egimus de speciebus turpibus naturalibus, nunc de iis quæ sunt contrà naturam.

### PUNCTUM III.

De Actibus turpibus consummatis contrà naturam.

*De Sodomia* 24. 25. et 26. *De Bestialitate* 26. *De coitu cum Dæmone* 28. *De Pollutione* 29. *De Distillatione* 30. *An liceat expellere semen corruptum* 31. *An teneamur impedire pollutionem de se evenientem* 32. *An vitare omnes pollutionis causas* 33. *Quid si actiones ponantur ex justâ causâ* 34.

24. — **E**T I. De *Sodomia*. Sodomia habet quidem specialem deformitatem. Dubitatur autem in-

---

(a) *Lib. 3. n. 458.* — (b) *Ibid. n. 459, ad 462.* — (c) *n. 463.*

ter DD. in quo ipsa consistat. Alii sentiunt consistere in concubitu ad indebitum vas : Alii verò communiùs et probabiliùs cum *D. Thomà*, in concubitu ad indebitum sexum. Hinc infertur 1. quòd coitus fœminæ cum fœminâ, et masculi cum masculo, perfecta est sodomia, in quâcunque parte corporis fiat congressus, quia ordinariè semper adest tunc affectus ad indebitum sexum; ideò non est opus explicare in Confessione, an pollutio fuerit intrâ vel extra vas præposterum, quamvis ad incurrendum casum reservatum requiratur seminatio intrâ vas, ut ait *P. Mazzotta* (a). Censeo verò in sodomiâ omninò explicandum in Confessione (quicquid dicant *Salm.*), an quis fuerit agens, vel patiens; quia patiens non faciliè semper polluitur ut agens, prout non benè *Salm.* supponunt (b). Imò explicandum si sodomia habita sit per vim, vel cum conjugatâ, aut habente votum castitatis (c).

25. — Infertur 2. Coitum viri in vase præpostero mulieris esse sodomiam imperfectam, specie distinctam à perfectâ. Si quis autem se pollueret inter crura aut brachia mulieris, duo peccata diversa committeret, unum fornicationis inchoatæ, alterum contrâ naturam. An pollutio in ore sit diversæ speciei? Affirmant aliqui, vocantque hoc peccatum *Irrumationem*, dicentes quòd semper ac sit pollutio in alio vase quàm naturali, speciem mutat. Sed probabilius sentiunt *Cajet. Filliuc. Holzman, Grassius*, etc. quòd si pollutio viri sit in ore maris, est sodomia : si in ore fœminæ, est fornicatio inchoata, et insuper peccatum contrâ naturam, ut mox diximus. Coitus autem cum fœminâ mortuâ non est bestialitas, ut quidam ajunt, sed est pollutio, et insuper est fornicatio affectiva (d). Præterea, pollutio habita tangendo puerum vel muliorem dormientem, absque tamen concubito siue conjunctione corporum, non habet nisi simplicis pollutionis malitiam, ut probabiliùs dicunt *Salm. Cajet. Azor. Bonac.* etc. Item qui polluitur tactibus alienis jam

---

(a) *Mazzot. tom. 3. p. 519. de Cas. res.* — (b) *Vide Opus nostrum lib. 3. n. 468.* — (c) *n. 469. in fin.* — (d) *Lib. 3. n. 466.*



dupliciter peccat cooperando peccato alterius; non tenetur verò explicare an tactibus maris, vel fœminæ, nisi illa habeat virum, aut votum castitatis (a). Item probabilius est cum *Lugo*, *Sylvest. Salm. Roncaglia*, *Croix*, etc. contrà aliquos, quòd tam sodomia, quàm omnes tactus impudici inter consanguineos aut affines, vel cognatos spirituales, aut legales induunt malitiam etiam incestus cum eadem habeant deformitatem, quàm actus consummatus (b).

26. — Quoad pœnas Sodomitarum, si sint laici, damnantur morte et combustione. Clerici verò et Religiosi per Bullam 27. S. Pii V. editam die 30. Aug. 1568. *Horrendum*, privantur omni Officio, Beneficio, et Privilegio Clericali; dummodò (ut docent DD.) sodomia 1. sit cum alio viro, non fœminâ, aut bruto. 2. sit perfecta cum pollutione intra vas. 3. sit frequentata, dùm dicitur in Bulla, *Sodomiam exercentes*. Probabilius est has pœnas incurrrere etiam patientes, ut dicunt *Bonac. Salmant. Diana*, et *Barbosa*, contrà alios, dùm patientes sunt verè sodomitæ. Contrà verò probabilius et communius docent *Suar. Navarr. Bonac. Barbosa, Less. Fill. Trullench. Salmant.* etc. (adversus *Azor. Dicast.* etc.) has pœnas non incurri nisi post sententiam, quamvis dicatur in Bullâ, *Præsentis Canonis auctoritate privamus*; quia ut diximus in *Tract. II. n. 25.* nulla pœna privans jure acquisito incurritur, nisi post sententiam, scilicet declaratoriam (c).

27. — II. De *Bestialitate*. Bestialitas est coitus cum bestia: ipsaque detestabilior est quàm sodomia. Non oportet autem explicare an bestia fuerit mas vel femella, ut communiter docent DD. contrà paucos, quia tota hujus criminis deformitas est in accessu ad speciem diversam (d).

28. — Coitus cum Dæmone succubo vel incubo, uti communissimè sentiunt *Azor. Cajet. Bonac. Fill. Salmant. Busemb.* etc. reducitur ad Peccatum bestialitatis, additâ tamen malitiâ culpæ contrà Reli-

---

(a) N. 467. — (b) n. 469. — (c) *Lib. 3. n. 470. ad 473.* — (d) *Lib. 3. n. 474.*

gionem ; et etiam fornicationis , aut sodomix affectivæ , si Dæmon appareat in formâ pueri aut mulieris , et etiam adulterii , aut incestûs , si quis delectetur de coitu cum Dæmone tamquàm cum nuptâ vel conjunctâ , juxtâ quæ diximus de delectatione morosâ *Tract. III. n. 48. (a).*

29. — III. De *Pollutione*. Pollutio est seminis effusio sinè congressu cum alio ; ipsaque est vetita de jure naturali , ut patet ex *Propos. 49. damnatâ ab Innoc. XI.* Undè per se est peccatum gravius quàm fornicatio , cùm sit contrâ naturam. Pollutioni autem additur malitia sacrilegii , si sit ab habente votum castitatis : adulterii , si à conjugato : item fornicationis , si quis se polluendo delectatur tamquàm de coitu cum foeminâ ; vel sodomix , si cogitet coire cum puero (b).

30. — Dubitatur 1. An distillatio voluntariâ , nempe illa quæ est fluxus humoris inter urinam et semen , sit culpa mortalis ? Resp. Si est cum aliquâ delectatione venereâ , vel cum commotione spirituum , erit quidem mortalis , si non vitetur , sicut vitanda est pollutio. Si verò evenit absque sensu et commotione , poterit ea permitti tamquàm emissio alterius excrementi , ut communissimè docent *Cajet. Bonac. Soy. Busemb. Holzm, Salm. Sporer, Elbel, etc.* Diximus *permitti*, sed nunquàm potest datâ operâ procurari , ut rectè advertunt *Sanch. et Bonacin. (c).*

31. — Dubitatur 2. An liceat expellere semen corruptum medicinis ? ( nunquàm enim licet tactibus ) Negant *Salmant. et Roncaglia*. Sed communiùs affirmant *Laym. Sanch. Bonac. Anaclet. Sporer, Croix, etc.* modò expulsio possit fieri sinè sensu venereo : et modò semen sit certè corruptum , nec aliter expelli valeat (d).

32. — Dubitatur 3. An sit obligatio impediendi pollutionem de se evenientem , putâ si inceperit in somno , et in vigiliâ consummetur ? Communiter negant AA. modò absit consensus in delectationem , vel ejus proximum periculum ex præteritâ experientiâ ; itâ *Sanch. Concina, Navar. Azor. Salmant. Holzm. Spor. Trull. etc.* tùm quia difficillimum est

---

(a) N. 475. — (b) *Lib. 3. n. 476.* — (c) n. 477. — (d) n. 478.

illam cohibere, cùm jam incepta sit; tùm quia non tenetur homo eam impedire cum periculo morbi ex corruptione seminis: tunc enim ipsam non vult, sed patitur. Ceterùm sapienter monet *Gerson* semper expedire, ut tunc homo conetur impedire quantum potest; saltem (juxtà *Sanchez*) omninò curare debet, ut eo tempore se muniat signo Crucis, avertatque mentem ab illà delectatione, invocando SS. Nomina Jesu et Mariæ, ut adjuvent ne ipse in culpam ruat. Notandum autem quòd si persona existit tunc in semiplenâ vigilia, et delectetur de pollutione inceptâ, minimè damnandus est de mortali cùm ad mortale omninò requirantur et plena advertentia, et perfectus consensus (juxtà dicta *Tract. III. n. 24. ad 39.*), quibus certè caret qui est semidormiens, et idèò non habet usum rationis perfectè liberum et expeditum (a).

33. Dubitatur 4. An sit obligatio vitandi omnes causas in pollutionem influentes? Resp. Si causæ sint graviter influentes, prout certè sunt illæ, quæ sunt graviter culpabiles in materiâ luxuriæ, nempe tactus, vel aspectus impudici, delectationes morosæ, et similes, sinè dubio tenetur homo eas evitare; alioquin pollutio, saltem in confuso prævisa, licèt non intenta, illi ad culpam imputatur. Et idem dicendum de pollutione causatâ ob colloquium diuturnum cum puellâ inordinatè dilectâ, vel ortâ ex actione, quæ, esto per se non sit mortalis, esset tamen talis respectu alicujus, qui pollutionibus hujusmodi habitis fuit solitus consentire (b).

34. — Advertendum tamen quòd si præfatæ actiones graviter influentes ponantur ex causâ necessariâ vel utili, absitque periculum consensûs, tunc pollutio ex eis orta non imputatur ad peccatum, ut omnes docent. Hinc etiam prævisâ pollutione (intelligi semper involuntariâ), I. licet Confessariis excipere Confessiones, et tractatus legere de rebus turpibus: item Chirurgis aspicere et tangere partes foeminæ ægrotantis, ac studere rebus medicis; ita communiter *D. Antonin. Navarr. Cajet. Petrocorens.*

---

(a) *Lib. 2. n. 479.* — (b) *Ibid. n. 432.*

*Sanch. Bonac. Anacl. Sporer, Salm. Holzm. et alii* plures cum *D. Thomâ* (i). Idque admittunt *Navarr. Hurtad. Roncaglia, Salmant. Elbel, Sporer, etc.* etiamsi aliquis Chirurgus ex officio medens, vel Parochus excipiendo Confessiones aliquoties in pollutionem consenserit, modò proponat in futurum convenientibus mediis se præcavere ad peccatum vitandum; secus verò dicunt de simplici Confessario; hic enim tenetur eo casu abstinere ab audiendis Confessionibus, si possit sinè gravi suo damno. Imò si Parochus vel Chirurgus in iis occasionibus semper vel ferè semper lapsus fuerit, et non appareat nova probabilis spes emendationis: hic omninò tenetur etiam cum jacturâ vitæ officium deserere (b). Sic etiam II. dicunt quamplurimi, ut *Cajet. Bonac. Laym. Sanch. Navarr. Fill. Salm. Spor. Croix. Busemb. Villal. Ledesma, Marchant. Trull. etc.* licere iis, qui magnum patiuntur pruritus in verendis, tactu illum abigere, etiamsi pollutio sequatur. Rectè verò id prohibet *Roncaglia*, si pruritus non sit valdè molestus, quamvis permittat eum abigere cum aliquâ tantum commotione. Nihilominus non facillè credatur quibusdam puellis quæ tactibus se polluere solent, prætextu hujusmodi ardoris; nam si diligenter examinentur, cognoscetur ille pruritus multoties potius excitatus fuisse vel à pravis cogitationibus præhabitis, vel ab habitu pravo contracto se tangendi. III. Dicunt etiam *Castrop. Laym. Sanch. Armil. Less. Azor. Navarr. Vasq. Bonac. Anacl. Salmant. etc.* licere equitare causâ utilitatis, et etiam recreationis, ut subdunt *Sanch. Laym. Castrop.* Dicunt quoque *Sanch. Laym. Castrop. Holzman, Sporer, etc.* ex communi, unicuique licere decumbere in aliquo situ ad commodius quiescendum. IV. Demùm dicunt *S. Antonin. Less. Tolet. Pichler. Salmant. Holz. Spor., etc.* etiam communiter licere cibos aut potus calidos moderatè sumere, et honestas choreas ducere (c).

Si verò causæ leviter influant in pollutionem, alii

(a) p. 3. quæst. 8. art. 7. — (b) *Lib. 3. n. 183. et lib. 5. n. 63. vers. Quart.* — (c) *Citat. n. 383.*

dicunt omnes esse vitandas sub gravi; prævisâ pollutione; etiamsi sint leviter culpabiles. Alii id admittunt, si sint mortales, quamvis in aliâ materiâ quàm luxuriæ. Sed communiter et probabilius docet *Sinct. Astorin. Suar. Abulens. Sanchez, Silvest. Sa, Roncaglia, Bonac. Anacl. Salmant. Holzman, Elbel,* etc. non esse obligationem gravem vitandi causas, nisi graviter culpabiles in eâdem materiâ luxuriæ. Diximus *gravem*; nam erit obligatio levis nisi adsit aliqua rationabilis causa, ut probabilius tenent *Sanch. Less. Roncaglia, Bonac. Salmant. etc. contra Holzman, Croix* etc. Imò valde probabiliter *Ronc. et Salm.* dicunt non excusari à mortali qui frequenter pollutiones expertus fuerit ex causis culpabilibus (licèt per se non graviter) in materiâ turpi, putà ex lectione turpium curiosâ, aspectu picturæ inhonestæ, vel coitu animalium, et similibus; quia respectu talis personæ causæ prædictæ non leviter, sed graviter influunt. Secùs autem ajunt idem *Salmant. et Sanch.* de causis quæ sunt omninò leves, quas universas vitare esset moraliter impossibile (a). Pollutio habita in somno non est peccatum, nisi fuerit antea intenta, vel nisi postea quis se complacet de delectatione habitâ; si verò gaudeat de exoneratione, vide dicta *Tract. III. numero 52.*

Deniquè sedulò hìc advertendum, quòd in hâc materiâ sexti Præcepti oportet, quantum possibile est, omnem adhibere severitatem, cùm in re tam labili nulla cautela unquàm nimia existimari debeat, et plures opiniones, quæ speculative loquendo sunt probabiles, in praxi improbables evadunt. Hinc Confessarius ubi periculum pœnitentium inspicit, licèt actionem, quam illi vellent perpetrare, de certò peccato mortali damnare non valeat, tamen nullo modo permittat. Hoc medici animarum est: præsertim respectu eorum qui in vitio turpi habitum in præterito habuerunt; his enim non solum proximas occasiones vitare, sed etiam remotas opus erit; aliàs ob fragilitatem contractam semper in idem recident, cùm in hâc materiâ, ad quam homines naturaliter sunt proni, de facili à minoribus ad ulteriora mala ipsi progrediuntur.

---

(a) *Lib. 3. n. 434.*

## TRACTATUS X.

## DE SEPTIMO PRÆCEPTO.

## CAPUT I.

## De Justitiâ, Jure, et Dominio.

*Divisio Justitiæ, Juris, et Domini* 1. *Peculium Filii familias* : De *Castrensi*, et *quasi-Castrensi* 2. De *Profectitio*, et *Patrimoniali*, aut *acquisito à filiis in negotiatione* 3. De *Adventitio* 4. De *bonis uxoris* 5. *Bona Clericorum* I. *Patrimonialia*, II. *Industrialia*, III. *Ecclesiastica*, IV. *Parsimonialia* 6. *An Beneficiatus habeat dominium absolutum fructuum* 7. *Qui hos fructus recipit à beneficio* 8. *Quot modis acquiritur dominium, etc.* 9. De *Præscriptione* 10. ad 13.

I. — **J**USTITIA dividitur in *Legalem*, *Distributivam*, et *Commutativam*. *Legalis* respicit jura, et pœnas juxtâ leges; *Distributiva* respicit personarum merita circa præmia, et honores; *Commutativa* bonorum valorem, ut unicuique reddatur quod suum est. Jus autem dividitur in *jus in re*, et in *jus ad rem*. Jus *ad rem* dicitur illud quod præbet actionem ad prætendendum aliquod non adhuc obligatum. Jus autem *in re* dicitur illud quod actionem præbet super re jam obligatâ, ut est jus quod acquirit emptor super re emptâ, ut Clericus super Beneficio ipsi collato. Insuper jus *in re* dividitur in *Dominium*, et *Usumfructum*. *Dominium* aliud est jurisdictionis in subditos, aliud proprietatis in bona. Prætereâ aliud est *Directum* quod habet Princeps in suo Feudo, et dominus in fundo in Emphyteusi dato; aliud est *Utile* quod habet Feudatarius, et Emphyteuta. *Usumfructus* autem est jus percipiendi ac etiam alienandi fructus alicujus fundi : Ad differentiam *Usum*, propter

quem, qui eum habet, potest quidem uti fructibus, quibus ipse et ejus familia indigent, non tamen potest aliis alienare (a).

2. — Hinc videndum, super quibus bonis habeant dominium filiusfamilias, uxores, et Clerici. Et I. quoad filiosfamilias notandum est quadrifariam posse esse eorum Peculium: Castrense, quasi-Castrense, Profectitium, et Adventitium. I. *Castrense*, sunt illa bona quæ filius acquirit in militiâ, aut propter militiam. II. *Quasi-Castrense* sunt bona acquisita in officiis publicis, Judicis nimirum, Advocati, Lectoris, Medici, et etiam Notarii, ut docent *Nav. Mol.* et *Lugo*; et *Sanch.* addit, officium Architecti Principis vel Civitatis. Istorum Peculiorum filius plenum dominium habet in proprietate, et usufructu. Et idem dicitur de eo quod acquirit filiusfamilias qui est Clericus, tam ob officium Clericale (juxta id quod habetur in *Authent. 1. C. de Episc. et Cler.*) quàm ob quemlibet alium titulum, juxta communem sententiam *Mol. Lug. Sanch.* etc. (b). Excepto titulo Beneficii; de quo quæstio et an Clericus acquirat plenum dominium fructuum, ut videbimus *num. 7.*

3. — III. *Profectitium* verò sunt bona quæ filius negociando patris pecuniam lucratus est, aut filio donata fuerunt, sed tantum patris intuitu. Hoc Peculium est solum patris quoad proprietatem et usumfructum. Notandum tamen 1. in dubio, an bona sint filio donata intuitu ejus, an patris, tunc filius integrè potest ea retinere tantum, si bonâ fide incepisset ea possidere. Notandum 2. bona à patre in patrimonium filio data, ut ordinetur in *Sacris*, non esse amplius profectitia. Sed hæc tamen debent conferri cum fratribus, cum Clericus hæreditatis paternæ portionem exquireret. Not. 3. Si filius negotiatus est bona paterna nomine patris, lucrum fore Peculium Profectitium: si verò nomine proprio, fore Adventitium, ut docent *Lugo* et *Mol.* Et in dubio an lucrum provenerit ex bonis patris aut alterius, tunc tantum habetur Profectitium, cum filius habuit bonorum patris administrationem; *Lugo* cum *Gomez, Bartol.*

---

(a) *Lib. 3. n. 486. 487.* — (b) *n. 488.*

etc. Nota 4. si filius negotiatur bona patris, extrâ domum paternam morans, et nihil à patre recipiens pro alimentis, tunc lucrum est adventitium; sed si negotiatur in domo patris, et alimenta ab eo recipit, lucrum est profectitium. Sed si servitus, quam filius præstat, sit excedens, tunc potest prætereundæ stipendium (a); circâ hoc vide infra num. 228.

4. — IV. Deniquè Pecûlium *Adventitium* sunt bona quæ proveniunt filio aliundè quam à paternis, aut sunt donata filio intuitu suo proprio. Hæc, si sunt consumptibilia usu, pater disponere potest, cum obligatione tamen eâ restituendi filio post suam mortem; si verò sunt stabilia, filius habet solam proprietatem, et pater usumfructum, etiamsi sint bona majoratûs, ut dicit *de Lugo*. Sed in quibusdam casibus ad filium spectat etiam ususfructus, putà 1. si ususfructus etiam donatus fuisset præcisè filio, aut si donatio facta fuisset contradicente patre. 2. Si filius simul cum patre succedat in patris hæreditatem. 3. Si filius recipiat dotem sinè patris fidei jussione. Ceterùm extrâ hos casus filius non potest de bonis adventitiis sinè patris consensu disponere; et etiam cum consensu patris non potest testari, nisi ad causas pias, ut ex *C. Licet, de Sepult. in 6*. Ususfructus verè est patris usquè dùm hic vivit, licèt filius ex patriâ potestate exiverit, dummodò ad Episcopatum non sit promotus, aut ad aliam magnam dignitatem; *Salmant. et Holzm.* Et si pater filium emancipat sponte, dicit *de Lugo* medietatem ususfructûs ad patrem, et alteram medietatem ad filium spectare; sed hoc non procedit si emancipat matrimonii causâ. Insuper dicit, quòd si pater permittit filium extrâ domum incolere, non ideò judicare illum remittere usumfructum prædictum, nisi quandò eum dimittit, ut sibi aliundè victum comparet, aut quandò filius hunc usumfructum consumit patre tacente (b).

5. — II. Quoad uxores, bona earum altera sunt *Dotalia*, altera *Paraphernalia*, quorum ipsæ plenum habent dominium. Bonorum autem dotalium ususfructus

---

(a) N. 488. v. III. *Peculium*. — (b) l. 3. r. 489.



fructus et administratio pertinent ad virum, proprietas verò ad uxorem, adeòque mortuo viro ipsa omnibus creditoribus ipsius personalibus præfertur. Et etiam in vitâ potest repetere dotem, si vir periclitaretur fieri impotens ad illam restituendam. Si verò dos consisteret in pecuniâ, aut in aliis usu consumptilibus, vir plenum acquirit dominium, cum obligatione postea restituendi uxori tantundem. Et idem currit pro bonis stabilibus, quæ viro æstimata dantur, et animo venditionis, adeòque si pereunt, sibi pereunt. (a).

6. — III. Clericorum denique bona quadruplicia sunt. I. *Patrimonialia* quæ ipsi obveniunt ex quacunque causâ prophanâ. II. *Industrialia* seu quasi *Patrimonialia* sunt ea quæ Clerici acquirunt ex Ecclesiasticis functionibus sinè beneficio, ut ex Concionibus, ex Missis etc. III. *Ecclesiastica* quæ acquiruntur ex Beneficiis. IV. *Parsimonialia* quæ Clericus ex redditibus Ecclesiasticis subtrahit de suâ sustentatione, vivendo parcius quàm honestè vivere potuisset. Et I. quoad bona patrimonialia non dubitatur quin de iis plenum dominium habeat. II. Idem procedit de bonis industrialibus juxtâ comm. sententiam *Lessii*, *Sanch. Castropal. Lugo*, *Anac. Salm.* etc. Et idem dicunt probabiliter *Silvester*, *Azorius*, *Angel. Bonac. Lugo*, *Salmant. Less.* etc. de Distributionibus quotidianis quæ dantur Canonicis (contrâ *Navarr.* et *Sanch.*); quia istæ non dantur immediatè ob titulum Beneficii, sed ob servitium tanquàm personæ stipendium (b). III. Idem procedit de *Parsimonialibus* de quibus potest Clericus pro suo libitu disponere, ut dicunt etiam communiter *Navar. Cabas. Sot. Less. Anacl. Covarr.* contrâ *Petrocor.* et alios paucos (c). Et idem docet expressè *S. Thomas* (d), ubi sic dicit: *De suis autem quæ sunt specialiter usui* (nempè Clerici) *deputata, videtur esse eadem ratio quàm de propriis bonis.* Ratio est quia hujusmodi fructus dantur Clerico tanquàm stipendium laborum, quos ille

(a) *Lib. 3. n. 488. v. IV. lib. 3. n. 489.* — (b) *Lib. 3. n. 490. et 491.* — (c) *cit. n. 491. v. III. id.* — (d) *2. 2. q. 185. a. 7.*  
Tom. I. P

exhibet servitio Ecclesiæ, juxtà id quod declaravit Concilium Agathense in Canone 36. (a).

7. — IV. Major difficultas restat circà bona Ecclesiastica quæ supersunt propriæ sustentationi, si Clericus malè impendat ea, an teneatur ad restitutionem. Non dubitandum, quin Beneficiatus mortaliter peccet, si malè impendat fructus superantes, et si non distribuit pauperibus, aut in aliis piis causis, ut dicunt DD. communiter (b). Dubium itaque est an præterea teneatur ad restitutionem? Prima sententia affirmat cum *Layman*, *Concina*, *Hubert*, *Roncagl. Petrocor.* etc. quia, ut dicunt, nullà ratione probatur Beneficiatus adipisci dominium fructuum Beneficii; et si fortè adipiscitur, saltem (sicut ajunt *Layman*, *Bonac. Roncaglia* etc.) acquirit quoddam dominium limitatum, juxtà mentem Ecclesiæ, cui supremum dominium Ecclesiasticorum bonorum spectat, nempe dominium cum onere annexo superfluum pauperibus dispensandi. Credunt Auctores contrarii hoc dominium probare propter divisionem factam olim à Simplicio Papà, qui præcepit bonorum Ecclesiasticorum quartam partem tradi Ecclesiæ, quartam Episcopo, quartam pauperibus, quartam Clericis. Sed respondet *Hubert*, ignorari, an hæc divisio unquàm effectum habuisset, undè inquit, donec probatur illam certè factam fuisse, retinent pauperes jussuum super omnia bona Ecclesiastica superantia Clericorum sustentationem (c). Hoc tamen non obstante negari non potest oppositam sententiam, quam tenent *Lessius*, *Lugo*, *Azor*, *Cabassut*, *Salmant*, *Holzman*, etc. satis esse probabilem, præsertim ob auctoritatem S. Thomæ, (d) qui expressè docet, quòd de bonis Beneficiorum eadem habetur ratio, quàm de bonis patrimonialium; hinc dicit in alio loco (e) quòd si Clericus abutitur fructibus suæ præbendæ, non tenetur ad restitutionem, sed solum ad poenitentiam peragendam. Atque loco antea citato supponit S. Doctor, asseritque pro certo divisionem præfatam bonorum verè effectum habuisse;

(a) *Lib. 3. cit. n. 491.* — (b) *l. 3. n. 491. ad IV.* — (c) *Lib. 3. n. 492.* — (d) *S. Thom. 2. 2. q. 185. a. 7.* — (e) *Idem S. Thom. Quodlib. 6. a. 12. ad 3.*

Imò notandum, non quidem Simplicium Papam introduxisse prædictam divisionem; sed invenisse introductam, et ipsum tantum de illâ executionem præcepisse, ut apparet ex eâdem ejus Epistolâ, ubi jussit Episcopum Gaudentium restituere tres portiones Ecclesiasticorum reddituum, quos per triennium sibi appropriaverat, retinendo solam quartam partem quæ ad eum pertinebat; *Sed sola ei ex his quarta portio remittatur, tres illas portiones, quas per triennium dicitur sibi tantummodo vindicasse, restituat (a).* Ex quo deducunt secundæ sententiæ Auctores, quod fructus Beneficiorum Clericis deputati in eorum dominium transeunt. Idque videtur confirmari à Concilio Tridentino *Sess. 24. Cap. 12. de Ref.* illis verbis, *fructuum, quos ratione etiam præbendæ, ac residentie faciunt suos.* Atque à Concilio Lateranensi V. *Sess. 9. §. Statuimus*, ubi dictum fuit, quod Beneficiarius, si omittit Officium recitare post sex menses à die possessionis, *fructus suos non faciat*, ergo si non omittit, benè fructus facit suos.

8. — Hinc quæritur an qui recipit dono à Beneficiato hæc bona superflua graviter peccet, et teneatur pauperibus restituere? Distinctione utendum est; Si tali donatione factus non est beneficiatus impotens satisfaciendo suæ obligationi, et Donatarius bonâ fide recepit dictos fructus, ad nihil tenetur; nam recepit à Clerico qui probabiliter (ut suprâ dictum est) erat dominus, saltem cum dominio limitato. Si autem Clericus redderet impotens, et donatarius reciperet fructus prædictos cum malâ aut dubiâ fide, dicimus eum debere majorem partem restituere pauperibus, juxtâ id quod dicitur in simili casu *num. 128.* Dico majorem, quia cum jam sit æquè probabilis cum *Sancto Thomâ* prima sententia, nempe quod Beneficiarius sit dominus absolutus fructuum, non potest ad totum teneri donatarius, sed tenetur tamen ad majorem partem, quia cum solâ opinione probabili non potest quis accipere possessionem alicujus rei, ut dicitur

---

(a) *Epist. S. Simplicii ad Florent. ap. Harduin. in Collect. concil. tom. 2. pag. 380.*

in simili casu (a). Circà administrationem fructuum Beneficii observentur, quæ dicemus *Tract. XIII. ex num. 45.* loquendo de obligationibus Beneficiatorum.

9. — Videamus denique quot modis acquiratur dominium. Tribus modis acquiritur, nempe voluntate domini, propter jus naturale Gentium, et propter jus positivum. Et I. acquiritur dominium privatâ domini voluntate, et de hoc erit sermo agendo de Contractibus. II. Jure naturali Gentium nimirum 1. *Occupatione*, nam res quæ dominum, non habent primo occupanti conceduntur; §. *Feræ, Inst. de Rer. divis.* (de Thesauris, et rebus casu inventis loquemur n. 69 et 70.) 2. *Nativitate*, propter quam foetus animalium spectant ad Dominum stabularum; §. *Item ea, eod. tit.* 3. *Alluvione*, propter quam si insensibiliter fundo alterius aliquid adjicitur, illi acquiritur; secus si patenter: (§. *Præterea, eod. tit.*) 4. *Arcessione*, v. g. si ad tuam vestem consuitur ornamentum aliquod (quod difficiliter separari potest, ut est opus acu pictum), illud sit tuum; (§. *Sic tamen.*) 5. *Specificatione*, cum datur ab aliquo forma materiei alienæ, illi acquiritur, soluto pretio domino rei; §. *Cum ex alienâ* (b). 6. *Confusione*, v. g. olei cum oleo; ut *Commixtione*, v. g. pecuniæ cum pecuniâ, frumenti cum frumento, tunc res fit possidentis (dummodò res sua sit major), cum obligatione tamen restituendi domino minoris partis pretium; ut habetur ex *L. Si alieni nummi, ff. de Solut.* Et hoc quod de pecuniâ valet etiam pro aliis similibus, ut dicunt *Less. Lug. Vasq. Silvestr.* etc. Cæterum dominus minoris partis semper potest ex cumulo accipere suum, ut dicunt probabiliter *Less. Castrop. Salm. et Trullench.* (c). 7. *Ædificatione*, si aliquis ædificat in suo fundo ex materiâ alienâ, acquirit dominium materiæ cum obligatione restituendi duplò majus; si quis autem materiâ propriâ ædificat in fundo alieno, totum perdit; §. *Cum in suo, Inst. de Rer. div.* quia præsumitur velle donare, secus verò si constet noluisse

---

(a) *Lib. 3. n. 669. et 761.* — (b) *num. 493. ad 497.* — (c) *l. 3. n. 498. et 499.*

donare, ( *L. 1. Ci de Rei vind.* ) 8. *Plantatione*, ut si quis arborem alienam in suo solo plantat. Plantâ tamen si juxtâ fines alieni soli consita sit, et radices in illud jecerit, fit communis, §. 31. *eodem*, etc. Si verò arbor secus alienum fundum posita ramos distendit in proprium fundum, non licet incidere ramos illos, nisi quando proximus admonitus incidere renuit (a). 9. *Perceptione fructuum bonâ fide factâ*, ( §. *Si quis eod. loc.* ) 10. *Traditione rei*, quâ Dominus vult dominium in alium transferre, §. *Per traditionem eod.*

10. — III. Deniquè dominium acquiritur jure positivo præscriptionis. Sed ad præscriptionem quatuor conditiones requiruntur, 1. *Bona fides*, quâ possessor rei certò credit rem esse suam. 2. *Titulus justus* emptionis, donationis, etc. Saltem probabiliter præsumpti aut colorati, ut dicit *La-Croix* cum communi (b). 3. *Possessio continuata*. 4. Ut res non sit vitiosa, sed apta præscribi. Quoad tertiam autem conditionem animadvertendum, quod possessio debet esse continuata per tres annos pro mobilibus, ut ex §. 1. *Inst. de Usucap.* sive inter præsentis, sive inter absentes, ut dicunt *Less. Anach.* et *Verde* cum comm. contra *Bonac.* qui vult quatuor annos inter absentes. Nihilominus *Busemb.* cum *Trullench.* etc. requirit pro fructibus perceptis duos annos inter præsentis, et quatuor inter absentes. Bona autem immobilia præscribuntur spatio decem annorum inter præsentis, et viginti inter absentes, qui in diversis provinciis morantur, ut vult de *Lugo*. Si verò aliquis partim est præsens, et partim absens, anni absentis sunt duplicandi, v. g. si fuerit præsens octo annos, et duos absens, hi duo duplicandi sunt, et 12. anni requiruntur ad præscriptionem. Si autem deesset titulus, tam pro stabilibus, quam pro mobilibus, requiruntur 30. anni. Pro bonis immobilibus Ecclesiæ requiruntur 40. anni, c. 1. *de Inst. reslit.* et Ecclesiæ Romanæ 100. An autem pro mobilibus Ecclesiæ requiratur idem tempus 40. annorum? affirmant *Anach. Hostiensis, Panorm.* etc.

---

(a) N. 501. — (b) n. 504. et 505.

dicentes quòd in præfato textu nulla fit distinctio. Sed *Bonac. Less. Laym. Mol. Castrop. et Lug.* volunt sufficere triennium. Utraque sententia est probabilis (a). Notandum hìc possidentem Beneficium tres annos aut illius fructus, jam præscribere juxtà regulam Cancellariæ, relata à *Croix* (b), etiamsi titulus fuisset nullus; dummodò non intercesserit intrusio, aut simoniacus ingressus.

11. — Dictum est *Possessio continuata*; nam possessio potest interrumpi aut naturaliter per illius cessationem; aut civiliter, ut cùm mota est aliqua lis: justa super bona, aut si prosequitur in possessione cum ignorantia legis manifestæ, prout tenuimus cum sententiâ probabiliori *Mol. Dicast. Croix*, etc. (contrà *Lugo Less. Castrop.* etc.), quia tunc deficiente fide civiliter bonâ, leges (vi quarum acquiritur dominium) negant præscriptionem. Si verò cùm jam cœpta est possessio cum bonâ fide supervenerit dubium, et factâ diligentia veritas non reperitur, dicunt *Anacl. La-Croix*, et *Lugo*, cum *Molin.* et *Less.* et communi, ut asserit, præscriptionem non interrumpi (c).

12. — Notandum 1. Successorem particularem (ut est emptor, Legatarius, etc.) possessoris malæ fidei bona posse præscribere, nunquam verò hæredem, ut dicunt *Molin. La-Croix*, et alii communiter; et Neapoli jam sic decisa est à quatuor Rotis S. C. 1738. Et hoc procedit etiamsi esset hæres hæredis, ut probabilius tenent *Lug. La-Croix* etc. contrà *Less.* Notandum 2. bonâ fide posse præscribi etiam liberationem à solvendo aliquod debitum, si debitor invincibiliter ignoret, ut dicunt *Lugo*, et *Croix*. Item hìc advertatur, quod in præfatâ decisione admissa fuit præscriptio 30. annorum in beneficium tertii possessoris, cùm bona fides præsumatur usquedùm contrarium ab actore evidenter non probetur. Insuper statutum fuit Advocatos, et Procuratores elapsis duobus annis stipendium suorum laborum non posse contendere. Idem statutum

---

(a) *Lib. 3. n. 506. et 510.* — (b) *Croix l. 4. n. 189.* — (c) *lib. 3. n. 527. verb. Si quis.*

fuit circa Notarios quoad scripturas factas, si adhuc copiam non exhibuerint, quia, copia exhibitâ, eis agendi actio ampliùs denegatur. Idem pro Pharmacopolis respectu debitorum principalium, quia respectu suorum hæredum agere nequeunt post duos menses: Artifices post annum: Famuli similiter post duos menses. Sed advertatur tales præscriptiones (ut ibi dictum fuit) non habere locum, si actor pro se scripturam publicam sive privatam produxerit. Insuper dictum fuit illas habere locum *non ope præscriptionis, sed vi præsumptæ solutionis*; adeo ut in conscientia debitor obligatus remaneat, qui revera sciret debitum non solvisse (a). Notandum 3. certis personis privilegiatis, nimirum Minoribus, locis piis, et uxoribus pro dotibus conceditur restitutio in integrum per quatuor annos post præscriptionem completam ad bona præscripta recuperanda (b). Notandum 4. ad præscriptionem requiri, ut res sit apta præscribi; unde res furtivæ, aut vi possessæ nunquam præscribuntur. Illæ res tamen, quas tertius possessor recepit bonâ fide à fure, possunt præscribi, sed requiruntur 30. anni inter præsentés, et 40. inter absentes; alioquin non possunt præscribi. Ad præscribenda verò bona Fisci requiruntur 40. anni (c).

13. — Deniquè adnotare oportet communem esse sententiam apud Theologos, et Jurisperitos etiam in foro conscientie præscriptione acquiri dominium (ait *Cajet. Less. Lug. Silvest. Covarr. La-Croix. et alii*). Et probatur ex *Cap. fin. de Præscript.* ubi tantum reprobat præscriptio malæ fidei; dum benè potest lex humana transferre dominium bonorum ex uno in aliud propter commune bonum, ut tot lites evitentur. Et advertendum quòd lex communis de præscriptione in nostro Regno Neapolitano, licet in foro externo non admittatur propter difficultatem probandi bonam fidem, nihilominus non reperitur jam ex ullâ aliâ lege abrogata, ut dicunt *Staib. Gallup. Prato, Ver. et Amato*, quare etiam in nostro Regno, ut dicunt præfati AA. contra *Ursill.*

(a) *Lib. 3. n. 516.* — (b) *n. 502. ad 514.* — (c) *n. 515. et 516.*

et *Ravit.* (et ut etiam me docuit doctissimus Episcopus D. Julius Torni) licitè uti possumus præscriptione legitimè factâ.

## CAPUT II.

### *De Furto.*

## PUNCTUM I.

### De essentiâ furti.

*Quid sit furtum* 14. *De paupere in extremâ aut quasi extremâ necessitate* 15. *De redemptione Christianorum* 16. *An Pauper teneatur ad petendum etc.* 17. *An possit accipere rem magni valoris* 18. *De fure qui consumit furtum in extremâ necessitate* 19. *An dives, non succurrendo pauperi, teneatur ad restitutionem* 20. *De compensatione* 21.

14. — **F**URTUM definitur : *Est occulta, et injusta rei alienæ ablatio invito rationabiliter domino.* Dicitur 1. *occulta*, ut distinguatur furtum à rapinâ, quæ fit vi, et novam culpam injustitiæ addit ratione injuriæ. Quod si res est sacra addit sacrilegium. Dicitur 2. *injusta*, quia secus non est furtum, nec peccatum, undè fit quod non peccat, v. g. uxor quæ aufert nummos à viro, ne cum familiæ damno eos dilapidet, aut vinum ne ebrietur (a). Dicitur 3. *invito rationabiliter domino*; nam in duobus casibus potest quis alterius rem accipere, etiam invito domino, nempe in extremâ necessitate, et cum justa compensatio intercedit.

15. — Et I. quoad necessitatem, si quis alienum surriperet sibi, aut alii existenti in extremâ necessitate, quantum est merè necessarium, non peccat; intellige, si non habet de proprio, prout dictum est *Tract. IV. num. 19.* quia in tali casu bona sunt communia; juxtà quod docent omnes cum *S. Thomâ* (b). Et idem currit pro necessitate quasi extremâ, ut dicunt communiter *Lugo, Less. Sot. Cajet. Azor.*

---

(a) l. 3. n. 58. et 519. — (b) 2. 2. Qu. 66. a. 7.



*Sylvest. Carden. Salmant. etc.* Ea necessitas esset, cum quis in probabili vitæ periculo esset, ut dicunt *Navarr. Vasq. Roncagl.* et aut amittendi aliquod membrum principale, ut *Castropal. Dicastill. et Tambur.* aut in periculo fieri captivus, aut ad triremes damnari, aut gravissimum, vel perpetuum morbum, aut infamiam incurrendi, ut *Lug. Ronc. Elbel, et Sporer, ex S. Thomâ.* Idem dicit *P. Mazz., cum Suar. etc.* de periculo prostituendi filiam; sed hoc ultimum probabilius negant *Salm.* Contrâ mihi videtur probabilius cum *Less. Castr. Bann. Ronc. Viva, etc.* posse nobilem sibi providere de re alienâ, si esset in extremâ necessitate, et ita erubesceret mendicare, ut potius mori contentus esset (a).

16. — Sed hic plura dubia cadunt. Et 1. an divites teneantur redimere Christianos à Turcis? Alii communiùs affirmant cum *Azor. Cajet. Major. et Filiuc.* Alii negant, ut *Sporer* cum *Hurt.* Sed si *Sporer* non dubitat concedere alicui alienum surripere, cum reperiretur in periculo fieri captivus, quomodo postea potest eximere divites saltem à contribuendo aliquod mediocre subsidium, ut redimantur ii qui sunt facti captivi? *P. Concina* sic scribit, et valdè probabiliter: si dives certò scit aliquem captivorum in periculo esse à fide deficiendi, aut vitam amittendi, tunc gravior erit ejus obligatio. Cæterum, subjungit, si redemptio magnam summam importaret, ipse non auderet tale onus diviti imponere, quia hoc posset incitare Turcas ad magis vexandos Christianos captivos, et ad majores incursiones faciendas, quæ postea in commune fidelium damnum reducere darent (b).

17. — Quæritur. 2. An peccet extremè pauper alienum accipiendo, quin priùs petat à domino? *Cocchini* damnat de peccato mortali; sed alii communiùs, ut *Less. Laym. et Concina*, tantùm de veniali. Nos distinguimus cum *Cardin. de Lug.* ita: Si illa res particularis non est absolutè necessaria pauperi, ille accipiendo graviter peccat, si eam non petat, quia aliàs omnes pauperes possent alienum

(a) *Lib. 3. n. 520.* — (b) *l. 3. n. 520. Qu. I.*

surripere, quin petant. Si autem illa res est sibi absolute necessaria, omninò non peccat, ut dicit *S. Thomas* (a), quia tunc habet jus sibi eam vindicandi (b). Dicitur est *extremè pauper*, quia in gravi necessitate nemini licet alienum accipere, ut habetur ex *Propos. 36. damnata* ab *Innoc. XI.*

18. — Quæritur 3. An in dicto casu quo illa res est absolute necessaria pauperi ad sibi vitam servandam, possit ille eam accipere cum res esset magni valoris? Negant *La-Croix et Concina*; sed rectius affirmant *de Lugo, Sporer, et Croix* vocat probabile, quia in extremâ necessitate pauper jus habet in bona alterius cujuscumque valoris illa sint. Nec obstat dicere quòd in isto casu dives non tenetur (prout cæteroquin vult sententia communior, et probabilior) ad succurrendum pauperi tanto dispendio, v. g. erogando ter aut quatuor mille aureorum; ut dicunt *Lug. Castrop Coninch.* etc. modò pauper non esset suus pater aut filius; nam caritas non obligat cum tanto incommodo. Dùm respondetur cum eodem *Cardinali de Lugo*, quòd sicut in Mundi principio, ante bonorum divisionem, utique quilibet poterat sibi de necessariò providere; nullus autem contrà ex justitiâ tenebatur Proximo providere; ità in casu extremæ necessitatis (in quâ bona sunt communia) potest benè pauper accipere bona divitis, sed non tenetur dives ex justitiâ ei providere; teneretur tantùm ex caritate; sed caritas (ut dictum est) non obligat cum tanto dispendio. Si tamen in eo casu positivè eum impediret, ille peccaret contrà justitiam (quicquid dicat *Sporer*); quia pauper tunc cum habeat jus posse uti illâ re, habet jus etiam ne impediat quominus eam accipiat (c).

19. — Quæritur 4. An fur teneatur ad restitutionem ablatis, postquam cum in extremam necessitatem ceciderit eam consumit? Affirmant probabiliter et communius *Less. Azor. Conc.* et alii dicentes necessitatem supervenientem non extinguere obligationem restitutionis jam contractam. Sed hoc non obstante

---

(a) 2. 2. *Qu. 66. a. 7.* — (b) *l. 3. n. 520. Punct. II.* — (c) *l. 3. n. 520, Qu. III.*

sententiam contrariam *Castrop. Navarr. Coninch. Sporer*, etc. (probabilem nuncupatam ab ipso *Less.*) ego non audeo reprobare, ut improbableem, quia in tali casu fur habet idem jus in eam rem, quam habet quilibet pauper suam faciendi. Nihilominus hoc intelligitur 1. quoties pauper eget eâ re in particulari, ut diximus in 3. Quæsito. Intelligitur 2. Si Pauper tunc temporis non solum sit pauper re, sed etiam spe (1); nam sub tali distinctione dicimus etiam cum *Castropal. Lug. Valent. Holzm. La-Croix, Sporer, Salmant.* et aliis, quod si quis etiam est pauper spe, tunc sicut dives tenetur ei absolutè in eleemosynam dare id quo eget, nec satisfaceret si mutuo ei daret; ita pauper, si casu fieret potens restituendo, non tenetur; teneretur quidem, si ipse alibi haberet alia bona, aut saltem spem probabilem illa habendi.

20 — Quæritur 5. An si dives negligeret succurrere pauperi in extremâ necessitate, eâ elapsâ teneatur ad restitutionem. Affirmant *Laym. Concina*, dicentes quod pauper tunc jam habebat jus accipiendi bona divitis. Sed communissimè, et rectè negant *Less. Lugo, Suar. Vasq. Coninch. Sanch. Holzman, Salmant.* etc. quia cum talis obligatio sit caritatis, ut superius vidimus, cessatâ necessitate, ad nullam restitutionem obligat; et licet pauper habuisset jus ad bona divitis, nihilominus illorum non acquisivit jus (b).

21. — II. Potest etiam res aliena sinè ipsius consensu accipi, cum intercedit justa compensatio. Ad licitam compensationem occultam tres requiruntur conditiones: 1. ut non fiat cum damno debitoris, 2. ut creditum sit certum et liquidum; 3. ut satisfactio alio modo obtineri non possit; quare creditor debet prius in iudicio postulare; quamquam si hoc negligitur non erit peccatum grave, imo nec leve, si viâ iudiciariâ sumptus, odia, aut alia damna subeunda essent, ideòque regulariter non peccat servus, si occultè sibi compensat, cum à domino salarium conventum ei non satisfit, aut si iniquè à domino inductus fuit servire pro salario injusto; sed

---

(a) *Ibid. Qu. V.* — (b) *l. 3. n. 530. Qu. V.*

advertendum quòd tunc non potest accipere ultrà pretium infimum (a). An autem servi possint sibi compensare de labore extraordinario; vide dicta in *Tractat. VII. num. 11.*

## PUNCTUM II.

De quantitate furti ut sit materia gravis.

*De materiæ gravitate respectu diversorum generum personarum. 22. De furtis vinearum 23. et 24. et lignorum 25. De furtis minutis 26. Reliquiarum 27. De furtis minutis, quæ fiunt multis, et præcipue Tabernariorum 28. et 29. De furtis minutis factis eodem tempore multis à multis 30. Qui accipit parùm post furtum grave 31. De furtis Filiorum 32. Uxorum 33. Servorum 34.*

22. — **A**D iudicium ferendum quandò furti quantitas perveniat ad mortale, debet considerari quantitas non solùm in seipsâ, sed etiam respectu personarum, temporis, et loci; v. gr. auferre acum Sartori potest esse materia gravis, si ipse non posset ibi habere aliam, quâ possit sibi victum comparare. Et ità etiam potest esse grave (saltem contrà caritatem) furari rem tenuis pretii, si dominus magnam poenam subiturus esset ob illius amissionem (b). Sed loquendo de furti quantitate in se ipsâ, hæc diversimodè mensuratur juxtà diversas dominorum qualitates. Et quia talis commensuratio pendet à sapientum estimatione, ideòque recte dicunt *Salmanticenses* opiniones in hoc communiores fieri etiam intrinsecè probabiliore. I. Respectu pauperum qui mendicant, assignant communius DD. regalem (qui nuncupatur etiam *julius* aut *argenteus*, qui importat *carolenum* de nostrâ monetâ) et etiam dimidium in casu raro magnæ paupertatis et indigentiae. II. Respectu pauperum qui laborant, duos regales; licet diversè loquantur DD. de Fossoribus, quàm de Artificibus, undè dicimus pro Fossoribus esse materiam gravem.

---

(a) N. 321. — (b) *lib. 3. n. 526.*

duos regales, sed pro Artificibus saltem requiri duos regales cum dimidio, si lucrum diurnum eorum tantum sit aut majus. III. Respectu eorum, qui propriis redditibus vivunt, *Concina*, et *Bonac.* assignant pro materiâ gravi tres julios; communius verò alii assignant quatuor, et alii usque ad quinque. Nihilominus in hoc puto distinguendum; nam nonnulli licet vivant redditibus suis, attamen vitam ducunt angustam; et pro istis erunt materia gravis tres regales, et forsitan minus si valdè miserè vivunt. Contrà pro personâ valdè opulentâ *Cardinalis de Lugo* requirit sex, aut septem regales. IV. Respectu Mercatorum nimis divitum multi DD. requirunt tres florenos (floreus æquivalet tribus regalibus) sed hæc summa videtur mihi nimis excedens; libentiùs adhæreo *Croix*, qui quoad istos requirit octo regales; pro aliis Mercatoribus verò mediocris fortunæ DD. requirunt quatuor regales; sed ego puto pro iis qui tenui sunt patrimonio sufficere pro materiâ gravi etiam duos regales cum dimidio. V. Respectu Magnatum communius requirunt aureum (nempe ducatum sive scutum); licet alii quid majus velint. Et idem dicunt *Sanch. et Card.* respectu communitatis valdè opulentæ. VI. Respectu denique Regum dicunt non esse materiam gravem summam excedentem duos aureos; ita *Sotus, Sylvester, Wigandt, Laym. P. Navarr. Bannez* etc. (a).

23. — Notandum tamen 1. quòd in furtis rerum expositarum, ut sunt fructus juxtà vias, et ligna in silvis, ut furtum sit gràve requiritur materia major (b).

24. — Sed hìc dubitatur 1. An liceat vesci uvis in vineâ alienâ? Admittunt *Covarr. Valer. Ripa* etc. adducentes textum Deuteronomii: *Ingessus vineam proximi tui, comede uvas quantum tibi placuerit, foras autem ne afferas tecum.* 23. 24. Et idem dicit *Abulensis* de pomis et aliis fructibus. Contrà hoc negant *de Lugo et Holzman*, dicentes hoc intelligi pro solis Hebræis; imò pro solis vindemiatoribus, qui in eadem vineâ laborant. Hæ duæ assertiones attamen

(a) *Lib. 3. n. 527. et 518.* — (b) *n. 528.*

non probantur, dùm Joseph Hebræus, et multi alii Auctores apud *Calmet* sentiunt textum non solum loqui pro Hebræis, sed pro omnibus aliis; et quòd intelligatur non solum de vindemiatoribus, sed de omnibus prætereuntibus, videntur probare eadem verba textus, *Ingressus vineam etc.* quæ verba potiùs denotant itinerantes, quàm aliq̃s, qui jam existunt in vineâ laborantes. Quare primam sententiam non puto improbabilem. Cæterum *de Lugo* concedit quolibet posse accipere unum vel alterum pomum, aut duas uvas de vineâ per quam transit (a).

25. — Dubitatur 2. An liceat lignari in silvâ alienâ? In hoc oportet distinguere ligna communitalis ab iis quæ sunt privatorum. Si silva est communitalis, licet possit communitas sub aliquâ pœnâ prohibere, ne ligna exportentur (modò adsit alius locus undè commodè possit quisque sibi providere), nihilominùs dicunt communiter DD. cum silva est totius communitalis, incolas qui contrà prohibitionem incidunt, non peccare mortaliter (imò volunt *Sotus*, *Sanch. Sal. Angel. Cordub.* non peccare ne venialiter quidem), neque teneri ad aliquam restitutionem, sed ad solam pœnam post Judicis sententiam; nam talis prohibitio reputatur ut lex merè pœnalis, quæ non obligat ad culpam. Et idem dicit *de Lugo*, *Mol. Bonac. Filliuc.* etc. de eo qui incidit ligna de silvâ communitalis vicinæ, quia tunc præsumitur contenta esse illa communitas de solis pœnis, quas exigit, semper ac non exposcit restitutionem. Hoc nihilominùs intelligitur, modò incisores magnam non facerent stragem arborum cum magno communitalis damno; undè *Sanch.* cum *Henriq.* excusant qui incideret unam tantum sarcinam in die pro usu proprio, aut duas in hebdomada, ut vendat et ex percepto familiam alat. Idem tantò magis valet, ut dicunt *Sotus*, *Mol. Sanch. Bonac.* etc. cùm adsunt duo oppida vicina, quorum incolæ solent ad invicem incidere ligna in suis silvis. Hoc valet pro silvis communitalis, sed si essent silvæ privatorum (quicquid dicant alii) dicimus cum *Soto*, *Molin. Bonac.* et aliis multis, eos, qui incidunt ligna,

---

(a) *Num. 529. Qm. 2.*

teneri ad restitutionem ; quia domini absolutum habent dominium super suis silvis , ita ut suo arbitrio possint vendere aliis ligna. Et idem rectè dicit *Croix* de privatis qui ab ipsis communitatibus emerunt , aut conduxerunt omnia ligna ; quia tunc communitas totum suum jus , quod habet super silvis , transfert illis Quod verò dictum est de silvis , dicitur etiam de pascuis (a).

26. — Notandum 2. Majorem materiam requiri ad constituendam culpam gravem in furtis minutis , quia licet sit proscripta hæc Propositio 28. ab Innoc. XI. *Non tenetur quis sub pœnâ peccati mortalis restituere quod ablatum est per pauca furta , quantumcumque sit magna summa totalis* : Undè benè potest fieri materia gravis , etsi furta omnia facta sint in materiâ parvâ , et etiamsi facta sint diversis dominis , ut dicemus *numer. sequenti*. Nihilominus volunt communiter DD. in furtis minutis requiri majorem materiam ; et hâc majorem si facta sint diversis dominis , et ampliùs majorem si in diversis temporibus. Dicunt *Less. Trullen. et Villalob* indistinctè pro furtis variis vicibus factis requiri duplò majorem materiam : ut sit grave : v. g. si pro unâ vice requiruntur quatuor julii , pro pluribus vicibus requiruntur octo. Sed mihi videtur æqua sententia aliorum , qui majori distinctione loquuntur , et dicunt quòd si furta facta sint pluribus vicibus , et diversis eodem tempore , requiritur dimidio plùs , nempè sex julii. Si autem diversis personis , et diversis temporibus , duplò majus , id est octo. Sed hoc intelligitur , modo fur à principio non haberet animum accipiendi materiam gravem , quia tunc currit eadem regula quæ currit in alio furto unâ vice facto. Contrà non intelligitur quandò inter unum et aliud furtum intercederet magnum intervallum ; nam tunc furtula non coalescunt in materiam gravem. Dubitatur autem inter DD. quodnam intervallum judicetur ita magnum , ut excuset à restitutione sub culpâ gravi ? *Laym.* dicit unum annum ; *Tolet. Nav. Filliuc. Vivald.* etc. dicunt unum mensem , et etiam quindecim dies , sed ego assentio *Ronc. et Viva* , qui re-

---

(a) l. 3. n. 529. Qu. 1. et fusiùs in Edit. Venet.

352 *Tract. 10. De septimo Præc. Decalogi.*

fellunt hanc opinionem ; tantùm admittit *Viva* , si materia esset valdè tenuis : et *Ronc.* videtur idem sentire , dicens requiri intervallum saltem duorum mensium , quandò materia cujuslibet furti accederet quasi ad gravem (a). Itaque juxtà hanc opinionem intervallum duorum mensium excusat à gravi obligatione restituendi furtula inter duos menses facta , quæ materiam gravem non attingunt.

27. — Notandum 3. Quod sicut non peccat graviter qui differt restitutionem per breve tempus , ut docent communiter *Sanch. Rebell. Pasq. Sayr Lup.* et *La-Croix* ; nec culpam esse mortalem surripere summam gravem alterius cum animo citò restituendi (b). Et hìc obiter notandum quòd qui furatur aliquam minimam partem sacrarum Reliquiarum in Romano districtu incurrit excommunicationem latam à Clem. VIII. Contrà probabiliter excusant à culpâ gravi *Sanch. Castropal. Croix , Bonac.* et alii eos , qui alibi surriperent aliquam portiunculam Reliquiarum , quin eas deforment , modò non esset aliqua Reliquia insignis aut rara , ut S. Crucis , aut Vestis Christi , aut Capillorum SS. Virginis (c).

28. — Notandum 4. Circa furta minuta aliquos , ut *Angelus , P. Navar. et Mcd* dixisse , hujusmodi furta cum diversis dominis sunt facta , non importare gravem restitutionem. Nihilominus hæc opinio est contrà communem , et debet omninò rejici , ut rectè dicunt *Lugo , Sanch. Salmant.* etc. undè semper ac hujusmodi furta minuta simul unita deveniunt ad materiam gravem ( juxta dicta num. 22.) sub gravi debet restitui. Ratio , quia præceptum non furandi obligat non solum ne damnum grave inferatur Proximo , sed etiam ne quis re alienâ ditescat (d) ; quandò tamen sunt facta diversis , semper requiritur materia major. , ut dictum est n. 26. Sed hic fit dubium , cuinam in tali casu restitutio facienda sit ? Si domini sunt incerti , non dubitatur quin tunc facienda sit pauperibus aut locis piis , ut dicetur fusiùs n. 67. Si autem domini sunt certi , juxtà regulam generalem

---

(a) *Num.* 530. — (b) *n.* 531. — (c) *n.* 532. — (d) *lib.* 3. *n.* 534. v. *Quær.* 1.



videtur quòd ipsis facienda sit restitutio, licèt sit parva uniuscujusque portio ; nihilominùs puto cum aliis doctis ( quos super hoc puncto consului ) non peccare graviter qui restitueret pauperibus loci : nam fur hujusmodi non jam intulit in tali casu grave damnum dominis, sed Reipublicæ, quæ, quia tunc ad ipsam pertinet jus principale bonorum ablatorum, ideò præsumitur illa non esse graviter invita, si restitutio fiat pauperibus, aut locis piis, qui sunt partes magis indigentes. Hinc concludimus quòd fur restituendo pauperibus, aut locis piis loci excusabitur à mortali : et etiam à veniali si adest aliqua causa, quâ non posset sine gravi incommodo aut infamiæ periculo fieri restitutio dominis, aut si adessent pauperes nimis indigentes quibus præsumerentur ipsi domini assentire restitutionem fieri (a). Et idem dicimus de restitutione quæ facienda esset à Tabernariis pro furtis minutis, v. g. olei, vini, etc. in tali enim casu dicimus cum sententiâ communissimâ quòd ( per se loquendo ) restitutio non potest fieri pauperibus, ut dicunt aliqui, sed civibus qui ordinariè prosequuntur in iisdem Tabernis hæc rerum genera emere ; sed qui restituisset pauperibus, propter rationem suprâ allatam excusaretur à peccato gravi, et etiam levi, si non posset fieri restitutio civibus sinè periculo, aut sinè notabili incommodo (b).

29. — Notandum 5. Quamvis pro gravi obligatione restitutionis requiratur culpa gravis theologica, ut dicemus n. 39. nihilominùs in furtis minutis cum quis devenit ad materiam gravem, eum obligatum esse sub gravi ad restitutionem, licèt in ultimo furto quod complevit materiam gravem non animadverterit peccatum mortale ; nam tunc tenetur non jam pro injustâ acceptione, sed pro injustâ retentione rei alienæ : ità communiter *Lugo*, *Card. Viv. Tamb. La-Croix*, etc. contrà paucos. Advertendum tamen, quod tunc, ut iste liberetur à culpâ gravi, satis erit restituere illam solam materiam parvam, quæ complevit gravem, uti dicunt *Less. Sanch. Bonac. Vasqu. Elbel* et *La-Croix* contrà alios (c).

---

(a) *Ibid. Qu. II.* — (b) *l. 3. n. 595.* — (c) *n. 353.*

30. — Notandum 6. Si accideret quòd multi furarentur parvum materiam, modò communi consilio id non facerent, neminem eorum peccare mortaliter, quamvis quisque advertisset furtum alterius, et grave damnum quod domino causaretur, ità communiter, *Habert, Lugo, Less. Sanch. Salmant.* etc. et hoc procedit licèt furarentur eodem tempore, ut dicunt *Less. Sot. et Sanch.* (contrà *Lugo*) quia tunc nemo reverà est per se causa damni domini, cui damnum per accidens grave redditur. Et licèt alter moveatur alterius malo exemplo, est communis sententia *Mol. Bonac. Less. Sanch. Lugo, Salmant.* et aliorum, quemlibet eorum qui surripiunt parvam materiam cum gravi damno domini peccare graviter contrà caritatem ratione scandali, quòd vicissim sibi præbent, sed non contrà justitiam; nam exemplum non est causa, quæ positivè influit in damnum alienum (a).

31. — Notandum 7. Quod si quis completà jam materià gravi, facit alia furta minuta, volunt *Lugo, La-Croix*, etc. semper eum novum grave peccatum committere. Sed probabiliùs dicunt *Less. Bonac. Tapia*, et *Salm.* reliqua furta subsequèntia non esse mortalia, nisi deveniant ad novam gravem materiam (b).

32. — Notandum 8 Furta domesticorum, ut filiorum, uxorum et famulorum, ut sint gravia, requirere majorem materiam; dùm domini respectu horum sunt minùs inviti, aut æltem minùs rationabiliter inviti, quàm respectu extraneorum: et sæpè sunt inviti magis quoad modum (quòd clàm accipiatur), quàm quoad substantiam. Et loquendo sigillatim r. circà furta filiorum, dicunt *Less. Navar. et Filliuc.*, non peccare graviter filium qui patri diviti furatur duo, aut tria scuta; imò dicit *Ban.* quòd à patre valdè opulento non est mortale furtum, nisi ascendat ad 50. scuta; sed hoc rationabiliter respuunt de *Lugo*, et *La-Croix* nisi esset filius Principis. Et idem dicit *Holzm.*, qui contrà admittit non esse grave accipere decem scuta à patre nimis divite; *Sanch.* admittit usque ad sex. Si verò pater mitteret filio, qui

---

(a) *Lib. 3. n. 537. et l. 2. n. 45. in fine.* — (b) *l. 3. n. 538.*

alibi studeret, centum scuta, dicunt probabiliter *Sot. Navarr. Laym.*, etc filium posse impendere quinque eorum in honestas recreationes (a). Advertit tamen *Less.* quòd licèt filius peccasset graviter furando patri, non est obligatus restitutioni quandò furtum est jam consumptum, et præsimitur pater nolle ad tantum eum obligare (b). An autem filius negotiando in domo paternâ possit sibi compensare de salario suorum laborum, observetur quid dicemus infra num. 228. loquendo de Societate.

33. — 2. Circà furta uxorum etiam requiritur major materia. Potest ceteroquin uxor accipere aliquid pro expensis necessariis familiæ, si vir parùm curat de eis, ut dicunt *Bonac Trullen. et Busemb.* (c). Præterea si uxor habet parentes, aut filios alterius matrimonii pauperes, potest accipere aliquid ex bonis communibus, et etiam viri, quantum sufficit illis, ut juxtà eorum statum vivant, licèt vir repugnet, quia ejus repugnantia est irrationabilis; ità *Navar. Castrop. Less. Busemb.* etc. Imò *Lugo, Moi. Sanch. Less. et Trull.* admittunt hoc etiam pro fratribus pauperibus. Advertendum tamen, quòd si uxor dat bona viri aut communia filiis egenis primi matrimonii, tenetur post suam mortem recompensare filiis secundarum nuptiarum (d). Insuper benè potest impendere in eleemosynas et dona, juxtà sibi æqualium morem, ut communiter dicunt DD. Dicit *Mol.* cum nonnullis aliis posse uxorem impendere in hoc vigesimam partem annuorum reddituum sui viri, nempe quina in centena, sed hæc summa meritò judicatur excedens à *Lugo, Sporer*, etc. saltem universaliter loquendo (e).

34. — 3. Circà furta servorum communiter dicunt DD. ut *Less. Cajet. Navarr. Sanch. Sporer, Busemb.* etc. quòd furta minuta, quæ fiunt à servis de cibis, qui non solent cautè servari, nunquàm deveniunt ad culpam gravem, modò illos non vendant, aut foras extrahant: et modò non accipiant in extraordinariâ quantitate: aut (addendum) si non essent res pretii extraordinarii (f).

---

(a) Num. 42. — (b) n. 544. — (c) n. 541, ad 5. — (d) lib. 3. n. 542. — (e) n. 540. — (f) n. 545.

## CAPUT III.

*De Restitutione.*

## PUNCTUM I.

Undè oritur restitutio, et ob quam culpam illa debetur.

*Quando adsit obligatio restituendi 35. et 36. De radicibus restitutionis 37. De culpa theologicâ, et juridicâ 38. et 39. An culpa venialis obliget ad restitutionem 40. An in contractibus, et officiis sola culpa juridicâ obliget 41.*

35 — **P**RÆSENS materia restitutionis sedulâ consideratione indiget, tum quia scatet quæstionibus implicatissimis, tum quia Confessarius æquè scrupulum sibi facere debet, si non obligat ad restitutionem Pœnitentes qui restituere tenentur, ac si obliget qui non tenentur. Et præcipuè si obliget eos qui sunt possessores bonæ fidei, quin etiam ex sententiâ Auctorum qui rigorem profitentur (ut *Habert, Natalis de Alexand. Wigandt, Henno*, etc), non debent cogi, ut se privent suis bonis, nisi constet eos injustè possidere alienum. Idèdque tam in hac materiâ restitutionis, quàm in eâ Capitis sequentis de Contractibus in Opere majoris molis Theologiæ Moralis curavi operam et diligentiam extraordinariam impendere. Idcirco opus est etiam, ut in hac praxi fusiùs solito sermonem proferam in notando DD. varietatem opinionum circa multas quæstiones, et eorum rationum momenta, saltem strictim cursimque, quàm potui.

36. — Restitutio definitur: *Est actus justitiæ commutativæ, quo reparatur damnum proximo illatum per injuriam.* Dicitur 1. *Actus justitiæ*, quia non omnis læsio, quæ proximo infertur (ut si esset contra caritatem aut aliam virtutem) inducit restitutionis obligationem, sed dumtaxat illa quâ leditur jus quod proximus habet *in re vel ad rem* super aliquâ re. Dicitur 2. *Justitiæ commutativæ*, quia læsio justitiæ Lega-

lis, quæ respicit legum observantiam, et distributivam quæ respicit personarum merita circa præmia, aut pœnas non inducit restitutionis obligationem. Dicitur. 3. *quo reparatur damnum proximo illatum per injuriam*; quia restitutionis obligatio non oritur tantum ex furto, sed etiam ex damno quod fit proximo cum ejus injuriâ (a).

37. — Radices sive rationes restitutionis, quæ communiter à Moralistis assignantur, duæ sunt : 1. *Ex injustâ acceptione*, cui conjungitur radix *ex injustâ damnificatione*. 2. *Ex injustâ retentione*, cui conjungitur altera radix *ex obligatione contractûs* (b).

38. — Præterea advertendum est alteram esse culpam theologicam quæ afficit conscientiam, et propriè est peccatum. Alteram esse juridicam quæ respicit leges; et hæc dividitur in *Latam* quæ est cum omittitur diligentia, quam ordinariè adhibent omnes : in *Levem*, cum omittitur diligentia, quæ adhibetur à viris diligentibus : et *Levissimam*; cum omittitur diligentia, quâ utuntur diligentissimi. Et loquendo de hac culpâ juridicâ, dicunt DD. si contractus est in commodum recipientis rem, ut sunt Precarium, et Commodatum, commodatarium teneri ad restitutionem ob culpam levissimam : Si contractus est in commodum habentis rem, ut est Depositum, Depositarium teneri tantum ob culpam latam; si verò contractus est in commodum utriusque partis, tunc recipientem teneri ob culpam levem. (c).

39. — Hoc posito, dicunt communiter DD. ob solam culpam juridicam neminem teneri in conscientia ad restitutionem sub culpâ gravi, nisi adsit etiam culpa theologica gravis : ita Navar. Solus, Azor. Less. Cabass. Lugo, Laym. Salm. Ronc. et ceteri omnes. Ratio est quia, ut conscientia obligata remaneat, opus est, ut in conscientia sit patratum delictum; et quia obligatio est gravis, oportet, ut gravis fuerit culpa. Hinc qui non intendit, nec prævidit damnum proximi (saltem in confuso), etiamsi det operam rei illicitæ, ad nihil tenetur : prout ad

---

(a) Lib. 3. n. 547. — (b) n. 548. — (c) n. 549.

nihil tenetur fur qui furatum pergens, furtum non fecit, attamen suâ protectione fuit causa (sed omnino casualiter) incendii segetum; ita *Less. Rebell. Bonac. Salm.* et alii communiter (a).

40. — Quæritur 1. an culpa venialis obliget ad restitutionem? Oportet distinguere: Si culpa est venialis ratione parvitatæ materiæ, utique obligat ad restitutionem, sed non ampliùs, quàm sub levi. Si autem culpa est venialis ratione imperfectæ advertentiæ, aut non pleni consensûs (ambæ conditiones necessariæ ad peccatum mortale, ut dictum est *Tract. III. num. 24. et 26.*), tunc alii dicunt ut *Layman, Mol. La-Croix* etc. inducere obligationem restituendi tantum materiam levem, pro modo culpæ. Sed sententia communior, et probabilior *Lessii, Lugo, Sanch. Azor. Sa, P. Navar. Filliuc. Ronc. Viva*, et aliorum multorum, tenet inducere nullam obligationem restitutionis, nec sub culpâ gravi, nec levi. Ratio est: non sub culpâ gravi, quia talis obligatio proportionem non habet cum culpâ levi: non sub levi, quia levis obligatio proportionem non habet cum materiâ gravi (sic ratiocinatur sapientissimus *Cardinalis de Lugo*, qui in decidendis dubiis investigare benè scivit rationes intrinsecas, quin aliquis sibi ducatum præbuerit); tantò magis quòd culpa quæ perfectè non est deliberata, non potest inducere perfectam obligationem (b).

41. — Quæritur 2. An in contractibus sufficiat culpa juridica, ut obligetur quis ad restituendum, vel solvendum? Affirmant probabiliter *Laym. Navarr. Mol. Vasq.* etc. quia ad id obligat lex contractuum cui contrahentes se subjiciunt. Sed non improbabiler negant *Sotus, Tolet. Less. Lugo, Filliuc. Sa, Croix, Ronc. Salm.* etc. qui dicunt æquum non esse obligare aliquem in conscientia ad gravem pœnam sinè gravi suâ culpâ, quoties non constat eum voluisse se subicere soli culpæ juridicæ. Et idem probabiliter dicunt *Sotus, Less. Lugo, Vasq. Salm.* etc. de culpis commissis in officiorum administratione (c).

(a) *L. 3. n. 549. et 550.* — (b) *n. 552.* — (c) *n. 553. 554. et 555.*

## PUNCTUM II.

De iis qui restituere tenentur.

*De cooperantibus, et I. de Mandante 42. et 43. II. De consilium dante 44. In dubio an consilium; etc. 45. Si Executor jam determinatus erat 46. Si consilium dedit de minori damno 47. Si revocat consilium 46. Qui ex ignorantia dat consilium 49. III. De præbente iniquum suffragium 50. IV. De Palpone 51. V. De Receptatore 52. Qui emit à fure, an possit ei rem reddere 53. VI. De Participante 54. Si multi domum incendunt 55. Qui ex timore proprii damni cooperatur 56. et 57. Qui impedit volentem damnum impedire 58. VII. De causis negativis 59. Quis cooperantium prius teneatur; et si creditor remisit uni suam partem etc. 60. Qui impedit Proximum à justo bono etc. 61. Qui impedit Fiscum ne interceptum capiat 62. Qui impedit odio, sed sine malis artibus 63.*

**42. — P**RÆTER principales qui furantur, aut damnificant rem alienam, ad restitutionem tenentur omnes cooperatores, qui sunt causa influens et efficax damni Proximi, aut qui ex justitiâ tenentur damnum impedire, et non impediunt. Hi comprehenduntur sequentibus versibus :

*I. Jussio, II. Consilium, III. Consensus, IV. Palpo, V. Recursus, VI. Participans, VII. Mutus, non obstands, non manifestans.*

**43. —** Et incipiendo à *I. Jussio*. Tenetur restituere Mandans qui expressè aut tacitè jussit aliquod damnum fieri; non autem ille qui tantum approbavit aliquam damnificationem factam : aut antequàm mandatum executioni daretur, illud revocavit, Mandatario revocationem significando (a).

**44. — II. Consilium.** Tenentur etiam restituere qui damni consilium dedit : prout etiam qui alium inducit ad inferendum damnum, contrâ propos. 39.

---

(a) *Lib. 3. n. 557. et 58.*

damnatam ab Innoc. XI. quæ eum excusabat. Notandum hic 1. licet consilium dans non teneatur ad restitutionem, cum graviter non peccavit in dando malo consilio; tamen postea tenetur ex justitiâ facere quantum potest sinè suo gravi incommodo, ut impediatur damnum, prout tenetur etiam ex justitiâ ignem extinguere, qui sinè culpâ suâ gravi domum alienam incendit; *Sanch. Less. Viva*, etc. communiter (a). Notandum 2. si executor erat jam determinatus ad damnum ferendum, tunc ad nihil teneri consilium dantem, ut dicunt communiter *Less. Mol. Vasquez, Busemb. Viva*, et alii ex *S. Thomâ* (b), qui docet injuriam sinè damno ad restitutionem non obligare: *Si aliquis passus sit injuriam* (sunt verba S. Doct.), *et non damnum, illi non facienda de jure restitutio realis*. Secus autem esset si executor motus sit etiam ex consilio, quia tunc consilium dans est jam causa efficax damni (c).

45. — Sed dubitatur 1. An teneatur ad restitutionem consilium dans in dubio an suum consilium fuerit necne causa damni? Negant *Silvest. P. Nav. Rebell. Henric. Salm. Busemb. Elbel, Dicast.* etc. Et hujus opinionis videtur esse etiam *S. Thomas* (d), qui dicit tunc tantum teneri consilium dantem aut palponem, *rum probabiliter æstimare potest quod ex hujusmodi causis fuerit injusta acceptio subsequuta*; et illud probabiliter facile intelligi potest de probabilitate pro unâ solâ parte, ita ut constituat persuasionem moraliter certam. Ratio horum DD. est, quia nemini potest imponi obligatio certa restitutionis, nisi est certus se causam damni fuisse. Contrâ affirmant *Habert, Lugo, Sanch. La-Croix, Ronc.* etc. et dicunt in tali dubio possidere delictum, et præsumptionem quod ipse consilium dans fuerit causa damni. Hoc non obstante non puto improbabilem primam sententiam, quia non semper, ut dicit ipse Angelicus loco citato, consilium in effectum operatur. *P. Concina* tenet consilium dantem

(a) *Num. 564. in fin.* — (b) *Opusc. 73. c. 20.* — (c) *l. 3. n. 561.*  
— (d) *2. 2. q. 62. a. 7.*



tem in tali casu teneri pro ratâ dubii; sed nos replicamus quòd nemo potest certâ obligatione onerari, cùm non fuit certa causa damni. Si tamen consilium dans jam fuit damni causa, ille tenetur restituere, licèt non defuisset qui idem consilium fuisset daturus (a). Hoc verò quod dictum est circa consilium dantem, dicitur de quolibet alio cooperatore in dubio suæ cooperationis (b).

46. — Dubitatur 2. Cùm aliquis jam est paratus ad damnum inferendum, et tu tantum suades modum, aut tempus, v. g. veneno, et non gladio, aut hodiè, non cras etc. an tenearis ad restitutionem? affirmant *Cajet. Mol. Viv.* etc. quia (ut dicunt) executio damni sinè suo consilio fuisset incerta, cùm potuisset ille à voluntate desciscere. Sed communiter negant *Less. Laym. Lugo, Holz.* et *Sporer.*; et dicunt probabile esse *Salm.* cum *S. Antonino, Navar.* etc. quia in tali casu consilium dans non est causa efficax quoad damni substantiam: Et rationi oppositæ respondent, quòd tunc non possidet jam consilium, sed prava determinatio jam facta ab executore. Ego attamen dico, quoties dubium est an executor voluntatem mutasset, aut si damnum non eodem modo accidisset, teneri consilium dantem ad restitutionem; nam possidet pravum consilium quod jam suum certum effectum assecutum est (c). Secùs verò si esset moraliter certus quòd damnum sinè suo consilio etiam evenisset.

47. — Dubitatur 3. An illi, qui paratus est damnum majus inferre, possit suaderi minus? Respondemus affirmando cum *Sanch. Bon. Busemb. Viva,* etc. modò damnum sit circa eandem personam; dùm nequit suaderi damnum (licèt minus) alteri particulari inferendum, et neque (ut ego sentio cum *Sporer* contrà *Vivam*) in genere aliis, quia tunc consilium etiam fit causa damni alterius (d).

48. — Dubitatur 4. An consilium dans deobligetur, cùm revocat consilium antè damni eventum?

---

(a) *Lib. 3. num. 562.* — (b) *num. 572.* — (c) *lib. 3. n. 561.*  
— (d) *num. 565.*

Prima sententia communissima cum *Less. Lugo, Habert, Croix, Holzm. et Sporer* distinguit : si simplex consilium dedit, sufficiet, ut revocet illud; non autem si etiam modum, aut motivum damni exequendi insinuavit. Ratio est valida, quia tunc licet revocetur consilium, motivum, et modus data semper pergunt movere; prout qui ignem domi applicat, licet conetur extinguere illum, etiam tenetur ad damnum. Secunda sententia contra cum *Concina, Merbes. S. Anton. Azor. Navar. Salmant.* etc. (et eam vocant probabilem *Less. Laym. Bon. Ronc.* etc.) excusat consilium dantem, semper ac ille modo, quo meliori potest conetur damnum dissuadere : saltem adducendo rationem æternæ salutis, quæ cuicumque rationi humanæ prævalere debet. Nec obstat (ut dicunt) paritas ignis, quia ignis operatur necessariò, sed cum consilium est revocatum, damnum non ampliùs accidit causâ suâ, sed malitiâ executoris. Non possum negare hanc sententiam esse probabilem, saltem auctoritate DD. quâ fulcitur; sed utique prima mihi videtur probabilior. Sed in tali casu (ut advertunt *Salm. Sporer* etc.) tenetur ex iustitiâ consilium dans partem animadvertere, ut caveat sibi à damno (a).

49. — Dubitatur 5. An teneatur ad restitutionem qui ex ignorantia (sed culpabilr) alicui suadet aliquod in illius damnum? Respondetur cum *Less. Laym. Holzman. et Viva*, quod si qui consilium præbet iudicatur in suo officio, v. g. Confessarii, Advocati etc. peritus, tunc tenetur; secùs verò si pro ignaro habetur, quia tunc damni eventus potius imprudentiæ illius, qui consilium exequitur ignari, imputatur : intelligitur, modò consilium non sit datum dolo; sive animo pravo nocendi, quia tunc semper consiliator malus tenetur (b).

50. — III. *Consensus* : intelligitur illius qui injuste suffragium dat sive votum, et suum votum est causa damni; quia illi qui non sunt causa, prout sunt ultimi ad votum dandum, peccant quidem, sed non tenentur ad restitutionem, modò ex com-

---

(a) *Lil. 3. num. 55g.* — (b) *lib. 3. num. 564.*

muni consensu inconclusionem injustam non convenerint. Sed quæritur quid dicendum cum quilibet suffragium ferentium non est certus, an suum votum fuerit causa damni? Alii dicunt omnes teneri *in solidum*; alii contrà neminem ad aliquid teneri. Sed vera sententia cum *Lug. Molin.* et *Sporer*, est et quòd quilibet tenetur tunc pro suâ ratâ ad damnum reparandum; et si alii non restituunt, teneri ad totum. Nec obstat quod superius n. 45. dictum est quòd cooperans non tenetur, quando nescit se fuisse certam damni causam; quia in nostro casu quilibet suffragium ferentium, saltem jus, quod habebat damnum patiens ad recuperandum ab aliis suffragatoribus damnum acceptum, deterius fecit, et ideo quilibet tenetur ad totum damnum, si alii non restituunt (a).

51. — IV. *Palpo*: intelligitur adulator qui inducit aut animum addit alicui ad damnum alteri ferendum, eum laudando, aut ejus animi abjectionem exprobrando (b).

52. V. *Recursus*. intelligitur ille qui furem, aut res ablatas in tutum locum recipit. Hic tenetur ad restituendum, semper ac est causa furti facti aut faciendi; et sic tenentur Caupones qui accipiunt furta servorum, aut filiorum-familias. Sed non tenetur Caupo, qui post patratum furtum coadjuvat furem ad fugiendum; aut hospitaliter furem et furta in tutum recipit ex suo officio aut amicitia, ut dicunt communiter *Conc.* et *Salmant.* cum aliis. Hoc tamen intelligitur, ut benè advertunt *Croix*, *Busemb.* et *Concina*, modò Caupo propter hoc non esset causa furtorum facientium (c).

53. — Hic autem incidit sermonem facere de illâ difficillimâ quæstione, utrùm emptor bonæ fidei rei furtivæ possit eam restituere furi, ad recuperandum suum pretium? Prima sententia (quæ est communissima) id permittit cùm nullus alius modus occurrit recuperandi pretium solutum. Ità *S. Antonin.* *Lugo*, *Navarr.* *Less.* *Silv.* *Rebell.* *Soto*, *Holzm.* *Salmant.* etc. qui dicunt quòd emptor ex hoc non infert inju-

---

(a) *Lib.* 3. n. 566. — (b) n. 567. — (c) n. 568.

riam domino, quia rem in eodem statu in quo erat reponit. Secunda sententia negat cum *Laym. Cajet. Mol. Croix, Concina*, etc. qui volunt rem restituentem esse domino, quia cum è furis manibus liberata sit, jam in statu meliori existit; undè restituendo eam furi, non jam in pristinum statum remittit, sed in deteriorem. Hæc sententia est valdè probabilis, sed non minùs est probabilis prima; etenim respondet *Card. de Lugo* rationi oppositæ: 1. Quod emptor non tenetur servare rem domino cum proprio damno: si quis (dicit) sumeret vestem alterius quam reperit, et postea animadverteret retentionem illius fore sibi damno, benè in eundem locum conjicere potest, licèt prævideat alios fore eam sumpturos. 2. Emptor (et hæc est ratio potior) cum habeat jus ad rescindendum contractum, non potest ei denegari actio reddendi rem furi; nam talis actio absolutè necessaria est ut rescindat contractum, et ut pretium suum recuperet, licèt per accidens eveniat domini damnum (a). Et ut dicunt *Tolet. Prad. Silvest. Alens. Holzm.* et alii (et probabile dicunt *Less. Lugo*, et *Busemb.*) hoc procedit etiamsi emptor malâ fide emisset, quia tam emptor malæ, quàm bonæ fidei habet idem jus pretium suum contractûs rescissione recuperandi. Et licèt ille malæ fidei peccaverit in recipiendo rem à fure, nihilominùs neque pro illâ rei acceptione, neque pro redditione furi, est causa domini damni, cum jam habeat jus eam illi reddendi (b) Sola enim injuria proximo illata non obligat ad restitutionem, cum illa non est damni causa, ut dictum est n. 44. cum *S. Thomâ* (c).

54. — VI. *Participans*. Participans bifariam intelligi potest: aut ille qui participat de furto, et hic tenetur ad illam partem solam quam recipit, quoties ille non fuit causa damni ab aliis illati, quia tunc tenetur ad totum: aut ille est particeps actionis furti; et super hoc plures quæstiones occurrunt. Quæritur 1. An quilibet participantium, qui ad furtum concurrunt, teneatur restituere *in solidum* nempe totum damnum? Distinguendum: si res est divisi-

(a) *Lib. 3. n. 66g.* — (b) *n. 570.* — (c) *Ibid.*

bilis ut vinea, frumenti acervus etc., tunc motor principalis tenetur ad totum: reliqui ad solam suam partem, ut dicunt *Lugo, Less. Navarr. Bonac. Salm.* etc. licet ex communi consilio furentur; modò (excipiendum) alter non moveat, aut animum excitet alterius ad furandum; et idem esset si quolibet non concurrente furtum non fieret, nam tunc omnes tenentur in solidum. Quamvis quoad praxim rudes cum difficultate sibi suadere possunt teneri ad restituendum quod fuit acceptum ab aliis, et contra in eo casu præsumentur ipsi domini fore contenti de sola uniuscujusque parte, ob timorem ne nihil recipiant, si cogerentur illi ad restituendum totum. Hinc est quod Confessarius quemlibet istorum (præcipuè, si est conscientiae parum meticulosæ) hortetur ut restituat quod debet, quin quantitatem explicet, sed remittens dictamini illius conscientiae (a).

55. — Sed majus dubium urget quandò res est individua, v. gr. cum multi incendunt aliquam domum, navem etc., an omnes teneantur restituere in solidum? Multi probabiliter affirmant, ut *Solus, Sanchez, Cajet. Ronc. Salmant.* etc., quia tunc quilibet est causa moralis totius damni. Sed probabiliter etiam negant *Silvest. Nav. Lugo, Spor.* et alii, qui dicunt quemlibet istorum teneri tantum ad suam partem; quia sicut qui concurrit ad partem damni dividui, licet cum aliis concurreret ad totum damnum, non tenetur nisi ad solam suam partem, ratione habitæ portionis rei circa damnum illatum; ita etiam qui ex parte concurrit ad aliquod damnum individuum, ad eam tantum partem tenetur ob causalitatem partialem, sive influxum partiarium, quem ille in eâ re immittit. Sed hoc debet intelligi, quoties sinè suo concursu etiam evenisset; quia si deficiente uno cooperantium, damnum non evenisset, tunc ut dictum est quilibet tenetur ad totum (b).

56. — Dubitatur 2. An qui timore gravis damni inductus cooperatur in alterius damnum, excusetur à peccato, et à restitutione? In hac quæstione DD. locuti sunt valdè confusè, nec pro meâ imbecillitate

---

(a) *Lib. 3. n. 579.* — (b) *Ibid.*

mihi videntur punctum attigisse mediis propriis principiis. Nonnulli universaliter excusant hujusmodi cooperantem, ut *Sanchez*, *Less.* et *Busemb.* Alii verò eum damnant, si ejus actio proximè in damnum concurrit, ut esset arcam infringere, res è domo extrahere, et hujusmodi; excusant autem si actio est remota, ut scalam tenere furi, claves tradere, transvehere furta; ità *Bonac. Spor. Holzman*, et *Salm.* licèt *Salmanticenses* alibi dicant etiam has actiones remotas esse intrinsecè malas, quia omnes (ut dicunt) cooperantur in actionem injustam furis, undè etiam ob istas cooperationes damnant cooperantem de peccato, et restitutionis. Ego in Opere meæ Moralis alio modo hoc punctum distinxì, dicendo diversimodè esse considerandam cooperantis actionem quoad domini damnum, et diversimodè quoad furis peccatum. Quoad damnum, dixi neminem posse cooperari ad damnum alterius, ut liberetur à suo, quandò damnum est ejusdem ordinis. Quà de re fit, ut etiam cum periculo mortis tenear denegare gladium volenti occidere inimicum; quia non possum, ut me caveam à morte, cooperari positivè in mortem Proximi (a). Secùs verò si damnum meum esset altioris ordinis, dùm ut effugiam mortem aut infamiam, benè quidem cooperari possum in damnum alterius bonorum; quia tunc ego existens in extremâ necessitate, dominus eorum esset irrationabiliter invitus, si repugnaret meæ cooperationi (b).

57. — Quoad peccatum furis, dixi cum Auctoribus primæ Sententiæ quòd ob evitandum meæ vitæ, aut famæ, damnum, tutò possum ponere actiones tam secundi, quàm primi generis, superius commemoratas; quia reverà sunt purè materiales, et ex se omnes indifferentes; quia omnes sinè peccato exerceri possunt; et licèt fur iis ad malum finem abutatur, ego tamen non pecco; et tantò minùs ad restitutionem teneor, cùm ex justâ causâ eas exerceam, ut dictum est *Tract. IV. n. 31. et 32.* loquendo de cooperatione materiali, et ità mecum sentit etiam *P.*

---

(a) *Lib. 3. n. 697. v. Teneris.* — (b) *n. 571. v. Secunda.*

*Molina*, quia dicit posse licite captivos timore mortis Christianorum bona accipere, *quoniam* (en rationem quam adducit) *sunt in necessitate eorum bonorum ad vitam conservandam.* Ità etiam sentit *Contin. Tournel.* qui dicit: *Non teneor subire grave detrimentum, ut alterius peccatum avertam.* Ità pariter doctus *P. Milante* qui dicit: *Innoxie cooperatur, qui ex metu ad ea* (loquendo de bonorum damnis) *concurrit.* Si unquam (ego subjungo) esset intrinsece malum furi claves tradere, eò quia tunc cooperor illius peccato, ne possem quidem ei tradere claves domus meae, ut me liberem à morte; sed quis hoc unquam cogitare potest? quare illas actiones tantum dico esse intrinsece malas quae augent, aut confirmant pravam furis voluntatem: ut esset servare ei humeros, eum certiorum facere de hora, aut modo magis commodo ad furtum exequendum, quia tales actiones sunt formaliter influentes in furis voluntatem, ideòque nunquam quocumque timore sunt licitae. Ità ego distinxi, punctum suis principiis discutiendo, et puto aliter dicendum non esse; ceterum sapientioribus hæc submitto. Observetur locus citatus (a).

58. — Dubitatur 4. An teneatur ad restitutionem qui impedit alium, qui vellet avertere Proximi damnum? Affirmant generaliter *Navar. et Medina.* Sed nos distinguimus cum *Lug. Less. Mol. et Croix*, ita: si impedit vi aut fraude, tenetur; secus verò si solo consilio, aut precibus, quia tunc peccat contra caritatem, non autem contra justitiam. Hoc tamen intelligitur, modò ille alius non teneatur ex justitiâ illud damnum impedire (b).

59. — VII. *Mutus, non obstands, non manifestans:* Intelliguntur causae negativæ, nimirum illi qui cum possint impedire alterius damnum, loquendo, aut reum manifestando, et cum hoc debeant facere ex pacto, aut officio, id negligunt. Cujusmodi sunt Principes, Magistratus, Exercituum Duces, Tutores, Ecclesiae administratores, Custodes, Satellites, et Servi, (c): Sed servi dumtaxat quoad damnum ex-

---

(a) *Lib. 3. n. 571.* — (b) *n. 572.* — (c) *l. 3. n. 573.*

terorum, ut diximus *Tract. VII. n. 8.* An autem teneatur ad restitutionem Confessarius, qui Pœnitentem obligat ad restituendum, ut debet, vide quod dicitur *Tom. 11. Tract. XVI. de Sacramento Pœnitentiæ num. 122.*

60. — Hic notandum 1. quòd inter præfatos coöperantes tenetur restituere, I. loco qui retinet rem. II. Mandans, si res non existit. III. Executor. IV. Cæteræ causæ positivæ, ut Consiliator, Participans etc. V. Causæ omnes negativæ (a). Notandum 2. quòd si creditor remittit restitutionem damnificanti principali, censetur remittere etiam minùs principalibus. Præterea si creditor promittat alicui ex æquè principalibus eum non molestare, censetur remisisse totam illius portionem; secùs si creditor vellet exigere totum debitum ab aliis, promissio tunc esset vana, quia alii cogerent illum ad contribuendam illam partem, quam creditori debebat (b).

61. — Præter præfatos coöperantes, tenentur ad restitutionem illi qui impediunt Proximum ab aliqujus justi boni consecutione. Sed in hoc distinguendum: si res erat ei debita ex justitiâ, quocumque modo eum impedis, teneris ad restitutionem. Si autem non debebatur ex justitiâ, tunc teneris, si vi aut fraude ab illius rei consecutione eum impedis; nam etsi Proximus non habebat jus ad illam rem, nihilo-minùs quisque habet jus ne malis artibus impediatur, ne aliquod bonum, quo non est positivè indignus, consequatur. Et idem dicunt *Salmant.* si precibus importunis, aut metu reverentiali eum impedis (c). Et tunc restitutio debet fieri pro modo spei, quam Proximus habebat in illud bonum (d).

62. — Sed hic quæritur 1. An teneatur ad restitutionem qui malis artibus impedit, quominùs res interceptæ Fisco applicentur? Respondeo cum *Less. Sanch. Lugo, Azor. Salmant.* et aliis communissimè, teneri post sententiam; sed non priùs, dùm Fiscus non acquirit jus ad pœnam, nisi post sententiam. Saltem, ut dicit *Lugo*, hoc jus Fisci ad pœnas ita communiter receptum fuisse concipitur (e).

---

(a) n. 580. — (b) n. 581. — (c) ex n. 582. — (d) n. 587. — (e) n. 583.



Cap. 3. Punct. 2. De iis qui restit. tenentur 369

63. — Quæritur 2. An teneatur ad restitutionem qui odio, sed sinè malis artibus impedit Proximum à consecutione alicujus boni, quod cæteroquin ei justè non erat debitum? Alii affirmant, ut *Lug. Caj. Salm.* etc. dicunt enim tunc animum injustum reddere etiam injustam actionem. Sed alii probabilius, et communissimè negant cum *Less. Petrocor. Castrop. Navar. Vasq. Sot. Laym. Mol. Bon. Sanch. Ronc. Holzm.* et aliis plurimis. Ratio est, quia ad restitutionis obligationem prava voluntas non sufficit, sed requiritur amplius actio externa graviter injusta, quæ de se externè jus Proximi lædat, et influat in ejus damnum; aliter malevolus peccabit adversus caritatem, non autem adversus justitiam (a). Hinc infertur non teneri ad restitutionem, qui odio in suum inimicum dehortaretur, (sed sinè dolo aut vi) Testatorem à relinquendo ei hæreditatem, aut Episcopum à Beneficii collatione: intelligitur de Beneficio simplici, quia aliter dicendum est de Curato; quia (juxtà sententiam probabiliorē) Episcopus ex justitiâ tenetur illud digniori conferre, postquam concursus adhibitus est (b). Observetur quid dicemus *Fract. XIII. n. 37.*

PUNCTUM III.

Cui facienda est restitutio?

*Si bona sunt certa, et dominus longè abest 64. et 65.  
Si dominus vindicat rem è manibus tui emptoris 66.  
Si bona sunt incerta 67. De compositione 68. De  
bonis inventis 69. De thesauris 70. De feris in ve-  
natione captis 71. Quæ venatio sit prohibita Clericis,  
et religiosis 72.*

64. — **D**ISTINGUENDA sunt bona certa à bonis incertis: dicuntur *bona incerta*, quæ incertum habent dominum. Si igitur dominus est certus, ipsi proculdubio res restituenda est; dummodò illa accepta non sit è manibus tertii justì possessoris, v. g. à conductore, custode etc., nam tunc ipsis, non domino, fieri

---

(a) Num. 584. — (b) n. 585. et l. 4. n. 108.

debet restitutio : nisi esset, quod isti probabiliter eâ re abusuri essent cum domini injuriâ (a).

65. — Dubitatur 1. Si dominus longè absit, cujus sumptibus res in ejus manus pervenienda sit? Si res bonâ fide accepta est, expensa à domino fieri debet; si autem malâ fide, à fure. Sed quæritur ad quantam expensam tenetur fur? alii eum obligant quibuscumque expensis; alii ad illam tantum quæ æquivalet furti valori; sed sententia mihi probabilior cum *Mol. Sporer, et Tambur.* est furem teneri efficere, ut res in domini manus perveniat, licet expensa superaret debitum; et ut dicit de *Lugo* etiamsi futura esset duplo major. Si autem esset hoc excedentior, tunc sententia communis eum obligat tantum, ut restituat pauperibus: hoc intellige cum desperatur posse alio tempore restitui res aut pretium domino, quia aliter expectandum est, et etiam probabiliter (ut dicunt *Lugo Less. Bonac.* etc.) differre potest restitutionem quam cum gravi suo damno facturum esset; dummodò dominus ex restitutionis dilatione simile detrimentum passurus non sit, ut dicunt *Less. Navar. Tambur. Lugo* etc. communiter, quandoquidem damnum, quod ob furtum dominus patitur, semper fur tenetur reficere (b).

66. — Dubitatur 2. Si tu bonâ fide emis aliquid ab aliquo, et bonâ fide alteri vendas, et inde verus dominus compareat, ad quid teneris? Distinguendum: si dominus vindicat sibi rem suam è manibus tui emptoris, tunc rectè dicunt *Lessius, Solus, Bonac. Castrop. Busemb.* etc. te esse obligatum ad restituendum emptori pretium receptum, licet cum eo convenisses quòd non teneris ad evictionem ut expressum est *L. Emptorem. §. Autem, ff. Act. empt.*, quia æquum non est ut venditor lucrum faciat cum damno emptoris. In tribus tamen casibus emptor nequit repetere pretium: 1. Si expressè convenisses de non restituendo nec pretium quidem: si factus non esses ditior ex eâ venditione, v. gr. si consumpsisses bonâ fide pretium in donationes largiendas, etc. 3. Si emptor empisset malâ fide à te, sciens illam rem esse

---

(a) *Lib. 3. n. 596.* — (b) *l. 3. n. 597. et 598.*

alienam ; quia tunc in poenam sui delicti ( quoties tu expressè eum non cavisses de evictione ) non potest suum pretium prætere, ut habetur ex *L. Si fundum, Cod. de Evict.* Sed ut advertit *Castropal.* tunc ne retinere quidem potes pretium , quia in conscientia ante sententiam teneris emptori restituere , et Fisco post sententiam. Si verò res non est evicta à domino , sed in manibus emptoris remanet , ad nihil tu teneris , ut dicunt *Less. et Salmant.* quia tunc non es jam causa , ut Dominus privetur sua re ; nec contra teneris cum tuo gravi damno efficere , ut dominus eam recuperet (a).

67. — Hoc procedit si dominus rei est certus. Si autem est incertus , etiam tunc oportet distinguere , et observare an res in bona , vel mala fide accepta sit. Si res accepta est mala fide , oportet rursus distinguere. Si dominus bonorum incertorum est ignotus tantum in particulari , prout cum scitur res spectare ad aliquam trium , vel quatuor personarum cujusdam loci , tunc nequit fieri restitutio pauperibus , sed res dividenda est inter eas , quas inter persona defraudata existit ; ita *Sylvius , Lessius , Castropal. cum P. Navar. Cajet. Molin. et Rebell. (b).* Si autem dominus est ignotus etiam in generali , ita ut nulla possit fieri separatio personarum illius loci , inter quas adsint illae ad quas pertinet res , tunc restitutio bene potest distribui pauperibus , ut praescriptum est *Cap. Cum tu , de Usur.* Et tunc sufficit illam erogari in pauperes cujuscumque loci , aut in quacunque opera pia. Intelligitur tamen id procedere , cum peracta est jam diligentia debita ad proprios dominos inveniendos , alioquin , si restituatur res pauperibus , ante diligentiam , et deinde appareant domini , semper debetur eis restitutio damni (c). Praeterea intelligitur id , semper ac illi qui damnum passi sunt , pauci fuerint , nimirum tres vel quatuor , ita ut distributione facta in eo loco , verisimiliter res

---

(a) *Lib. 3. edit. Venet. n. 601. et n. 800.* — (b) *Sylvius to. 3 in 2. 2. q. 62. pr. 5. Concl. 2. Less. de Just. c. 14. n. 32. Castr. part. 5. tr. 32. D. 1. p. 18. §. 8. n. 5. cum P. Nav. Cajet. Molin. et Rebel.* — (c) *Vide opus nostrum Lib. III. n. 589. et 596. ad 5.*

ad proprios dominos non est perventura, prout communiter docent *Sylvest. Bonac. Navarr. Castrop. et Salmant.* (a). cum *Soto, Tapia et Rebellio*. Et quamvis *Silvius loc. cit. Concl. 4.* dicat magis convenire, quod eo casu restitutio fiat pauperibus loci, ubi res fuit ablata, attamen ipsemet subdit cum *Sylvestro* id non esse necessarium. Si autem damnum illatum fuisset pluribus et diversis dominis incertis alicujus Universitatis, tunc omninò facienda est restitutio ejusdem Universitatis incolis, ut mox postea hic dicetur, atque distinctiùs dictum est *num. 28.*

68. — Notandum hìc quod super iis debitis incertis, potest fieri compositio; sed hæc non potest fieri cum Episcopo, sed cum Papâ (aut Pœnitentiariâ) ut bene dicunt *Lugo, Mol. Turr.* etc. contra aliquos; et intelligitur quoties adest justa causa (b), et cum dominus est omninò incertus; undè rectè dicunt *Soto, et Henric.* non permitti compositionem, cum fit restitutio pauperibus ob domini absentiam, ut dictum est *num. 66.* (c); sicut nec permittitur, cum restitutio minutorum furtorum facienda est ab illis, qui vendunt vinum, oleum etc. nam illa necessariò facienda est pauperibus ipsius loci; imò juxta sententiam communioem *Laym. Conc. Salm. Diana, Spor. Croix* etc., non sufficit eam pauperibus loci facere, ut admittunt *Vasq. Anacl. Escob.* cum *S. Thomâ*; sed fieri debet ipsis Civibus, qui ad tabernam confluere solent; licèt ut diximus *num. 28.* si pauperibus fiat, graviter non peccetur (d). Sed hìc dubitatur an debitor remaneat liber ab omni obligatione, licèt compareat dominus, factâ jam compositione? Alii negant, dicendo teneri ad id in quo factus est ditior; sed communius affirmant *Lugo, Salmant. Trullench. Tap.* etc. quia in eo casu Pontifex, ut administrator bonorum temporalium quatenus spectat ad bonum spirituale, utique potest transferre dominium, et omnem tollere obligationem (e).

---

(a) *Sylvest. verb. Restitutio 8. q. 3. Bonac. to. 2. de Rest. in gen. D. 1. q. 3. p. 4. n. 10. Castrop. loc. cit. n. 2. cum P. Nav. Salmant. tr. 13. de Rest. c. 1. n. 215. cum Soto, Tapia, et Rebellio.* — (b) *n. 591.* — (c) *n. 594.* — (d) *n. 595.* — (e) *n. 592.*

69. — Hoc procedit cùm res accepta est malâ fide ; sed si bonâ fide , v. gr. si quis casu invenit annulum in viâ , aut ex errore inculpabili recepit majus debito , et nesciat dominum , cui restitutus esset , quæritur an possit sibi ea retinere ? Affirmant *Sotus* , *Sà* , *Navarr.* etc. modò præmittat diligentiam ; nam ut dicunt , res derelictæ fiunt primi occupantis. Sed negant *Less.* *Laym.* *Castropal.* etc. dicendo quòd res illa aut ejus pretium applicari debet piis usibus , cùm præsumatur ea esse domini voluntas. Nos cum *Lugo* , *Croix.* et *Holz.* distinguimus ità : Si dominus omnino non potest ampliùs inveniri , tunc retineri potest ; quia tunc res pro derelictâ habetur , et à primo occupante acquiritur dominium illius. Secùs autem , si etiam post diligentiam aliqua appareat spes inveniendi dominum ; tunc enim ei res conservanda est , aut ejus pretium : et si neutrum servari potest , debet distribui pauperibus , quia usque dùm talis spes durat , dominium est penes dominum (a). Et hanc sententiam tenet *S. Thomas* (b) , dicens : Si (res) pro derelictis habeantur , et hoc credit inventor , licet sibi eas retineat non committit furtum. Et idem dicendum est de paupere cui fur dedit furtum , cùm dominus inventus non sit ; nam si spes non erat illum inveniendi , jam in pauperem dominium translatum est , ità ut non teneatur rem domino reddere , licet hic postea compareat (c).

70. — Præterea quæritur ad quem spectant thesauri inventi ? Dico I. Lege communi cùm inventor eum invenit in proprio prædio , thesaurus suus erit. II. Cùm reperitur in fundo alieno , tunc si casu invenitur , dividendus est inter loci dominum , et inventorem , qui in conscientia tenetur dimidium dare domino , ut dicunt communiter *Lugo* , *Less.* *Castrop.* *Laym.* *Salmant.* etc. : sed si ex industria reperitur , totus restituendus erit domino . ut dicitur in *L. unic. C. de Thesaur.* III. Si verò thesaurus invenitur in loco publico aut sacro , dividendus inter inventorem , et Fiscum , aut Episcopum. IV. Si deniquè inveniretur arte magicâ , totus spectabit ad Fiscum , sed non antè

(a) n. 603. — (b) 2. 2. q. 66. art. 5. ad 2. — (c) l. 3. n. 590.

Judicis sententiam. Ità lege communi ; sed lege nostri Regni , si in loco publico invenitur non arte propriâ , totus Fisco debetur ; si in privato , et casu , tertia pars erit Fisci , tertia inventoris , et tertia domini fundi (a).

71. — Insuper quæritur cujæ erunt feræ , quæ in venatione capiuntur ? Si fera ab uno vulnerata est ; et ab alio capta , spectat ad capientem semper ac illa fugisset ; in dubio verò dividenda est. Quæ tamen in retibus capiuntur sunt illius qui eas tetendit (b). Si autem aliquis in silvâ reservatâ ( quæ à Principe , aut ejus privilegiato reservari potest ) feram eapit , dicit *Less.* quòd peccat mortaliter , et tenetur illius pretium restituere Principi , pro spe quam Princeps habere poterat efficiendi suam ; sed *Soto* , *Mol.* etc. hoc admittunt solo , casu , quo locus sit conclusus , et *Less.* penitus negat , cum præter prohibitionem illic venandi , est imposita pœna (c).

72. — Advertendum hîc , non omnes venationes esse Clericis inhibitas , sed solam clamorosas , id est cum strepitu , adhibitis canibus aut avibus rapacibus. Et dicunt *Less. Castrop. et Rebell.* ne clamorosas quidem interdictam esse sub gravi , nisi fuerit frequens , aut cum scandalo , aut cum magnis impensis. Addunt alii ( ut *Mol. Cajet. Sà* , *Spor.* etc. ) nunquam esse damnandum culpâ gravi , præciso scandalo , Clericum ob solam venationem ; nam in textu *Cap. 1. de Cler. venan.* illa non vetatur , nisi sub suspensione ferendæ sententiæ , imò *Laym. Less. Valent. et Sà* . sentiunt esse licitam , si sit rara , et moderata , et si fit causa necessitatis , aut exercitii. Hinc doctus Auctor Libri cui titulus ( *Istruzioni per li nov. Confess.* ) concludit venationem non clamorosas esse omnino recreationis causâ licitam ; et clamorosas non esse mortales , nisi adsit contemptus et contumacia. Religiosis verò clamorosa strictius vetita est ex *Clem. 1. §. Porro , de Statu Mon.* Sed *Castrop.* dicit ne mortale quidem esse , nisi adsit scandalum ; saltem ( dicunt *Salmant.* ) si ter , aut quater sinè gravi strepitu eam exercent in anno (d).

---

(a) n. 604. — (b) n. 604. — (c) n. 605. — (d) n. 606.

PUNCTUM IV.

Quid restituendum est à possessore bonæ fidei, et quid à possessore malæ fidei?

*De possessore bonæ fidei 73. De fructibus naturalibus, civilibus, mixtis, et industrialibus 74. Qui recipit à fure rem ablatam mixtam cum re illius 75. Qui infert damnum existimatum minoris quo valet 76. De possessore malæ fidei 77. Quid si res crescit, aut crevisset pretio, et de expensis utilibus à fure factis, et de eo qui se simulat pauperem 78. Si res etiam perisset apud dominum 79. Qui emit cum dubio 80. Qui defraudat gabellas 81.*

73. — **L**OQUENDO de Possessore bonæ fidei, nempe de eo qui domino injuriam tantum materiale intulit (injuria *Materialis* dicitur quæ caret culpâ, *Formalis* cum culpâ) ille tenetur restituere rem tantum si existit, aut si cum suâ confundit, tantum id in quo factus est ditior: itaque si vestem alienam consumpsit, tenetur ad id, quod pensurus erat in propriam sibi conficiendam (a). Sed in dubio sit vel ne factus ditior, ad nihil tenetur, ut dicunt *Sanch, Croix*, et alii, quia in dubio nemo tenetur re suâ privari (b). Dicunt nonnulli DD. quod qui bonâ fide recipit pecuniam à fure, non tenetur restituere eam domino, licet illa existat; sed hæc opinio non mihi videtur probabilis, quia dominium pecuniæ in specie spectat ad dominum, sicut et cæterorum omnium (c). Ad quid autem teneatur possessor bonæ fidei, superveniente dubio quod non potest dilucidari? Vide quod dictum est *Tract. I. num. 20.*

74. — Insuper possessor non tantum debet restituere rem, sed etiam fructus ab illâ perceptos. Sed hic oportet distinguere fructus naturales à civilibus, à mixtis, et ab industrialibus. *Naturales* sunt illi qui à solâ naturâ producuntur, ut sunt pascua, animalium foetus et hujusmodi. *Civiles* sunt illi qui

---

(a) n. 607. 608. — (b) n. 706. — (c) cit. n. 608. v. *Dicunt.*

percipiuntur à domorum, aut pecudum locatione : et etiam librorum, vestium etc. ut tenendum est cum communi contrà *Laym.* *Mixti* sunt illi qui partim à naturâ et partim ab industriâ habentur, ut sunt oleum, vinum, caseus, etc. *Industriales* denique sunt illi qui solâ industriâ acquiruntur, ut est lucrum quod percipitur à pecuniâ, quæ negotiationi exponitur, aut à melioramentis rei factis. Fructus autem *Naturales*, et *Civiles* debent integrè (ablatis expensis) restitui, tum à possessore bonæ, tum malæ fidei; hâc differentiâ, quòd possessor bonæ fidei ad nihil tenetur, si nihil percepit, aut si in bonâ fide eos consumpsit. et in nihilo sit factus ditior : aut si eos præscripsit triennalis spatii cum titulo, aut 30. sinè titulo, ut jam dictum est *num. 10.* Sed possessor malæ fidei semper integrè debet fructus prædictos restituere, quamvis eos non perceperit, si dominus jam percepturus esset, si res apud se fuisset; et licèt dominus exacturus non fuisset, etiam tenetur restituere, quando jam ipse percepit, quia res semper domino fructificat. Fructus *Mixti* denique debent restitui eâdem regulâ, nempe bonæ vel malæ fidei; sed hîc advertendum quòd jam non debent restitui prædicti fructus (ut dicunt aliqui) sublatis expensis, et laboris valore, sed ut meliùs dicunt *Mol. Dicast.* et *Croix* cum aliis (a), quoad solum valorem correspondentem naturæ, quia valor correspondens industriæ possessoris totus ei debetur (b).

75. — Quæritur 1. An tenearis restituere domino pecuniam, frumentum, aut similia quæ recepisti à fure, postquàm ille commiscuit cum suis? Non tenearis, si fur remanet potens restitutioni, dùm id quod tu accepisti (licèt malâ fide) erat jam factum proprium furis. Secùs autem si fur redditur impotens, quia tunc illâ acceptatione tu fuisti causa damni domini : et ità omninò tenendum cum *Sanch. Tamb.* et aliis communiter; quicquid dicant aliqui (c).

76. — Quæritur 2. Ad quid teneatur proficiens in mare gemmam alienam æstimatam 10. si valebat 100.?

---

(a) *L. 3. n. 825. v. Bened.* — (b) *n. 620.* — (c) *n. 612. et 722.*



Alii cum *Lugo* obligant ad centum, dicentes eum qui injustè proximo damnum infert cum culpâ gravi, teneri ad totum damnum licet ignoratum. Alii tamen communiùs cum *Poncio*, *Exparsa*, *Holzm. Croix*, *Dicastillia*, *Dian. Mazzotta* etc. et probabiliùs, dicunt teneri tantum ad decem. Ratio, quia obligatio restitutionis correspondet culpæ, et culpa correspondet injuriæ, quæ intenditur inferri proximo: Hinc sicut cum levis est culpa, nulla adest obligatio gravis restituendi (ut ipse *Lugo* fatetur), ita cum culpa est minor, minor etiam debet esse restitutionis obligatio. Rationi oppositæ respondetur, quòd damnificans tunc tenetur ad totum damnum culpabiliter illatum, cum saltem in confuso (ut ceteroquin regulariter apprehenditur) damnum quod infertur apprehenditur; sed neutiquam cum omninò invincibiliter ignoratur, ut benè advertunt *Salm. Holzm. Mazzot.* et alii communiter (a).

77. — Loquendo autem de possessore malæ fidei, hic tenetur non solum ad restituendam rem existentem, et totum id in quo factus est ditior, sed etiam ad totum detrimentum illatum domino ob damnum emergens, aut lucrum cessans, saltem in confuso prævisum; ut paulò antè diximus. Hoc nihilominus intelligitur quandò dominus habebat plenum *jus in re*, nam si habebat *jus tantum ad rem*, tunc debet ei satisfieri solum pro valore spei, quam habebat efficiendi suam (b).

78. — Hic notandum 1. quòd si res ablata crescit pretio, tempore quo injustè retinetur, crescit domino: et hoc currit etiamsi dominus eam consumpturus fuisset antè incrementum, nisi illi ablata fuisset; quare si dominus vendidisset agnum cum valebat quinque, et fur consumpsit cum valebat decem, decem debent restitui; non verò quinque, ut dicendum cum *Lugo*, *Castrop. Conc. Salm.* etc. adversus alios; quia res semper fructificat domino, Dicit attamen *Concina* quòd si agnus crescit valore decem, et postea decrescit ad valorem quinque, tantum quinque debent restitui, quia tunc damnum

---

(a) n. 619. — (b) l. 3. n. 614.

est tantum quinque; et huic opinioni adhæsi in Opere Morali (a); sed nunc illa mihi videtur omnino improbabilis, quia cum nunc creverit valor ad decem in domini beneficium, et cum fur non restituerit tunc agnum, damnum non fuit quinque, sed decem, et mora culpabilis furis fuit causa detrimenti. Valde probabiliter contra, imò probabilius mihi videtur quod dicunt *Less. Molin. Croix*, etc. communissimè (contra *Sotum* et alios) nempe quod si quis occidit agnum alterius cum valebat quinque, satis est ut restituat domino tantum quinque, licet agnus postea creturus fuisset pretio, et dominus jam illum servaturus fuisset, quoties dominus, illis quinque sibi redditis, sine incommodo emere posset alterum similem agnum (b). Notandum 2. quod possessori malæ fidei ex *L. Adeo*, §. 7. *Ex diverso. ff. de Acquis. Domin.* negatur actio contendendi expensas utiles in re factas; unde ait *Sanch.* (et *Lugo* vocat sententiam tutam) posse idcirco dominum licet eas retinere. Sed meritò *Less. Castrop. Navar.* et idem *Lugo* oppositam appellant probabiliorem, nam præfata lex (ut pœnalis) non obligat nisi post Judicis sententiam (c). Notandum 3. quod qui se simulat pauperem, tenetur ad restituendam elemosynam (modo non esset modica) aut domino, ut ait *Molin.*, aut aliis pauperibus, ut dicit *Castrop.* (d).

79. — Quæritur 1. An fur teneatur restituere pretium rei deperditæ, cum illa æquè periisset apud dominum? Distinguendum, si res periit sine furis culpâ, et eodem tempore et periculo (v. g. in eodem incendio) in quo periisset jam apud dominum, tunc certum est, ut dicunt omnes, quod ad nihil tenetur; quia tunc furtum non est causa damni, et sola injuria (ut dictum est *num. 44.*) non inducit restitutionis obligationem. Contra, si res periit ob solam furis, aut alterius culpam antè commune periculum, certum est quod fur tenetur eam restituere, quia periculum quod supervenit, non eximit eum ab jam

---

(a) n. 621. — (b) l. 3. cit. n. 621. — (c) n. 618. — (d) n. 622.

contractâ obligatione. Quamvis si ille eodem tempore quo imminentem ruinam prævideret, rem consumeret, probabiliter eum excusant *Less. Lugo, Vasq. Sporer*, et *Laym.* Sed majus dubium restat, quid si elapso periculo communi res in alio periculo perit; dicunt *Castrop. Less. et Salmant.* tunc possessorem teneri ad restitutionem, ratione habitâ culpabilis suæ moræ in restituendo. Sed quoties secundum periculum fuerit pariter commune, ita ut res æquè apud dominum periisset, probabiliter eum excusat *Croix*: cum non mora tunc, sed periculum fuit causa damni (a). Utrum verò fur restituere teneatur, cum rem consummat, postquam in extremam necessitatem deciderit, vide dicta n. 19.

80. — Quæritur 2. Ad quid teneatur qui emit rem à venditore cum dubio an sit ejus, et deinde adhibitâ diligentia veritatem detegere nequit? Aliqui dicunt teneri illum eam restituere, aut ei cujus dubitat rem esse, aut pauperibus. Sed communius et probabilius dicunt *Castropal. Lugo; Less. et Salm.* pro rata dubii dividendam esse; nam ex unâ parte non potest tota retineri, dum nihil sibi prodest possessio dubiâ fide incœpta; contra æquum non est obligare eum ad restituendum totum, cum dubium sit, an illa res sit aliena, an sua (b).

81. — Hic quæritur 3. An fraudans gabellas teneatur ad restitutionem? Sententia communissima, cui adhæsi in Opere Morali, affirmat; quia sicut Rex tenetur populorum saluti prospicere, ita populi tenentur ei sustentationem ministrare, ita *Mol. Suar. Sanch. Croix*, et alii multi. Et probatur ex textu Apostoli: *Reddite omnibus debita, cui tributum tributum, cui vectigal vectigal. Rom. 13.* Alii autem negant, cum adjungitur pœna, ita *Navar. Beja, Sa, Duald. Malder.* etc. dicendo, quod licet subditi teneantur Principi suo congruum subsidium ministrare, et licet Princeps possit ad hoc etiam sub culpâ obligare eos, non præsumitur tamen velle obligare, ad culpam, quoties in sui lucrum magnam superaddit pœnam, et illi se subjiiciunt subditi. Præterea, adhuc

---

(a) l. 3. n. 620. — (b) n. 625.

juxtâ sententiam, quod lex mixta obliget ad culpam et pœnam, dicunt quòd, positâ lege quæ pœnam injungit, dici potest tunc peccare fraudantem, cùm adhuc post confiscationem bonorum nollet pœnam solvere, aut sibi eam compensare vellet; tunc enim lex videtur disjunctiva, nempe quòd solvatur aut gabella, aut pœna, prout ait *Sanchez cum Salon. Cordub. Angles*, et aliis. Saltem ajunt dubium esse, an lex hæc ad utrumque obstringat, et in dubio nequit adesse obligatio certa. Hoc tamen non obstante, ego non omitto primam sententiam suadere (a). Ceterum *Sanch. cum S. Anton. Gabriel. etc.* excusant eos qui vehunt res proprio usui, aut familiæ, dummodò etiam super illis expressè non sit imposita gabella, ut deducitur ex *L. Universi, C. de vectig.*, aut quia solutio etiam pro rebus usui proprio destinatis non sit introducta jam ex consuetudine. Præterea *Silvest. Lugo, Less. etc.* excusant pauperes, si eorum paupertas sit tanta, ut solvendo pro gabellis nequirent se et suos sustentare (b).

## PUNCTUM V.

Quid restituendum pro homicidio.

*Quid restituere debet homicida 82. Si ob offensionem vitæ, famæ, etc. 83. Qui occidit unum pro alio, an teneatur restituere 84. et an incurrat excommunicationem, vel irregularitatem 85. Qui obtinuit remissionem ab occiso, an teneatur restituere filiis 86. Quid restitui debet hæredibus defuncti; et quid si intendatur eorum, aut creditoris damnum 87. Si homicidium imputatur tertio 88. Qui occidit excedendo justam defensionem 89. An hæres suppli-*  
*cio affectu teneatur ad damna 90.*

82. — **H**OMICIDA tenetur restituere omnia damna in bona occisi illata, tum ob expensas curationis (non autem funeralium), tum propter lucrum cessans pro spe quam offensus habere poterat illud

(a) l. 3. n. 616. q. III. Edit. Venet. ubi alia dubia in hæc materiâ discutiuntur. — (b) numer. cit.

acquirendi. Neque ex hoc quòd in reum animadversum sit, præfata damna remissa fuisse intelliguntur, etsi remissa præsumuntur, si in eo casu non exiguntur (a). Nonnulli dicunt à restitutione lucri cessantis deducendum esse pretium laboris quem offensus insumpturus erat. Alii tamen hoc negant. Melius dicit *Bonac.* tantum detrahendum fore quod offensus verisimiliter daturus fuisset, ut à tali labore eximeretur (b).

83. — Dubitatur 1. An præter præfata damna teneatur offensore pecuniâ satisfacere pro offensa illata in vitam vel famam proximi? Affirmant *Sotus, Cajet. Sylvest.* etc. dicentes quòd qui nequit restituere totum, tenetur saltem ad partem; et innituntur doctrinæ S. Thomæ (c) qui dicit; *Cum aliquis abstulit membrum alicui, debet ei compensare, vel in pecunia vel in aliquo honore.* Nihilominus probabilior et communior est sententia opposita, quam tenent *Less. Lugo, Bonacin. Laym. Sanch. Salm.* et multi alii, et *P. Concina* vocat probabilem (quod in sensu illius idem sonat ac moraliter certum, aut saltem probabilissimum, adeo ut oppositum non sit satis probabile). Ratio, quia justitia commutativa obligat ad restituendum pro æqualitate damni illati, sed ubi damnum est ordinis diversi à satisfactione, non potest dari æqualitas aliqua, nec compensatio, nec in totum nec in partem; ideoque non adest obligatio bonis, vitæ aut famæ, quæ sunt ordinis superioris bono, compensandi læsionem. Et hoc probatur ex Scriptura, ubi sic habetur: *Percussor erit innocens, ita tamen, ut operas ejus et impensas in medicos restituat*; itaque satisfactis damnis, percussor innocens remanet: id est (ut bene dicit *Lugo*) remanet liber ab omni alio onere. Probatur etiam ex *L. fin. ff. de His qui effud. etc.*, unde dicitur: *Cicatricum autem, aut deformitatis nulla fit æstimatio, quia liberum corpus nullam recipit æstimationem* (d).

---

(a) *Lib. 3. n. 631. ad 10.* — (b) *n. 625.* — (c) *2. 2. Qu. 42. art. 2. ad 1.* — (d) *lib. 3. n. 627.*

84. — Dubitatur 2. An ad restitutionem teneatur qui volens interficere inimicum ex errore interficit amicum? Hæc quæstio similis est illi, an teneatur restituere damnum qui volens domum inimici incendere, illam amici incendit? Alii affirmant, ut *Bonac. Busemb.* etc. dicendo, omnem actionem contrà justitiam obligare ad restitutionem; Errorem verò domini domûs esse circà qualitatem, non circà substantiam, ideòque non excusare à restitutione. Alii tamen DD. ut *Lugo, Mol. Sporer, Croix, Leand.* etc. (cum doctissimo quodam Illustrissimo Torni meo Magistro) negant, semper ac ille sinè ullâ dubitatione intendit incendere domum inimici, non autem amici; nam pro restitutione damni illati non sufficit actio materialiter injusta aut injuriosa, sed requiritur formaliter, id est voluntariè injuriosa in offensum. Hinc si ego omninò involuntariè lædo amicum, ego nullam injuriam formalem infero, ideòque error est circà substantiam, non circà qualitatem, cùm tota damnum restituendi obligatio oritur ex injuriâ. Et eadem ratio currit pro errore in homicidio, ut dicunt *Filliuc. Tamb.* et *Leand.* Idem dicunt de furto *Mol. Lugo,* et *Sporer,* v. g. si quis accipit rem putans auferre eam suo inimico, sed reverà aufert amico, et eam consumit, hic (ut volunt) non tenetur ad restitutionem, sed quoad furtum rectè contradicit *Sanch.* quia hæc est differentia inter furtum, et damnificationem: in furto principaliter intenditur lucrum injustum, et accessoriè domini injuria; sed in damnificatione principaliter intenditur domini injuria, et accessoriè damnum illius; quâ de re in damnificatione error personæ est circà substantiam, in furto autem est circà qualitatem (a).

85. — Quæritur 3. An incurratur excommunicatio Canonis ab eo, qui volens percutere unum Clericum percutit alium? Negant *Concina, Diana, Suar.* ex eo quia injuria respectu alterius est involuntaria. Sed mihi videtur absolutè probabilior sententia communissima *Mol. Sanch. Bonac. Viva,* etc.

(a) *Lib. 3. n. 629.*

qui affirmant; quia excommunicatio incurritur non ob personæ, sed statûs læsionem, qui status in eo casu jam læditur, licet in personâ erretur. Igitur percussor excusabitur tamen à restitutione damni illati in personam, ut in præcedenti dubio dictum est, quia non adfuit injuria voluntaria in personam; non autem ab excommunicatione (a). Et tantò minus excusabitur ab irregularitate, ut rectè dicunt *Sanct. Covarr. Led. Veg. contra Filliuc. Spor. Tambur.* etc. quia irregularitas imposita est delicto cujuscumque homicidii, et qui occidit unum pro alio, licet erret in personâ, non errat tamen in delicto, cum jam hominem occidat. Alius autem esset casus, si quis mandasset, ut occideretur inimicus, et mandatarius occideret alium, ut fertur declarasse S. C. Nam tunc homicidium respectu alterius est omninò involuntarium, tam quoad personam, quàm quoad delictum illud in individuo; dum illud homicidium accidit non ob mandatum, sed ob errorem mandatarii (b).

86. — Dubitatur 4. An interfector cum à vulnere antequàm moreretur, remissionem damnorum obtinuerit, hoc non obstante teneatur restituere filiis illius? Affirmant *Lugo*, et *La Croix* dicendo quòd pater non potest præjudicium inferre filiis in jus quod ipsi habent super ejus bona. Sed communiter hoc negant *Sotus*, *Sanchez*, *Bonacina*, *Salm. Busemb.* etc. quia filiis non fit injuria nisi in quantum sibi præjudicatur in bonis patris contra ejus voluntatem; quare sicut propter patrem acquirunt jus, ita propter illum amittunt illud. Licet non benè efficeret pater in remittendo ea damna in filiorum præjudicium (c).

87. — Quæritur 5. Quid homicida restituere debeat hæredibus defuncti? Hæredibus non necessariis restituere debet omne debitum cum defuncto jam contractum antè ejus mortem, id est (ut dictum est in principio) omnes expensæ in curatione factæ, et lucrum cessans tempore infirmitatis. Sed hæredibus necessariis, ut sunt filii, parentes, et uxor,

---

(a) n. 628. Qu. I. — (b) *Ibid.* — (c) l. 3. n. 630.

tenetur ampliùs restituere lucrum (juxtà valorem spei) quod verisimiliter defunctus lucraturus fuisset; ità communiter *Sotus*, *Sanch. Navar.* cum *S. Thomà*, etc. Dicit nihilominùs rectè *La-Croix* hoc non procedere si hæredes necessarii in posterum reciperent ab aliis æqualiter alimenta, nam tunc nullum adest damnum (a). Præterea, hoc non procedit pro fratribus, et sororibus, quibus defunctus prosecuturus fuisset alimenta præstare, si vixisset, etiamsi homicida jam hoc illorum damnum animadvertisset; ut dicunt probabiliter *Less. Concina*, *Sot. Lug. Bonac. Salmant.* etc. contrà *Sanch. Azor.* etc. Nec obstat dicere, quòd qui vi impedit aliquem à consecutione justì boni peccat contrà justitiam, atque idèò tenetur ad restitutionem, ut dictum est n. 61. Quia hoc currit, cùm directè intenditur damnum proximi, non autem quandò damnum ei per accidens contingit. Idèòque contrà juxtà hanc rationem dicimus cum *Tamb. Conc. Less. Viva, Croix, Elbel* (adversus *Sot. Bonacina*, etc.) quòd si homicida directè intendit nocere dictis consanguineis (aut cuicumque alteri), tunc tenetur damna compensare; quia quisque habet jus ne directè impediatur vi à consecutione justì boni (b). Et idem dicendum cum *Less. Becano, Salm. Conc. Viva, Tambur.* etc. contrà alios, respectu creditorum defuncti, nimirum quòd tunc tantum debet occisor compensare damna quæ eis evenerunt, cùm hæc directè ab illo fuerunt intenta (c).

88. — Quæritur 6. An teneatur homicida ad restituendum damnum quod tertio evenit, cui homicidium imputatur? Dicimus non teneri, licèt homicida animadvertat damnum præfatum, et quamvis etiam intendat; quia intentio prava, ut dictum est n. 63. sinè actione externâ graviter injustâ in damnum patientem non obligat ad restitutionem; ità *Sot. Less. Sanch. Tamb. et Croix* contra paucos. Hoc tamen intelligitur, modò homicidium non fiat eum talibus circumstantiis, ut moraliter inducant imputationem prædictam, ut si homicidium committeret

---

(a) n. 631. — (b) n. 633. (c) n. 634.



mitteret indutus vestibus tertii, aut in illius agro, etc. quia tunc jam adest actio externa, et injusta (a).

89. — Queritur 7. An teneatur ad restitutionem qui invasus ab inimico, occidit eum, sed excedendo justam defensionem? Nonnulli excusant dicendo tunc inimicum cedere suo juri; nos autem non excusamus cum *Lugo*, *Sanch. Navarr. Croix*, et aliis communiter, quia excedendo jam gravem infert injuriam suo inimico, qui non amittit jus quod habet ad vitam suam ob suam iniquam aggressionem. Probabiliter tamen *Lugo*, cum *Vasq.* et aliis (contra *Suar.*) excusat à restitutione qui inimicum provocat ad pugnam, et eum occidit; nam tunc non pugnat contra justitiam, dum ille jam cedit suo juri, pugnam acceptando (b).

90. — Queritur 8. An hæredes interfectoris teneantur restituere damna cum ipse jam sit supplicio affectus? Negant *Sotus*, etc. Sed affirmandum cum *Sporer*, *Croix*, et aliis communiter. Excipiunt tamen probabiliter *Sot. Less. Filliuc. Busemb. et Croix*, si hæredes occisi præfatam restitutionem non petant, quia tunc præsumuntur eam remittere; modò (intelligitur) res non existat, aut modò illa non sit magni pretii (c).

## PUNCTUM VI.

Quid restituendum ob Stuprum.

*Ad quid tenetur corruptor, si mulier consentit* 91.

*Ad quid si defloravit vi, aut minis* 92. *Si adest promissio vera, aut ficta tenetur ad matrimonium*

93. *Limitatur* I. *Si mulier poterat advertere fictionem* 94. II. *Si timeatur malus exitus*; III. *Si mulier remittit*; IV. *Si adest familie dedecus*; V.

*Si vir exhibeat tantum tactus* 95. VI. *Si inveniat puellam corruptam*; VII. *Si mulier renuit nuptias* 96. *Si corruptor ligatus est voto castitatis, an*

*etc.* 97. *Si est consanguineus, etc.* 98.

91 — **I**N hoc oportet distinguere ad quid teneatur deflorator, cum non intervenit promissio

(a) n. 636. — (b) n. 637. et 638. — (c) n. 705.

Tom. I.

R

matrimonii, et ad quid cùm illa intercedit. Cùm ille matrimonium non promisit, et puella sponte consentit suæ violationi, ad nihil tenetur respectu illius. Et idem dicunt *Lugo, Sanch. Suar. et Less.* respectu parentum, cùm illa sit corporis sui domina; sed *S. Antonin. Navarr. Salm.* etc. obligant eum ad reparandam ejus famam aliquâ honoris significatione, aut veniæ expostulatione, dummodò illi hoc non recusent (a). Ceterùm communissimè dicunt *Sot. Suar. Sanch. Vasq. Mol. Renc. Laym. Less. Lugo, Salmant.* etc. quòd non tenetur vir reficere patri damnum bonorum ratione majoris dotis, quâ indiget pro filiâ collocandâ. Excipe tamen 1. Si ille manifestaret delictum. 2. Si puella esset pauper, et vir valdè dives, ut dicunt *Salm. Bann. Tap.* etc. (contrà *Dicast. et Rebell.*) nam tunc præsумitur sub tali conditione consensisse. 3. Si Judex virum in pœnam sui delicti mulctaret ad dandam illi aliquam summam; ceterùm leges (*cap. 1. et 2. de Adulter. et leg. un. ff. de Rapt.*) damnant defloreatorem aut ad eam ducendam, aut dotandam, quia leges præsument deceptionem, aut vim, quoties oppositum non probatur. Sed in conscientiâ rectè dicunt *Salm.* virum ad hoc non teneri, si mulier reverà sponte consensit (b), sicut dictum *Tract. 11. nu. 26.*

92.—Si autem vir virginem deflorasset vi, fraudibus, aut minis, tunc tenetur reficere tam ei quàm patri damna, quæ eis intulit in honorem et in bona, dotando eam, aut dotem augendo. Et quamvis ducere eam non teneatur, ut dicunt communiter *Lugo, Less. Salm.* etc. nihilominus benè potest Judex ad nuptias in pœnam sui delicti eum obligare juxtà textum *cap. 1. de Adult. et Exod. cap. 22* (.). Imò quando deflorator non potest alio modò damnum restaurare, ex se tenetur ducere, ut communiter dicunt *Less. Lug. Salmant. Bann. Dicast.* etc (c). Contrà ad nihil tenetur, 1. si mulier jam corrupta erat priùs, modò ob injuriam quâ postea affecta est, infamiâ non remaneret

---

(a) *Vide l. 3. Edit. Ven. n. 641. §. I.* — (b) *lib. 3. num. 641.*  
 — (c) *Ibid. v. Hæc de Viro.* — (d) *n. 649. in fin v. Illi.*

notata. 2. Si illa æquè nuberet ac si esset virgo, quia tunc in effectu nullum damnum adest; verumtamen advertunt quòd si mulier à viro malè haberetur ob cognitum defectum, debet deflorator aliquo modo reficere damnum quod patitur (:). Ad quid autem teneatur si precibus aut donis eam induxisset? Dicunt communiter *Sanch. Less. Lugo, Sol. Vasq. Salmant.* etc. ad nihil teneri, modò non intercessissent minæ, aut timor gravis damni; et tunc dicunt ne teneri quidem ad totum damnum (').

93. — Hæc procedit cùm non adest promissio matrimonii; sed cùm promissio inest, deflorator tenetur puellam ducere non solum cùm promissio est vera, sed etiam cùm est ficta, ut tenendum est cum *S. Thomà* ( ) quem communiter sequuntur *S. Antonin. Sanch. Lugo, Less. Tamb. Salmant. Croix, Viva* etc. (contrà pauciores, qui obligant ad reparandum solum damnum). Ratio 1. est quia tale damnum nullo alio modo adæquatè reparari potest, nisi matrimonio. Ratio 2. (et hæc est potior, et in posterum valebit ad decidendos multos casus), quia in contractibus non nominatis, *do, ut des.* et huiusmodi, cùm alter præstat suam partem, alter, licèt fictè promiserit, pariter tenetur ex iustitiâ præstare suam, non secùs ac si vero ex animo promisisset, dùm hoc necesse est, ut à contractibus fraudes, quæ cum damno communi impedirent commercium humanum, removerentur ('). Et idem dicendum cum *Lugo et Salmant.* contra *Sanch.* si quis fictâ matrimonii promissione viduam bonæ famæ cognosceret ( ). Hoc procedit quoad conscientiam; sed quoad forum externum, hìc obiter notamus, quod advertit *Continuator Tournely* (f), valdè utile esse ad impedienda hæc tam frequentia facinora, si Episcopi, et Magistratus irritas omninò declararent omnes istas matrimonii promissiones etiam iuramento firmatas, nisi planè testimoniis, et scripturis validis hæc constarent.

94. — Limitatur tamen sententia præfata circà

(a) *Lib. 3. num. 641. Edit. Ven. Dub. 1. v. Hæc de viro.* —  
(b) *Ibid. Dub. 2.* — (c) *Suppl. qu. 46. a. 2. ad 4.* — (d) *lib. 3. n. 642.* — (e) *n. 646. in fin.* — (f) *Tom. 3. p. 484. v. Quæ.*

obligationem defloratoris fictâ promissione. I. Si mulier ex verbis, aut aliis circumstantiis de facili animadvertere poterat deceptionem; ut esset, sicut dicunt communissimè *Lugo, S. Antonin. Navarr. Silvest. Salm. Busemb.* cum *S. Thomâ (a)*, si vir esset longè nobilior aut ditior, quia tunc (ut dicit Angelicus) merito præsumi potest quod mulier finxit aut voluit decipi, sed reverà non decepta est. Quanta autem hæc disparitas debet esse, *Lessius* exemplificat hoc modo: Si vir esset filius Magnatis, et mulier filia fabri; sed *Sanch. Navar. et S. Antoninus* dicunt sufficere minorem inæqualitatem: verb. gr. si nobilis (sed non Magnates) ducturus esset filiam agricolæ aut artificis. Et idem dicunt præfati Auctores cum aliis, et cum eodem *Less.* si vir esset notabiliter opulentior (b). Item dicunt probabiliter *Sanch. Lugo, Less. Sal. Viv.* et alii hoc procedere, etiamsi puella disparitatem ignoraverit: quia si adesset præcisa obligatio matrimonii, tunc vir teneretur reddere aliquid excedens æqualitati debitæ injuriæ illatæ: undè tunc sufficet, ut curet reficiendum damnum eam dotando (c). Contrà si mulier poterat percipere disparitatem, ut suprâ dictum est, probabilius est cum *Less. S. Anton. Lugo, Sanch. Sylv.* etc. (adversus alios) non teneri tunc ne damnum quidem reparare, sicut etiam expressè docet *S. Thomas loc. cit.* sic dicens: *Et etiam quoad hoc (nempè ad damni reparationem) non tenetur, quia præsumi probabiliter potest, quod sponsa, non fuerit decepta, sed decipi se finxerit (d).*

95. — Limitatur II. Si ex Matrimonio pessimus timeretur exitus, ut dicunt *Lugo, Sanch. Busemb. Henric.* etc. (e). Limitatur III. Si mulier remitteret defloratori obligationem se ducendi; cum talis remissio valida sit, licèt dissentiret familia, ut probabiliter dicunt *Lugo, Less. Ronc. et Laym.* dum jus ad matrimonium præcipuè ad eam spectat, ideòque liberè illa cedere potest (f). Limitatur IV. Si matrimonium

---

(a) *Suppl. q. 46. a. 2. ad 4.* — (b) *lib. 3. n. 643.* — (c) *n. 642. Dub. 2.* — (d) *Ibid. dub. 3.* — (e) *n. 644. ad 646.* — (f) *Ibid.*

non posset perfici à viro sinè familiæ dedecore ; nam tunc non tenetur ad matrimonium, licèt promissio esset vera, cùm tunc sit invalida, sicut de re illicitâ, prout dicunt communiter *Laym. Navarr. Sanch. Ronc. Sporer* etc. (a). Sed utique teneretur, si promissio fuisset vera et disparitas tantùm esset in divitiis, ut dicitur *Tom. II. Tract. XVII. n. 16.* loquendo de Sponsalibus. Limitatur V. Si vir adhibet tantùm tactus cum virgine, ut dicunt *Sanch. Navarr. Lugo. et Croix*, quia soli tactus non sunt tantæ injuriæ, ut inducant obligationem ineundi matrimonium fictè promissum, nec tanti ponderis, ut non ingerant mulieri suspicionem fictionis : modò (excipitur) mulier non esset nobilis, aut honesta ; aut modò vir non requisisset, nisi solos tactus, cum nuptiarum promissione, et propter illos (jam patefactos, aut saltem familiaritate divulgatâ) puella remaneret infamiâ notata (b).

96. — Limitatur VI. Si vir puellam censebat virginem, sed corruptam inveniret : ita communiter *Laym. Sanch. Salm. Ronc. Holzman, Sporer* etc. Et eo casu dicitur juxtâ sententiam probabiliorē *Lessii, Concin. et Roncagl.* quòd vir non tenetur aliquod dare ratione copulæ traditæ, nisi adesset pactio expressa, aut nisi ex tali facto mulier remaneret infamiâ notata : sed dicit probabiliter *Elbel* quòd si ipsamet suam ignominiam divulgaret, vir ne ad aliquid quidem teneretur (c). Limitatur VII. Si ipsamet puella exhibito consensu suæ violationi propter fictam matrimonii promissionem repugnet nuptias contrahere, quia vir non tenetur tunc ad aliud ; nisi esset, ut rectè excipit de *Lugo*, quòd ille simulasset se melioris conditionis, aut illi conditionis æqualis, et esset deterioris ; quia tunc, licèt mulier nuptias respiceret, tamen ille tenetur compensare damnum majoris dotis, quâ indigeret, ut nuberet. Eidem compensationi dicimus cum *Navarr. Vasq. Sylv. et Henrig.* contra *Sanch. et Lugo*) teneri virum, si puella matrimonium non recusaret, sed sui parentes : nam pro-

(a) *Ibid. et lib. 6. num. 851.* — (b) *lib. 3. num. 645.* — (c) *lib. 3. n. 646.*

missio ficta præcipuè intelligitur facta ad compensandum damnum. Idem dicimus cum *Less. Azor. Bonac. Lugo. Croix* (adversus *Mol* etc.), si Mulier violationem invita passa fuisset, et nollet postea nubere ei à quo injuriâ affecta est. Deflorator contra, ut rectè dicunt *Lugo. Less.* et alii, non tenetur ad eam ducendam cum nulla intercessit promissio, nec vera, nec ficta; modò alia via subesset, quâ damnum repararetur, et inæqualitas non esset nimia (a).

97. — Dubitatur 1. An habens votum castitatis virginem deflorando teneatur eam ducere. Negant *Laym. Salmant. et Conc.*; sed rectè affirmant *Lugo, Sanch. Vasq. Tamb. Spor. et Croix*, nec agnosco utrùm opposita sententia probabilis judicanda sit, quia (ut dictum est *num. 96*) ut servetur bona fides in contractibus, fictè promittens tenetur præstare partem suam, ac si verè promisisset, cum alter contrahentium partem suam adimplevit. Objiciunt promissionem irritam esse ratione præcedentis voti. Sed respondetur 1. quòd debita onerosa semper præferenda sunt gratuitis, qualia sunt vota. 2. Quod deflorator, si promittere nequibat matrimonium, poterat saltem promittere impetrationem absolutionis à voto; et ad hoc jam se obligavit promittendo matrimonium, dùm qui ad finem tenetur, tenetur etiam ad ponenda media, nempe ad impetrandam dispensationem. Et casu quo eam obtinere non posset, tenetur saltem ad compensandum damnum, ut dicunt rectè *Lugo, et Spor.* (b).

98. — Dubitatur 2. Ad quid teneatur violans virginem sibi conjunctam sub matrimonii promissione? Si promissio fuit vera et intercessit pactum impetrandi Dispensationem, communis est sententia cum *Lugo, Laym. Sanch. Salmant.* etc. promissionem esse validam, et obligare priùs ad dispensationis impetrationem, et deindè ad matrimonium, quoties hujusmodi dispensationes solent concedi. Itaque idem dicimus cum *Lugo, et Tambur.*, si promissio fuerit ficta, nec mulier potuisset fictionem animadvertere; nam promittens tenetur efficere

---

(a) n. 648. — (b) *lib. 3. n. 649.*

omne id ( ut superius dictum est ) quod facturus fuisset si promissio fuisset vera. Si tamen ille inculpabiliter non advertisset ad impedimentum cognationis quod aderat, et pro dispensatione opus esset magno incommodo, aut sumptu, ad tantum non tenetur; tenetur autem ad damni refectionem, sicut quilibet alius injustus deflorator ( ).

## PUNCTUM VII.

Quid restitui debet ob adulterium.

*Ad quid tenetur adultera; et an teneatur se prodere apud spurium filium* 99. *An filius teneatur credere ei* 100. *Ad quid tenetur adulter; et licet non induxerit matrem ad supponendam prolem* 101. *In dubio si proles sit viri aut alterius adulteri* 102. *Si proles mittatur ad Hospitalia, etc.* 103.

99. — **D**ISTINGUENDA est obligatio adulteræ ab illâ adulteri. Adultera cum reparare nequit mariti, et filiorum legitimorum damnum ob prolem spuriam, quæ nata est, tenetur saltem illud compensare, suis bonis propriis, aut se privando illis quæ prætere potest, suis industriis, aut inducendo filium, ut Religionem ingrediatur, si sit ad hoc idoneus (b). Dubium restat utrùm teneatur prodere delictum suum? Respondemus non teneri, cum prudenter timeret mortem, aut infamiam, et tale suum damnum valdè præponderaret damno viri, et filiorum legitimorum; sed cum damnum respectivè esset æquale, aut parum excedens, illa non potest suum celare crimen; ita dicunt communiter *Lugo*, *Sot*, *Less*, *Tol. Croix*, *Ronc*, *Dian*, *Tambur*, *Spor*. (contra aliquos). Hinc fit quòd adultera debet suum crimen manifestare, 1. Si illa jam sit malæ famæ apud vulgum; aut ut dicunt *Less*, et *Lugb*, si scœmina esset adeò vilis conditionis, ut ejus fama non esset tanti, quanti alterius damnum. 2. Si secus timeretur damnum commune, v. gr. si spurius sit perditis moribus, et

---

(a) n. 650. — (b) lib. 3. n. 652.

succedere deberet in Principatum. 3. Si illa posset sinè multo damno se prodere viro suo ; sed rectè hic dicunt *Lugo*, et *Spor.* difficulter adulteram posse ad id teneri, quia difficulter poterit magnam vexationem evitare, ut infertur ex *Cap. 9. de Pœnit.* ubi dicitur : *Mulier quæ de adulterio prolem suscipit, quamvis id viro suo timeat confiteri, non est pœnitentia deneganda.* Sed contrà dicunt communiter *Lug. Less. Ronc. Spor. Croix, Tamb.* etc. quòd mater teneatur se prodere filio spurio, si probabiliter sperare posset illum sibi crediturum, et bonis cessurum. Nec obstat dicere quòd amissio famæ præponderat bonorum amissioni ; quia ex unâ parte non est certum quòd delicti propalatio apud unum vel alterum probum sit gravis infamiæ ; imò non videtur improbabile oppositum, ut dicitur *Tract. XI. num. 11.* Ex aliâ parte mater certè tenetur ad damnum reficiendum, undè quoties certa non est, quòd suum damnum sit multò majus damno aliorum filiorum, illa tenetur ad illius reparationem (a).

100. — Sed punctum sistit, quòd filius non teneatur matri in hoc præstare fidem, ut docent communiter *Azor. Filliuc. Lugo, Less. Laym. Ronc. Salm. Holzm.* etc.; nam nemo tenetur credere testimonio unius, etiam probatissimi, ut habetur ex *Cap. Relatum, de Testam.* et ex *C. Licet, de Testi.* ubi dicitur : *Nulla est causa quæ unius testimonio, quamvis legitimo, terminetur.* Cùm hoc expediat bono communi, ut vitentur fraudes, quæ secus possent de facili committi. Ideòque dicunt *Elbel*, et alii, quòd rarò potest accidere quòd mater teneatur se prodere apud filium, quia rarò contingere potest, quòd filius teneatur credere matri. Sed si unquam ea indicia illegitimitatis filii adessent, ut nota fuissent, filius jure in foro externo damnaretur (v. g. si mater perspicuè demonstraret viri absentiam, aut impotentiam tempore conceptionis, tunc filius teneretur credere matri, et mater se prodere apud filium (b)).

101. — Hactenùs de adulterâ. Quoad adulterum, ille tenetur restituere filiis legitimis tam hæredita-

---

(a) *lib. 3. n. 653.* — (b) *n. 653. in fine, et 654.*



tem suæ proli relictam, quàm alimenta illi exhibita à tertio anno, quia usque ad tertium annum teneatur eam lactare mater, si potest, si autem non posset, etiam tenetur ad hoc adulter (a). Dicunt nonnulli AA. quod si adulter non induxisset Matrem ad prolem supponendam inter legitimos, sed in hoc se negativè habuisset, tunc non tenetur ad alimenta, aut saltem non ad hæreditatem. Sed nos dicimus cum *Less. Mol. Cajetan. Conc. Salm. Croix*, etc. communiter ad utrumque obligari; quia ille semper est causa moralis proxima damnorum præfatorum, conjiciendo adulteram in moralem necessitatem prolem supponendi (b).

102. — Quæritur 1. Ad quid teneatur adulter in dubio, an proles sit propria an viri? Dicit *Laym.* teneri ad damnum pro ratâ dubii. Sed communiter docent *Sot. Navar. Lugo, Less. Sanch. Castropal. Tourn. Conc.* etc. ad nihil teneri, quoties nescit certè prolem esse suam; nam secus possidet matrimonium, et possidet etiam adulter exemptionem à satisfaciendo damno (c). Et idem procedit (ut rectè dicunt *Sot. Sanch. Salm. Trull.* etc.) si dubitatur inter duos adulteros, cujus sit proles; eadem ratione, quia non potest imponi onus certum pro dubiâ obligatione. Debet dumtaxat excipi cum *Elbel* et aliis, casus, quando secundus adulter advertisset, quod suo peccato sit causa ipse incertitudinis, ne dignoscatur cujus sit proles: quâ incertitudine positâ, non potest postea exigi damnum à primo adultero; ideoque hic secundus remanet obligatus ad totum damnum: juxta id quod dictum fuit n. 50. (d).

103. — Quæritur 2. An si adulteri essent opulenti, et mitterent prolem ad hospitale, teneantur ad refectionem expensarum? Affirmant *Spor. Elbel, Salm.* etc. quia (ut dicunt) hujusmodi opera instituta sunt tantum pro pauperibus. Sed probabiliter negant *Henr. Dicast. Rodriq. et Renzi*, et probabile dicunt etiam Auctores primæ sententiæ, quia hospitalia non sunt erecta solum ob parentum pauperum levamen, sed etiam et fortè potius ad cautionem filiorum ex ille-

---

(a) n. 655. — (b) n. 657. — (c) n. 658. — (d) l. 3. n. 658.

394 *Tract. 10. De septimo Præc. Decalogi.*

gitimo consortio natorum , ob periculum , quod eis subest mortis temporalis , et æternæ , si parentes deberent suis impensis eos alere (a).

## PUNCTUM VIII.

De tempore , et modo restitutionis.

*Obligatio statim restituendi , et damnum reparandi.*

104. *Non debet absolvi pœnitens antequam restituat* 105. *Potest restitui per alium ; sed quid si iste non restituit , etc. Et si Confessarius faciat celebrare Missas , cùm dominus est certus , etc.* 106.

104. — **Q**UOD tempus , fur (cùm possit) tenetur quàm primum restituere , alioquin peccat graviter , et toties (juxtà opinionem *Bonac.* et aliorum) quoties ei offeruntur occasiones restituendi ; sed juxtà id quod dicunt *Lugo , Navar. Salm.* etc. probabiliter committit unum continuatum peccatum : observetur quod dictum fuit *Tract. III. num. 47.* Non est autem capax absolutionis qui vellet restituere in morte , cùm possit in vitâ , aut vellet restituere partem , cùm possit totum. Cæterùm potest aliquandò debitor differre restitutionem cùm adest justa causa ; ut esset ad evitandum scandalum , aut propriam infamiam , aut ob alias rationes , quæ puncto sequenti examinabuntur. Sed advertendum cum sententiâ communi *Lugonis , Less Mol. Tambur.* etc. (quicquid dicant aliî) quòd cùm debitum provenit ex delicto , non obstante causâ justâ differendi restitutionem , semper tenetur fur ad totum damnum , quod creditor patitur , reficiendum ; quia hujusmodi damni semper causa est furtum antea factum (b) ; secùs autem , si debitum proveniat ex ratione contractûs (c).

105. — Præterea , potest differri restitutio cùm dilatio esset modica (nempe 20. dierum , ut putat *Castropal.*) et creditor nullum damnum pateretur : cæterùm , cùm Pœnitens potest statim restituere , regulariter loquendo dicimus cum *Conc.* quòd Con-

---

(a) n. 656. — (b) n. 679. ad 681. — (c) n. 740.

*Cap. 5. Punct. 8. De tempore, et modo rest. 395*

Confessarius non potest absolvere debitorem, nisi prius restituat, ut dicemus pariter *Tract. ult. Punct. 1.* loquendo de iis, qui sunt in occasione proximâ. Ratio est, quia cum restitutio sit res valde difficilis ad exequendum, si poenitens absolveretur antequam satisfaciatur, communi experientiâ quæ habetur, relinquitur in eodem non restituendi periculo. Quare rectè ait S. Thomas de Villanova: *Prius restituat, et tunc ad Confessarium redeat, ut absolvatur.* Dictum est regulariter, quia (ut dicit idem P. Concina) si restitutio non potest fieri tam citò, et poenitens dignoscatur verè paratus satisfaciendo, potest absolvi primâ vice; et probabiliter (ut dicunt Lugo. et Salm.) etiam secundâ, et tertiâ vice, si eæ concurrant circumstantiæ, ut Confessarius debeat illi dilationem concedere (a). Si autem admonitio de restitutione non esset profutura, vide quod dicitur *Tomo II. Tract. XVI. n. 115.* loquendo de Poenitentiae Sacramento.

106. — Quoad autem modum restituendi, qui non posset sinè sua infamiâ per se restituere, debet saltem secretò per confessarium, aut per alium fidelem restituere. Sed hic dubium fit: cum accideret quod Confessarius sibi retineret pecuniam sibi traditam, ut restituatur, an poenitens teneatur iterum ad eam solvendam? Negant Sotus, Castropal. etc. dicentes quòd cum non teneatur debitor ad palàm restituendum, tenetur esse contentus creditor de restitutione manûs alterius. Sed nos absolute affirmamus cum Lugo, (qui vocat contrariam tenuè probabilem) Less. Navar. Silv. Spor. Salm. Croix, etc. 1. quia licet fur non teneatur ad manifestandum suum delictum, nihilominus semper tenetur ad reddendum dominum indemnem; 2. quia fur tenetur ad omnia damna quæ eveniunt domino causâ furti; et nunquam præsumitur dominus esse contentus, usquedum non recuperet quod sibi ablatum est (b). Si verò dominus esset certus, et Confessarius imprudenter Missas celebrare fecisset; ait Tamb. quòd si prima opinio opposita superius allata Soti, etc. est probabilis in primo casu.

---

(a) n. 679. et 682. — (b) l. 1. n. 39.

probabilis est etiam in hoc quòd debitor ad nihil tenetur. Sed nec huic acquiescere valeo, quia semper creditor petit suum, et de illo arbitrio suo, non aliorum, vult disponere (a). Jam dictum est num. 65. quòd fur tenetur curare, ut suis sumptibus res perveniat in manus creditoris. Adverte tamen, quòd Commodatarius, si rem commodatam mittit domino per virum qui communiter existimatur fidelis, et res deperditur, adhuc ob culpam emissarii, ad nihil tenetur, ita statutum per *L. Argentum 20. ff. de Commodat.*

## PUNCTUM IX.

De ordine personarum quibus restitutio prius facienda est.

*Si res existit, debet domino tradi. Sed si alienata est, etc. 107. Debent præferri creditores onerosi 108. Si omnes sunt onerosi 109. An credita ex delicto, aut ex contractu, etc. 110. An credita certa 111. An hypothecaria anteriora; et an anteriora personalia 112. An debitor possit præferre quem maluerit. 113. Quid si creditor exigit, etc. 114. Si servus recipit salarium à domino cere alieno gravato 115.*

107. — **C**UM debitor potest omnibus satisfacere, nullus ordo observandus est. Sed cum non potest omnibus, sequentes regulæ observandæ sunt: 1. Si res existit, debet utique domino illa restitui, aut eo deficiente, pauperibus, ut dicit *Busemb.* Idem currit pro restitutione rei emptæ, cum pretium non est solutum, quia tunc dominium penes venditorem restat, ut habetur ex §. *Venditæ, Instit. de Rer. div.* Secus autem si venditor pro pretio pignus, aut cautionem accepisset; tunc enim dominium jam in emptorem translatum est, et venditor jam pro suo pretio in tuto est; et idem dicimus cum *Lug. Mol. Laym. Castrop. Vasq. Azor.* etc. (contra *Bonac. et Salmant.*) si fidem pretii percepit, quia etiam tunc rei dominium est emptoris, ut in *Capite sequenti de Contract. num. 166.* Quare

---

(a) *Ibid. 2. Quodæ.*

tunc nihil aliud venditori competit quàm actio personalis in emptorem (a). Si tamen esset pecunia furtiva confusa cum propriâ, rectè dicunt *Castropal. Ronc.* et *Croix*, illam restitui debere suo domino, dùm in tali casu totus cumulus eidem remanet obligatus (b).

108. — 2. Debita onerosa satisfacienda sunt antè gratuita, quia horum promissio semper includit tacitam conditionem, *deducto ære alieno* (satisfactis debitis) ut dicunt communiter *Lugo*, *Silv. Molin. Navar. Less.* etc. ex *L. Inter*, §. 15. ff. de *Re judic.* (c).

109. — 3. Si debita autem sunt omnia onerosa, 1. Debet satisfieri debitis, quibus obligata sunt bona debitoris cum expressâ hypothecâ. 2. Debitis cum hypothecâ tacitâ, et hæc inter præferendæ sunt uxorum dotes. 3. Depositis in manu debitoris depositis. 4. Debitis privilegiatorum, nempe pupillorum, locorum piorum, etc. 5. Cæteris debitis personalibus. Sed omnibus istis creditoribus licet expressam haberent hypothecam, debet semper præferri qui pecuniam dedit ad rem emendam, aut ad domum reparandam, aut ad campum colendum, et custodiendum, aut ad colligendas fruges, ut est expressum in *L. 3. ff. Qui potiores* etc. (d).

110. — Dubitatur 1. Quæ debita prius satisfacienda sunt, an quæ ex delicto, an quæ sunt ex contractu? Tres sunt sententiæ. Prima præfert, quæ sunt ex delicto; ita *Medin. Rebell.* etc. cum *S. Thomâ* (e), quia retinere res ablatas est major injuria, quàm non solvere pro debito promisso ex contractu. Secunda præfert debita ex contractu, non jam gratuito, sed oneroso; ita *Cajet. Navar.* etc., quia secus (dicunt isti) fieret restitutio pro furto ex eo, quod ad alios spectat; sed *Lugo* hanc rationem uti firmam non habet. Tertia communior *Lugo*, *Less. Castrop. Bonac. Laym.* etc. et mihi probabilior, dicit præfatis debitis *pro rata*

---

(a) *Lib. 3. n. 685.* — (b) *n. 686.* — (c) *n. 649. v. Secunda*, et *n. 689.* — (d) *l. 3. n. 689. et 690.* — (e) *Opusc. 73. c. 17.*

398 *Tract. 10. De septimo Præc. Decalogi.*

satisfaciendum esse, modò non existat in specie res domini, aut modò non sit alicui creditorum hypotheca, secùs, nullum habetur fundamentum ex lege aliquâ, quòd inter creditores ex delicto aut ex contractu prælatio facienda est (a).

111. — Dubitatur 2. An debita certa (nimirùm quorum domini certi) præferenda sint incertis? Probabiliter affirmant *Less. Bonac. Busemb. Salmant.* etc., quia debita certa lege naturæ debentur creditoribus, incerta verò tantùm ex lege positivâ debentur pauperibus. Nihilominùs est satis probabilis sententia *Mol. Bann. Tap. Rebel.* etc. à *Lugo* nuncupata probabilissima, restitutionem faciendam esse pro ratâ; dùm est valdè probabile, ut aliundè dicunt *Cajet. Covarr. Arag.* etc. quòd restitutio pauperibus debeatur etiam ex lege naturali; nam talis præsumitur esse creditorum ignotorum voluntas, quia cùm ad ipsos nequeat pervenire restitutio, saltem fiat pauperibus pro suis animabus (b).

112. — Dubitatur 3. An semper præferendi sint creditores anteriores? Loquendo de creditoribus hypothecariis cum expressâ hypothecâ, certum est semper inter istos præferendos esse anteriores. Et idem dicunt *Lugo, Vasqu. Mol.* cum aliis communius de creditore cum hypothecâ tacitâ, quòd debet iste præferri illis qui habent expressam. Inter creditores verò personales non negatur probabilis esse sententia *Castropal. Less. Holzm.* etc. quòd istis debeat pro ratâ creditorum satisfieri, dùm istis non sunt obligata bona, sed persona debitoris quæ æquè est obligata omnibus. Sed communior et probabilior est sententia de *Lugo, Sancti Antonini, Suar. Navar. Bonac. Conc. Croix, Tol.* et *Salmant.* qui citant *Sanctum Thomam*, et alios, præferendos esse personales anteriores, quia regula; *Qui prior est in tempore, potior est in jure*, licèt à lege civili pro solis hypothecariis assignata sit, tamen à jure Canonico (*reg. 45. jur. in 6.*) illa assignatur pro omnibus; et talis regula est fundata in lege naturæ, dùm licèt creditor personalis di-

---

(a) n. 688. — (b) n. 687.

rectè habeat devictam solam debitoris personam, indirectè tamen sibi habet bona illius obligata (a).

113. — Dubitatur 4. An debitor possit inter creditores personales pauperiorem præferre? Probabiliter id asserunt *Mouin Sa*, *Less. Laym. Med. etc.* cum *S. Thomâ* (b), quia pauper majus damnum suffert. Sed probabilius id negant *Lug. Castrop. Azor Vasqu Less.* etc., quia talis prælatio nullibi legum indicata reperitur. Excipit *Less.* si pauper esset in gravi necessitate; sed hoc dico debere intelligi tantum quandò alii creditores tenerentur in particulari ad succurrendum tali pauperi, ex obligatione præcisâ eleemosynæ (c).

114. — Dubitatur 5. An creditor qui integrum suum debitum exegit, possit illud sibi retinere, quin aliis personalibus creditoribus impertiatur? Negat *Lugo*, si ille non est anterior, et si extrajudicialiter exegit. Sed est communissima sententia opposita *Less Navar. Cabas. Salmant.* etc., quia leges favent vigilantibus exactoribus; et non distinguunt in judicio, an extrà, ut observatur in *Leg. Pupillus*, ff. *Quæ in fraud.* et *L. Si non*, in 6. §. 1. ff. *de Bon. auct. jud.* etc. Hinc dicit *Busemb.* cum *Silv. Navar.* et *Bonac.* quòd cum quis creditorum personalium æqualium suum creditum efflagitat, debitor tenetur ei satisfacere (d). Si nullus verò creditorum exigit, non potest debitor (qui est impotens satisfaciendo omnibus suis creditoribus) arbitrio suo uni integrè satisfacere Et in tali casu dicimus cum *Castrop. Tourn. Conc. Salmantic. Bon. Azor.* etc. (contrà *Less.* et alios) non posse creditorem integram solutionem sibi factam retinere. Nec obstat dicere quòd præfata lex, *Pupillus*, non revocat quòd solutum est, quia leges tantum intendunt remunerari creditoris diligentiam, non autem dare alicui jus retinendi quod debitor ei injustè solvit; nec in hoc juvare potest accepisse in bonâ fide (e).

---

(a) *Lib. 3. n. 690.* — (b) *Opusc. 73. c. 18.* — (c) *num. 691.*  
— (d) *n. 692.* — (e) *n. 693.*

115. — Dubitatur 6. An possit servus qui non est præcisè necessarius recipere stipendium à domino ære alieno gravato? Respondetur quòd potest retinere illud, si in bonâ fide recipit. Si autem ille advertit dominum in posterum futurum fore aliis creditoribus satisfaciendo injustè (sinè necessitate) impotentem ex tali solutione, dicimus cum *Navar. Ang. etc.* eum teneri ab illo discedere, nec posse proseguire ad exigendum; nam aliàs ille fit causa creditorum damni, ut diximus in simili casu n. 75. (a). Contrà uxores, et filii licitè recipiunt alimenta à patre quantovis ære alieno gravato, ut dicunt *Sanchez, Laym. et Croix*, (dummodò non habeant undè aliundè vivant) cum talis debitor teneatur ex justitiâ eos alere. Imò quantum ad uxorem dicunt *Mol. Navar. Vasqu. et Laym.* illam, licèt haberet undè viveret, etiam posse à viro usurario ad restituendum impotente alimenta recipere; quia vir non minùs tenetur ad mulierem alendam, quàm ad pro debitis solvendum. Addit *Laym.* quòd mercedes operariorum pro debitoris necessariis usibus debent etiam creditis hypothecariis præferri (b).

## PUNCTUM X.

### Quæ causæ excusant à restitutione?

*Causæ excusantes ex parte creditoris sunt; 1. Si restituitur ejus creditori; 2. Si præsumitur ejus consensus; 3. Si prævidetur ejus abusus* 116. *Ex parte debitoris; 1. Si deest culpa; 2. Si obtinetur compositio; 3. Si damnum suum est multò majus; 4. Si adest animæ periculum; 5. vel vitæ, vel famæ; 6. Si cedit bonis* 117. *Excusat necessitas* 118. *Quid si creditor etiam esset in necessitate?* 119. et 120.

116. — **N**ONNULLÆ causæ excusant ex parte creditoris, aliæ ex parte debitoris. Ex parte credito-

---

(a) n. 694, — (b) n. 695.



ris excusat 1. si solvis creditori creditoris tui , quia tunc acquirendo cessionem crediti illius , jam potes justè compensare. 2. Si prudenter præsumere potes dominum consentire , ut tu illam rem tibi sumas , aut acceptam tibi retineas , ut communiter admittunt *Silv. Navarr. Lug. Less. Sanch. Sa, Sayr. Holzm. Croix* , etc. (a) et expressè hoc docet *S. Antonin.* (b) qui dicit : *Invito domino dicitur, quia si credit dominum permissurum , et subest justa causa credendi , ( restituere ) non tenetur.* Et habetur ex *L. 46. §. 7. ff. de Furtis* , ubi sic dicitur : *Rectè dictum est , qui putavit domini voluntate rem attingere , non esse furem ; quid enim dolo fecit qui putat dominum consensurum fuisse ?* Ratio est , quia tota furti malitia consistit in eo quòd contrà domini voluntatem alienum accipit ; undè supposito domini consensu , non est amplius furtum. Confirmatur hoc ex *S. Thomà* (c) qui permittit Religioso donare sub spe rati habitationis Prælati , nempe si putat licentiam habiturum fuisse , si ab eo illam petiisset. 3. Debitor ad restitutionem non tenetur , si dominus rei restituendæ hâc abusurus fuisset ad peccandum , ut dicunt *Less. Lugo , Sot. Mol. Navar. Croix* , etc. contrà alios ; et expressè id docet *S. Thomas* (d) dicens : *Quandò res restituenda apparet esse graviter nociua ei cui restitutio facienda est , vel alteri , non debet ei tunc restitui ; quia restitutio ordinatur ad utilitatem ejus cui restituitur.* Imò quandò dominus eâ re in tertii damnum abusurus fuisset , tu teneris denegare illam , semper ac sine damno tuo gravi potes ei illam denegare , ut dictum est *n. 56.* ubi dictum fuit nunquàm licere , etiam ad vitandam propriam mortem , gladium restituere volenti inimicum occidere. Et tunc peccares non solum contrà caritatem , sed etiam contrà justitiam , ut docent communiter *Lugo , Sot. Less. Castrop. Conc. et Salm.* , quia proximus jus habet ne quis in suû damnum coöperetur (e).

---

(a) num. 700. v. *Quær. hic I.* — (b) 2. p. t. 1. c. 15. in princ.  
 — (c) *In 4. D. 15. q. 2. art. 5. q. 4.* — (d) 2. 2. q. 62. a. 5. ad 1.  
 — (e) *lib. 3. n. 697.*

117. — Ex parte autem ipsius debitoris, excusatur ipse à restitutione, 1. Si in damno causando culpam lethalem non commisit, ut *n.* 39 diximus. 2. Si restitutio pauperibus pro debitis incertis facienda esset, et debitor à Papa Compositionem obtinuisset, ut dictum est *n.* 68, aut si ipse pauper esset, et sibi applicasset (*a*). 3. Si restituere sinè damno suo multò majore, et duplò excedente nequiret, nam tunc rectè restitutionem differre potest, modò ex dilatione æquale damnum dominus passurus non esset, ut dictum est *n.* 65. Pro omissione verò lucri non potest debitor restitutionem differre, ut rectè dicunt *Salm.* Excipit *Beya* si ex dilatione nullum passurus esset damnum creditor (*b*). 4. Si restituere non posset debitor sinè periculo animæ suæ aut suorum, v. gr. si periculum subesset quòd mulier aut filiæ prostituantur, aut se dent in latrocinia, etc. ità *Less. Mol. Bon. Filiuc.* etc. (*c*). 5. Si restituere sinè vitæ aut famæ periculo non potest. Modò famæ suæ amissio damno creditoris præponderet, ut *n.* 99. in fine. 6. Si cedit bonis suis; nam leges debitori impotenti omnibus creditoribus suis satisfaciendo permittunt, ut sibi retineat quantum satis est ad se sustentandum juxtà statum suum, cedendo illis reliqua sua bona, et ità ut liber sit pro eo quod solvendo non est, modò ad meliorem fortunam non perveniat: *L. cum, et Fil. C. Qui bon* etc. licèt dicat *Laym.* quòd etiam ille in paupertate suâ remanens, tenetur laborare, et acquirere quantum potest, ut satisfaciat. Notandum tamen talem cessionem locum non habere in debitis ex delicto; Quamvis *Less. Navar.* et *Salon.* etiam concedant furi cedere bonis, retinendo sibi quantum ei ad victum satis est (*d*). 118. — Excusat 7. paupertas, si restituendo vitam decentem juxtà statum suum debitor ducere non posset; *Azor. Sol. S. Anton. Navar. Laym. Salm. Croix,* et alii communiter (-); modò (intelligitur)

---

(a) *n.* 696. — (b) *n.* 697. — (c) *n.* 698. ad 6. — (d) *lib.* 3. *n.* 699. — (c) *n.* 702.

debitor talem statum justè acquisiverit ; nam si injustè acquisivisset furtis aut fraudibus , ille teneretur ad restituendum ; etiamsi casurus sit à suo statu , ut communiter DD. Prætereà intelligitur , ut dicunt *Castropal. Navarr. Silverst. P. Layman, Croix, etc.* modò debitor culpabiliter ludis , crapulis , etc. in talem necessitatem se non conjecerit : sed hoc non obstante , semper ac debitor à suo statu justè acquisito casurus esset , mihi et aliis Doctis durum videtur ad integram restitutionem illum obligare. Ceterùm rectè advertunt *S. Antonin. Spor. Elbel, etc.* quòd in tali casu semper tenetur debitor expensas diminuere , ut possit restituere saltem quod potest (a).

119. — Sed majus dubium est , an paupertas à restitutione excuset , cùm dominus etiam esset pauper ? hìc oportet distinguere necessitatem extremam à gravi ; Si debitor restituendo se aut suos (nempe filios , parentes , aut uxorem) in extremam necessitatem conjecturus esset , excusatur ; quia tunc bonis quæ restitutus esset utitur , non secùs ac si jam in extremâ necessitate constitutus esset ; et hoc quamvis res aliena in suâ specie existeret ; et etiamsi rei dominus in eâdem necessitate extremâ reperiretur ; quia in tali necessitate omnia sunt communia , ideòque in tali casu melior est conditio possidentis ; sed rectè excipiunt *Less. et Castrop* si accideret casus quòd dominus rei ex illo particulari furto in extremâ necessitate positus esset : dùm dominus qui priùs possidebat tunc præferendus est (b). Sed si fur , necessitate transactâ , teneatur ad restitutionem , vide dicta *num. 19.*

Loquendo autem de gravi necessitate , si solus debitor est in gravi necessitate , aut si restituendo decidere debet à statu suo justè acquisito , benè potest ille restitutionem differre , ut dictum est *num. præcedenti.* Sed dubium restat , cùm uterque nempe debitor , et creditor sunt in eâdem gravi necessitate , an debeat fieri restitutio : et respondetur , quòd si creditor jam in gravi necessitate reperitur , debitor

---

(a) *n. 698. ad 5. et 6. n. 702.* — (b) *n. 701.*

restituere debet, licet in æqualem gravem necessitatem conjiciendus esset, quia in æquali necessitate preferendus est creditor; ita communiter *Azor. Mol. Less. Laym. Spor. Salm. Croix*, etc. sed si debitor, et creditor, in eadem necessitate gravi jam reperiuntur, adeo ut illud vitæ sustentandæ juxta eorum statum satis non sit; tunc aliqui dicunt debitorem teneri restituendo: saltem cum debitum est ex delicto, ut dicit *Ronc.* Sed *Less. Castrop. Silvio et Trull.* cum eodem *Ronc.* meritò dicunt probabile esse in tali casu restitutionem posse differri; quia tunc debitor restituendo subijcere se deberet damno multò majori, dum ex gravi necessitate in quasi extremam prolabi deberet. Sed excipitur semper, si creditor propter illud furtum in particulari in illam gravem necessitatem lapsus esset. Et excipitur si res in specie existeret (a). Advertendum hic tandem, quod qui dubitat, an damnum, quod causavit, sit leve, an grave, non tenetur compensare, nisi leve. Sed si res ablata existit, et dubitat an sit valoris gravis, an levis, tenetur sub gravi ad eam restituendam; aliter exponet dominum ad injustè subeundum damnum grave (b). Ad quid autem teneatur possessor bonæ fidei, superveniente dubio, quod res non sit sua, vide dicta num. 73. hujus *Tract.* et *Tract. I. num. 20.*

120. — Quæritur hic ultimò, an debitor donans creditori immemor sui debiti, à restitutione excusetur? Negant *Sanchez, Layman, Bonac.* etc. quia (ut ajunt) non potest unâ solutione satisfieri duabus obligationibus, unì ex titulo justitiæ, alteri ex titulo gratuito. Sed affirmant *Cardenas, Rodriguez, Mazzotta, et La-Croix*, cum *Rebello* ac aliis, quorum sententia satis est probabilis, semper ac certè præsumitur, quod debitor, si debiti fuisset memor, nequaquam donasset. Ratio est, quia semper censetur quisque, cum dat bona sua, velle potius satisfacere obligationi justitiæ, quàm voluntati donandi, sive obligationi factæ donationis, quæ cum facta fuerit per errorem, sive per debiti oblivionem, quæ dedit cau-

---

(a) *Lib. 3. n. 701. et 702.* — (b) *n. 706.*

sam donationi, manet rescindibilis ab eodem donante, qui in conscientiâ non tenetur ad eam implendam; nam in quovis homine supponitur tacita mens non velle se obligare, ubi deceptus invenitur (a). Nec obstat 1. quòd in contractibus non attenditur voluntas interpretativa, seu conditionalis, sed actualis; quoniam in nostro casu non intelligitur facta satisfactio primæ obligationi per voluntatem interpretativam, sed per voluntatem actualem ab initio habitam à debitore satisfaciendi debitum quod contraherat; quæ voluntas habitualiter perseverat, semper ac non revocatur; et hæc voluntas debet prævalere, tanquàm anterior, et magis urgens; idque probatur ab iis quæ scribunt ipsimet adversarii in similibus casibus (b). Nec obstat 2. quòd debitum certum nequit compensari cum satisfactione probabili, quia hoc procedit, cum debitum est certum et solutio est tantum probabilis; sed in casu nostro habetur, quòd debitum est certum et satisfactio sive datio debiti compensativa etiam est certa quapropter æqualitas jam ponitur. Stante igitur ex unâ parte debiti oblivione, quæ causam dedit donationi, redditque eam aut nullam, aut saltem rescindibilem ab eodem donante; et ex aliâ parte præsumpta satisfactio obligationis justitiæ per voluntatem perseverantem debitoris illam satisfaciendi; in hoc casu redditur dubia lex sive obligatio satisfaciendi duobus oneribus justitiæ et donationis; et cum hujusmodi lex sit dubia, ipsa non obligat, juxtà id quod dictum est in *Tract. 1. ex num. 32.*

Idem autem quod dicitur hîc de debito procedit de votis; quapropter si quis aliquod edidit votum, et postea implet operam promissam immemor voti, non tenetur iterum implere, semper ac pro certo præsumere potest, quòd si memor voti fuerit, pro eo operam impletam applicasset. Idque communiter docent *Suarez, Azor. Bonac. Less. Laym. Sanch. etc.* quia tunc votum impletur per illam primam voluntatem habitam in principio, cum votum fuit emissum. Idemque dicunt ipsimet AA. de obligatione implendi Pœnitentiam Sacramentalem (c).

(a) Vide lib. 3. n. 715. — (b) Lib. 3. n. 700. Qu. II. — (c) l. 3. n. 700. v. *Limitant vero.*

## CAPUT IV.

*De Contractibus.*

## PUNCTUM I.

## De Contractu in genere.

*Quot modis constituuntur contractus* 121. *Qui contrahit sinè animo contrahendi, aut se obligandi* 122. *De contractibus turpibus* 123. *De contractibus initis dolo, aut errore* 124. *Metu* 125. *Sinè solemnitatibus* 126.

121. — **C**ONTRACTUS quatuor modis constituitur, 1. solo consensu, ut Venditio, Locatio etc. 2. Solis verbis, ut stipulatio: 3. Scripturâ, ut Census: 4. Traditione, ut Donatio, Mutuum, Depositum, et Commodatum (a).

122. — Notandum 1. Si quis externè contrahit, sed sinè animo contrahendi, non remanere eum obligatum (nisi esset quia alter contrahentium, cùm contractus esset onerosus, jam partem suam adimplevisset, ut dictum est in hoc *Tract* n. 93) Et qui contraheret sinè animo se obligandi, probabiliter ne obligatus quidem remaneret (b).

123. — Notandum 2. Contractus turpes, v. g. gratulationis, fornicationis etc. antequàm effectum habeat delictum, cùm ipsi sint omninè irriti, non obligare; sed eo patrato communior et probabilior sententia, quam tenent *Sot. Cajet. Less. Sanch. Lug. Mol. Salmant. Croix* etc. (quamvis opposita *Adriani, Comitoli, et Tournely* etiam sit satis probabilis) docet teneri solvere pretium promittentem, et recipientem non teneri illud restituere, tùm ratione superiùs allatâ, quòd cùm alter contrahentium partem suam posuit, alter tenetur ponere suam; tùm etiam quia opus malum jam positum, licèt non sit dignum pretio uti malum, est tamen æstimabile ut utile uni,

---

(a) *Lib. 3. n. 708.* — (b) *n. 701. et Lib. 6. n. 833.*

et onerosum alteri id ponenti (a). Vide quod dicitur *Tract. XIII n. 67* Si quis autem donum aliquod mulieri traderet ad copulam extorquendam, non posset illa copulâ non concessâ, donum retinere; secus verò si donum datum fuisset ad voluntatem mulieris alliciendam (b).

124. — Notandum 3. Contractum dolo, aut errore circa substantiam initum esse invalidum, licet error non dedisset causam contractui, nempe cum, etiamsi pars errorem cognovisset, etiam contraxisset. Contrà cum error est circa qualitatem rei, et causam contractui non dedit, ille certè est validus. Sed si error fuisset circa solam qualitatem, et contractui causam dedisset, nonnulli DD. dicunt esse nullum; sed communis et valdè probabilior sententia vult esse validum; nam talis contractus non potest dici invalidus, nec lege naturæ, cum jam adest plenus consensus circa substantiam: nec lege positivâ, ut constat ex textu Justiniani *Instit. l. 4. tit. 13. de Except.* ubi declaratur validus talis contractus, licet detur actio parti deceptæ illum rescindendi. Sed hoc non obstante, quandò error fuisset invincibilis, et res adhuc esset integra, probabile est cum *Less. Laym. Castrop.* etc. deceptum non teneri in conscientia stare contractui, cum omnium contrahentium mens tacita ea sit, ut nolint se obligare iis contractibus in quibus decipiuntur (c).

125. — Notandum 4. Contractus metu initos (modò metus sit gravis, et injustus), similiter posse rescindi non solum à Judice, sed etiam propriâ auctoritate partis metum passæ; et hoc etiamsi res in manus tertii possessoris bonæ fidei transiverit. Et si unquam pars læsa peteret contractum rescindere, et altera renueret, potest tunc sibi compensare damnum quod passa est (d). Ceterum hujusmodi contractus ex se sunt validi, licet essent gratuiti, juxta sententiam communissimam et probabiliorē, quam tenent *Less. Azor. Lugo, Salmant.* et alii multi (e).

---

(a) n. 712. — (b) *ibid. Quær. II.* — (c) *Lib. 3. n. 715.* — (d) n. 717. — (e) *Lib. 3. n. 716. v. Quæritur I.*

Nihilominus excipiuntur 1. Matrimonium (et etiam Sponsalia ut dicitur *Tom. II. Tr. XVII. n. 3.*) 2. Professio Religiosa. 3. Votum. 4. Promissio, aut Traditio rei Ecclesiæ. 5. Electio Prælati. 6. Auctoritas Tutoris metu extorta. 7. Jurisdictio Ecclesiastica metu acquisita. 8. Absolutio à Censuris. 9. Renunciatio Beneficiorum. Loquendo autem de aliis contractibus, jam dictum est quòd metum patiens actionem habet rescindendi contractum: intelligitur quandò metus est gravis, non autem cùm est levis juxtà probabiliorem sententiam; licet oppositam *Sotì, Navar. Less. Sanch. Castrop. Salm.* etc. non judicamus improbabilem, sed semper excipiunt hi DD. Matrimonium, et Professionem Religiosam, quæ irritari non possunt ob metus levis incussionem (a).

126. — Quæritur autem inter DD. an liget in conscientia contractus sine debitis solemnitatibus celebratus? Multi affirmant, ut *Sot. S. Antonin. Sa, Mol.* etc. dicentes legem humanam auferre quidem actionem in hujusmodi contractibus, non autem naturalem obligationem, pro quâ sufficit solus consensus. Multi alii verò id negant, ut *Less. Lugo, Bonac. Salm.* etc. et dicunt legem humanam, ut fraudum periculò occurrat, benè posse etiam naturale debitum auferre. Sed cùm utraque sententia sit probabilis, puto in praxi omninò amplexandam esse tertiam sententiam *Sanch. Cabass. Bann. Bejæ*, etc. (cui adhæret etiam *Sot.*) nempè cùm ei tale sit dubium, præferendum esse possessorem, donec à Judice non sit damnatus ad restituendum.

PUNCTUM II.

---

(a) *Lib. 3. num. 716. Qu. 1. et seq.*



## PUNCTUM II.

### De promissione, et donatione.

*De promissione* 127. *Quis non potest donare; et si quis recipit dona à debitis gravato* 128. *De donationibus inter conjuges, et patres, et filios* 129. *De donatione non acceptatâ; et si per nuncium, aut per litteras facta est* 130. *Si est pro causâ piâ; et an hæres possit acceptare* 131. *Traditio; Adimplementum; Donatio prodiga; Causa finalis* 132. *Causæ ut donationes revocari possint, præsertim si sint inofficiosæ* 133. *De donatione causâ mortis* 134.

127. — QUOAD promissionem, probabile est simplicem promissionem, nisi adfuerit expressa voluntas sub gravi se obligandi, non obligare nisi ad culpam levem, dùm talis promissio non jam obligat ex justitiâ, sed ex solâ fidelitate sive honestate, ut dicit *S. Thomas* (1); et hujus sententiæ sunt etiam *Cajet. Bunn. Ledesm. Henriq. et Salm.* cum aliis (b). Certum est autem omninò non obligare, quandò res promissa redditur aut nimis nociva, aut impossibilis, aut illicita, aut inutilis, aut quoties talis rerum mutatio superveniat, ut si prævisa fuisset, promissio non fuisset facta; ità expressè *S. Thomas* (c), et alii communiter (d).

128. — Quoad donationem, multa notanda sunt. Notandum I. impeditas esse donando sequentes personas: 1. Ratione carentes: 2. Muti et surdi à nativitate: 3. Pupilli, et impuberes (nisi ad piam causam): 4. Morte damnati: 5. Communitatum administratores, nisi donationes sint remuneratoriæ, et eleëmosynæ (e). Prætereà, non possunt donare ære alieno gravati; et advertendum eos qui dona ab hujusmodi recipiunt, teneri ad restituendum, si debitores iis donis impotentes fierent creditoribus solvendo; quia hujusmodi donatarii reci-

(a) 2. 2. q. 88. a. 3. ad 1. — (b) lib. 3. n. 720. v. *In hâc*. — (c) 2. 2. Qu. 110. a. 3. ad 5. lib. 3. n. 720. — (d) lib. 3. n. 720. v. *Notandum*. — (e) n. 721.

piendo sunt causa positiva damni creditoris, quandoquidem contractus donationis non perficitur solâ donantis voluntate, sed etiam acceptantis; undè ipsi, tanquàm causa positiva damni creditoris, ad restitutionem tenentur (a).

129. — Notandum II. donationes inter conjuges non valere, nisi confirmatæ sint juramento, aut donantis morte, postquàm in vitâ doni traditio facta est. Sunt tamen validæ si factæ sunt causâ mortis, et si sunt remuneratoriæ; aut factæ à viro qui est prodigus, aut ab uxore ut vir aliquam obtineat dignitatem (b). Idem quod est inter conjuges, dicitur de donationibus patris factis filiisfamilias. Est valida tamen si talis donatio facta est causâ matrimonii, aut studiorum (et tunc non præsumitur pater velle, ut res donata in legitimam computetur); aut si filius est tantùm naturalis, aut si pater donat fructus peculii adventitii (c).

130. — Notandum III. donationem antè acceptationem obligationem aliquam non parere (nisi facta esset infanti, tunc enim pro ipsis acceptat lex). Ratio est quia nulla obligatio potest inter partes sine mutuo eorum consensu contrahi. Ità ex *L. Si quis argumentum §. Si autem. C. de Donat.* contrà *L. Absenti. ff. eod. cit. (d)* Vide etiam de *Franchis Dec. 339.* Et hoc procedit, etiamsi donatio esset juramento firmata (e); dùm juramentum actûs naturam sequitur, nempè donationis, quæ per se est revocabilis, quoties non est acceptata. Hinc est quòd si donatio facta est per nuncium, illa potest revocari, usquedùm coram ipso nuncio acceptata non sit; et si literis facta est, usquedùm acceptationis responsio non refertur ad donantem (f). Ideòque eo casu juxtà probabiliorem *Lopez, Tiraquel. Decii*, et aliorum, donatarius non potest talem donationem acceptare, si certior post donantis mortem fiat; quia tunc conjungi non potest (ut dictum est) consensus donantis cum illo donatarii, ut contractus validus fiat. Et juxtà hanc sententiam,

---

(a) *n. 722.* — (b) *n. 723.* — (c) *lib. 3. n. 724.* — (d) *num. 725.*  
— (e) *n. 727.* — (f) *lib. 3. n. 728.*

si nuncius culpâ suâ rem donatam non attulit donatario, aut donationem sibi commissam non executus est, ipse tenebitur post donantis mortem non solum ad restituendum rem hæredibus, sed etiam damnum illatum donatario. Sed hoc non obstante, non iudico improbabile contrarium, quod tenent *Less. Lugo, Sanch. Salm. et Viva*, qui dicunt donatarium etiam post donantis mortem posse acceptare donationem, ex eo quia donantis voluntas in literis aut in nuncio misso, aut in legatione huic datâ donationem faciendi, virtualiter perseverat. Et posito quod utraque sententia sit probabilis, dico quod si donatarius bonâ fide accepit donationem, et rem donatam jam accepit, licite potest eam retinere. Et tantò magis, si tunc cum donatio acceptatur, nec nuncius nec donatarius donantis mortis sunt conscii, quia tunc acceptatio est certè valida, ut dicunt *Sanch. Lugo, et Salmant. ex L. Inter causas, ff. Mandati, etc.* Contra donatarius tenetur ad restitutionem si rem malâ aut dubiâ fide recepit; cum, juxta dicta n. 8. *hujus Tractatus*, et in Opere (a), cum dubio etiam positivo, aut cum opinione probabili legitima possessio acquiri non possit (b).

131. — Quod autem suprâ dictum est, nempe quod donatio antè acceptationem non obligat, hoc currit etiamsi facta sit ad pias causas (advertendum tamen donationes pias à quolibet acceptari posse); itâ probabilius docent *Sanch. Castrop. Covar. Rebel. Salm. etc.* Sed excipitur si donatio directè est facta Deo, quia tunc est votum; et in dubio præsumitur esse votum in quo probabile est posse Episcopum dispensare, licet donatio acceptata sit ex parte piæ causæ (c). Sed si donatarius (loquendo generaliter de omni donatione) decesserit antè acceptationem, quæritur an possit hæres eam acceptare; affirmant *Molin. Suarez, Sanch. etc.* Sed probabilius id negant *Less. Castrop. Salm. et Rebell.*, quia hæres in

(a) *Lib. 3. n. 669. et 761. Qu. II. num. 729. et 730.* — (c) n. 726. — (d) n. 731.

omnia Defuncti jura realia, non autem personalia, ut est hoc, succedit (a).

132. — Notandum IV. dominium rei donatæ non acquiri, nisi post traditionem. V. Donationem principaliter factam ut donatarium obliget ad aliquod, illa erit irrita, si per donatarium stet, quin finis adimpleatur. Secus autem, si facta est ad alliciendum eum ad aliquod præstandum (b). VI. Donationem prodigam non esse validam (c). VII. Donationem factam ob causam præsentem, aut præteritam non esse validam, si deest causa primaria; secus si deest secundaria (d).

133. — Notandum VIII. quòd donatio inter vivos multis de causis revocari potest. 1. Ob enormem donatarii ingratitudinem (e) 2. Si donanti proles orta est, quâ prius carebat: intelligitur cum donatio de magnâ bonorum parte fuisset, et cum fit extraneis; quia si fuisset in alicujus ascendentis beneficium facta, aut ad causas pias, tunc potest solum revocari in quantum est necessarium, ut filii suam habeant legitimam (f). An autem, quia nascuntur alii filii, possit pater donationem revocare, probabile est eum posse, licet negent alii. Sed si pater eam non revocat, non potest à filiis revocari (g). 3. Si donatio est inofficiosa, nempè si lædit filios in legitimâ; et tunc si facta est extraneis à patre animo pravo, in totum revocatur: sed si sinè tali animo, aut est facta aliis filiis, revocatur solum in partem. Donatarius attamen nihil tenetur restituere antè Judicis sententiam. An autem possit lædi filiorum legitima applicando bona in opera pia, permittunt *Navar. Card. Rodriq. Lop. Veg.* etc. modò restent filiis alimenta. Sed id negant *Sanch. Less. Salmant. Conc.* etc., et hæc sententia videtur probabilior, quia leges civiles observari debent, ubi à juri Canonico non sunt correctæ, ut diximus *Tract. II. n. 14. 15. et 33. (h).*

---

(a) n. 731. — (b) n. 734. et 736. — (c) n. 735. et *fusiùs lib. 6. n. 851.* — (d) *Lib. 3. n. 737.* — (e) n. 738. — (f) n. 739. — (g) *Lib. 3. n. 740. ad 6. in fine.* — (h) n. 740.

134. — Notandum denique omnes donationes causâ mortis usquè ad mortem esse revocabiles. Et supponuntur factæ causâ mortis, quoties à donante factæ sunt aut pro tempore post suam mortem, aut ad suæ mortis considerationem. In dubio autem intelliguntur factæ inter vivos, adeoque irrevocabiles (a). Donationes causâ mortis cùm sunt factæ absentibus non valent, nisi destinetur nuncius, aut epistola; sed si adsunt testes valent, ut fidei commissa (b).

### PUNCTUM III.

De commodato, precario et deposito.

*De commodato, et precario* 135. *De deposito* 136. *An debeat præservari res domino* 137. *In quibus casibus depositarius teneatur restituere* 138.

135. — **H**ic pauca adnotanda habemus. *Commodatum* est cùm aliquod ad usum præstatur ad tempus determinatum. *Precarium* est cùm conceditur donec dominus illud repetat; et hoc precarium cessat morte illius, qui illud recipit, non autem morte dantis, donec per hæredes non repetatur. *Commodatum* autem non potest repeti antè tempus determinatum, nisi esset quòd aliter commodans damnum pateretur. *Expensæ ordinariæ* in commodato fieri debent à commodatario, *extraordinariæ* à commodante (c).

136. — *Depositum* autem est cùm datur aliquid custodiendum; unde depositarius non potest illo uti, siàè domini saltem præsumptâ voluntate; secùs tenetur restituere usûs valorem, si res non sit usu consumptibilis (d).

137. — Notandum hìc primò in casu incendii, naufragii, etc. depositarius non tenetur depositi conservationem suis bonis præferre, nisi esset res multò præstantior suâ; quia tunc debet præferre depositum: sed potest sibi rei suæ valorem com-

---

(a) num. 741. — (b) num. 742. — (c) L. 3. num. 744. et 745. — (d) num. 748.

pensare. Contrà commodatarius semper tenetur præferre rei sibi in usum concessæ conservationem, aliter saltem tenetur dominum de pretio facere indemnem (a). An autem commodatarius, aut depositarius teneatur ad restitutionem, si res periret culpâ suâ, non jam theologicâ, sed tantum juridicâ, probabile est non teneri ad restitutionem, ut dicunt *Lugo, Cabass. Roncag. et Salm.* (b) : vide dicta hic n. 41.

138. — Notandum 2. quòd Depositarius non tenetur ad restituendum depositum, si certò scit rem esse furtivam, aut si ipse haberet certam sibi compensandi causam; aut si prudenter timeret, ne dominus eâ abusus esset contrà justitiam (ut gladio ad inimicum interficiendum) aut etiam contrà caritatem, ut dicit *Less. cum S. Thomâ* (c), contra *Sanch. et Bonac.* (d).

#### PUNCTUM IV.

##### De mutuo, et usurâ.

*De mutuo, et quândò debet restitui* 139. *De mutuo minoribus concesso* 140. *De concesso filiis-familias* 141. *De usurâ* 142. *De mutuo dato sub spe lucris* 143. *De lucro gratis oblato* 144. *De oblato ex timore, etc.* 145. *De pacto non repetendi sortem, nisi intrâ tempus longum* 146. *De damno emergente* 147. *De lucro cessante* 148. *Conditiones, 1. ut mutuatarius admonitus sit* 149. *2. ne ultrâ spem exigatur* 150. *3. ut mutuum sit causa damni et lucris cessantis.* 151. *An damnum, aut lucrum debeat esse certum* 152. *De periculo,* 153. *et* 154. *De Montibus pietatis* 155. *De pœnâ conventionali* 156. *et* 157. *An ut exigatur benevolentia, etc.* 158. *De pactis obligatoriis, etc.* 159. *De pacto restituendi in eâdem quantitate* 160. *De præstando quod debetur ex justitiâ aut caritate* 161. *Obligatio usurariorum, et hæredum* 162. *De cooperatoribus* 163. *etc.* 164.

139. — **L**OQUENDO de mutuo, mutuum est cum datur res usu consumptibilis obligatione restituendi

---

(a) n. 752. — (b) n. 749. — (c) 2. 2. q. 62. a. 5. ad 1. — (d) *L.* 3. num. 753.

eam tempore præfixo in eâdem specie, et bonitate. Sed si tempus non est præfixum, restituenda est cum exposcitur (elapso tamen aliquo conveniente spatio) imò restitui debet etiam non requisita, si à mutuantem aut ob oblivionem, aut observantiam, aut loci distantiam, non exposcitur (a).

140. — Notandum hic 1. quòd mutuum datum universitati, Minori, et Ecclesiæ, aut ad aliam piam causam non potest repeti, nisi probetur illud in eorum utilitatem esse impensum; excipitur, si daretur alicui Ecclesiæ cum Prælati et Capituli consensu (b).

141. — Notandum 2. Filiosfamilias, qui non habent bona castrensia, aut quasi, non teneri ad restituendam pecuniam mutuo acceptam. *L. 1. C. de S. C. Maced.* Et hoc non solum valet pro foro externo, sed etiam interno conscientiæ; excepto si cum juramento de satisfactione se obligasset, (quod juramentum potest ceteroquin à superiore Ecclesiastico relaxari); Sed in casu quo sciente, et non contradicente patre accepissent; aut si mutuum in patris utilitatem expensum esset, nempe in ea quæ illi præstare filio debuisset, tunc pater tenetur ad satisfactionem (c). Hoc tamen quod dictum est de pecuniâ, non procedit pro re mutuo acceptâ à filiofamilias. Nec aliud de mutuo dicendum restat.

142. — Loquendo de usurâ, usura est lucrum proveniens ex mutuo ob usum rei mutuo datæ. Illa tùm lege positivâ, tùm naturali est illicita: nam in aliis rebus usus est distinctus à dominio, sed in rebus consumptibilibus, usus non distinguitur à dominio, dùm usus rei destructionem importat, ideòque cum in mutuo dominium necessario in mutuatarium transfertur, si mutuans aliquid lucri exigeret, ex re non amplius suâ, et ex sterili, ut est pecunia, frumentum, etc., exigeret (d).

143. — Itaque ex merâ mutui ratione nullum lucrum exigi potest. Imò ne licet quidem mutuum dare cum spe alicujus lucri; et licet *Sanctus Thomas* (e) videtur admittere expectationem alicujus lucri,

(a) *L. 3. n. 754. et 755.* — (b) *num. 756.* — (c) *Lib. 3 num. 757.* — (d) *n. 759.* — (e) *2. 2. q. 78. a. 2. ad 3.*

cùm lucrum expectatur aut exigitur non ex pacti debito, sed ex benevolentia, hoc tamen dicimus intelligi debere cùm mutuum principaliter datur ad benevolentiam expiscandam, et minùs principaliter aliquod lucrum speratur. Sed principaliter mutuum dare ob lucri spem (licèt sperati ob meram benevolentiam), ut esset si aliàs sinè tali spe mutuum non daretur, dicimus omninò non licere, cùm Evangelium dicat: *Mutuum date, nihil sperantes. Lucæ 6.* Et hoc est expressum in *C. Consuluit, de Usur.* ubi dicitur usurarius, qui mutuo dat animo lucrandi, licèt, sinè pacto, *aliàs non traditurus* (verba sunt textûs): et ibi adducuntur pariter verba quæ mok retulimus ex Evangelio (a). Et notetur hîc Prop. 42. damnata ab Innoc. XI. quæ dicebat: *Usura non est, dùm ultra sortem exigitur aliquid tamquàm ex benevolentia debitum.* Propositio meritò reprobata, quia benevolentia nunquàm obligare potest ad lucrum præstandum, cùm multis aliis modis exhiberi possit (b).

144. — Sed si mutuatarius daret aliquid merè gratis, benè potest à mutuante retineri. Sed quid dicendum in casu, quo dubitatur an mutuatarius gratis dederit, an ut mutui pretium? Respondetur, quandò mutuans bonâ fide recepit, et postea superveniente dubio non potest certus fieri; tunc potest licitè illud sibi retinere. Secùs autem si jam recipit in dubio (quicquid dicant alii), quia cum dubio nemo legitime potest possessionem inchoare (c). Ceterùm si mutuatarius non esset pauper, nec illiberalis, nec dedisset motus ab aliquâ mutuantis efflagitatione, sive minis, tunc præsumi potest illum gratis dedisse; præsertim si dedit post sortis mutuo datæ redditionem (d).

145. — Dicunt multi DD. ut *Laym. Sot. Lugo, Castrop. Salmant.* et alii, quòd si mutuatarius ultra sortem dederit aliquid, ne videretur ingrati animi, aut ne deinceps sibi denegaretur mutuum, benè potest mutuans illud retinere; quia mutuatarius ad præstandum illud donum non inducitur ab aliquâ

---

(a) num. 762. — (b) n. 764. — (c) n. 769. et 761. — (d) l. 3. num. 761.



extrinsecâ mutuantis actione, sed tantum ex motivis suis intrinsecis, quæ omnia spontaneam efficiunt illam donationem (a).

146. — Hic notanda Propos. 42. ex damnatis ab Alexand. VII. quæ dicebat: *Licitum est mutuanti aliquid ultrâ sortem exigere, si se obliget ad non repetendam sortem usquè ad certum tempus*. In mutuo est intrinseca obligatio, ut mutuans expectet restitutionem sortis pro aliquo tempore. Sed si mutuans se obligaret expectare ad tempus longum et extraordinarium, (v. g. ad tres, vel quatuor annos) dicunt *Sporer, Medina, Serra, Ledes. Trull. et Henriqu.* posse tunc illum exigere aliquid, quia talis obligatio est extrinseca mutuo, adeoque digna pretio; saltem quia (dicunt *Salm. cum Prado, Bannez, Arragona*, etc.) mutuans se obligando tantum temporis expectare, est moraliter impossibile, ut aliquod damnum, aut incommodum notabile non patiatur. Et si potest quis licite aliquid exigere, si se obligat ad dandum mutuum intrâ longum tempus, ut dicit *Molina* cum communi, cur non potest qui se obligat ad non repetendum suum, nisi post tempus extraordinarium? (b).

147. — Quatuor sunt tituli ordinarii propter quos mutuans potest aliquid ultrâ sortem exigere. I. Titulus est *Damnum emergens*, quod mutuans mutui causâ patitur, tunc enim, ut dicit *S. Thomas* (c), non est quod ille vendit usum pecuniæ, sed indemnem se reddit in damno passo (d).

148. — II. Titulus est *Lucrum cessans*, nempè illud quod mutuanti non obvenit ob mutuum. De justitiâ hujus tituli sunt qui dubitant, sed immeritò, dum communiter illud probatur apud DD. et etiam *S. Thomam* (e), qui dicit duobus modis posse aliquem damnificari, aut si impeditur à consecutione alicujus boni, quod jamjam consecuturus erat, aut si privatur illo quod jam habet. Et licet Angelicus alibi (f) dicat non posse mutuantem convenire de lucro sperato, quia non potest vendere quod adhuc non

---

(a) n. 763. — (b) n. 760. — (c) 2. 2. q. 78. art. 2. ad 1. — (d) L. 3. n. 768. — (e) 2. 2. qu. 62. art. 4. — (f) 2. 2. qu. 78. art. 2. ad 1.

habet ; attamen sapienter advertit doctus *Silvius* (a) hoc debere intelligi, quòd mutuans non potest exigere totum lucrum, quod speratur, sed tantum valorem spei. Sed de hoc titulo hodiè non est amplius dubitandum, cum Benedictus XIV. in Bullâ *Vix pervenit* declaraverit, unum ex justis titulis exigendi aliquid à mutuo, esse lucrum cessans, nempe (ut in Bullâ se explicat) si pecunia aliter impensa fuisset, *sive ad proventus annuos conquirendos, sive etiam ad licitam negotiationem exercendam, honestaque lucra percipienda* (b).

149. — Nihilominus, ut hoc lucrum exigatur ratione damni emergentis aut lucri cessantis, tres requiruntur conditiones. *Prima* ut pactum lucri præcedat contractum (excepto si mutuans cogeretur invitus mutuari, aut si mutuatarius elapso tempore, non restitueret mutuum) ; et præterea ut mutuatarius etiam antè contractum sit admonitus de præfato titulo. Nec sufficit præsumere, quòd ille consensurus fuisset lucro promisso, si de justo titulo certior factus esset ; quia ad contractum non sufficit voluntas interpretativa, sed requiritur actualis. Attamen si contrahentes consentirent contractui omni meliori modo, quo iniri potest, tunc probabiliter dicunt *Lassius*, *Tourn.* *Salm.* et *Croix*, quòd potest exigi lucrum promissum. Cæterum Bened. XIV. in præfatâ Bullâ hæc præscribit : » Qui ab omni usuræ labe se immunes præstare volunt, admonendi sunt, ut contractum instituendum antè declarent, et conditiones inserendas explicent, et quem fructum ex pecuniâ postulent » (c).

150. — *Secunda* conditio est, ut ratione lucri cessantis non exigatur ultra valorem spei lucri sperati, deductis expensis, et pretio laboris, quem impensurus fuisset, ut tale lucrum exigeretur : non jam ex toto, sed ex parte, nempe quantum mutuans aliis soluturus fuisset, ut liberaretur ab ipso labore (d).

151. — *Tertia* conditio est, ut mutuum sit vera causa damni, aut cessationis lucri ; nam si mutuans

---

(a) 2. 2. q. 77. a. 1. — (b) l. 3. n. 769. — (c) n. 769. et 773. — (d) num. 769. v. II. *Conditio*.

illud lucrum aliâ pecuniâ sibi fecisset, aut aliâ industriâ, cui vacare non potuisset. illam pecuniam in negotiationem applicando, tunc nihil potest exigere. Sed si mutuans daret mutuo pecuniam negotiationi destinatam, nec illi esset animus aliam pecuniam pro familiæ opportunitatibus, aut pro alio fine reservatam, in illius locum sufficere, tunc probabiliter potest exigere lucrum cessans pecuniæ mutuo datæ, ut dicunt *Less. Lug. Laym. Castropal. Valent. Salm.* etc., quia tunc reverà mutuatio est causa cur cesset lucrum speratum à pecuniâ; nec mutuans tenetur in mutuatarii gratiam negotiationi exponere pecuniam illi non destinatam, sed aliis suis finibus. Ego tamen hoc non admitterem in casu quo mutuanti, cum mutuum dat, esset animus substituendi negotiationi illam pecuniam reservatam (•).

152. — Addit *P. Concina* his tribus conditionibus quartam, nimirum, ut damnum aut lucrum sit certum: nempe quod paratæ sint lucrandi occasiones. Sed melius dicunt communiter cum *Silvio, Navar. Mald. Tap. Salas, Decoquer, Salm.* etc. quod benè potest in pactum deduci lucrum solvendum ob illos titulos incertos, modò sint probabiles, et modò non exigatur ultrà valorem periculi damni, aut spei lucri, dum subiacere illi periculo damni incerti, et privare se spe lucri incerti, utiquè sunt digna pretio (b).

153. — III. Titulus est periculum amittendi sortem. Hic titulus est valdè nonnullis decertatus; sed communiter, et meritò admittitur etiam ab Auctoribus probabilioristis, prout sunt *Fagnanus, Petroc. Cabassut. Tourn. Wigandt*, ultrà *Silvest. Silv. Less. Mol.\* Lug. Salmant.* et alios, dummodò periculum sit extraordinarium, non autem commune. Ratio est, quia suscipere tale periculum est certè dignum pretio, ut docet *S. Thomas (c)*, qui dicit: *Res extra periculum plùs æstimatur, quàm existens in periculo.* Et hoc confirmatur ab eo quod expressum fuit à Conc. Lateran. sub Leone X. sess. 10. ubi damnum fuit recipere aliquid ex mutuo; dummodò (nota)

---

(a) num. 771. — (b) num. 770. — (c) *Opusc.* 75. c. 6.

non esset periculum sortis, aut expensæ, ut illa recuperetur, dicendo Concilium lucrum quod exigitur tunc esse usuram, *quandò nullo sumptu, nullo periculo conquiri studetur*. Confirmatur etiam ex Declaratione S. C. de *Propagandâ Fide* approbatâ ab Innoc. X. et relatâ à pluribus gravibus AA.; nimirum à Cabass. Tournely, La-Croix, Bancel, et primò ab Hurtado, qui authenticum exemplar manu Notarii Apostolici firmatum adducit; in illâ dictum fuit posse ex mutuo peti lucrum ultrâ sortem, *ratione periculi probabiliter imminantis (a)*.

154. — Opponunt Adversarii textum in c. *Naviganti*, de *Usur.* ubi legitur quòd pactum exigendi aliquid præter sortem habendum est usurarium, quandò mutuans suscipit suprâ se sortis periculum; verba textûs hæc sunt: *Eo quòd (mutuans) suscipit in se periculum, usurarius censendus est*. Sed respond. 1. à multis quòd in textu citato præsumitur ex errore sublata fuisse particula *non*, quæ præcedebat verbum *censendus*; itâ valde probabiliter Tourn. Cabass. Laym. Castrop. etc. ratione acceptâ ex contextu verborum immediatè subsequentium: *Ille quoque . . . non debet ex hoc usurarius reputari* etc. loquendo de alio casu: cæteroquin hoc non cohæreret cum verbis præcedentibus *usurarius censendus est*. Sed (de hoc quicquid sit) respondetur 2. cum Fagnano, quòd hoc valet pro foro externo, quod præsumit in tali contractu animum usurarium, non autem pro interno. Respond. 3. hoc currere quandò mutuans vi ipsius mutui vellet obligare mutuatarium ad transigendum huiusmodi periculum, nam si mutuatarius offerret cautionem, mutuans teneretur eam acceptare; non autem cum non intendit eum obligare (b).

155. — Hic scire juvat ab eodem Conc. Lateran. adducto approbatos fuisse *Montes* nuncupatos *pietatis*, in quibus exigitur certum lucrum ultrâ sortem propter expensas Officialium Montis, et ob pignorum conservationem, quæ veneunt elapso tempore præfixo mutui restitutioni, et quod residuum

---

(a) num. 765. — (b) l. 3. num. 769. v. *Obijciunt II.*

est, redditur dominis, si inveniuntur; aliàs applicantur pauperibus, aut in ipsius Montis augmentum. Dicunt nonnulli mutua hujus Montis non debere dari, nisi pauperibus, ne postea deesset undè auxilietur pauperibus, in quorum gratiam præsertim hujusmodi Montes instituti sunt (a).

156. — IV. Titulus est *Pœna conventionalis*, nempe pactum, quòd si mutuatarius non satisfacit solutioni intra tempus prædefinitum, solvenda ei erit aliqua summa ultra sortem. Hic titulus etiam communiter censetur justus à Soto, Less. Tournely, Cabass. Henrico de S. Ignatio, Wigandt, Salmanticens. etc.; talis enim pœna non imponitur, nec imponenda est fine lucrandi, sed fine reddendi vigilem mutuatarium redditioni in præfinito tempore. Ut tamen talis pœna exigatur, tres requiruntur conditiones; 1. ut dilatio mutuatarii in reddendo sortem tempore præfinito sit notabilis, et culpabilis. 2. Ut pœna sit moderata, et culpæ proportionata. 3. Ut mutuatarius se obliget ad reddendam sortem tempore, quo verè possit ille eam restituere, aliàs pactum æstimatur usurarium (b).

157. — Dubitatur autem an præfata pœna debeatur antè sententiam Judicis? Alii negant; sed probabilius affirmant Less. Tournel. Silvest. Salmanticens. etc.; quia talis pœna induit pacti rationem, non pœnæ (c). Et hìc advertendum quòd pactum nuncupatum *Legis Commissoriæ*, nempe quod si non reddatur termino præfixo mutuum, pignus in totum abdicatur mutuanti, hoc pactum solum coonestari potest, si appositum fuisset tamquam pœna conventionalis cum conditionibus suprà expressis; cæterum per se loquendo, esset usurarium; et mutuans pacto non obstante, deberet restituere totum superfluum pignoris ultra sortem, et præterea fructus à pignore perceptos, si illud est fructiferum; ideoque pactum, ut à mutuante exigantur fructus fundi pignori dati, nuncupatum *Antichriseos* (vulgò *a godere*), per se est illicitum. Ex-

---

(a) num. 765. v. Circa. — (b) num. 766. — (c) num. 767.

cipitur si tale pignus fuisset datum pro dote promissâ (sed non adhuc constitutâ), ad sufferenda matrimonii onera (a).

158. — Ad dignoscenda quænam pacta licita sint in mutuo, oportet attendere regulam traditam à *S. Thomâ* (b), nempe omne onus quod imponitur dignum pretio, esse usuram; non autem, si exigitur aliquod quod pecuniâ non acquiritur, ut est benevolentia (c); modò non exigatur aliquod beneficium in particulari, tanquàm debitum illi benevolentiae, aut gratitudini, cùm damnata sit Proposit. 42. ab Innocent. XI. quæ dicebat non esse usuram exigere aliquid, *tanquàm ex benevolentia, et gratitudine debitum*, ut esset v. g. si mutuans obligasset mutuatarium ad ei conferendum aliquod officium; ratio est, quia gratitudo potest multis aliis modis exhiberi, ut laudando, honore afficiendo benefactorem etc. Quare debitum reddendi aliquod in particulari est onus pretio æstimabile, adeoque usura.

159. — Ità etiam est illicitum obligare mutuatarium ad emenda in posterum à mutuante necessaria, aut locandam illi domum, ad vendendum frumentum, ad mutuandam pecuniam, aut id simile. Dictum est in *posterum*, quia exquirere à mutuatorio hæc eodem tempore quo ille petit mutuum, hoc non est illicitum, ut docet *S. Thomas* cum aliis communiter (d).

160. — Est illicitum etiam pactum, ut pro pecuniâ aut aliâ re mutuo datâ, reddatur alia rei species, quia hoc onus etiam esset pretio æstimabile. Hic autem dubitatur, an sit licitum pactum, ut reddatur res mutuo data cetero tempore in eadem specie, et quantitate? v. gr. si datur mutuo frumentum mense Augusti cum pacto, ut restituatur in eadem quantitate mense Maji? Respondetur, quandò dubium est æquale, quòd mense Majo frumentum (et idem de cæteris rebus) possit crescere,

---

(a) *num. 775. et 776.* — (b) 2. 2. q. 77. a. 2. — (c) *n. 744.*  
 (d) *num. 780. et 781.*

et decrescere, aut si mutuans statuit suum frumentum usque ad Majum conservare, tunc certè licitum est pactum; deductis tamen expensis, aut periculo conservationis. Sed si res non potest pretio decrescere mense Majo, et contrà mutuans non erat certò conservaturus (quicquid dicant *Less. Salm. Azor. Bonac.* etc.) tale pactum est usurarium; nam obligando mutuatarium ad reddendum frumentum Majo, cum pluris valet, dignoscitur animus lucrandi: undè tunc in restituendâ sorte deducendus est à sorte valor augmenti. In mutuo autem pecuniæ semper licitum est pactum, ut reddatur in eâdem specie, saltem si diminutio non est moraliter certa (a).

161. — Est commune inter DD. non esse illicitum mutuanti exigere aliquid ex justitiâ debitum, v. gr. ut mutuatarius cesset à vindictâ, aut ab injustâ vexatione, aut ut solvat debitum prius contractum (b). Diximus *ex justitiâ debitum*, quia non currit regula, si res erat debita ex caritate. Quarè dicimus cum *Azor. Bonac. Spor. Salmanticens.* etc (quicquid dicant *P. Concina*, et alii) quòd si detur mutuum Medico, aut Advocato, qui tenebatur mederi, aut causam defendere ex solâ caritate, non licet pacisci, ut ipse teneatur hoc præstare; quia, posito pacto, additur onus justitiæ, quod est dignum pretio (c). Ità etiam dicimus cum *Lugo, Laym. Bonac.* etc. adversus alios, non licere mutuanti obligare mutuatarium ad remittendam offensam, quam deberet ex caritate ei remittere, sed ex justitiâ poterat satisfactionem petere (d).

162. — Deniquè loquendo de usurariorum obligatione, et aliorum, qui positivè et graviter coöperantur contrà mutuatarii voluntatem, ipsi tenentur restituere omnes usuras exactas, non autem accessiones factas ex usuris, quia hic est fructus industriæ, qui spectat ad illum qui eam adhibet

---

(a) *l. 3. n. 781.* — (b) *n. 674. v. 7. et n. 776.* — (c) *num. 777.* — (d) *num. 778.*

(a). Probabile est autem hæredes usurariorum non teneri in solidum ad restitutionem usurarum, sed quemlibet pro suâ ratâ, ut deducitur ex *c. Tua nos. 9. de Usur.* et ex *l. 1. Cod. de Delict. Defunct. l. 4. tit. 17. (b).*

163. — Servi usurariorum qui coöperantur in aliquo quod mutuatorio non displicet, ut in deferendo pignore, aut pecuniam, aut in tabulas referre, aut amicis verbis usurarum solutionem efflagitare, hi excusantur à restitutione; secus qui firmanth chyrographum, aut minis, aut aliis mediis cogunt ad solutionem (c).

164. — Loquendo deniquè de iis qui consilium præstant, aut pecuniam exhibent usurario, hi excusantur à restitutione, sicut dicunt *Lug. Tol. Silvest.* et alii communiter, cum id agunt in mutuantis gratiam (d). Demùm notandum, quòd usurarii publici sunt infames, et eorum testamentum est nullum; nec possunt admitti ad Communionem, nec sepeliri in loco sacro; et qui scienter eorum corpora sepulturæ reddit, ipso facto est excommunicatus (e).

---

(a) *num. 784.* — (b) *num. 790.* — (c) *n. 789.* — (d) *n. 785.* — (e) *num. 792.*





## PUNCTUM V.

### De emptione, et venditione.

*Determinatio pretii, et rei* 165. *De emptione* 166. *Quando transfertur dominium* 167. *De emptione conditionatâ* 168. *An periculum, et fructus rei spectent semper emptori* 169. *De pacto exigendi fructus usquë ad solutionem* 170. *Si emitur pecuniâ alienâ, aut venditur res aliena* 171. *De pretio justo* 172. *Quomodò pretium crescit aut diminuitur* 173. *De mercibus ultroneis; et quandò potest carius vendi* 174. *De venditione sub hastâ* 175. *ad 177. An si ob dilationem, vel anticipationem pretii etc.* 178. *De chyrographis* 179. *De pacto retrovendendi* 180. *De pacto reëmendendi* 181. *De contractu Mohatræ, et Antichriseos* 182. *De Monopolio* 183. *et 184. De vitio rei* 185. *ad 187. Qui novit brevi pretium fore, ut crescat, aut decrescat, etc.* 188. *De venditricibus, et proxenetis* 189. *Si res est vendita duobus* 190. *Si res perit, etc.* 191.

165. — **N**OTANDUM I. quòd ut contractus venditionis sit validus, requiritur determinatio tam pretii (saltem remissa alicui tertio), quàm rei; saltem in mensurâ, v. gr. si venditur vinum talis dolii tanti in singulos cados; aut saltem in spe, ut cum venditur jactus retis (a).

166. — Hic quæritur an, datâ arrhâ, possit ille qui eam dedit à contractu resilire? Affirmatur; nam hæc est consuetudo. Sed secùs esset, si arrha daretur tantùm ad majorem cautelam. Cæterùm in dubio rectè dicit *P. Concina* (contrâ *Croix*) posse resilire dantem, omissâ arrhâ, quia plerumque omnis contractus intenditur fieri juxtâ consuetudinem quæ est in usu (b).

167. — Notandum II. contractum venditionis perfici solo consensu; dominium verò rei non trans-

---

(a) n. 794. — (b) n. 794. v. *Quæritur*.

ferri nisi traditione ; imò ne traditione quidem illud transfertur , nisi emptor solvat , aut saltem offerat pretium , aut præstet pignus , aut fidejussionem ( vulgò dictam *Pieggiaria* ), aut saltem exhibeatur fides sive promissio ; ut habetur ex §. *Venditæ* , *Instit. de Rerum divis.* (a) , vide dicta num. 107.

168. — Notandum III. quòd cùm emptio est conditionata , adimpletâ conditione , contractus fit validus à tempore emptionis , ita ut fructus spectent ad emptorem , excepto si conditio remissa fuisset arbitrio emptoris (b).

169. — Notandum IV. quòd licèt periculum , et commodum plerumque spectet ad dominum rei , nihilominùs in emptione rei determinatæ , licèt res non sit adhuc emptori tradita , aut si est tradita , sed sinè fide pretii ( in quibus , ut suprâ dictum est , dominium restat penes venditorem ) , periculum tamen et commodum sunt emptoris , ut expressum est in sequentibus textibus , §. *Cum autem* , 3. *Institut. de Emptione , et Vendit. L. id quod. 7. de Peric. et Commod. ac L. post. perfectum* , 1. *C. eod. tit.* Excipitur tamen , si expressè conventum sit contrarium , aut si res non sit tradita , et venditor fuerit in morâ , ne traderetur , aut si res suâ culpâ periit , aut deterior facta sit (c). Sed præter hos casus exceptos , sicut periculum rei spectat ad emptorem , ità ei debentur fructus illius (d). Et leges Civiles oppositæ in hoc puncto reprobatæ sunt à jure Canonico , prout favorabiles lucro usurario , prout dicunt *Salmantic.* (e).

170. — Dubitatur autem an venditor possit à principio convenire , ut fructus ipse percipiat , donec pretium solvatur , cùm jam dominium translatum est , rei traditione , et fide pretii ? Nonnulli negant , sed communis et probabilior sententia affirmat cum *Sanct. Molin. Bonac. Petrocor.* etc. , quia tunc licitè potest venditor sibi reservare dominium utile rei , usquedùm pretium sit solutum (f).

---

(a) num. 795. et 799. — (b) num. 797. — (c) lib. 3. n. 748. — (d) *Ibid.* v. *Ità.* — (e) *Tract. XIV. c. 2. num. 17.* — (f) l. 3. n. 798. v. *Diximus.*

171. — Notandum V. si quis emit aliquid pecuniâ alienâ, sed nomine suo, ex *L. Si eo, de Rei vind.* res emptoris est? Excipiunt DD. si pecunia esset alicujus Ecclesiæ, aut Minoris, aut Militis (a). Contrâ si quis vendit rem alienam, licet respectu rei invalida sit venditio, nihilominus acquirit dominium pecuniæ. Si ipse verò vendidisset malâ fide, teneretur ad omnia damna emptori; si in bonâ fide non tenetur nec ad damna, nec ad evictionem, sed tenetur restituere pretium emptori (cùm res jam evictione ad dominum pervenisset), licet pactum intercesserit, nec ad evictionem aliquam teneretur, ut habetur ex *L. Emptorem, §. Qui autem, ff. de Actionibus empt.* Excipiunt tamen, 1. Si pactum expressum intercesserit de non restituendo pretio. 2. Si venditor in nihilo sit factus ditior, quia fortè ille dono dedit pretium acceptum. 3. Si emptor conscius erat rem fuisse alienam, aut alteri obligatam ex *L. Si fundum C. de evict.* Sed hoc procedit pro foro externo, cæterum in conscientia, si pretium in pœnam non est Fisco adjudicatum, venditor semper debet illum restituere emptori (b).

172. — Notandum VI. quòd cùm pretium taxatum est à Republ. illi debent stare omnes, etiam Ecclesiastici; nisi accideret quòd mutarentur circumstantiæ, et quòd major Civium pars, Superioribus scientibus, Taxam non observaret (c). Taxâ exceptâ, quælibet res habet suum pretium infimum, medium, et supremum, et horum quodlibet est justum. In hoc advertendum 1. Quòd pretium judicatur juxta tempus traditionis rei, et locum ubi venditur. Advertendum 2. Pretium rerum pretiosarum, et extraordinariarum habere majorem latitudinem, quam res viles, et ordinariæ: sit exemplum hujus differentiæ: Vinum valet 5, potest emi 4. et 6. Si valet 10, potest emi 8. et 12. Si centum, 95. et 105. Hoc pro rebus ordinariis: sed loquendo de rebus extraordinariis, et magni pretii, Villa quæ v. g. vendita est 20. millibus, potest emi 12 millibus (d). Advertendum 3. Quòd

---

(a) num. 799. — (b) Vide *Castr. tr. 32. D. 5. p. 28. §. 1. num. 1. et Salm. tr. 14. c. 2. num. 51. cum aliis.* — (c) lib. 3. num. 803. — (d) lib. 3. num. 804.

si in pretio adest læsio *ultrà dimidium*, pars læsa potest rescindere contractum in iudicio; sed si infrà *dimidium*, altera pars etiam tenetur in conscientia ad damnum reficiendum usquè ad pretium justum. Attamen si utraque pars justum pretium ignorarent, tunc justum est illud de quo conventum est (a). Advertendum denique, quòd communiter non præstatur fides vendentium mendaciis; quare plerumque hi ad restitutionem non tenentur, si pretium non excedit supremum, aut nisi adverterent, quòd emptores sibi fidem præstaverint (b).

173. — Notandum VII. pretium augeri aut obementium concursu, aut ob mercium penuriam. Et ita contrà minuitur, vel ob defectum ementium, vel ob mercium copiam. Hæc regula debet præcipuo modo attendi in multis quæstionibus resolvendis, quæ postea movebuntur (c). Notandum etiam hîc quòd communis existimatio Regionis, ubi res existit, reddit justum quodcumque pretium (d).

174. — Notandum VIII. quoad emptorem, posse eum minoris infimo emere rem quæ sibi parum comoda est, vel si in vendentis gratiam emit. Quare dicunt aliqui merces ultroneas decrescere pretio usquè ad *dimidium*; sed probabilius juxtà communior sententiam usquè ad tertiam partem. Ratio cur merx ultronea decrescit, est quia in hujusmodi venditionibus est magis infrequens ementium numerus (e). Et propter eandem rationem qui emit multa simul, potest pariter emere minoris infimo (f). Contrà venditor non potest vendere pluris supremo ex eo, quia res esset utilis, aut in nimio desiderio emptori (g). Enimverò potest quid amplius exigere, si alii interveniant tituli, nimirum 1. Si fiat cum ejus damno, aut lucro cessante (modò de hoc moneatur emptor); et hoc licet adsit taxa pretii, et licet venditor ipse offerat vendere. 2. Si venditor peculiari animo erga rem, quam vendit, affectus sit (h). 3. Si

---

(a) n. 805. v. *Quòd si*. — (b) *Ibid. v. Hic etiam*. — (c) n. 801. v. *Not. 2.* — (d) num. 808. *Not. 1.* — (e) num. 802. — (f) *Ib. in fin. v. 2.* — (g) num. 806. — (h) *Ibid. q. 1.*

sint res raræ, ut gemmæ, picturæ, feræ, et id genus. An autem hæc possint vendi quanti plurimi? probabile est, posse; sed probabilius negatur, nisi sit usus mulieris honestæ (a). 4. Si res vendatur minutim ratione majoris incommodi quod adhiberi debet, et ratione detrimenti (quod vulgò dicitur *Sfraudo*) quod perferri solet (b).

175. — Notandum IX. quòd bona quæ veneunt sub hastâ, aut quæ per venditrices circumferuntur vendendæ, possunt vendi, et emi quocumque pretio quod pacisci possunt ipsi. *L. 2. C. de rescind. vend.* Dummodò absit fraus, sive ex parte vendentis, v. g. si celaret rei vitium, aut fictos emptores introduceret; aut ex parte emptoris, si dolo, minis, aut precibus importunis impediret alios offerentes (c).

176. — Hic dubitatur 1. An possit precibus simplicibus effici, ne alii offerant? Alii negant, sed communissimè alii id permittunt, *Tournely, Lugo, Salmant. Castrop. P. Nav. Vega, Tapia, Conrad.* etc. (d).

177. — Dubitatur 2. An emptor possit cum aliis conventionem facere, ne plùs offerant? Hic casus apud DD. parùm à DD. invenitur discussus. *Diana* (e) cum *P. Navar.* et aliis videtur id permittere, quoties obtulit justum pretium saltem infimum quanti res valet. Sed ego cum *de Lugo* (f), et aliis doctis, quos consului, puto oppositum, casu quo res exponitur sub hastâ ex Judicis sententiâ; ratio est, quia cum vendens tunc teneatur rem dare plus offerenti, injustitiam ei irrogat emptor si offerendo pretium tantùm infimum, aut etiam medium, impedit vendentem, quominùs speret medium, aut supremum ad quod habet jus, nimirùm ne impediatur illud consequi; nam sicut vendens, si alius offerens desit, est in periculo rem tradendi minori pretio, et etiam infimo minore, ità contrà æquitas exposcit,

---

(a) num. 808. — (b) num. 809. — (c) num. 808. v. Not. — (d) Ità *Tournel. tom. 1. pag. 416. Lugo de Contr. D. 26. n. 45. Salm. eod. tit. c. 2. num. 58. cum Palao, Trull. Tap. Dian. p. 1. tr. 8. R. 76. cum P. Nav. Reg. Vega, Contr. et Ariag.* — (e) p. 1. tr. 8. R. 76. — (f) *Disp. 26. num. 45. in fin.*

ne defraudetur spe consequendi pretium majus, si forte occurrent plures offerentes, qui æmulatione augent pretium. Hoc exposcit æquitas, et hoc videtur exposcere jus licitationis.

178. — Notandum X. quòd præcisè ob dilationem, aut solutionis anticipationem, non potest pretium augeri, nec minui; nisi interveniret alius titulus periculi, aut damni, aut lucri cessantis, de quibus titulis semper monendus est emptor, ut dictum est *n.* 149. Et hic advertendum quòd mercatores vendendo carius pecuniâ expectatâ, difficulter excusantur ob solum titulum lucri cessantis; quia vendendo dilatâ solutione, majorem mercium copiam distrahunt, et ita restauratur lucrum quod eis cessat ob dilationem (a). Potius excusare potest titulus existimationis, quæ probabiliter reddit justum pretium hujusmodi venditionum dilatæ solutionis, ut dicunt *Lugo, Less. Cano, Mol. Tolet. Sanch. Castrop. Bonac. et Salm.* quia in hujusmodi venditionibus adest major copia emptorum, et minor numerus vendentium; et quia semper inest periculum commune amittendi sortem. Et idem dicunt de emptoribus, qui anticipatè solvendo pretium minus exhibent, quia in hujusmodi emptionibus adest copia vendentium, et inopia emptorum, et etiam aliquod periculum rem non habendi, aut saltem non habendi juxta optata (b).

179. — Et eâdem ratione inducti probabiliter dicunt *Nav. Cajet. Sanch. Tourn. Anacl. Azor. Lugo,* cum *S. Bernardino Senensi*, et aliis, quòd chirographa, licet sint liquida, possunt minoris emi, quia aliud est habere pecuniam, aliud est emere actionem ad illam, quæ actio communiter existimatur minoris, quia hæ actiones in praxi non sunt immunes ab aliquo periculo exactionis, aut saltem molestiæ, et expensæ. Dico tamen excipienda esse chirographa, quæ vulgò nuncupantur *Fides crediti*, pro quibus nullum morale periculum adest: modò ob distantiam, incommodo aut periculo sibi non esset exactio, propter eum qui ad exigendum mittendus est (c).

---

(a) *lib. 3. num. 810.* — (b) *num. 811.* — (c) *num. 829.*

180. — Notandum XI. quòd pactum de retrovendo est licitum, cùm debitæ conditiones interveniunt, nempè, 1. Ut diminuatur pretium, quod decrescere potest usquè ad quartam partem: imò alii dicunt usque ad tertiam: et tunc utique valet pactum, ut emptor teneatur retrovendere eodem pretio, licèt rei pretium augeatur. 2. Ut rei periculum sit penes emptorem. 3. Ut fundus retrovendatur cum fructibus aut sinè, ut reperitur cum traditur (a).

181. — Ità etiam juxtà sententiam probabiliorē Less. Lugo, Molin. Castrop. Silv. P. Navar. Bonac. Azor. et aliorum, licitum est pactum de reëmendo rem ad emptoris requisitionem cum sequentibus conditionibus, nimirum, 1. Ne adsit animus usurarius. 2. Ut augeatur pretium prioris venditionis. 3. Ut venditor non teneatur ad reëmendum eodem pretio; sed si res deterior fieret, debeat solvere tantum quanti valet tempore reëmptionis; et contrà si res crescit, crescit vendenti. Et hoc modo illa est vera emptio, non autem mutuum, ut supponunt adversarii; dùm interim quòd res non redimitur, periculum ad emptorem spectat, quod secus est de mutuo (b).

182. — Contractus, qui *Mohatra* nuncupatur, est certè illicitus, ut constat ex Propos. 40. ex damnatis ab Innoc. XI. Hic contractus fit cùm quis vendit cum pacto expresso aut tacito, ut res sibi minoris retrovendatur (c). Ità pariter est illicitus, et usurarius contractus qui *Antichryseos* dictus, vulgo à *godere*, nempè quandò quis aliquem fundum frugiferum dat fruitioni alteri, et hic dat illi pecuniam etiam fruitioni (d).

183. — Notandum XII. prohibitum esse *Monopolium*, cùm his duobus sequentibus modis fit, nimirum, 1. Quandò quis impedit quominus aliæ merces in regionem introducantur, ut ipse solus vendat suas cum civium damno. 2. Quandò unus aut plures emunt omnes merces, ut eas vendant pluris pretio supremo, quàm in foro venderentur, nisi

---

(a) num. 812. — (b) l. 3. num. 813. — (c) *Ibid.* v. Not. — (d) *Vide Salm. c. 3. num. 776. et 916.*

Monopolium factum fuisset. Cæterum si quis aut plures emunt merces, postquam cives jam sufficienter sibi comparaverunt, ut eas vendant lucro aliquo moderato, hoc utique licitum est, ut communiter docent DD. Et probabiliter dicunt *Lugo*, *Med. Less.* et *Holzm.* quòd hujusmodi mercatores non peccarent contrà justitiam, si venderent pretio supremo, et ne contrà caritatem quidem, modò non inducerent alios ad vendendum carius (a). Undè fit, quòd si inter se conspirarent de non vendendo, nisi supremo pretio, licèt probabile sit cum *Less. Viva*, *Lugo*, *Holzm.* *Molin.* *Bonac.* *Salmant.* etc. (contrà *Tourn. Spor.* etc.) non peccare contrà justitiam, nihilominus non possunt excusari à peccato gravi contrà caritatem, ut certum est apud omnes (b).

184. — An autem facto Monopolio injusto inter aliquos vendendi pretio supremum excedente, licitum sit aliis eodem pretio vendere. Admittunt *Salmant.* cum *Bonac. Med.* et aliis, dicendo quòd illud pretium jam factum est commune. Sed hæc opinio reprobata à *Rebel.* *Tapia*, *Dicast.* et *Concina*, mihi reverà non placet; quia tale pretium ex injustitiâ adauctum, semper injustum est; nec debet teneri pro justâ æstimatione, quæ ab injustitiâ ortum habuit (c).

185. — Notandum XIII. loquendo de vitio rei quæ venditur, vitium posse esse circà substantiam, circà qualitatem, et circà quantitatem. Si vitium est circà substantiam, aut contractus nullus est, aut deceptor debet reficere damnum, licèt à parte sibi condonare fecisset excessum pretii injusti (d). Et hìc notandum, quòd si res est perfectior eâ, quæ venditur, illa præter injustitiam potest vendi pretio communi, licèt sit admixta aliâ re deterioris conditionis; prout esset vinum cum aquâ, modò emptor illud non emat ad conservandum, quia vinum cum aquâ commixtum facìlè corrumpitur. Idem dicunt de Pharmacopolis qui minoris vendunt unum pro alio; modò illud sit certè æqualis utilitatis, et minuatur pretium; ità *Sotus*, *Lugo*, et *Salmanticenses* (e).

---

(a) num. 826. — (b) n. 817. — (c) n. 817. v. *Sed hic.* — (d) n. 819. — (e) l. 3. n. 820. *Dub. 1. et n. 821.*



186. — Si vitium est circa *Quantitatem*, etiam damnum reficiendum est; sed si unquam taxa esset injusta, aut injustum pretium ob Monopolium emptorum, tunc non est improbabile, ut dicunt *Lugo*, *Laym. Castrop. Salmant.* etc. vendentem posse uti mensurâ tantum mancâ, quantum ad pretium justum, infimum tamen dumtaxat, perveniat (a).

187. — Si vitium deniquè est circa *Qualitatem*, tunc oportet distinguere: quando vitium est patens, non adest obligatio illud manifestandi, et vendente illud non manifestante, contractus est validus; modò illi non constet ignorantia emptoris, et modò qualitas non transeat in substantiam, prout esset, si emptor suam manifestasset mentem; se nolle illam rem nisi cum tali qualitate. Si autem vitium est occultum, tunc certè vendens tenetur illud patefacere, modò non se protestetur vendere, ut communiter dicunt, *Ad saccum ossium fractorum*; et prout tali protestatione omissâ communiter practicatur in nundinis; advertendum tamen, quòd tunc non potest res vendi ultrâ pretium supremum, cum ratio vitii occulti habenda sit (b).

188. — Dubitatur, an quis possit vendere pretio corrente rem, quam scit brevî minoris valituram. Est valdè probabile, quòd licitè possit, ut communissimè dicunt *Cajet. Less. Sot. Castrop. Tournely, Salm. Bonac.* cum *S. Thomâ* (adversus aliquos), quia in venditione non attenditur pretium futurum, sed præsens, quod existimatur non juxtâ notitiâ particularem, sed juxtâ existimationem communem. Et ità pariter licitum est emere merces pretio corrente, licèt noscatur notitiâ particulari brevî pretium auctum iri. Et eum qui ità vendit, probabiliter dicunt *Less. Bonac. Tourn. Ronc. et Salm.* ne peccare quidem contrâ caritatem, nisi esset quia ex hoc emptor in gravem necessitatem conjiciendus esset, aut si cum vendere posset illi qui statim rem consumpturus esset, vellet vendere ei qui eam conservaturus esset. Advertendum tamen hoc procedere cum pretii accretio, aut imminutio notitiâ privatâ noscitur,

(a) n. 822. — (b) n. 823.  
Tom. I.

nam si notitia esset communis, jam pretium ex se variatur (a).

189. — Notandum XIV. quod qui recipit ad vendendum res pretio designato, nequit sibi retinere plus quod ex eâ percipit, licet in loco remotiori, et labore majore venderet; nisi tamen esset. 1. Quia talem extraordinariam diligentiam adhiberet, pretium cuius corresponderet lucro percepto. 2. Si ipse rem melioraret. 3. Si lucrum esset parvi momenti. 4. Si tacite convenerit cum domino, nihil amplius ei dare, præter designatum pretium, ut si dominus nullum ei assignasset stipendium. 5. Si factâ diligentia ordinariâ, ipsemet Proxenetâ sibi emeret rem pretio designato, et postea illam majore pretio venderet. Et idem dicitur relativè de eo, cui commissâ fuisset emptio alicujus rei (b). Sartores qui se offerunt ad emendos pannos, non possunt exigere plus pretio quod solvunt, nisi esset quod mercator ipsis revera ob peculiarem amicitiam, aut quia suam officinam frequentant, remitteret aliquid ex pretio communi (c).

190. — Notandum XV. rei duobus venditæ ab eo acquiritur dominium, cui tradita est post pretii solutionem, aut post datam fidem pretii, ut dictum est *numer. 167*. Sed si is malâ fide emeret, sciens quod alteri jam vendita erat, tunc tenetur reddere eam primo emptori, ut communiter DD. Sed non antè sententiam, nisi esset 1. Quod ipse induxisset venditorem ad sibi rem vendendam. 2. Si primus emptor esset locus pius, minor aut universitas. 3. Si ipse esset donatarius, quia tunc tenetur eam restituere emptori, si eam petat intrâ annum. *L. 1. ff. quæ in fraud. etc. (d)*.

191. — Notandum XVI. rem venditam, si est determinata, nempe talis domus, tale dolium, etc. quando perit, perire emptori; modò venditor non fuerit in morâ ad tradendam rem. Sed si non est determinata, v. gr. decem oves ex hoc grege, aut determinata tantum ad mensuram, ut hoc vini dolium tanti in singulos cados, tunc antè mensurationem, aut traditionem res perit venditori; ita ex *L. lector*,

---

(a) *Lib. 3. num. 824.* — (b) *n. 825.* — (c) *n. 826.* — (d) *n. 827.*

*ff. de Peric.* Sed incrementum , aut decrementum rei spectat ad emptorem , ut dicunt *Less. Bonac. Salm.* etc (a). Cùm autem res est jam tradita , ejus periculum spectat semper ad emptorem , licèt pretium non sit solutum , nec præstita sit fides , ut superiùs diximus *num. 169.*

## PUNCTUM VI

### De Negotiatione.

*Cui prohibita sit negotiatio ; et quandò est culpa lethalis ; et si Clericus negotiatur per alios , aut aliis* 192. *Emerere pecora pro suis pascuis , etc.* 193. *Vendere pluris , ut emat minoris. Emerere lanam , etc. si fit per necessitatem* 194. *An Clerico liceat esse Tutor , Factor , etc.* 195.

192. — **N**EGOTIATIO propriè dicitur cùm aliquid emitur animo illud idem non mutatum carius vendendi. Hæc sub gravi vetatur Religiosis , et Clericis in sacris constitutis ; secùs verò Minoristis , nisi essent Beneficiati , ut dicunt communiter DD. ex *Can. Placuit* 3. q. 26. (b) Peccat ideòque graviter Clericus , vel Monachus qui frequenter negotiatur , licèt præciso scandalo , et quamvis in materiâ non turpi , nec gravi , ut dicunt *Lessius , Lugo , et Salm.* cum aliis (contrà paucos). Quamquàm excusant à mortali , si hoc fieret bis aut ter in materiâ non gravi , aut semel in gravi (c). Et ità etiam eum excusant *Laym. Cast. Salm.* etc. si per alium negotiaretur , modò (ut dicunt *Lugo , et Salmant.*) ejus superintendentiâ non esset nimia (d). Contrà declaravit Bened. XIV. in Bullâ Apostolica , quòd ille Clericus qui aliis negotiatur , incurrit easdem pœnas , ac si sibi negotiaretur : nisi esset quia negotium jam à laicis inceptum , non posset sinè detrimento dimitti ; nam tunc potest Clericus illud proseguire , sed solum ad tempus , et per

---

(a) *num. 828.* — (b) *L. 3. num. 831.* — (c) *Ibid. v. Non peccat.* — (d) *num. 832.*

interpositam laici personam, et de licentiâ S. C. (a).

193. — Non est vetitum Clerico emere pecora, ut in propriis pascuis saginata vendat, aut ut vendat partus eorum, lanam, etc.; hoc est commune cum *Less. Lugo, Layman, Ronc. Castrop. et Salm.* Sed dicimus non esse licitum pascua aliena conducendo hoc facere, cum vetitum sit à Concilio Chalcedon. (in *Cap. Pervenit*, 21. q. 3.) pascua aliena conducere, ut vendat fructus. An autem liceat pascua aliena conducere ad saginanda propria pecora, et hæc vendere; negant *Laym. et Sporer*; sed affirmant *Salm. et Viva*, modò absit scandalum; et hæc opinio mihi videtur valdè probabilis, dum hoc non reperitur ullâ lege vetitum (b).

194. — Licitum est verò Clericis cariùs vendere, ut emant minoris. Et ità etiam licitum est vendere aliquid cariùs cum emptum sit non animo vendendi, sed conservandi illud. Item etiam licet emere plura pro securitate suæ provisionis, et postea superfluum vendere. Insuper emere colores, ut vendant picturas, et lanas ut vendant pannum, modò non conducantur alii operarii ad hoc efficiendum, ut dicunt *Lug. Salm. Mol.* etc. (c). Præterea licitum est Clerico etiam negotiationem propriè dictam exercere, quandò hoc expediret pro suâ, et suorum sustentatione, ut habetur ex *C. Multa, Ne Oler. vel Mon.* Et pro hoc satis est gravis necessitas conservandi statum decentem, prout probabiliùs, et communiùs dicunt *Castrop. Spor. Croix*, et *Mazzot.* contrà *Laym.* qui admittit solam vitæ sustentationem (d).

195. — Vetitum est Clerico agere Tutorem, Tabellionem, aut exercere qualecumque officium publici Ministerii, propter quod teneatur reddere rationes administrationis. Et si quis Clericorum aliquod prædictorum officiorum exercuerit; ipse non poterit ordinari, donec rationes non reddat, aut saltem præstiterit fidejussionem. Sed hoc non intelligitur de administratione locorum piorum, pupillorum, et viduarum. Item vetitum est Clericis personæ sæcularis procurationem gerere; hoc tamen procedit in casu, (ut

---

(a) num. 833. — (b) *Lib. 3. n. 835.* — (c) n. 836. — (d) n. 837.

dicatur in c. *Sed nec* 4. *Ne Cler. vel Monac.*) quo ut Clericus eo fungatur officio, negligere deberet proprium ministerium Ecclesiasticum; *Si quis ab ecclesiastico* (sunt verba textûs) *fiat ministerio alienus pro eo quòd, officio Clericali neglecto, fluctibus sæculi se immergit*; et eo casu Clericus incurreret etiam suspensionem à suo officio, *sed ferendæ sententiæ.*

## PUNCTUM VII.

### De Censu.

*Quid sit census* 196. *Conditiones requisitæ à Nicolao V.* 197. *Conditiones requisitæ à S. Pio V.* 198. *An liceat census personalis* 199. *An liceat census redimibilis ex parte emptoris* 200. *An pereunte fundo pereat census* 201. *An possit constitui census pecuniâ antiâ debita* 202.

196. — **C**ONTRACTUS censûs, aut venditionis annorum reddituum, est cùm quis pro certâ summâ (v. g. 100) exigit quotannis quinos, senos, etc. in centenos ex aliquo fundo fructifero. Hic contractus est licitus, modò debitæ circumstent conditiones; nam est vera emptio, quâ qui dat pecuniam emit non jam pensionem, sed jus ad percipiendam partem fructuum fundi (a).

197. — Quoad autem conditiones, in Bullis Nicolai V. et S. Pii V. appositas sciendum quòd in illâ Nicolai V. (quæ in nostro Regno Neapolitano viget in observantiâ) requiritur I. Ut census constituatur super re certâ in specie, et generaliter super aliis bonis. II. Ut adsit pactum retrovendi eodem pretio. III. Ut pensio non excedat denos in centenos (b).

198. — In illâ S. Pii requiritur I. Ut census sit super re stabili et frugiferâ; et sufficit ceteroquin officium perpetuum, aut alius census. II. Ut præmium sit de pecuniâ numeratâ. III. Ut absit pac-

---

(a) n. 839. — (b) *Ibid.* n. 825.

tum anticipatè solvendi pensionem. IV. Ut non obligetur venditor ad substituendum alium fundum, si pereat obligatus. V. Ut venditor non privetur ab alienando fundo hypothecato. VI. Ne conveniatur ad solvendam aliquam pœnam, aut interesse ob lucrum cessans, si pensio non solvatur. VII. Ne novus creetur census de pensionibus non solutis. VIII. Ne emptor suo arbitrio possit repetere præ-  
tium; et ut venditor possit semper redimere census; ceterùm de jure naturali est sententia communissima posse pacisci ut census sit irredimibilis. IX. Ne census vendatur aliis pluris, vel minoris, nisi esset quia census evaderet non liquidus (a). Sed circà Bullam S. Pii V. advertunt communiter Auctores, illam non fuisse receptam in pluribus Regnis, nimirum in utrâque Siciliâ, in Hispaniis, in Germaniâ, in Galliis, in Belgio; imò *Continuator Tourn.* affirmat nec Romæ observari. Et ubi recepta non est, sententia communis est, quod non obliget (b).

199. — Dubitatur autem 1. An liceat census Personalis? Alii negant, sed multi graves AA. probabilius et communiùs affirmant, loquendo quoad jus naturale; ità *Sotus, Less. Merbesius, Tournel. Hab. Wigandt, Castrop. Ronc.* etc., quia sicut in censu reali emitur jus ad percipiendos fructus à fundo, ità in personali emitur jus ad percipiendos fructus ab industriâ et labore alicujus, jam addicti tali officio, v. g. Pictoris, mercatoris etc. (c). Dicitur est, jure naturali spectato, nam juxtà Bullam S. Pii paulò antè allatam requiritur (ubi acceptata est) omninò fundus stabilis.

200. — Dubitatur 2. An liceat hic contractus si conveniatur, ut census sit redimibilis non solum ex parte venditoris, sed emptoris? Alii ut *Lessius, Laym. Castrop.* etc. admittunt illum. modò observentur conditiones quas alibi (n. 181.) recensuimus pro pacto reëmendi fundum. Sed alii, ut *Sotus, Covar. Salmant.* etc. negant, et hæc sententia proculdubio suadenda est, dum omnes conveniunt

---

(a) n. 846. et 847. — (b) n. 849. — (c) n. 840.

quòd in tali contractu adest periculum saltem intentionis usurariæ (a).

201. — Dubitatur 3. An præcisâ Bullâ S. Pii, pereunte fundo sinè culpâ venditoris, pereat etiam census? Negant *Salmant. Sot. Castrop.* etc. dicentes quòd in tali casu tenetur venditor ad substituendum alium fundum. Sed nos oppositum tenemus cum *Lessio, Lugo, Ronc.* etc. quia in contractu censûs, non jam principaliter obligatur persona, et accessoriè res (uti supponunt Adversarii), sed res tantum, cum vendatur jus super illius fructibus: undè pereunte fundo, nihil amplius debetur. Et hinc dicimus, quòd licèt sit licitum pactum solvendi pensionem (modò sit diminuta) etiam annis sterilibus; non licèt tamen pactum eam solvendi etiamsi fundus pereat (b).

202. — Dubitatur 4. An possit constitui census de pecuniâ quam priùs venditor debebat emptori? Spectatâ Bullâ S. Pii non potest, quia ibi requiritur pecunia numerata. Sed loquendo de jure naturæ, non est improbabile quòd possit cum *Nav. Less. Valent.* etc. cum census habeat rationem eamdem, quam quælibet alia emptio, quæ utique potest fieri cum pecuniâ quæ ei debetur (c).

## PUNCTUM VIII.

De cambio, locatione, Emphyteusi, feudo, et libello.

*De cambio, et ejus speciebus* 203. *Qui recipit monetam falsam* 204. *De locatione* 205. *De successione locatoris* 206. *In casu sterilitatis etc.* 207. *An possit conduci jus mendicandi* 208. *Si tabellarius eodem proficiscatur duorum mandata executurus an etc.* 209. *An debeatur salarium famulo ægrotanti* 210. *De emphyteusi* 211. *De feudo* 212. *De libello* 213.

203. — **C**AMBIVM est contractus, quo campsor cambit pecuniam campsario cum lucro aliquo præ-

(a) *Lib. 3. n. 843.* — (b) *n. 846.* — (c) *n. 847. ad II.*

ter sortem. Et quætuPLEX est : Minutum , per literas , reale , et siccum. *Minutum* ( sive *Manuale* ) licitum est , et fit cùm pecuniæ minores pro maioribus , vel contrà dantur. Pariter licitum est cambium *Per literas* , et hoc fit , cùm campsor recipit pecuniam à campsario , ut eam alibi solvat. Solutio autem pro tali cambio ex constitutione S. Pii V. non est differenda ultrà tempus statutum. *Reale* contrà est cùm campsor dat pecuniam , ut postea eam alibi recipiat à campsario per hujus Procuratorem ; et hoc etiam est licitum. *Siccum* denique ( sive *Fictum* , ut etiam appellatur ) est cùm tantum fingitur locus diversus ubi solutio facienda esset , et interim campsor exigit lucrum : hoc procul dubio est illicitum (a). Ad hanc cambii speciem reducitur etiam cambium vulgò *Colla Ricorsa* , quod ( ut paucis comprehendam ) est cambium cum duplici fictione (b). Cambium *Francofurtense* , nempè cùm mercatores dantes cambium ad proximas nundinas , quò magis eæ distant , eò plus exigunt , est licitum , modò reverà intercedat titulus lucri cessantis pro mercatore (c).

204. — Advertendum quòd si quis casu recipit monetam falsam , non potest expendere : et si fortè expenderit , juxtà sententiam veriore , tenetur ad restitutionem. Dicunt tamen *Croix* , et *Spener* , hoc intelligi debere cùm materia monetæ est falsa , secus verò si tantum est adulterina imago Principis.

205. — *Locatio* est contractus quo quis personam aut rem suam alteri dat ad usum pro certâ mercede. Nota 1. quòd si res fiat inutilis usui , conductor non amplius tenetur ad pensionem promissam (d). Nota 2. quòd expensæ ordinariæ parvi momenti spectant ad conductorem ; sed extraordinariæ ( modò sint utiles ) ad locatorem. Sed casu quo conductor se obligasset ad melioramenta , intelligitur se obligasse suis expensis (e). Nota 3. quòd si res perit , conductor ad nihil tenetur , modò locator non probet ejus culpam. Nota 4. quòd locator non potest

---

(a) *Lib. 3. n. 850. ad 854.* — (b) *cit. n. 854. v. Quæritur.*  
 (c) *Ibid.* — (d) *n. 857. ad 2.* — (e) *n. 863.*



rem repetere, nisi in sequentibus casibus, nimirum,  
1. Si conductor non solvit pensionem biennio. Si  
res sit necessaria locatori : 3. Si fundus non possit  
aliter reparari : 4. Si conductor eâ re abutatur,  
v. g. si ibi alat meretrices, destruat, etc (a).

206. — Notatur 5. quòd successor universalis,  
nempè hæres, non potest antè præfinitum tempus  
cum testatore conductorem expellere ; benè tamen  
potest successor particularis, ut legatarius, dona-  
tarius, aut emptor, ut habetur ex l. *Emptorem C.*  
*de legat.* Excipiunt nonnulli DD. si ager jam esset  
cultus aut seminatus : sed ego nescio quomodò huic  
exceptioni sit locus, cum lex (ut expressum est in  
l. *Qui fundum*, 25. ff. *de locat.* ubi sermo est de  
legatario) jam dat conductori actionem pro damnis,  
quæ patitur, in hæredem (b).

207. — Notatur 6. quòd damnum sterilitatis ex  
se loquendo spectat ad conductorem ; sed loquendo  
ex æquitate, cum non intercedit culpa conductoris,  
et sterilitas est nimia (ut si aliquo anno fundus  
non fructificaret ne pensionis quidem medietatem,  
sicut dicunt *Less. Lugo*, etc.) tunc debetur remis-  
sio, ut habetur ex *C. propter, de locat.* et ex l. 8.  
*C. eodem tit.* Et si nihil fructificaret, nihil debere-  
tur (c).

208. — Dubitatur 1. An liceat pauperi elocare jus  
mendicandi ? Alii affirmant, sed nos negamus cum  
communiori, nisi in casu in quo pauper non posset  
ipse mendicare (d).

209. — Dubitatur 2. Si tabellarius eòdem profi-  
ciscatur duorum mandata executurus, an possit in-  
tegram mercedem ab ambobus recipere ? Aurigæ  
certò possunt ; ob consuetudinē quæ viget. Quoad  
alios autem probabile est, ut dicit *P. Concina*, quòd  
tantum dimidiam mercedem exigere possint ; sed  
probabile est etiam cum *Less. Laym. Castropal.* et  
*Croix*, quòd possint exigere integram ab unoquo-  
que, cum per accidens contingat, quòd opera sit  
utilis utrique (e).

---

(a) *Lib. 3. n. 858.* — (b) *Lib. 3. n. 859.* — (c) *n. 860.* — (d) *n. 861.* — (e) *n. 862.*

442 *Tract. 10. De septimo Præc. Decalogi.*

210. — Dubitatur 3. An dominus debeat solvere salarium famulo ad annum conducto, si aliquos menses ægrotet? Dicimus cum communi (contrà paucos) non teneri; nisi alicubi aliud ferret consuetudo. Et dicimus cum *Lugo*, et aliis (contrà *Azorium*) ne ad expensas quidem infirmitatis teneri, nisi esset quia servus in gravi necessitate esset (a).

211. — Contractus *Emphyteusis* est cum dominus dat corpus stabile alteri in perpetuum, aut saltem per annos 10 ad meliorandum; ita ut ipse retineat dominium directum, et dominium utile transferatur ad Emphyteutam, cum onere solvendi annum canonem: qui canon si non solvatur per tres annos dominus potest sibi vindicare fundum, si hoc erit sæcularium, duos si est Ecclesiæ. Præfatus canon semper debetur, etiamsi fundus periret quoad partem (secus si periret totus), et etiamsi pateretur gravem jacturam fructuum, modò pensio non esset magna, et ferè æqualis fructibus; nam tunc ex æquitate debet illa diminui (b).

212. — *Feudum* est contractus similis emphyteusi, cum datur fundum nobile aut rusticum vassallo sub onere exhibendi fidelitatem et obsequium personale domino directo (c).

213. — Contractus *Libellaticus* deniquè est cum emphyteuta sive feudatarius tradit tertio fundum eundem sub iisdem conditionibus, et hic contractus dicitur etiam subemphyteusis, aut subinfeudatio (d).

---

(a) n. 864. — (b) n. 865. et 866. — (c) n. 867. — (d) n. 868.

## PUNCTUM IX.

### De sponsione, et ludo.

*De sponsione, an sit licita, et quid si altera pars dicat se certò scire factum* 214. *De ludo filiorum-familias, et Religiosorum* 215. *De fraudibus* 216. *De ludis prohibitis, an sint prohibiti laicis; et an victor possit sibi retinere lucrum* 217. *An qui perdit teneatur solvere; quid si intercessit juramentum solvendi, et non repetendi* 218. *De ludis prohibitis Clericis* 219. *Religiosis* 220. *Episcopis* 221.

214. — **S**PONSIO (vulgò scommessa) est cum duo de eventu alicujus facti contententes aliquam summam spondent consequendam ab eo pro quo stat veritas. Hæ sponsiones non sunt prohibitæ (saltem graviter) nisi fiant sub conditionibus peccaminosis, aut si qui ad invicem sponsonem facerent, quis eorum plùs vini potabit; aut si quis sponderet aliquid tantum perditurum, si tale peccatum non assequatur, quia tunc se exponit majori periculo peccandi. Secùs si sponderet aliquid, non fore peccaturum (a). Ut autem præfatæ sponsiones sint justæ, requiritur æqualitas tam præmii, quàm dubii circa eventum. At si quis unquàm diceret se certò scire aliquod, et alter, hoc non obstante, etiam vellet sponsonem interponere, tunc dicunt alii quòd potest retinere præmium, quia tunc alter cedit suo juri: Sed nos sentimus oppositum cum *Lugo* et *La-Croix* quandò ille alter etiam pro certâ haberet suam assertionem; nam tunc ille non habet animum cedendi, sed inductus est ad ità sponsonem certandum à solo errore suo, ratione cujus alter non habet jus sibi retinendi præmium. Secùs autem dicerem, si ille jam dubitasset, quia tunc cessat deceptio, et reverà vult cedere juri suo (b).

215. — Agendo de ludo oportet distinguere ludum in generali à ludo prohibito. Quoad ludum

---

(a) *Lib. 3. n. 869. et 870.* — (b) *n. 879.*

in generali, notandum 1. quòd summa victa filio-familias restituenda est, modò non sit de suis bonis Castrensibus, aut quasi; aut si adsit patris consensus, aut sit summa parvi momenti, aut sit aliqua pars moderata deducta ab alimentis, quæ ei pater subministrat. Et idem dicitur de uxoribus, et Religiosis. Contrà isti tenentur restituere pecuniam quam lucrati sunt ab aliis (nisi esset modica summa), licèt alii scivissent hos subditos, et proprium peculium non habere (a). Hic autem fit quæstio, an illi Religiosi qui habent licentiam generalem à Superiore expendendi peculium suo arbitrio, peccent contrà paupertatem si illud in ludos insumunt? Et an victores teneantur ad restitutionem? Plures Auctores, ut *Suar. Lugo, Hurtad. Rebel. Salas, Med. etc.* dicunt esse probabile, quòd non; tùm quia superior tunc aufert impedimentum voti, tùm quia saltem tunc licentia præsumitur data à Religione, quæ licèt invita circà modum, non est circà substantiam. Nihilominùs nos dicimus cum *Nay. Less. Sanch. Salm. etc.* esse absolutè probabile oppositum, quia talis licentia non præsumitur fuisse data à Prælati, nec Prælati, licèt vellent, possunt eam imperiri; cùm ipsi sint simplices administratores, non autem domini honorum Monasterii (b).

216. — Notandum 2. quòd lusor, si fraudibus injustis utitur, v. g. signis notando chartas, aut mutando *Talos* etc. debet restituere lucrum, et etiam quantum valebat alteri spes lucrandi. Dictum est *fraudibus injustis*, nam licet uti iis astutiis, quas regula lusûs, et consuetudo ferunt, ut aspicere chartas, quas alter suâ negligentia conspicit facit, aut dignoscat chartas quæ exterius ob aliquod casuale signum ex se ipsis dignosci possunt (c).

217. — Quoad ludum prohibitum, notandum est quòd omnes ludi sortis (qui dicuntur lusus alearum) ut sunt lusus taxillorum, qui vulgò dicuntur *Bassetta, Primera*, etc. hi vetiti sunt tùm jure

(a) *Lib. 3. num. 875. et 876.* — (b) *num. 863. et l. 4. num. 31.*  
— (c) *num. 882.*

Canonico C. *Episcopus Dist. 35. et C. Clerici, de vita, et honest. Cleric. tùm jure Civili, L. Alearum, de bel. et sumt. fund.* Deindè distinguere oportet in hâc materiâ laicos ab Ecclesiasticis. Quoad laicos, est commune inter DD. tales lusus non esse prohibitos sub gravi, quia citatus Canon *Episcopus* est à consuetudine derogatus, et leges civiles circa hos sunt poenales, cùm (in victorum poenas) dant actionem ei qui vincitur, repetendi summam amissam (a). Ex quo ceteroquin inferitur, quòd victor potest sibi lucrum retinere, donec per Judicis sententiam non obligetur restituere, juxtà communem (b). Et hoc etiamsi lusisset animo repetendi, si perdebat (c).

218. — Contrà communis est sententia et probabilior cum *Sanch. Less. Lugo, Viva, Nav. Tolet. Laym. Mol. Salm. etq.* (contrà *Sayr. Bann.* et alios paucos) quòd qui perdit, non tenetur solvere; quia cùm ei detur à lege beneficium repetendi, datur etiam non solvendi, ut deducitur ex aliâ *L. Creditori, C. de Pactis*, ubi dicitur *Frustrà solvitur, quod statim repetendum est* (d). Si autem vellet transigere, benè potest id facere, licèt non haberet animum judicem adeundi (e); et licèt cessisset beneficio legis, quia cùm lex sit edita ob bonum commune, ejus cessio est nulla. Modò (limitatur) ex utrâque parte non sit juramento firmata promissio, non solùm de solvendo, sed etiam de non repetendo: nam lex vetat quidem hujusmodi lusbis ludere, sed non quidem solvere amissum; undè tunc neuter lusorum ne potest quidem juramenti relaxationem petere, dùm adest tertii præjudicium (f). Et ille qui perdidit, si jam solvisset, non potest sibi compensare, nisi adeat Judicem, licèt non jurasset de non repetendo. (g). Sed si ille peteret contractûs rescissionem, et alter renueret, vide dicta n. 125.

---

- (a) Num. 885. — (b) n. 887. — (c) n. 889. — (d) n. 890. —  
— (e) n. 891. — (f) n. 891 et 892. — (g) n. 893.

219. — Quoad Ecclesiasticos, non est dubitandum, quin Clerici (in sacris tamen aut Beneficiati, dum pro aliis interdicto saltem obsolevit) peccent lethaliter, si ludant lusibus meræ sortis, ut superius explicatum est, cum iis frequenter ludunt, et diù, licet in modicâ quantitate; quia huiusmodi lusus notabiliter Ecclesiasticorum statum dedecet. Et idem dicitur si exponunt ludo magnam quantitatem, licet raro; saltem cum in hoc grave adesset scandalum aliorum, ut vult *Laym.* (a). Dictum est *lusibus meræ sortis*, nam simplices lusus chartarum, in quibus vincere dependet tam à sorte, quam ab industriâ, ut sunt lusus appellati recreationis, v. g. *Tressette*, *Ombre*, et alii id genus, hi non sunt vetiti sub gravi Clericis saltem ex hodiernâ consuetudine, nisi adesset scandalum, aut peculiaris alicui prohibitio (b).

220. — Loquendo autem de Religiosis, si isti sunt reformati strictioris observantiæ, ut Cappucini, Theresiani, Jesuitæ, Alcanterini, et similes, illi ludendo ludis sortis, etiam semel, non excusantur à gravi: et tantò minùs excusantur Superiores qui id permittunt. Et idem ego dicendum puto, si quocunque chartarum ludo, etiam recreationis causâ (ut suprâ dictum est) ludant, saltem si luderent semel atque iterùm; tùm ob scandalum cui essent laicis, tùm ob abusum qui irreperet. Quoad autem alios Religiosos laxioris observantiæ, ut dictum est de Clericis, ità etiam dicunt DD. tunc graviter peccare, cum luderent lusibus meræ sortis, et frequenter, aut in nimia quantitate; præter peccatum contrà Paupertatem, ut dicitur *Tract. XIII. n. 13. et 14.* Si autem ludus esset simplex (ut suprâ explicatum est), *Peyrin. Dicast. Salm.* etc. eos excusant à gravi, et etiam à levi, ut dicunt, si luderent animi gratiâ; sed huiusmodi solatium mihi semper videtur indecens statui Religioso, nec usus mihi videtur posse id cohonestare (c).

---

(a) n. 897. ad 898. — (b) n. 900. — (c) *Lib. 3. n. 901.*

221. — Sed si Episcopus luderet aleis, etiamsi semel, aut frequenter chartis solatii causâ, nescio quomodo possit excusari à gravi scandalo. Et idem dico de Prælatò qui frequenter, et ex proposito assisteret alearum lusibus. Sed quoad Clericos et Religiosos qui assistant, licet hoc etiam vetitum sit à Canonibus (*cap. Clerici, de vita, et honest. Cler.*), nihilominus communiter DD. eos excusant à culpâ gravi (a).

## PUNCTUM X.

### De societate.

*Conditiones ut sit justa societas* 222. *Debet prius detrahi capitale domino* 223. *Debet attendi valor laboris, et commoditatis sortis, quæ spectat ad dominum* 224. *Damnum sortis cui spectat* 225. *De animalium societate, ad caput salvum, et de pacto supplendi animalia mortua* 226. *De contractu Trium contractuum* 227. *An filius negotiando pecuniâ paternâ, etc.* 228. *De societate inter fratres* 229. *Quot modis finitur societas* 230.

222. — **C**ONTRACTUS societatis is est cùm duo saltem contribuunt pecuniam et laborem, ut commune faciant lucrum, aut damnum. Conditiones Societatis sunt tres, I. Ut ineatur in materiâ honestâ. II. Ut adsit æqualitas inter laboris æstimationem, et pecuniæ commoditatem. III. Ut uterque socius subeat onus damnorum, et expensarum quæ eveniunt ob negotiationis causam, sed damnum sortis spectet tantum ad dominum (b).

223. — Ex quo infertur 1. quòd si unus contribuit pecuniam, alter verò laborem, terminatâ societate, prius restituenda est sors domino, et postea reliquum dividendum est, ut rectè docent *Lugo, Bonac. Cabass. Petroc.* etc. (quicquid dicant alii); quia sicut sorte pereunte, tota perit domino, ita eadem (dùm existit) tota ei debetur. Nec valet di-

---

(a) n. 902. et 903. — (b) n. 904. ad 906.

cere quòd altero laborem conferente, et altero pecuniam, æquum est, ut in fine totum dividatur; quia in eâ societate qui contribuit sortem, non contribuit pecuniam, sed hujus commoditatem; undè si unus contribuit Navem, et Navicularius laborem, absolutâ navigatione navis utique tota ad dominum spectat, qui illius commoditatem contulit; non secus cum quis confert sortem, ea integra ad dominum spectat (a).

224. — Infertur 2. quòd in faciendâ divisione, prius (uti jam dictum est) detrahendum est capitale in domini beneficium; deindè dividendum est lucrum, habitâ proportionem valoris industriæ à socio adhibitæ, et valoris, non jam sortis (uti contendit *Cabassut.*) sed commoditatis sortis collatæ ab altero, juxta communem æstimationem lucri quod producere potest pecunia negotiationi applicata, uti rectè dicunt *Castrop. Ronc. et Rebell.* In quo potest contingere aliquandò, quòd industriæ valor ita excedat valorem usus pecuniæ, ut justum reddatur pactum (quod ex se esset injustum) ut dividatur etiam capitale. Advertendum contrà, quòd in aliquibus locis valor industriæ sit ita tenuis ob loci consuetudinem, aut ob frequentiam operariorum, ut rectè subjiçatur operarius etiam quoad partem periculo sortis, licèt ipsum periculum per se totum solius domini esse debeat (b).

225. — Infertur 3. quòd damnum sortis ad dominum totum spectat, quamvis sors pereat antequàm operarius suum conferat laborem (ut non rectè excipiunt nonnulli DD.); quia, ut non semel suprà explicatum est, non confertur sors, sed tantum usus illius. Undè dato quòd pereat sors in principio societatis, dominus nihil confert de pecuniæ usu; ideoque operarius ad nihil tenetur, licèt nihil laboris sui contribuat (c).

226. — Infertur 4. quòd injusta est societas pecudum cum pacto, quod dicitur *ad caput salvum*,

---

(a) num. 907. — (b) numer. 907. Qu. II. — (c) numer. 907 Qu. III.



nempè, ut absolutâ societate priùs restituantur pecora in eodem numero, et valore, licèt illa sint mortua, aut deteriora facta, deindè reliqua dividantur; hic contractus est injustus, quia damnum sortis (ut dictum est) totum domini est, nihil Custodis (a). Et ità etiam dicimus cum *Tumb. Silv. Angelo*, etc. (contrà *Azor. Ronc.* etc.) non licere (ex se loquendo) pactum, durante societate, suffiendi partus in locum armentorum, quæ moriuntur; quia partus, uti fructus societatis, non debent substitui, sed dividi; undè tale pactum redundaret in custodis damnum (b). Advertendum tamen hic deficientibus pecoribus, custodis intererit probare quòd illa sinè suâ culpâ perierint, ut notant *Pontas, Tourn.* etc. ex *L. Cum duobus*, 52. §. *Damna ff. Pro socio* (c).

227. — Hic autem 1. agitur illa celebris questio, an liceat exigere lucrum certum, salvo capitali, mediis *Tribus contractibus*, nempè societatis, assecurationis sortis, et assecurationis lucri; contrà qui confert pecuniam, cedere debet majori lucri parti, quod sibi probabiliter contingeret præcisis præfatis assecurationibus. Multi DD. ut *Merbes. Concina, Habert, Tourn.* etc. negant; quia (uti dicunt) talis conventio, positâ sortis, atque lucri assecuratione, non esset ampliùs societas, quæ de naturâ suâ, cum ea sit, ut dans pecuniam periculo subjaceret, transiret in mutuum, undè non potest exigi lucrum. Sed alii communiùs admittunt, ut *Navar. Tolet. Less. Lugo. Custrop. Bon. Ronc. Salm.* etc. dicentes quòd illi tres contractus, si separatim iniuntur, jam essent justì; et ità volunt etiam, cum fiunt cum eodem. Nec est verum, subjungunt, quòd talis contractus transeat in mutuum, quia qui accipit mutuum potest suo libitu pecuniam impendere; sed hic socius omninò debet in negotiationem eam impendere, quapropter essentialiter mutatur natura mutui. Et sciendum quòd hic trinus contractus approbatus fuit à facultatibus Theologicis Co-

---

(a) n. 909. Qu. 3. — (b) cit. n. 909. Qu. 2. — (c) ib. v. *Hic. Opera*.

loniensi, Trevirensi, Salmanticensi, Moguntinensi, et aliis, ut refert quidam liber typis editus Parisiis 1745. cum titulo : *Exam. Theolog. sur la société du prêt à rente*. Dicerem tamen, ut hic contractus nunquam fieret, Theologorum consilio non præcedente.

228. — Quæritur 2. An filius negotians pecuniâ paternâ, possit accipere partem lucri suo labori, et industriæ correspondentem? Affirmat *Ronc.* casu quo filius negotiatur proprio nomine, quia tunc, dicit, detracto valore alimentorum quæ à patre recipit, posset sibi sumere quantum pater præstaturus esset aliis pro hujusmodi labore. Sed huic opinioni acquiescere non possumus, quia licet ipsa sit probabilis, attamen cum etiam probabilis sit opposita *Molinæ*, *Lug. Sylvest.* et aliorum, nempe quod filius cum patre cohabitans non potest sibi compensare labores suos stipendio, quod extraneo dandum fuisset, modo labores non essent excedentes (a); Quâ de re cum agatur de compensatione, pro quâ requiritur jus certum et liquidum, nequit filius eam sibi facere sinè patris consensu (b).

229. — Notandum quod inter fratres non intelligitur facta societas, nisi omnes fratres alicui negotiationi vacent, aut si quis eorum negotietur, et alii non conferunt bona propria præter communia; nam si unus confert bona propria, alii verò tantum bona communia, benè potest ille se compensare juxta excessum, quem de suis bonis, aut de suo labore in negotiatione impendit. Sed si unus fratrum ab aliis absens de bonis communibus in communem negotiaretur, intelligitur durare Societas usque dum alii fratres divisionem non exposcant (c).

230. — Notandum denique quod societas potest dissolvi multifariam : I. Cum terminatur negotium et tempus prædefinitum : II. Mutuo consensu sociorum, etiam tacito, v. gr. si alter eorum seorsim negotiari incipiat. Cæterum neuter sociorum potest à contractu se abdicare nisi esset quia ei incumbendum

---

(a) *Lib. 3. n. 504. et etiam 488. ad v. III. in fin.* — (b) *n. 910.* — (c) *n. 907. Qu. V.*

foret in bonum publicum , ut si alter damno esset societati , aut si pactis non staret. III. Morte alterius socii , quia societas non transit ad hæredes , nisi quoad negotia jam incœpta , aut nisi adesset pactum jramento firmatum cum defuncto socio , ut dicit *Bonac.* IV. Exilio , aut professione Religiosâ. V. Si alter sociorum infirmitate , aut aliâ causâ necessariâ non posset amplius parti suæ satisfacere. VI. Si amittitur pecunia contributa. VII. Si ita res mutantur , ut societas evadat inepta fini (a).

## PUNCTUM XI.

De Assecuratione , fidejussione , pignore , hypothecâ , tutelâ , et Testamentis.

*De assecuratione* 231. *De fidejussione* 232. *De pignore , et hypothecâ* 233. *De tutelâ et curatelâ ; et an pupilli possint se obligare , et donare* 234. *De testamentis. Si constet de voluntate testatoris , etc. Si adsit tantum unus testis etc.* 235. *De legato pro virginibus. An ultimæ voluntates possint immutari à Papâ aut ab Episcopo* 236. *De obligatione legandi bona filiis , fratribus , aut aliis conjunctis pauperibus* 237. *In quibus casibus pater possit exhæredare filios* 238.

231. — **C**ONTRACTUS I. *Assecurationis* est cum quis suscipit sibi rei alterius periculum mediante aliquo justo pretio , se obligando ad eam compensandam si pereat. Ut hic contractus sit justus requiritur , ut eventus sit incertus , saltem quoad præsentem notitiam (b).

232. — II. *Fidejussio* ( vulgò *Pieggeria* ) est cum quis alienam obligationem suscipit implendam , si debitor principalis non esset solvendo. Unde prius fieri debet discussio à principali ; et si principalis ad nihil teneretur , ad nihil etiam tenetur fidejussor. Pro fidejussione semper licet accipere pretium , licet absit periculum , ut communiter DD. contra paucos ; quia

---

(a) n. 907. Qu. VI. — (b) n. 911.

assumptio talis obligationis de se est pretio æstima-  
bilis (a).

233. — III. *Pignus*, et *Hypotheca* similitudinem habent ad invicem, dùm pignus est cùm debitor dat creditori rem mobilem, hypotheca cùm dat aliquod stabile, ut sit pro debito obligatum. Creditor non potest uti pignore sinè consensu debitoris; et si illo utitur, debet in sortem commutare fructus, quos percipit. Cæterùm præsumitur præfatus consensus, cùm usus non est domino damno, ut ait *P. Viva*, prout esset liber pignori datus, et hujusmodi. Res sacræ, ut Calices, Planctæ etc. non possunt pignori, nisi ad subveniendum pauperibus, aut Ecclesiis. Item advertendum, quòd contractus dictus *Antichri- seos*, vulgò *a godere*, est illicitus (ut dictum est *num. 182.*), nisi subesset justus titulus damni, aut lucri cessantis, aut pœnæ conventionalis (b).

234. — IV. *Tutela*, aut *Curatela* sunt quidam quasi contractus, quibus tutores, et curatores obligantur sibi esse curæ pupillos, et minores, tàm quoad educationem, quàm quoad bonorum administrationem. Et hic notandum, quòd pupilli, et minores non possunt sua bona obligare (exceptis Castrensibus, aut quasi), si sunt stabilia, sinè Judicis auctoritate: et si sunt mobilia, sinè consensu tutoris, aut curatoris. Dubitatur tamen, an si ipsi obligentur, saltem remaneant naturaliter obligati? Affirmamus cum *Less. Lug. Navar. Sanch. Laym. Castropal. Salmant.* et aliis (contrà *Bonac* etc.) quoties pupillus est saltem proximus ad paupertatem, et contractus non sit cum ipso suo tutore, aut curatore, sed cum extraneis, nam in *L. Novatio*, ff. de *Novat.* hoc habemus expressum, cùm ibi dicatur, *dummodò obligatio utiliter teneat, aut naturaliter, ut putà* (notetur) *si pupillus sinè auctoritate tutoris promiserit.* Præterea advertatur, quòd pupilli, et minores non possunt donare, nisi illa quæ alii similis conditionis donare possunt; sed donatarii non tenentur restituere ac-

---

(a) *Lib. 3. n. 912.* — (b) *n. 913. ad 916.*

cepta, nisi post Judicis sententiam; nam tales donationes jam jure naturæ sunt validæ (a).

235. — V. Quoad testamenta, etiam Moralistæ fusiùs de hoc tractant, sed quia hæc potiùs ad forum, quàm ad conscientiam spectant, omissa hic facio, cum me ad ea, quæ in opere Morali dixi, remittam (b). Hic tantum aliqua, quæ Confessarium juvant scire, adnotabo. Notandum 1. Quòd cum Hæredi constat voluntas testatoris circa dispositionem piam, ipse in conscientia tenetur eam adimplere, licet nullæ adessent probationes externæ. Sed cum hoc non constat, non tenetur credere uni soli testi, licet probatissimo, qui hoc sibi testatur; quia saltem debent esse duo testes; ita habetur ex c. *Relatum* 1. de test. et C. *Licet de Vestib.* ubi dicitur: *Nulla tamen est causa, quæ unius testimonio, quamvis legitimo, terminetur.* Et hæc regula certa est, ut ait *Laym.* et recepta ab omnibus communiter (c).

236. — Notandum 2. Quòd legatum relictum virginibus debetur etiam corruptæ, si ejus corruptio est occulta, juxta communem sententiam (d). Notandum 3. Legatum relictum virginibus oriundis non dandum virginibus ibi fortuito natis, ut dicunt *Sanch. Trullench.* et *Barbosa* apud *Ferraris* (e). Notandum 4. Pias dispositiones solùm à Papâ commutari posse cum justa intercedit causa, ut exprimitur in *Clement. Quia contingit, de Domib. Relig.* non autem ab Episcopis qui, (sicut probabiliter dicunt *Laym. Bonac. Salm. et Trull.*) tùm tantùm possunt, cum superveniret talis causa, quæ si cognita fuisset à Testatore, aliter disposuisset, possunt interpretari ejus voluntatem, et applicare legatum alii usui pio (f).

237. — Notandum 5. Testatores tenentur in conscientia, et quidem sub gravi legare sua bona, non solum Hæredibus necessariis, v. g. Filiis, et Parentibus, aut avis, quoad legitimam; sed etiam fratribus, et sororibus, cum isti necessitate extremâ aut gravi laborant, ut tenendum est cum *Lugo, Bonac. Silv.*

---

(a) n. 917. et 918. — (b) *Vide* l. 3. c. IV. et n. 919. — (c) n. 924. — (d) n. 930. *Dub.* 6. — (e) apud *Ferraris Biblioth. v. Civitas* n. 71. — (f) n. 931.

*Diana*, etc. contra *Salmant.* Ratio est quia nos in vita jam tenemur diligere, et adjuvare Fratres pauperes sub gravi obligatione, ut docent communiter *Laym. Silvest. Ang.* cum ipsismet *Salm.* ob sanguinis ligamen, et ita ut si quis suum fratrem lædit, duo committit peccata, unum contra justitiam, et alterum contra pietatem. Si igitur obligatio pietatis nos in vita ligat, quidni in morte? Dixi *necessitate. extremâ*, aut *gravi*, quia si fratres essent quidem pauperes, sed non in tantâ necessitate; aut si essent conjuncti in gradu remotiori, licet isti essent in gravi necessitate, tunc probabiliter non erit obligatio gravis, sed erit saltem levis (a).

238. — Notandum 6. Quod pater potest exhæredare filios ex justâ causâ, puta si isti tentassent eum interficere, aut impedire, quominus testaretur, aut aliâ gravi injuriâ eum affecissent; secus verò, si matrimonium cum personis suæ qualitatis imparibus contraxissent. Contra est valdè probabile, quod pater possit exhæredare filiam, quæ cum esset ætate minori 25. annis luxuriosè vixisset (b). Hoc tamen intelligitur, si filia (aut filius), habeat undè vivat, quia illa cùm paupertate laborat, pater semper tenetur ei alimenta ad vitæ sustentationem necessaria ministrare (c).

---

(a) n. 946. — (b) n. 948. — (c) *Lib. 3. n. 341.*



# TRACTATUS XI.

## DE OCTAVO PRÆCEPTO.

### CAPUT UNICUM.

De judicio temerario , contumeliâ , et detractiōe.

### PUNCTUM I.

De Judicio temerario.

*De Judicio , et suspiciōe temerariæ 1. Advertenda pro praxi 2.*

1. — **J**UDICIUM temerarium tunc est peccatum mortale cū sinè sufficienti fundamento judicamus proximum aliquod grave malum commisisse. Ex quo infertur quòd hujusmodi judicia plerumque excusantur à mortali , aut quia fundamentum judicatur sufficiens , aut quia non sunt judicia , sed suspiciones , quæ quamvis sint temerariæ , non attingunt mortale , nisi dubitetur , quòd personæ bono nomine essent reæ gravissimorum criminum , uti atheismi , hæresis , incestus cum parentibus , et hujusmodi (a).

2. — In hâc materiâ igitur advertat confessarius multos rudes se accusare , quòd temerè judicarint : oportet efficere , ut ipsi sciant. 1. Cū adsunt sufficientia momenta ità judicandi de aliquâ actione , judicium non esse temerarium , sed justum adedque non esse culpabile. 2. Hæc ut plurimū non esse judicia , sed suspiciones , quas domini , et patresfamilias aliquandò tenentur habere , ut aliquod peccatum impediāt : v. g. ne servi furentur , ne filiæ

(a) Num. 962. ad. 965.

peccent cum hominibus versando, et alia id genus. Tantum advertatur, ne hujusmodi suspensiones cum aliis communicent sinè necessitate.

## PUNCTUM II.

### De Contumeliâ.

*De contumeliâ, et de honoris restitutione* 3. *Causa quæ excusat* 4. *De resseratione, et lectione epistolarum* 5. *Cui hoc permissum sit.* 6.

3. — **C**ONTUMELIA etiam est grave, cum per eam graviter læditur honor proximi coram ipsomet. Undè si publica fuit, publicè ei honor restituendus est, veniam ab eo petendo, aut saltem efficiendo ut hi sciant jam talem honoris restitutionem factam fuisse (a). Et si contumelia clàm illata est, etiam secretò compensanda est, juxtà veram, et communem sententiam *Lessii, Lug. Spor. Roncagl. S. Anton. Salm.* adversùs *Laym. et Molin.* (b).

4. — Excipitur tamen 1. Si probabiliter præsumitur, quòd offensus ex signis quæ ostendit, jam remiserit offensam, aut recuset illam publicam satisfactionem, ne novo rubore effundatur, et in hoc casu sufficiet eum alio modo honorare. Si offensus jam ultus fuerit injuriæ; aut si jam publicè in offensorem à Judice poenâ sufficienti ad reparandum honorem ablatum animadversum sit. (c).

5. — Contumeliâ etiam afficeretur proximus, si ejus literæ resignarentur, aut legerentur, nisi habeatur, aut saltem præsumatur consensus ejus, ad quem mittuntur, aut ejus à quo scriptæ sunt, ut dicunt *Lug., Busemb. Escob. Navarr.* etc. (d). Et graviter peccaret, si materia esset gravis, aut judicaret proximum ità molestè laturum, ut graviter offenderetur. Eo casu tamen si reverà materia esset levis, qui legeret non peccaret contrà justitiam, sed contra caritatem, ut rectè dicit *La - Croix* cum communi contrà *Bonac.* (e).

6.

---

(a) n. 966, et 984. ad 988. — (b) n. 985. — (c) n. 983. et 989. — (d) l. 5. n. 70, ad 72. — (e) l. 5. n. 70. v. *Ita.*



6. — Licet contrà 1. Principibus reserare literas inimicorum et etiam aliorum, qui tempore belli scribunt ad regiones inimicorum. Et idem etiam licet ministris publicis, si hoc judicant oportere ob bonum commune. 2. Prælati Religiosi possunt aperire epistolas suorum subditorum, si in hoc adest statutum aut usus; aut saltem suspicio probabilis, quòd in illis contineatur aliquid mali. Sed hoc non potest intelligi de illis epistolis, quæ directæ sunt ad Superiores majores aut ab istis datæ sunt. 3. Licet etiam privatis aperire literas suorum adversariorum, qui sibi injustæ sunt molestiæ: ità communiter *Lessius, Lugo, Laym. Sanck. Nav. Bonac. Salmant. et Ronc.* Et idem permittunt *Lugo, et Busemb.* ut evitetur injuria gravis, quæ imminet alicui Tertio (a). Si autem aliquis colligeret chartulas Epistolæ laceratæ à domino, et in publico loco relictas (non verò in occulto), et ob curiositatem eas legeret, tunc ei nullam facit injuriam (modò non patefaceret secretum cum illius damno); nam quæ pro derelictis habentur, licitum est ea in propriam utilitatem convertere; ità *Lqym. Busemb. Diana, S. Antonin. Sylvest.* etc. Et hoc quamvis (dicunt *Lugo, et Ronc.*) dominus lacerasset epistolam in minutas partes; tunc enim videtur voluisse cedere suo juri. Sed meritò contradicit *La-Croix*, cum *Rebellio*, etc. quia lacerando ille minutatim epistolam, benè significare voluit nolle eam legi, et noluisse cedere suo juri. Et hoc, quod dictum est de epistolis, valet pro omnibus aliis scripturis; quia quilibet habet jus secreti in suis scriptis, quæ non vult esse communia cum aliis; ità *Nav. Mol. Busemb.* etc. (b).

---

(a) *Lib. 5. n. 70. et l. 3. n. 969. circa fin.* — (b) *lib. 3. cit. n. 70. v. 6. v. Literas.*

## PUNCTUM III.

## De Detractione.

*Detractio quando est culpabilis 7. De arcano per fraudem cognito, etc. 8. De arcani obligatione 9. An possit publicare delictum ob defensionem 10. An propter consilium, et solamen; et an viro probò 11. Si delictum est publicum in uno loco, etc. 12. Si fuerit publicum aliquo tempore etc. 13. Si delictum est connexum 14. Si referat ut ab aliis auditum 15. Qui nominat aliquem Ordinem, aut monasterium 16. Qui inducit, aut audit detractionem 17. De famæ restitutione 18. Causæ excusantes à restitutione 19. An adsit obligatio compensandi infamationem cum pecuniâ 20. An infamatus possit sibi compensare 21. Qui sint libelli famosi, et quæ pænæ adsint contrà eos conficientes 22.*

7. — **D**ETRACTIO alterius famæ tunc est mortale, cum aut publicatur delictum falsum proximi, aut delictum verum, sed occultum, et quod brevi non est publicandum; et item cum publicatur, ut infametur; nam si manifestetur ob alium justum finem (loquendo de delicto vero) v. g. ut proximus corrigatur, aut ut evitetur damnum grave aliorum, et nullum extaret medium quo evitetur illud, tunc illud patefacere non est illicitum, (nisi in casu quo damnum infamiâ notati esset notabiliter excedens proprium damnum); quia, ut dicit *S. Thomas (a)*, illa dicitur vera detractio, quæ fit ut denigretur alterius fama, non autem illa, quæ fit ob aliud bonum necessarium: *Si verba* (sic ait *S. D.*), *per quæ fama alterius diminuitur, proferat quis ob aliquod bonum necessarium, non est peccatum, nec potest dici detractio (b).*

8. — Hic locum habet magna quæstio: an quis ad evitandum grave suum damnum, possit patefacere delictum occultum alterius, sed injustè cognitum aut vi,

---

(a) 2. 2. q. 73. art. 3. — (b) *Lib. 3. n. 969.*

aut fraude, v. gr. reserendo literas, etc.? Variæ sunt sententiæ, inter quas nobis arridet illa *Lug. Laym. Tourn. La-Croix, et Sporer*, qui negant posse hoc fieri, quia illa actio injusta obligat patrantem eam ad restituendum proximo omnia damna, quæ inde illi proventura erunt. Eo solo casu posset revelare alterius delictum, quandò ei liceret illud investigare etiam per vim, aut reserando alterius literas, ut esset, si revelatio conferret bono communi, aut si ille proximus sub gravi teneretur aperire arcanum, ut repararetur damnum, aut si ille injustam vexationem exhiberet, et alius, qui literas resignat, probabiliter putaret in illis aliquod contineri, quod directè esset causa injusta damni proprii, aut alterius innocentis; nam secus, si directè non contineretur in literis vexatio, sed ab illis posset deduci indirectè aliqua notitia, quæ sua utilitas promoveri posset, aut vitari damnum, non liceret tunc aperire literas, cum hoc sit contra bonum commune societatis humanæ, quod præferendum utique est bono privato; ita *Less. Laym. et Salmon.* cum aliis communiter (a).

9. — Hic quoque opportunè cadit, ut sciatur quandònam teneamur servare arcanum? In hoc oportet distinguere arcanum naturale à promisso, et à commissum: *Naturale* est quandò quis casu scit aliquod factum occultum: *Promissum* est cum se aliquis obligat non manifestare aliquid: *Commissum* deniquè dicitur, cum aliquis confidit alteri arcanum cum prohibitione non revelandi. Veniamus ad obligationem Arcani. *Promissum* obligat juxta intentionem committentis, sed non habet ille obligationem gravem observandi, nisi cum certum est ita se obligasse. *Commissum* (dictum etiam *Rigorosum*) obligat strictius quàm naturale, et potest tantum in sequentibus casibus aperiri. 1. Si præsumitur consensus principalis. 2. Si factum jam sit publicatum. Imò *Azor. Lugo, Ronc. Salm.* et alii dicunt non esse mortale uni, vel alteri illud communicare commissum, licèt sit de re

---

(a) n. 969. circa fin.

gravi; modò persona non sit talis, ut præcipuè illi iudicetur committens voluisse celari. 3. Si occultatio arcani, vergeret in damnum commune, vel alicujus innocentis, ac ipsius committentis : quia tunc tu benè potes detegere illud. Hùc adde ; juxtà communiozem et probabiliorem sententiam cum *Soto*, *Navar. Laym. Less. Lug. Bonac. Ronc.* etc. quòd potes detegere secretum etiam ad reparandum tuum proprium grave damnum, cùm deterioris conditionis non sis, quàm cæteri innocentes ; dummodò (limitatur) detectio non vergeret in grave damnum commune ; et modò non te obligasses illud celare etiam cum aliquo tuo damno. An autem illud possis prodere in periculo vitæ, cùm etiam in tali periculo te obligasses celare, utraque sententia affirmativa, et negativa est probabilis (a).

10. — Notandum 1. licere (ut dicunt *Lugo*, *Carden. Tournely*, et *Busemb.*) revelare aliquod verum delictum proximi, in quantum juvat, et etiam est necessarium ad se defendendum, ab aliquâ insidiâ ab illo paratâ. Dictum est verum, quia imponere delictum falsum semper est grave, uti habetur ex Prop. 44. ex damnatis ab Innocent. XI. quæ dicebat : *Probabile est non peccare mortaliter, qui imponit falsum crimen alicui, ut suam justitiam, et honorem defendat, etc.* (b). Multi DD. tamen excusant à mortali cùm quis ut aufugiat acriores cruciatus confiteatur commisisse delictum cujus immunis est ; sed hoc non admittimus cum aliis (c) ; observa id, quod dicitur in *Tract. XIII. n. 83.*

11. — Notandum 2. licere patefacere alterius peccatum in quantum conducit proprio consilio, aut levamini in aliquâ injuriâ gravi, quâ quis affectus est, ut communissimè *Nav. Bon. Sairo, Ledes. Mazzotta, Busemb. Salmant.* et alii. Et multi graves DD. ut *Less. Cajet. P. Nav. Bonac. Covar. Nav. Trullench.* etc. excusant (saltem à gravi) qui revelaret aliquod delictum secretum uni, vel alteri viro prudenti, dùm fama consistit in æstimatione hominum,

---

(a) *Lib. 3. num. 970. et 971.* — (b) *num. 972.* — (c) *lib. 4. num. 275.*

idèdque non judicatur infamatio significare illud peccatum uni, vel alteri qui illud celatum tenerent. Et hoc idem apertè sentit S. Thomas, (a) dicens: Si ex incautelâ alicui dixerit hoc (nimirum alterius peccatum), itâ tamen quòd non proveniat indè infamia delinquenti, tunc non peccat mortaliter, licèt incautè agat (b).

12. — Notandum 3. quòd cùm delictum est publicum alicubi, dubitatur, an sit gravis culpa illud manifestare alibi, etsi è non adhuc pervenerit notitia, nec brevì perventura erit? Adsunt tres sententiæ. Prima cum *Dicast. Villalob. Antoine, Tournely, Cuniliati* etc. tenet esse mortalem contrà justitiam, quia delinquens adhuc ibi suam famam possidet. Secunda cum *Lessio, Sylvio, et Bonac.* tenet esse mortalem contrà caritatem, quia licèt reus amiserit jus ad famam, validè tamen mœreret, sciendo palàm fieri suum crimen eo loco, ubi ignoratur. Tertia sententia communior, quam mordicùs tuetur *Lugo* (et vocat communem ac veram) cum *Cajetano, Anton., Ledesma, et Major*; eamque tenent *Salmant* cum *Nav. Bannez, Serra, Fill. Fagund. Macado* et aliis (c), dicit non esse gravem culpam neque contrà justitiam, neque contrà caritatem. Plures afferunt rationes præfati Auctores; sed potior ratio est; quia ad bonum commune expedit agnosci malefactores, ut ab eis alii cavere se possint; hocque commune bonum damno præponderat delinquentis. Hæc ratio utique valdè probabilis mihi videtur, semper ac crimen est tale, quod reddat reum perniciosum et vitandum, prout esset crimen latrocinii, impudicitia, homicidii, proditiõis, et similium. Nec obstat dicere, quòd reus possidendo eo loco famam suam nequit illâ expoliari per solam opinionem probabilem; nam respondetur, quòd eodem tempore quo ipsius peccatum publicum evadit, ex unâ parte jam probabiliter amittit ipse jus ad famam, et ex aliâ omnes acquirunt jus ad ipsum agnoscendum, ut evitent; et cùm jus rei evadit incertum, incerta quoque evadit possessio illius. Invenio autem quod P.

(a) *Quodlib.* 11. a. 13. ad. 3. — (b) *Vide lib.* 1. n. 37. et l. 3. num. 973. — (c) *Lugo D.* 14. num. 59. *Salm. de Rest. c.* 4. n. 61. cum aliis.

*Concina* (a) in hac quæstione distinguit, et ait, quòd cum delictum est notorium *notorietate facti*, scilicet publicè patratum, tunc patefieri potest ubicumque; cum verò notorium est tantum *notorietate famæ*, sic inquit: *Cauti omnes sint oportet, quia facile fingitur hæc publica fama*. Adverte autem, quòd delictum publicatum in unâ tantum familiâ, aut Monasterio, non potest dici absolutè publicum; undè non potest alibi manifestari, et ne in alio quidem Monasterio ipsius Ordinis, quod cum illo haberet frequentem communicationem (b).

13. — Delictum verò alicujus publicum uno tempore, non potest in alio in quo factum est occultum publicari sinè gravi culpâ, saltem contrà caritatem; excipe tunc si delictum esset publicum, non solum *notorietate facti*, sed etiam *notorietate juris*, nempe per sententiam Judicis, aut rei confessionem in judicio, ut docent *Lessius*, *Lugo*, *La-Croix*, etc. (c). Ceterum hoc non obstante, non prohibentur quin Historici delicta publica describant, etiam ex solo facto; *Sotus*, *Molina*, *Vasq.* etc. (d).

14. — Notandum 4. quòd si quis infamiâ notatus est ob unum delictum, non est grave illum infamare de alio illi connexo, aut affine, ut si dicatur de milite fornicasse, et hujusmodi. Secus verò si publicaretur aliud peccatum diversum; aut si de eo qui dicitur esse adulteratus semel, patefieret bis eum lapsus esse (e).

15. — Notandum 5. peccare tantum venialiter eum qui refert peccatum proximi, sed uti narratum ab inimicis, aut aliis modicæ fidei; aut si verisimiliter creduntur auditores non præstare fidem dictis. Sed peccabit mortaliter, si dicet à fide dignis audivisse, aut si refert delictum gravissimum; quia in hoc erit peccatum grave etiam solum suspectum fundatum præbere (f).

16. — Notandum 6. peccare eum qui detrahit famæ alicujus ordinis Religiosi, aut Monasterii alienjus Re-

---

(a) *Concina Comp. Theol tom. 1. pag. 239. num. 10.* — (b) *n. cit. 36.* — (c) *Ib. n. 36. v. Similiter.* — (d) *Vid. Salm. de Rest. c. 4. n. 37.* — (e) *lib. 3. n. 976.* — (f) *Ibid. n. 977. et 978.*

ligionis, sed etiam qui publicat delictum alicujus Religionis, nominando Monasterium aut Ordinem. Nihilominus si Ordo esset amplius, rectè ait P. *Concina*, non æstimandum grave peccatum, nec frangi sigillum, nominare Ordinem qui non est strictæ observantiæ (a).

17. — Notandum 7. peccare graviter qui inducit alterum ad detrahendum. Qui etiam non inducit, sed oblectatur de detractione ab aliis factâ, peccat etiam graviter, sed tamen contrà caritatem. Sed qui oblectaretur non de damno, quod proximus patitur in illâ detractione, sed tantum de novitate, aut curiositate, quam continet detractio illa, multi DD. excusant à gravi; modò ille non esset superior; quia graviter interest subditum detrahentem corripere. Superiores igitur peccant graviter contrà caritatem (sed non contrà justitiam) ut rectè tenet *Lugo*, *Sotus*, *Reb. Dicast.* etc. si omittunt corripere subditos detrahentes proximo de re gravi (b). Sed qui non est superior à multis gravibus DD. excusatur à peccato mortali, si ob verecundiam, aut timorem, non nititur impedire detractionem, dummodò proximo (ultrà infamiam) non imminet aliud damnum ex detractione causandum, et modò, ait *S. Thom.* (c), certè non sciat, quòd si corriperet, detractionem impediret; sed hanc certitudinem habere est moraliter impossibile ei qui non est superior, aut saltem si non multò præstat dignitate, aut nobilitate (d). Advertunt *Lugo*, *Busemb.* etc. errare eos qui statim ac audiunt loqui contrà proximum, putant illicò teneri ad correctionem; quia sæpè plus prodest proximo, ut detractio incepta terminetur, dum aliquando, expleto discursu, cognoscetur quòd res aliter sese habeat, quàm in principio apprehensa fuit. Ceterum ut ab omni scrupulo se eximat; ubi audit aliquem detrahentem, et quidem de re gravi, et occultâ, satis erit, si à circulo discedat; aut si nitatur sermonem aliò traducere; aut si ostendat sibi illud displicere, vultum aliò convertendo, aut oculos

---

(a) *Lib.* 3. n. 978. et l. 6. n. 653. in fine. — (b) *lib.* 3. n. 979. et 980. — (c) 2. 2. q. 73. a. 4. — (d) *lib.* 3. n. 3. n. 881.

demittendo, aut vultum valdè serium ostendendo (a).

18. — Notandum 8. injustum detractorem teneri ad famæ restitutionem, et etiam ad damnum illi causatum (dummodò sit saltem in confuso præcognitum); et non solùm cùm delictum impositum est falsum, palinodiam canendo apud auditores, tam mediatos, quàm immediatos (cùm immediati negligenter advertere suos auditores); sed etiam quandò est verum, prospiciendo modo quo meliori potest, dicendo v. g. *Erravi, hallucinatus sum, me fefellit, mentitus sum*; quia omne peccatum est fallacia, et mendacium; juxtà S. Joannem. Ego soleo hoc consilium dare, ut dicant: *Ex capite meo hoc erui*, vulgò (*me l'ho cavato dal capo*) æquivocando, quia omnia verba è mente (pro quâ accipitur caput) procedunt. Quod si unquàm famæ restitutio probabiliter majori damno potius, quàm utilitati infamiâ notato futura esse judicaretur, quia præsumeretur ab hominum memoriâ effluxisse (ut jam præsumitur, cùm famæ obtreptatio multo abhinc tempore acciderit, et indè hoc omninò in oblivionè jacuerit;) tunc satius est occasiones captare infamatum laudandi in aliquâ ejus virtute; ut eum in bonam aliorum opinionem ponat, quàm res præteritas hâc famæ restitutione in memoriam revocare. Confessarius attamen curet, ut hujusmodi famæ compensationes, cùm commodè fieri possunt, antè absolutionem fiant, quia postea difficulter adimpebuntur; licèt ceteroquin hæ. minùs difficultatis habeant, quàm pecuniæ restitutio (b).

19. — Deniquè notandum, detractorem plurimis ex causis posse excusari à famæ restitutione: 1. Si delictum jam ex aliâ viâ fuerit factum publicum, aut si infamatus aliis modis suæ famæ consuluerit. 2. Si prudenter præsumitur diffamatus remisisse, dùm quilibet est suæ famæ dominus, ut dicunt *Laym. Nav. Trullench. Busemb. Holzm.* etc. cum communi (c); modò intelligitur, possit remitti, dùm remittere non potest quandò ejus infamia cederet in scandalum, aut in damnum commune, aut suorum. 3. Si ob famæ restitutionem subeundum esset periculum

---

(a) *Lib. 3. n. 979.* — (b) *lib. 3. n. 992.* — (c) *lib. 3. n. 1003.*



vitæ, aut damnum multò gravius, quàm est illud infamati. 4. Si judicatur quòd detractioni præstata non sit fides, ut quandò fit in iracundiæ calore. 5. Si prudenter judicatur, quòd factum oblivione sit deletum, ut suprà dictum est. 6. Si infamatus etiam tibi detraxit, et adhuc non restituit, quia tunc juxta sententiam communiorem et probabiliorem *Soti*, *Sylvii*, *Wigandt*, *Tournely*, *Laym. Salmant.* e'c. tu potes suspendere tuam restitutionem, donec alter adimpleat suam (a).

20. — Dubitatur 1. An cùm famæ restitutio non potest fieri, teneatur detractor pecuniis compensare? Alii ut *Sylvius*, *Sotus*, etc. cum *S. Thomà* (b) probabiliter affirmant, quia fama etiam est pretio æstimabilis. Sed sententia communior, et probabilior cum *Lessio*, *Lug. Sanch. Laym. Vasq. Bon. Salm. Croix*, etc. negat, quia justitia obligat solum ad restituendum ablatum, aut æquivalens; sed fama, cùm sit diversæ speciei, quoniam ordine superior est bonis, nunquàm quocunque pretio compensari potest. Undè restitutio facta per pecuniam nunquàm erit congruens satisfactioni. cùm infamatus semper eodem modo quàm antè pretii solutionem creditor restaret (c). Observetur quod dictum fuit *Tract. X. n. 83*.

21. — Dubitatur 2. An cùm detractor non potest, aut non vult famam restituere, possit infamatus pecunià se compensare à detractore? Alii DD. negant, quia nequit fieri compensatio cum solà probabili opinione. Alii tamen affirmant, ut *Lessius*, *Molina*, *Arag. Ledes.* etc. et *Salm.* admittunt hanc opinionem uti practicè probabilem, dicentes, regulam non posse compensari cum probabili, procedere cùm debitum est dubium, non verò cùm est certum, ut certum est creditum quod habet offensus de suâ famâ, et dubium tantum versatur de modo compensandi, et hunc modum probabiliter admittunt DD. (d). Hoc non obstante adhæreo primæ sententiæ, dùm infamatus est creditor in materiâ famæ, non autem bono-

---

(a) n. 988. et 989. — (b) 2. 2. q. 62. a. ad 2. — (c) lib. 3. m. 627. et 1000. — (d) n. 100.

rum; et si probabile est, imò probabilius (ut nuper vidimus) non teneri detractorem, pecuniis compensare, cum non potest famam reparare, semper evenit, quòd infamatus compensatur ob creditum tantum probabile, non certum (a).

22. — Aliquid hìc addendum circà libellos famosos. *Libellus famosus*, sive *Infamatorius*, est, cum publicatur in scriptis aliqua gravis et occulta infamia cujusdam. Vocatur etiam libellus famosus scriptura tradita Judici absquè nomine accusatoris. Adversus eos qui hos libellos conficiunt, adest excommunicatio ferendæ sententiæ, ut habetur ex c. *Qui alterius*, 5. *Quæst.* 11. Sed latæ, si libellus sit adversus Papam, aut Cardinales; imò est reservata, si est contrà Ordines Franciscanum, et Dominicanum, aut alium communicantem; non verò si contrà aliquem particularem Religiosum. Eandem culpam et pœnam incurrunt, qui ad alicujus januam quoddam infamatorium signum appendunt (b).

## TRACTATUS XII.

### DE PRÆCEPTIS ECCLESIAE.

1. — **P**RÆCEPTA Ecclesiæ sunt multa, sed principaliora, et communiora Populo Christiano sunt quinque. 1. Sacro interesse diebus Dominicis, et Festis de præcepto (sed de hoc jam satis in tertio præcepto Decalogi). 2. Jejunare in Quadragesimâ, Vigiliis, quatuor Temporibus. 3. Abstinere à carnibus feriâ sextâ, et sabbato. 4. Confiteri saltem semel in anno, et communicare in Paschate. 5. Non celebrare nuptias temporibus vetitis, et de hoc agetur in *Tract. de Matrimonio*. Itaquè restat hìc agendum de 2. 3. et 4. Præceptis. In I. Capite erit sermo de jejuniis, et hìc etiam agetur de abstinentiâ à carnibus; in II. Capite de Confessione et Communionem annuam.

(a) Vide l. 1. n. 35. v. *Attamen*. — (b) lib. 3. n. 995.

## CAPUT I.

### De jejunio Ecclesiastico.

#### PUNCTUM I.

##### De jejunii obligatione.

*De abstinentiâ à carnibus 2. De lacticiniis 3. et 4. De larido 5. De tribus Bullis Benedicti XIV. 6. An dispensati possint vesci piscibus 7. De carne suind 8. De unicâ comestione 9. De interruptione prandii 10. De electuariis etc. 11. De potionibus 12. De vino, et birra 13. De sorbetto 14. De chocolate 15. De collatiunculâ serotinâ 16. ad 19. Si quis pluries vescitur carnibus, aut alio cibo, etc. 20. De horâ refectionis 21.*

2. — **T**RES sunt conditiones quas requirit jejunium Ecclesiasticum, abstinencia à carnibus, unica comestio, et hora refectionis. Præcipue jejunium consistit in abstinentiâ à carnibus eorum animalium, quæ in terrâ nascuntur, et respirant, juxta regulam *S. Thomæ* (a); aut communiter inter carnes, et non inter pisces reputantur juxta sententiam communem aliorum. In dubio autem an esus carnum alicujus animalis tempore jejunii sit licitus vel illicitus, nec adsit legitima consuetudo, videndum erit; ait Bened. XIV. (b) ex regulâ Angelici, *an hujusmodi animal sit simile, aut dissimile iis, quorum esus diebus jejunii interdictus est, et an illius carnes humano corpori validius nutriendo, et corroborando idoneæ dignoscantur, quemadmodum latè probat Tamburinus tùm l. 4. in dec. c. 5. §. 1. n. 10. tùm ad 4. præc. Eccl. c. 3. n. 2.* Et si ita nec quid certi definiri potest, subjungit idem Benedict. rem deferendam esse ad Sedis Apostolicæ judicium. Hinc dicunt *Bonac. Regin. Conc. Tamb. Holz. Elbel* etc. non esse vetitas testudines, ranas, limaces (vulgò dictas *Maruzze*) locustas (vulgò *grilli*), aut conchilia. Idem dicunt *Holzman*, et *Elbel*

---

(a) 2. 2. q. 147. a. 8. — (b) *De Synodo* l. 11. c. 5. n. 12.

de lutris (vulgò *Lutrie*), de castoribus, et de anatibus cujusdam generis. Contrà, aves, licèt quædam earum nutriantur in aquis, nihilominùs omnes pro veris carnibus habentur, ut sunt fulicæ, corvi marini, et similes (a). Ab isto præcepto sunt immunes amentes, et pueri antè usum rationis. An autem eximantur pueri qui antè septennium perfecto usu rationis dotati sint, vide quod dictum fuit *Tract. 11. n. 37.*

3. — In Quadragesimâ autem adultis prohibentur sub gravi, non solum carnes, sed etiam ova, et lacticinia, ut habetur ex Prop. 32. ab Alexandro VII. proscriptâ, quæ dicebat: *Non est evidens, quòd consuetudo non comedendi ova, lacticinia in Quadragesimâ, obliget.* Hic quæritur, 1. An in Vigiliis, et quatuor Temporibus extrà Quadragesimam sint universè interdicta lacticinia? Nonnulli (sed pauci) affirmant ex can. *Denique 6. Dist. 4.* ubi S. Gregorius scripsit: *Par autem est, ut jejunemus à caseo et ovis.* Et hujus sententiæ videtur esse S. Thomas (b), dicens Ecclesiam interdicere fidelibus tam carnes, quàm ova. Sed pos dicimus cum sententiâ communi, in vigiliis non vetari lacticinia, nisi ubi inolevit consuetudo abstinendi, ità *Navar. S. Antonin. Laym. Sanch. Concina*, et alii cum *Salm.* qui pro hâc re adducunt etiam Concil. Tolet. Nec obstat dictus can. *Denique*, quia ibi S. Gregorius quæsitus fuit de solo jejunio Quadragesimali, et congruè responsio arrisit petitioni; et S. Thomas de eâdem Quadragesimâ loquitur, nam de aliis jejniis disserens cit. a. 8. ad 3. dicit: *Et ideò in quolibet jejunio interdicatur esus carniû; in jejunio autem Quadragesimali interdicuntur etiam ova.* Igitur extrà Quadragesimam de jure non interdicuntur ova. Nec obstat quod exprimitur in Bullâ, *In supremâ* N. SS. P. Benedict. XIV. *In Quadragesimâ aliisque diebus carniû et lacticiniorum esus est prohibitus, dispensari contigerit*, etc. Nam, ut scripsit probabiliter quidam Auctor modernus (*P. de Petio Teatinus in Addit. ad Fel. Pot.*), per prædicta verba non reprobatur sententia contraria, cùm possint intelligi relativè ad tempus solummodò

---

(a) n. 1015. — (b) 2. 2. q. 147. a. 8.

Quadragesimale, non verò aliis : sed nodus omnis solvitur ex aliis verbis Pontificis *de Synodo* (a) ubi Pontifex sic loquitur : *In ceteris verò jejniis extra Quadragesimam ab Episcopo prohiberi non debent ova, et lactinia in iis locis, in quibus eorum usus legitimâ consuetudine jam quidem inolevit.* Si Episcopis insinuat quòd prohibere non possunt, evidens est quòd reipsâ quidem non prohibuit, nec declaravit prohibita esse, saltem ubi consuetudo viget iis vescendi (b).

4. — Quæritur 2. An ubi adest consuetudo abstinendi à lactiniis, incolæ teneantur sub gravi ab illis abstinere? Negant *Sanch. Villalob. Tamb* etc. quia de eâ non constat (uti dicunt) an introducta sit cum animo se obligandi sub gravi, uti necesse erat. Sed affirmat communis sententia, quam nos sequimur cum *Less. Laym. Conc. Salm. Bonac. Viva*, et aliis cum *S. Thomâ* (c); quia sicut diximus *Tract. II. n. 79. in fin.* cum talis abstinencia sit gravis oneris, et cum videatur itâ constanter observari, benè quidem præsumitur introducta esse, et continuata animo se obligandi; aliter faciliter cessasset, et posito quòd præsumptio stet pro obligatione, pro eâ stat possessio, et non pro libertate (d). Et idem dicemus propter eandem rationem de obligatione Monialium ad Horas Canonicas. Vide in *Appendice III. de Examine Ord. n. 61. in fine Tom. III.*

5. — Quæritur 3. An iis quibus permittuntur lactinia, permittatur laridum? Affirmant *Silvest. Osiens. Abb.* etc., et *P. Viva* appellat probabile, citans *Laym.* et *Azor.* (sed ego inveni *Laym.* omninò id improbare, et *Azorium* non dampnare tantum). *Tamburinus* cum *Diana* et *Henriq.* admittit solum cum liquefactum est, sed ego judico sequendam esse primam sententiam communem *Sanch. Bonac. Conc. Ronc. Elbel, Milante*, et aliorum qui omninò negant, quia pinguedo est vera caro (e).

6. — Quæritur 4. An dispensati ad carnes, aut ad lactinia, possint diebus jejunii vesci piscibus?

---

(a) *Lib. II. c. 5. n. 13.* — (b) *lib. 3. n. 1000.* — (c) *Cit. q. 147. a. 8. ad 3.* — (d) *lib. 3. n. 1009. Dub. III. (c) n. 110.*

Sed hic antè omnia notanda sunt ea quæ sancita sunt, et declarata à SS. P. Benedicto XIV. circa jejunium in tribus suis Bullis. Et 1. in Bullâ *Non ambigimus* datâ die 3. Martii 1741. declaratum fuit neminem posse dispensari ad carnes *sinè legitimâ causâ et de utriusque Medici consilio*, nempe Medici et Parochi, aut Confessarii; Et super declaratum fuit ad dispensandum cum integro populo, aut communitate, requiri gravissimam et urgentem necessitatem, ac dispensationem impetrandam esse à Sede Apostolicâ toties quoties opus fuerit; Et tunc sic dispensatos teneri ad unicam comestionem, ac non esse miscendas licitas atque interdictas epulas, nempe carnes, et pisces, ut declaravit in Rescripto ad Episcopum Compostellæ, quod affertur in Bullâ *Libentissimè*. 2. In Bullâ, *In supremâ* ejusdem anni, die verò 22. Augusti, declaratum fuit iisdem duobus præceptis teneri quemlibet privatum cum quo dispensatum esset, et non tantum in Quadragesimâ, sed etiam in omnibus aliis jejunii diebus. 3. In Bullâ *Libentissimè* sub die 10. Junii 1754. declaratum fuit dispensatos ad carnes in collatiunculâ serotinâ eo cibo atque portione debere uti, quibus utuntur jejunantes meticolosæ conscientiæ. 4. Debere ipsosmet observare normam præscriptam jejunantibus. 5. Cibos vetitos dispensatis ad carnes esse pisces (etiam in Dominicis Quadragesimæ); ita ut in eâdem mensâ non possint simul apponi carnes et pisces. Epulas interdictas (sunt verba Bullæ) *esse pisces, adeoque utrumque simul adhibere non posse*; subjungendo ibi, quod permittuntur pisces dispensatis ad lacticiuia.

7. — His positis, dubitabatur à quodam, an in mensâ privatâ liceret dispensatis ad carnes vesci aliquo pisce? Super hoc scripsit prænominatus de *Petio*, inhibitionem esse factam tantum pro convivii ob scandalum, non autem pro illis in mensâ privatâ qui moderatè vellent aliquo pisciculo vesci, ablato scandalo, et non ex gulâ. Sed esto istæ limitationes ponantur, attamen omninò improbabilis est talis opinio (ne dicam inventum), dum 1. Bulla loquitur generaliter. 2. Pontifex in tantum expri-

mit convivia in citatâ Bullâ, non quia præceptum cadere velit tantum super illa, sed ut ostendat quò fuisset prætergressa gulæ indulgendi licentia, ut etiam ad convivia epulæ interdictæ inferantur, quod utique temeritatem majorem sapit. 3. Relictis subtilitatibus ratiocinationibusque inanibus ex eo quòd in posterioribus Bullis statuitur, luce meridianâ clariùs videbitur longè aberasse *de Petio*. In Bullâ enim, *In Supremâ*, sic statuitur : *Nos quibuscunque..... dispensari contingerit, ab omnibus omninò, et nemine excepto (nota) unicam comestionem, et licitas, atque interdictas epulas minimè esse apponendas declaramus, atque decernimus*. Ergo sicuti nemini, sive in privato, sive in convivio licet plures comestiones adhibere, ità nec epulas interdictas (quales sunt pisces), cùm ad utrumque obliget omnes, nemine excepto; aliàs deberent excipi, qui privatim et non in convivio pisces comesturi essent. 4. Interrogatus Pontifex, quænam epulæ sint interdictæ conjungi cum licitis; Respondit, epulas licitas pro iis quibus permissum est carnes comedere, esse carnes ipsas; epulas interdictas esse pisces, adeoque utrumque simul adhiberi non posse: ergò pisces interdicti sunt iis quibus conceduntur carnes absolutè, quales sunt ii qui etiam privatim comedunt. 5. Pontifex ibidem declarat, pisces non interdici iis, qui sunt dispensati ad lacticinia; ergò sunt interdicti dispensatis ad carnes. Quid clariùs desideratur?

8. — Quæritur 5. An dispensatis ad carnes tempore jejuniorum, sit vetita caro suina? Affirmat absolutè *P. Concina* ex quodam Decreto, quod adducit Clementis XI. Romæ edito diè 24. Februarii an 1702. Sed communiter negant *Lugo, Sanch. Croix, Tamb. Salm. cum Trull. Villalob. etc.*, quia esset nimis scrupulosum (uti dicunt) imò magis molestum, quàm jejunium ipsum, si quilibet dispensatus examinare deberet, quæ carnes sibi essent nocivæ, quæ verò non. Nec obstat Edictum (non jam Decretum) præfatum Clementis, ubi duo præcepta fuerunt, unum ut dispensati tenerentur ad unicam comestionem, aliud ne iisdem permitte-

rentur carnes insalubres : non obstat dico, quia illud Edictum non fuit generale, sed particulare pro statu Romano, ut attestatur *Viva*, et alii, et ut declaravit idem Benedictus XIV. cum erat Archiepiscopus Bononiensis in *Notific. tom. 1. n. 24*. Et postea in Bullâ *Non ambigimus*, cum meminisset laudatum Edictum, licet universale fecisset præceptum unicæ comestionis, sub silentio tamen præterivit præceptum de abstinendo à carnibus non salubribus : unde argumentatur non voluisse Pontificem hoc præceptum fieri universale. Sed ut loquar in particulari de carne suinâ, non mihi videtur quod possit dici absolutè nociva, dum ista, ut scribit celebris Medicus *Hoffmanno*, maximam habet cum sanguine humano convenientiam. Sed dicet aliquis, cur talis caro interdicta fuit Hebræis, nonne quia nociva ? Sed respondetur, quod in Palæstinâ (regione valde calidâ) ibi ideò potuit ut nociva prohiberi, quia ibi sues (juxtâ *Calm. in Levit. 11. 8.*), sunt faciliores leprâ inficiari : quod in aliis partibus non ita accidit : sicut etiam vetita fuit caro leporis, sed in istis regionibus lepores certè non reputantur nocivi. Præterea *S. Thomas (a)* dicit carnes vetitas fuisse Judæis, aliæ ob nimiam humiditatem, aut siccitatem ; aliæ ob immunditiam, ut carnes suillæ ; et reverà ratio talis prohibitionis allata à Moyse est, quia illæ erant carnes immundæ Hebræis : *Horum carnibus non vescimini, quia immunda sunt vobis, Levit. 11. 8.* Dicuntur immundæ, quia ut scribit *Plutarchus, nullum animal ita gaudet cæno ac sordidis locis*. Insuper ait *Natalis de Alexandro*, et idem prius scripserat *Tertullianus (Lib. 2. contra Marcionem c. 18.)*, carnem suillam fuisse prohibitam Judæis ad frænandam gulam, et incontinentiam.

9. — Secunda conditio jejunii est unica comestio. Dubitabatur prius, an dispensati ad carnes ad illam tenerentur, eo quia cessante abstinentiâ à carnibus, cessabat quoque essentia jejunii ? Sed hodiè (ut diximus) declaratum habemus à Benedicto XIV.

---

(a) 2. 2. q. 102. art. 6. ad 1.



jejunium duo continere præcepta, undè licèt cesset primum de abstinentiâ à carnibus, non cessat secundum (licèt minùs principale) de unicâ comestione; excipitur tamen casus quo dispensatio ad carnes concedatur ob infirmitatem aut debilitatem virium, ut dicunt DD. communiter, et ut ab eodem Pontifice declaratum est in Bullâ, *In Suprema*, ubi dicitur: *Dummodò nulla certa et periculosa affectus valetudinis ratio intercedat, vel aliter necessariò fieri exigat* (a).

Tertia conditio est hora refectionis, quæ est circà meridiem. Fit quæstio an peccet notabiliter antevergens horam sinè causâ? Illud notabiliter alii intelligunt priùs quàm horam, sed alii probabilius tantùm horam. Ceterùm anticipare infrà horam omnibus licet. An autem anticipatio notabilis sit mortalis, affirmant *Azor. Sanch. Conc.* etc. Sed communius negant *Less. Tolet. Pal. Laym. Roncag. Holzm. et Salm.* cum aliis pluribus. Quia hora non est de essentiâ jejunii, sed tantùm circumstantia accidentalis, quæ licèt olim graviter obligabat, hodiè tamen, ut ajunt *Holzman, et Roncaglia*, postquam ex consuetudine mutata est hora prandii, designatio temporis, non videtur inducta tanquàm de substantiâ jejunii (b).

10. — Permittitur nihilominùs 1. interrumpi prandium ob aliquod negotium quod intercedit. Sinè causâ ceteroquin non licet prandium interrumpere, et denuò ad mensam redire; sed hoc intelligitur moraliter; nam etiam sinè causâ, et quamvis aliquis terminasset prandium, potest iterùm comedere, si commensales prosequuntur prandere, aut si in mensâ afferuntur aliæ epulæ, quæ non expectabantur; ità *Sanch. Salm. et Villalob.* Imò *Filliuc. Tamb. et Elbel* concedunt generaliter posse sumi alium cibum post sesquiquadrantem. Certum est autem per horam, sinè causâ, prandium interrumpi; sed si aliquo negotio quis intercipitur, utique potest ad horam interrumpere; Imò *Lezana, Diana, Fag. Tamb.* etc. concedunt usquè ad duas: sed id jure-

---

(a) *Lib. 3. n. 1015. in fin.* — (b) *Ib. n. 1016.*

meritò ait *Holz.* licere, cùm quis cibo sufficienti non fuerit refectus, et jejunium sinè gravi incommodo tolerare non potest, tunc potest prandium reassumere, quia Ecclesia non intendit aliquem obligare diem ducere sinè sufficiente refectione (a). Probabiliter tamen dicunt *Croix, Flagund. et Tamb.* licere prandium protrahere usquè ad duas horas; et *Elbel* cum *Gob.* admittunt usquè ad tres aut quatuor horas, saltem pro Germanicis, inspectâ eorum consuetudine (b).

11. — Permittitur 2. aliquod sumere ratione medicinæ, ut sunt electuaria (quæ sunt quædam conservæ ex saccharo et juniperis, aut cedro etc. confectæ) de quibus loquitur S. Thomas (c), et sic dicit, *Electuaria assumuntur ad digestionem, undè non solvunt jejunium, nisi fortè aliquis in fraudem electuaria in magnâ quantitate assumat per modum cibi.* Itaque licet assumere hæc electuaria ob quamlibet causam justam, nempe ad vehiculum cibi, ad stomachi roborationem, ad vocem conservandam, ad auferendum oris foetorem et hujusmodi. Ità etiam permittitur sumere parùm cibi (v. g. unciam) ad depellendam debilitatem, ut communiter *Azor. Less. Tol. Laym.* etc. Nonnulli hoc permittunt toties, quoties bibendum erit, ne potius noceat; sed hoc, ut rectè dicunt alii, vix potest permitti semel atque iterùm in diem (d).

12. — Permittuntur 3. omnes potiones, quæ per modum potûs accipiuntur, ut sunt *Caffè, et Tè, Salviæ*, etc. non autem lactis, aut juris, quia licèt hæc potiones sorbeantur, tamen non habent rationem potûs, sed cibi, et potiùs ad nutritionem, quàm ad cibi vehiculum referuntur. Et idem dicitur de succo fructuum, aut pomorum, vulgò *Melloni d'acqua* (contrà id quod quidam modernus Anonymus improbabiliter scripsit), et etiam uvarum dentibus confectarum, aut tunc pressarum (e).

---

(a) *Lib. 3. num. 1020. Qu. III. et IV.* — (b) *Ibid. Qu. V.* — (c) *2. 2. q. 47. a. 6. ad 3.* — (d) *num. 1018. et 1019.* — (e) *lib. 3. n. 1021.*

13. — Dixi *uvarum tunc pressarum*, non *vini*, quia licet antiqui fideles etiam à vino abstinerent, hodiè vinum non est prohibitum, licet biberetur ad sedandam famem, ut communiter tenent *Asor. Sanch. Less. Navar. Laym. Bonac. etc. cum Salm.* qui ob præsentem consuetudinem hanc sententiam vocant certam. Et etiam S. Gregorius tunc temporis in cit. c. *Deniquè*, dist. 4. permittebat vinum sine ullâ exceptione: *Vinum quoque ita bibere permittitur, ut ebrietatem omninò fugiamus*. Et idem dicitur de *Cervisiâ*, seu *Birrâ* (quæ conficitur ex aquâ hordeacea, et aliis ingredientibus), quæ etiam pro vero potu accipitur (a).

14. — Idem dicimus de aquâ mixtâ saccharo, et succo cinnanomi vel mali cedrini, vulgò dictâ *Sorbetto*, vel *Limonatâ*, ut docet communis sententia cum *Wigandt, Concina, Elbel, Salm. Viva, Croix, etc.* dum (ut dicunt) semper ac parva quantitas harum rerum misceatur cum magnâ quantitate aquæ, reputatur potio naturalis. Nec debet existimari quòd per congelationem mutet naturam, quia naturæ mutatio importat privationem essentiæ; sed aqua congelata in os immissa statim liquefit, et ad priorem statum redit. Et quòd congelatio non mutet naturam, etiam habemus ex Rubricâ Missæ (c. ro. n. 11.) approbatâ à S. Pio V. ubi dicitur, quòd cum in celebrando Missam congelantur post consecrationem species vini, non debent iterum consecrari, (quod utique deberet fieri omninò, si congelatio mutaret naturam specierum), sed debent liquefieri igne, et postea sumi (b).

15. — Quæstio magna est inter DD. an potio *Chocolatis* frangat jejunium. Multi negant, *Card. Brancatius, Escob. Hurtad. Holzm. Viva, etc.* modò aquæ portio sit in quantitate excedente; dicentes ex hoc sumi rationem potionis, ideòque dicunt posse sumi toties quoties libuerit in die. Alii verò affirmant, ut *Sanch. Silvius, Laym. Ronc. et Tambur.* dicentes eam potionem tantum habere rationem potûs, quæ ad alimenti vehiculum inservit,

---

(a) n. 1022. — (b) n. 1022. Qu. II.

non autem illam quæ ipsa est alimentum, ut est lac, et jus, et ita est etiam Chocolate, undè concludunt per illud frangi jejunium, nisi sumatur in parvâ materiâ. Quid ego verò sentio dicam: mihi utique *Chocolate* pro potu non probatur, dùm verè illud nutrit, et non videtur simplex potus. Sed nihilominus dico licere illud sumere ob duas rationes; prima est, quia si Chocolate non habet rationem potus, communiter tamen à multis judicatur habere rationem medicinæ, et sicut diximus cum *S. Thomâ* posse sumi electuaria, licèt nutriant, ita etiam Chocolate, et in hoc convenit etiam *P. Concina*. Secunda ratio magis universalis, quia hodie talis potio est in usu apud omnes, ut testantur *Salmant. Viv. Holzm. Tamb. et Reno.* qui, stante hac consuetudine, pro comperto habent posse licèt sumi. Sed tam ratione medicinæ, quàm consuetudinis, puto cum *Salmant. et Milanæ*, non posse permitti amplius quàm semel in die. Sed tota nunc opinionum varietas est circa quantitatem in quâ possit sumi, quin jejunium lædatur. *P. Concina* dicit posse admitti sub medicinæ ratione; sed dumtaxat in aquam ponendo parùm pulveris, quod utique est nimis rigidum, et à nemine usque adhuc assertum. Alii ut *Salm.* cum *Leone*, et *Turriano* permittunt usque ad duas uncias. Sed ut meam in medium proferam sententiam, cum Episcopo *Milanæ* rationabilissus mihi videtur, posse admitti juxtà usum communem sesquiunciam, cum eâ aquæ quantitate, quam capere potest vas usuale, quia hæc est quantitas illa, quæ communiter est in usu.

16. — Permittitur vespere refectiuncula juxtà consuetudinem, quæ hodiè viget in locis à Prælati tolerata: nam *S. Thomas* (a) de jejunio disserens, dicit: *Et hoc ipso quod Prælati dissimulant, videntur annuere.* Et in hoc certè standum magis auctoritati AA. modernorum, licèt inferiores numero, quam antiquis, qui nihil poterant attestari de consuetudinibus modernis. Nulli dubium est, quod antiquitus, jejunium rigorosius observabatur, sed juxtà modernam

---

(a) 2. 2. q. 147. a. 4. ad 5.

disciplinam ab omnibus admittitur serotina refectiuncula. In hoc debet attendi quid consuetudo permittat tam circa *quantitatem*, quam circa *qualitatem* ciborum. Circa *Quantitatem* (quicquid dicat *P. Concina*, qui nihil aliud permittit, nisi tres uncias), alii permittunt quartam partem cœnæ consuetæ: sed hæc regula mihi non probatur, quia aut potest esse nimis indulgens (saltem respectu aliquorum), aut saltem est nimis obscura, et scrupulosa. Melius igitur est sententiam sequi aliorum, communiter hodiè acceptam, uti testantur *Castropal. Ronc. Salmant. Viva, Bonac. Holzm. Tamb. Elbel, Dian. Spor. Milante, Croix, Felix Pot. Mazzot.* etc. quæ omnibus indiscriminatim (etiam illis qui parvo cibo indigent, ut etiam communiter dicunt) permittit quantitatem octo unciarum, et aliquid aliud (nempè duas alias uncias, quod est parva materia, uti dicitur *numer. 21.*) ei qui majori nutrimento opus haberet (a). In vigiliâ Nativitatis communiter admittitur collatiuncula duplò major, nempè 16. unciarum, ratione talis solemnitatis, etiamsi talis vigilia incidat in Sabbato 4. Temporum; non autem in Sabbato sancto, nec in vigiliâ Pentecostes. Nonnulli uti *Salmant.* permittunt in Vigiliâ Nativitatis usquè ad satietatem refici, dicendo talem esse consuetudinem: sed ego de illâ valdè dubito in nostris Regionibus; tantò magis quòd *P. Mazzotta, Pasqual. et Renzi* omninò eam negant. Si quis autem vellet in eadem vigiliâ anticipare collatiunculam in mane, ut cœnet vesperi, rationabiliter advertit *Sanch.* (contrà id quod sentiunt alii) non posse excedere octo uncias, quia tunc non adhuc incoepit festivitas, quæ incipit à vesperis (b).

17. — Circa autem qualitatem ciborum, certum est permitti fructus, panem, herbas, et dulciaria: sed quæritur 1. An permittantur pisces? Multi AA. ut *Sporer, Marchant. Pasqu. Elbel, Tamb. Vivald. et Burghaber*, dicunt juxtà hodiernam consuetudinem vesperi cibum sumi de piscibus etiam recentibus, et magnis, ut licet manè. Cæterùm hisce partibus recepta est consuetudo comedendi pisciculos recentes,

---

(a) n. 1025. — (b) lib. 3. ib. v. In vigiliâ.

et ut dicunt *Viva*, et *Mazzotta*; cum *Bonac.* etiam licere sumere in modicâ quantitate (v. gr. duas aut tres uncias) aliquid piscis grandioris. Idem confirmat *Milante* (a), qui testatur nunc temporis etiam Communitatibus Religiosis ministrari vespere pisciculos recentes in Quadragesimâ, et quoad majores sic scribit: *Attentâ præsentî disciplinâ, sine ullo scrupulo posse etiam magnos pisces permitti existimo, cum debito moderamine* (b).

18. — Quæritur 2. An liceat sumere 8. uncias panis in aquâ, cum oleo decocti? Nonnulli admittunt, sed hæc opinio juremeritò à *Salmanticensibus*, *Viva*, *Ronc.* *Tambur.* et ab aliis communiter refellitur, quia panis per coctionem, et fermentationem in aquâ, certam diversam naturam acquirit; nam ita consubstantiatur cum aquâ, ut numquam postea possit segregari; saltem hoc consuetudo non admittit. Vix ergò potest permitti cum *Tamb.* panem in vinum, aut aquam infundere, et illico illum sumere; quia tunc non intercedit fermentatio; aut cum *Ronc.* permitti possunt 4. aut cum *Salmanticensibus* ad summum 5. uncie panis aridi decocti in aquâ. Et idem dicendum de leguminibus aquâ elixatis. Probabiliter postea *Castrop.* *Laym.* *Bonac.* *Azor.* *Viva*, *Mazzot.* et *Salmant.* permittunt vesci juscule cocto cum oleo, aut aceto, aut vino decocto: advertendo tamen cum *Viva*, quod oleum, acetum, et vinum decoctum computanda sunt in pondus 8. unciarum, dum hæc non habent rationem potûs (c).

19. — Quoad dispensatos cum quæsitus fuisset nos-  
ter Pontifex Benedictus XIV. an ipsi in refectiunculâ possent uti carne, respondit (ut legitur in Bullâ *Libentissimè*), ita; *Non licere, sed opus habere eo cibo edque uti portione, quibus utuntur homines jejunantes rectæ, et meticulosæ conscientie.* Post hanc responsionem multi DD. dicebant dispensatos ad carnes, aut ad lacticiuia, posse in refectiunculâ casei parum (parum casei dictum est, non ovum) sumere, modò uncia, aut sesquiuncia non excederetur, et

---

(a) In *Prop. Alex. VII. Exercit. 23.* — (b) *Vide n. 1026. et 1028.* — (c) *lib. 3. n. 1029.*

hoc videbatur probabile juxtà usum qui apud multos observabatur ; sed postea cùm à quodam Confessario ad Sacram Pœnitentiariam datæ fuissent literæ de hoc , et cùm ipse Pontifex de suâ sententiâ quæsitus esset , respondit Pœnitentiaria Papam oretenus declarasse vetitum esse etiam caseum ; quam quidem Declarationem hic afferro : *Sacra Pœnitentiaria . . . optimè conscia mentis Sanctitatis suæ , de auctoritate speciali ejusdem respondit ; quòd in serotinâ refectiunculâ non licet carnem , vel lacticinia adhibere. Romæ in S. Pœnit. die 10. Februarii 1756.* Et cùm adhuc dubitatum fuisset à quibusdam de fide præstandâ huic Responso , ab eodem Confessario scriptum fuit ad ipsum Pontificem , et hoc Responsum venit : *Sacra Pœnitentiaria de mandato Sanctissimi Domini , qui suis oculis retrospectam Epistolam dignatus est legere , respondet quod Sanctitas sua dixerit . . . vera esse , et pro veris habenda esse quæ constat ab eâdem Pœnitentiariâ fuisse rescripta. Romæ die 23. Julii 1756.* , et hæc responsa originaria apud me conservantur. Nonnulli postea dixerunt præfatam Declarationem opus habere promulgatione , ut obligare possit , sed juxtà illud quod diximus *Tract. 11. num. 73. et 74.* cùm Declaratio ab ipso legislatore , qui declarat mentem suam , facta est , non indiget promulgatione (a). Et *Salmant. in Append. Tract. VI. pag. 98. num. 27.* afferentes præfatam Bullam , varias illationes deducunt , et inter eas est ista : *infertur 2. (sunt verba Salm.) nec ova , nec lacticinia esse materiam collationis serotinæ pro his qui dispensati sunt* , et hanc dant rationem ; *ex eo quòd horum ciborum ab iis qui rigorosè jejunant in tali collatione usus non adhibetur.* Nunc ad hujusmodi confirmationem notum sit nuperrimè nostrum regnantem Pontificem Clementem XIII. edidisse Bullam , incipientem , *Appetente etc.* sub die 20. Decemb. 1759. quâ Pontifex , cùm abusum aliquorum noverit sumendi extrâ prandium quasdam potiones lacte mixtas , illum condemnavit , declaravitque prædecessorem Pontificem Benedictum XIV. censuisse non licere dispen-

---

(a) lib. 1. n. 1022. v. Olim edit. Venet.

satis uti nec carnibus, nec lacticiniis, nisi in unicâ comestione, extrâ quam ipsos non aliter gerendos esse dixit, quàm alii qui nullâ Dispensatione fruuntur. Hæc verba Bullæ; *Nova infringendis jejunii legibus vel opinionum commenta, vel à vera jejunii vi et naturâ abhorrentes consuetudines humani pravitate ingenii novissimè sint invecæ, ea omnia, quantum juvante Domino fieri potest, radicitus convellenda curetis. In quibus profectò abusum illum censemus omninò numerandum, quem rumor quidam ad nos pertulit; cum nonnulli, quibus ob justas et legitimas causas ab abstinentiâ carniū dispensatum fuerit, licere sibi putant potiones lacte permixtas sumere, contrâ quod prædicto Prædecessori nostro visum fuerit, qui censuit, tam dispensatos à carniū abstinentiâ, quàm quovis modo jejunantes, unicâ exceptâ comestione, in omnibus æquiparandos iis esse, quibuscum nulla est dispensatio, ac propterea tantummodò ad unicam comestionem posse carnem, vel quæ ex carne trahunt originem, adhibere. Et quæ sint ea, quæ à carne trahunt originem, habetur à can. Deniquè Dist. 4. ubi dicitur: Quæ trahunt originem sementinam à carnibus, ut sunt ova, et lacticinia. Itaque concludendum, dispensatis in collatiunculâ nullum alium permitti cibum, nisi illum qui non dispensatis conceditur.*

20. — Si quis autem frangit jejunium, manifestare debet Confessario quomodò violavit illud, an pluris comedendo, an carne vescendo; nam quoties quis vescitur carne, aut lacticiniis toties peccat; sed si comedisset cibos communes, sed pluries in quantitate notabili, non amplius teneretur ad jejunium, ita tenent communiter Azor. Cajet. Suar. Tol. Castrop. Sanch. Laym. Anacl. Ronc. Holzm. Salmant. etc. contrâ paucos: quia essentia præcepti de abstinentiâ à carnibus consistit in abstinentiâ, quare semper durat obligatio ab illis abstinendi: sed essentia præcepti non comedendi pluries consistit in unicâ comestione, ut docet S. Thomas (a); *Ecclesiæ moderatione*

---

(a) 2. 2. q. 147. c. 6.



deratione statutum est, ut semel in die à jejunantibus comedatur. Quare, destructâ essentiâ præcepti secundâ comestione, jam præceptum solutum est; nec potest amplius observari (a). Quæstio autem fit, an qui inculpabiliter bis comedit in quantitate notabili, debeat in reliquo diei abstinere ab alio cibo? *Laym. Bonac. Castrop. Holzm. Sporer*, etc. negant eâdem ratione; sed probabilius mihi videtur oppositum *Azorii, Valent. Sa, et Nav.*, quia licet qui violat jejunium inadvertenter, jam materialiter illud frangit; nihilominus videtur, advertendo postea ad obligationem, teneri ad illud observandum, ne solvat illud formaliter (b).

Dictum est in quantitate notabili, nempe ultrâ duas uncias, quæ putatur materia parva, ut dicunt *Sanch. Viva, Salmant. Vivald. Turrian. Leone, Tambur. Leand. Spor. Busemb. Elbel*, et alii. Sed si quis pluries in die sumeret aliquid parvum, quod deveniat ad grave, peccaret graviter, ut habetur ex Prop. 39. ex damnatis ab Alexand. VII. Nota etiam quod in carne possit etiam dari parvitas materiæ, sed hæc est multò magis limitata: dicunt *Salmant. Diana, et Roncagl.* quod quantitas excedens octavam partem uncie est materia gravis (c). Permittunt *Salm.* cum *Diana* posse sumi duo crustula ex ovis, et butyro confecta (vulgò *Ciambelle*); sed melius dicunt *Ledesma, et Villal.* quod solum potest excusari ratione parvitatæ materiæ (d).

21. — Tertia conditio demùm jejunii est hora refectionis. Hæc hora olim erat hora post occasum solis. Deindè anteacta fuit ad horam Nonæ. Sed à Sæculo XIV. fuit anticipata ad horam Sextæ, nempe ad meridiem. Hinc dubitatum fuit, an notabilis hujus horæ anticipatio in refectione sit gravis culpa? Affirmat prima sententia cum *Azorio, Sylvio, Sanchez, Natal. Alex. Antoine, Franzoja, Cuniliati*, ac *Navar. Abul. Covar.* et aliis apud *Salmant. et Concinnam*, qui pro hâc sen-

---

(a) lib. 3. n. 1030. — (b) ib. Qu. II. — (c) cit. n. 1029. v. in Confess. n. 1029. Dub. IV. immin.

tentiâ refert adesse 24. Auctores (a). Id probatur ex can. Solent 50. Dist. 1. Concilii Cabilonensis, ubi dicitur : *Nullatenus jejunare credendi sunt, qui antè manducaverint quàm vespertinum celebratur officium.* Hinc clarè educitur, quòd eo tempore (in quo refectio erat præscripta ad horam Nonæ) hora jam spectabat ad substantiam jejunii. Proindè S. Thomas scripsit : *Cùm Ecclesia instituit certum tempus comedendi jejunantibus, qui nimis notabiliter anticipat, jejunium solvit* (b). Alii verò negant hodiè culpam esse gravem anticipationem refectionis, ut Lessius, Toled. Bonac. Laym. et Salmant. cum plurimis, qui observari possunt apud nostrum Opus Morale (c). Dicunt isli, juxtà præsentem consuetudinem, horam non pertinere ad substantiam jejunii. Sed hæc ratio (pace tot Auctorum) minimè suadet, nam ipsimet, ut sunt Laym., et Salmanticensés (d), non negant olim præceptum observandi horam fuisse grave, et quidem ad substantiam jejunii pertinuisse. Hoc posito, donec non probetur hodierna consuetudo antiquo gravi præcepto derogasse, illud sinè dubio possidet; sed hæc consuetudo non probatur, vel saltem non est certa, stantibus tot Auctoribus qui illam negant. Quapropter, licèt quondam secundæ sententiæ adhæsi, re tamen meliùs animadversâ, nunc illam minimè probabilem censeo. Deindè dubitatur quænam sit notabilis hæc anticipatio vetita sub gravi? hora enim jejunii moraliter mensuranda est, ut docet S. Thomas : *Ad jejunium requiritur hora determinatæ non secundum subtilem examinationem, sed secundum grossam æstimationem, sufficit enim quòd sit circà horam nonam* (e). Hinc alii dicunt anticipationem notabi-

---

(a) Azor. tom. 1. lib. 7. c. 11. qu. 4. Sylviu. tom. 3. in 2. 2. qu. 147. ad Concl. 3. Sanch. Dec. 4. c. 11. num. 51. Natal. Al. lib. 4. Reg. 13. Antoine de jejun. qu. 2. Franzoja in Bus. pag. 213. Anim. 3. Cunil. trat. 12. cap. 1. §. 2. num. 2. Alii apud Salm. tr. 23. cap. 2. num. 86. Conc. tom. 5. pag. 275. qu. 7. —

(b) S. Thom. in 4. Dist. 15. qu. 3. a. 4. qu. 3. — (c) Opus nostrum lib. 3. n. 1016. vers. Quær. — (d) Salm. loc. cit. num. 9. Laym. l. 3. tr. 8. c. 1. n. 11. — (e) S. Th. 2. 2. q. 174. a. 7. ad 2.

lem esse plusquàm hora ; idque asserunt *Salman-ticenses* ab omnibus admitti, sed *Natalis Alexand.* reprobatur. Alii verò communiter assignant, tanquàm gravem, anticipationem unius integræ horæ ; ità *Natalis Alexandr. Sylvius, Azor. Holzman, Concina, Antoine, Cuniliati, et Franzoja* locis citatis. Aliqui autem Auctores asserunt Mendicantes habere Privilegium à Leone X. anticipandi refectionem per duas horas in hyeme, et per tres in æstate. Sed *Franzoja et Natalis Alexand.* dicunt de hoc Privilegio documenta non ostendi, imò inquisitione adhibita non reperiri. Dicunt verò *Azorius, Sylvest. Palud. et Navarrus*, posse excusare à culpâ hanc anticipationem quæcunque rationabilis causa, nimirum negotii urgentis, debilis complexionis, necessitas prædicandi, docendi, vel legendi in mensâ, incipiendi iter, inserviendi hospitibus, exercendi urbanitatem cum amicis ; attamen mihi suum non est quamcunque harum causarum satis esse ad excusandum à præcepto, quod etiam hodiè est grave, sicut ostendimus.

## PUNCTUM II.

Da causis excusantibus à jejunio.

- I. De dispensatione, et qui dispensare potest 22. II. De impotentia physica 23. De impotentia morali 24. De adolescentibus, et senibus 25. III. De labore 26. et 27. De viatoribus 28. ad 30. De artificibus opulentis 31. Si artifex potest sine gravi incommodo jejunare 32. Qui sine causa suscipit aliquem laborem 33. IV. De pietate, et quis hac causâ sit excusatus 34.

22. — QUATUOR sunt causæ quæ excusant à jejunio : dispensatio, impotentia, labor, et pietas : de singulis seorsim loquamur. I. excusat *Dispensatio*. Potest dispensare in jejunio 1. Papa quoad universum populum fidelem. 2. Episcopi, sed isti cum solis suis subditis, et tantum in particulari ; nam

ad dispensandum cum integrâ Communitate circâ qualitatem ciborum, Sedi Apostolicæ reservatum est, ut declaravit Benedictus XIV. in Bullâ *Non ambigimus*. Dubitatur an Episcopus ob causam particularem possit dispensare, aut commutare jejunium universale unâ vice, aliquâ urgente causâ occurrente, v. g. si adesset periculum quòd aliàs jejunium non observaretur. Multi DD. id affirmant, ut *Azor. Sanch. Cajet. Laym. Salmant.* etc., sed Benedictus XIV. in Bullâ *Prodiit*, §. 10. dixit contrariam opinionem esse communioem, et magis in ratione fundatam, et ità ipsum respondisse aliquibus Episcopis Italiæ: Nihilominus dixit, quòd cum Pontificia auctoritas eò pertingat, quòd ordinaria nequit pervenire, idèdque Episcopis licentiam pro illo anno impertitus est, ut transferre possent vigiliam S. Mathiæ, quæ in ultimo Bacchanaliorum die contigerat (a). 3. Parochi etiam possunt dispensare in jejunio cum aliquo suo subdito, ut dictum est *Tract. II. num. 59*. Et hoc etiam præsentè Episcopo, ut communiter dicunt *Sanch. Azor. Conc. Salmantic.* etc., quia talis jurisdictio competit Parochis ob consuetudinem, quæ utique jurisdictionem confert, ex cap. *Contingat, de Foro comp.* Et idem possunt Vicarii Parochorum qui exercent actus Parochiales modo Parochus non repugnet; *Sanchez, Palat. Salmanticens.* etc. (b). 4. Prælati Regulares, etsi locales, et eorum Vicarii idem possunt cum subditis, et cum seipsis. Sed omnes isti Superiores nominati, excepto Papâ, nequeunt dispensare nisi ex justâ causâ, secus dispensatio est irrita (c). Quod autem ad subditum spectat, ait *Sanctus Thomas* (d), quòd si causa quæ à jejunio eximit, fuerit evidens, potest subditus à se eximi, præsertim cum sibi non esset facile superiorem adire (hoc intelligitur ob suæ conscientiæ majorem quietem); sed si causa est dubia, debet tunc sinè dubio ad Prælatum confugere. Hic notandum quòd si festum Patroni in aliquem diem jejunii

---

(a) *Lib. 3. num. 1032. ad 2.* — (b) *Ib. ad 3.* — (c) *Ib. ad 4.* — (d) *2. 2. q. 247. a. 4.*

inciderit, debet jejunium ad præcedentem diem transferri; sic docet Bened. XIV. in Bullâ *Prodiit*, die 30. Jan. 1751. cum *Cajet. Sanch. Consil. l. 5. c. 1. d. 5. num. 27.* et aliis communiter.

23. — II. Excusat *Impotentia*, aut physica; aut moralis. Ob impotentiam *physicam*, excusantur 1. infirmi quibus jejunium potest esse notabili nocumento; et ita pariter convalescentes, aut debiles qui nequeunt alimento sufficienti in unicâ comestione se reficere. 2. Mulieres prægnantes, aut lactantes, quibus imò non est permissum jejunare (nisi semel aut bis, si mulier est robusta); sed ampliùs in die jejunii permissum est eis vesci etiam carnibus, si qua est debilis, aut puer fuerit infirmus (a). 3. Pauperes excusantur, qui destituti sunt cibo unicæ comestioni sufficienti; ut dicunt omnes cum *S. Thomâ (b)*, qui excusat eos, *qui non possunt simul habere quod eis ad victum sufficiat.* Undè valdè probabiliter dicunt *Sanch. cum Angel. et Ronc. ac Salmanticensibus* quòd ii qui nihil aliud, quàm panem, et herbas aut legumina habent, non tenentur ad unicam refectionem; cùm hujusmodi cibi tenuis sint alimenti, et in tantum eis sufficiunt qui ad hæc obsonia sunt assueti, quia plures in die ad repletionem se reficere solent (c).

24. — Ob impotentiam *moraalem* excusantur, 1. omnes qui jejunare nequeunt sinè gravi incommodo, aut difficultate extrinsecâ. Hinc 2. excusantur illi quibus jejunium gravem capitis dolorem affert; *Castrop. Less. Sanch. Laym. Salmant.* etc. Dicunt nonnulli hujusmodi teneri manè collatiunculam sumere, et serò cœnare ad refectionem; sed probabiliter eos excusant ab hoc onere *Filkiuc. Elbel, Viva, Tamb. Fagund.* et alii multi; quia refectionem usquè ad vesperam differre nunc temporis est medium extraordinarium et difficile, cum in eo non leve perferratur incommodum: proptereaque aptiqua disciplina immutata est. 3. Milites sive in Castris, sive in Stationibus morentur, *Ronc. Concina, Pasq. Salm.* et alii communiter. 4. Uxores, si jejunando gravem pa-

---

(a) *L. 3. n. 1033.* — (b) 2. 2. q. 147. a. 4. ad 4. — (c) *n. 1034.*

terentur virorum indignationem : et viri , si aliter fiant impotentes ad reddendum conjugale debitum ; *Sanch. Cajet. Nav. Laym. Salm. Concina* , etc. Dictum est *impotentes ad reddendum* , non verò excusantur si tantum fiant minus potentes ad reddendum , vel impotentes ad petendum ; nisi casus esset quod vir , abstinendo à petitione , nequiret amovere ab uxore periculum incontinentiæ , aut suspicionem , quodd ipse aliam diligit mulierem (a).

25. — Excusantur 5. Adolescentes , qui non adhuc expleverint 21. annum. 6. Senes sexagenarii. Sed hic dubitatur an hujusmodi senes exempti sint etiamsi sint viribus validi ? Negant *Bonac. Laym. Filliuc.* etc. , sed multi probabiliter affirmant , ut *Sanch. Castrop. Azor. Ronc. Holzm. Salm. Mazzotta , Elbel , Viva* , et alii ; tum quia hæc est consuetudo universalis : tum quia esset nimis scrupulosum ei cui discutiendum esset , an ipse sit , vel ne satis robustus ad jejunium sustinendum : tum etiam quia ( et hæc est potior ratio ) hujusmodi senes ob defectum caloris naturalis nequeunt semel alimentum sufficiens sumere , egentque cibo frequentiori ; et licet nonnulli in tali ætate robusti videantur , eorum tamen robur est de facili illusivum , et inconstans , cum negari non possit horum vires in diem deficere , et in interitum prolabi , adeo ut si in morbum incidunt , difficulter convalescunt perfectè. De quâ re scripsit Galenus senibus simili ratione ac iis , qui ex morbo convalescunt , victum esse curandum (b). Et ad excusandum sexagenarium à jejuniis sufficit annum 60. esse inceptum , ut dicunt *Castrop. Angles , Sa , Naldo , Viva , Busemb. Mazzotta* , etc. , quia in favorabilibus annis inceptus habetur pro completo (c). Alii excusant à jejuniis etiam mulieres quinquagenarias , sed hæc opinio ( nisi aliqua particularis circumstantia concurreret infirmitatis , aut debilitatis ) est à multis reprobata , à *Laym. Tamb. Croix* , etc. Quare *Diana* dubitat de ejus probabilitate (d). Qui autem voveret jejunare , et expressè diceret , *usque ad mor-*

---

(a) num. 1035. — (b) lib. 3. num. 1036. — (c) *Ib. in fin.* — (d) num. 1037.

tem, aut per totum vitæ meæ cursum; (quicquid alii dicunt) nos dicimus hunc teneri ad jejunandum etiam post annum sexagesimum. Secùs verò judicandum (ut tenent *Elbel*, et *Anaclet.*) de eo qui sinè tali expressione, et nihil ad ætatem sexagenariam advertens voveret; quia supervenit notabilis mutatio, quæ, esto non fuerit prævisa, excusat à voto, juxtà dicta *Tract. V. n. 35. de Voto*. Et idem nos dicimus utendo distinctione de Jejuniis Regulæ, quæ à Religiosis promittuntur (a).

26. — III. Excusat Labor. In primis adnotanda est Prop. damnata 3o. ab Alexandro VII. quæ dicebat: *Omnes officiales qui in Republicâ corporaliter laborant, sunt excusati ab obligatione jejunii*, etc. Hæc Propositio meritò damnata fuit, quia erat nimis generalis, et juxtà eam excusaretur quicumque laborat, sive ex officio, sive animi gratiâ, sive labor sit compatibiliscum jejunio, sive incompatibilis, quod falsum est. Ceterum et hodiè nemo est qui dubitet, quin omnes artes, quæ sinè nimiâ corporis defatigatione exerceri non possunt, excusent à jejunio. Hinc ab illo excusantur fossores, agricolæ, lapidæ, figuli, textores, lanarii, fullones, bajuli, aurigæ, nautæ remigantes, fabrilignarii, ferrarii, murarii, tabellarii, sutores, furnarii, coqui qui multas dapes multis personis parant, si ferè per diem laborant, typographi prælum versantes. Servi qui occupantur in laboribus majoribus, non autem famulæ, quæ nent, vel in aliquem levem laborem incumbunt. Mercium venditores qui Urbem percursant. Ecclesiæ ornantes, scalas hùc illùc circumferendo. Sed hi omnes intelliguntur tunc excusari, cùm majorem diei partem consumunt in hujusmodi laboribus (b).

27. — Barbitonsores ordinariè non excusantur, nisi quia aliqui (ut dicunt communiter *Sanchez*, *Less. Castrop. Concina*, *Mazzotta* etc.) ob laboris quantitatem, aut ob debilitatem complexionis, jejunando suam artem exercere non possent. Idem dicimus de sartoribus cum *Roncaglia*, *Concin.* et *Salmant.* Idem quoque dicimus de Notariis, Scriptoribus, Pictoribus, et horo-

(a) num. 1038. — (b) num. 1041.

logiorum Artificibus, sed de illis nimirum qui horologia parva conficiunt, nam pro magnis labore magno opus est (a). Alii verò absolutè excusant molitores, argentarios, et sculptores. Sed pro istis pariter expendendæ sunt circumstantiæ, præ oculis semper habendo illam regulam communiter acceptam, quod qui artem exercere nequit (licèt de se non laboriosam) sinè magno incommodo, spectatâ suâ debilitate, aut aliâ particulari causâ, non tenetur ad jejunium (b).

28. — Excusantur à jejunio etiam illi qui per magnam diei partem longum iter pedestre agunt, ut sunt muliones et agasones. Advertendum tamen quòd si quis eorum, completo itinere, et aliâ refectione non sumptâ priùs, cibum quantum satis accipiat, tunc secundam refectionem sumere non potest, nisi die sequenti iter prosecuturus esset. Præterea, quisque (si commodè potest) tenetur iter differre, ne reddatur liber à jejunio, ut docet *S. Thomas* (c) quem sequuntur *Lessius Laym. Tol.* etc. et juxtâ id quod paulò post dicemus n. 33. Sed si quis jam iter incœperit, et interim dies jejunii contigerit, non tenetur iter interrompere, ut jejunet, ut dicunt communiter *Sanch. Laym. Abul. Sporer,* etc. (d).

29. — Quæritur 1. Quale iter sufficiat ad excusandum? Putat *Pasqualigus* satis esse iter septem milliariorum, sed hæc opinio ab aliis rejicitur, qui saltem requirunt iter 4. aut 5. leucarum (nempè 12. aut 15. milliariorum, nam terna milliaria conficiunt leucam unam, sive unam horam itineris, ut dicit *Croix*); itâ *Palas, Viva, Salm.-Diana* et *Trull.*, sed *Croix* cum *Bonac. Fill.* etc. requirit saltem 5. leucas. Si tamen via esset difficilis et aspera, aut iter agens esset debilis, aut itineri non assuetus, adeò ut sinè gravi difficultate jejunare nequiret, tunc dicunt *Sanch. Salmant. Ronc.* et *Croix* satis esse ad eum excusandum iter etiam sex milliariorum (e).

30. — Quæritur 2. An excusetur à jejunio iter faciens equo aut rhedâ? Ab Alexandro VII. damnata fuit hæc 31. Propos. *Excusantur absolutè omnes illi*

---

(a) *Ibid. v. Barbitonsores.* — (b) *ib. v. Alii.* — (c) 2. 2. *qu. 147. art. 4. ad 3.* — (d) n. 1047. — (e) *Ibid. v. Sed dub. I.*



qui iter agunt equitando, utcumque iter agant, etiamsi iter necessarium non sit, et etiamsi iter diei conficiant.

Ceterum communiter DD. excusant eos qui ita per plures dies iter agunt: *Laym.* et *Viva* requirunt iter octo dierum; sed hoc videtur nimis rigidum. Attamen idem *Viva* advertit non excusari à jejunio qui iter agendosinè gravi incommodo jejunare potest. Et contrà etiam rectè dicunt *Azor. Sanch. Tolet. Ronc. Salm. Croix*, etc. etiam iter unius diei posse excusare aliquem qui illud magno labore conficere deberet (ut contingit cursoribus), aut esset viribus debilis, aut tempus pluvium, et via aspera et laboriosa, aut iter esset extraordinarium. Sed iter 8. aut 10. leucarum non esse extraordinarium putant *Sanch. Tolet. Salmant. Corell. etc.* (contrà *Machado, Dianam* etc.) Rationabiliter ait *Viva* itineranti potius vescendum esse lacticiniis, et servare jejunium, quàm cibus levioribus vesci, qui eum sustentare non valent, et postea pluries refici<sup>(a)</sup>.

31. — Quæritur 3. An artifices divites artes laboriosas exercentes teneantur jejunare? Affirmat *P. Concina* cum *Durando*, et *Amilla*. Sed communiter negant *Silvest. Sanch. Nav. Less. Ronc. Tol. Viva, Salm. Elbel*, et alii plures, quia in bonum publicum vergit, ne artifices ab opere propriæ artis desistant: nam si diebus jejuniorum tantum pauperes illis deberent vacare, Respublica detrimentum sentiret. Et pro hoc omnes citati AA. afferunt expressam Declarationem Eugenii IV. an. 1440. ubi dixit: *Artifices laboriosas artes exercitantes, et rustici, sive divites, sive pauperes, non tenentur jejunare sub præcepto peccati mortalis*, etc. (b).

32. — Quæritur 4. An teneantur ad jejunium artifices qui sinè gravi incommodo jejunare possunt? Alii ut *Tamb. Pasqual.* et *Leand.* absolute id negant, tum ex consuetudine contrariâ, tum quia leges non considerant casus extraordinarios. Alii verò communis, et probabilis affirmant, ut *Bon. Regin. Conc. et Viva*, semper ac jejunando grave incommodum non patiantur: modò hoc manifestum sit, cum in dubio præsumptio stat pro exemptione à jejunio.

(a) *Lib. 3. Ib. Dub. 2.* — (b) *num. 1041.*

Hæc secunda sententia speculativè videtur probabilior, dùm lex generaliter obligat quemlibet qui sinè gravi incommodo jejunare potest, sed in praxi difficulter invenitur qui ex hujusmodi laboribus non fatigatus, aut debilis pro crastino labore, derelinquatur (a). Idem dicimus de illo artifice qui diem aut biduum vacat à labore, quia licèt sit sententia communis cum *Azorio*, *Sanch. Ronc. Bonac. Croix*, etc. quòd illo biduo non tenetur ad jejunium (in primo die ob laborem hesternum, in secundo ob crastinum), nihilominus si præciso gravi incommodo potest jejunare, tenetur, ut rectè dicunt *Bonac.* et *Viva*, contrà *Sanch.* et *Elbel* (b).

33. — Quæritur 5. An peccet qui sinè justâ causâ laborem assumit, quo liberatur à jejunio? Alii negant, ut *Ronc. Bon.* etc. modò eo fine laborem non suscipiat, ut à jejunio eximatur. Alii ut *Salm. Pasq.* etc. eum excusant, licèt in jejunii fraudem talem laborem assumat, dicentes licitè eum suo jure uti, quo liberatur à jejunio. Nos verò dicimus peccare, licèt non laboret in fraudem, et ità tenent *Palauts*, *Sanchez*, *Layman*, *Croix*, et alii, ut enim diximus *Tract. 11. n. 20.* omnis lex exposcit, ne sinè justâ causâ impedimentum apponatur, quominus observetur. Et idem apertè docet *S. Thom.* (c) dùm dicit peccare eum qui alicui operi vacat, ex quo postea impeditur à Missâ audiendâ; et rationem affert; *Qui enim vult aliquid, cum quo aliud esse non potest, ex consequenti vult illo carere.* Dictum est peccare; Ceterum si quis opus aggreditur animo jejunandi, iste postea non peccaret, si illo defatigatus jejunium solveret; nam omnes communiter *Laym. Concina, Silvest. Sanch. Palauts*, etc. conveniunt in afirmando, quòd licèt quis in fraudem præcepti aut alio fine pravo jam aliquo labore gravi defunctus est, jejunare non tenetur; quia tunc jam evasit moraliter impotens ad jejunandum. Insuper, ait *Sanchez*, quòd si quis laboraret ex aliquo fine honesto, v. g. ut videret conjunctos, ut venationi, aut ludo pilæ indulgeat, iste non peccaret: sed huic sic generatim

---

(a) *L. 3. n. 1043.* — (b) *n. 1044.* — (c) *1. 2. q. 71. a. 5.*

asserto rectè contradicunt *Abelly*, et *Sporer*, si iter, aut labor suscipiatur ex puro animi solatio. Qui verò aliquem laborem gravem aggreditur ob magnum lucrum, dicunt probabiliter *Navarr. Cajet. Laym. Sanch. Spor. Elbel*, etc. eum non peccare, licèt non laboraret, ex proprio officio (a) Hùc refertur quod dictum est *Tract. VI. n. 22*; nam juxtà *L. un. C. de sent.* magni lucri amissio pro gravi damno habetur.

34. — IV. Excusat *Pietas*, cùm v. g. deberet quis se in aliquod pium opus se applicare, quod esset majoris meriti quàm jejunium. Et hoc admittunt *Sanch. Bon. Armilla, Gabr. Salm.* etc. (contrà alios), licèt opus non exerceretur ex officio, aut obedientiâ, sed ex merâ devotione; modò in aliud tempus differri non possit (b). Hinc excusant DD. 1. Eos qui magno labore assistunt pluribus infirmis, *Castrop. Holzm. Salmant.* etc. 2. Eos qui peregrinationem aggressi sunt, quæ valdè conferret gloriæ Dei, et populi communi ædificationi, aut propriæ animæ magno profectui, ut *Sanch. Castrop. Silvest. Holzm. Salm.* etc. Modò non possint eam commodè differre, ut dictum est, et ut rectè limitant *Less. Laym. Salm. Holzm.* cùm *S. Thomâ* (c) qui sic ait: *Si peregrinatio, aut operis labor commodè differri possit, aut diminui absque detrimento corporalis salutis, non sunt Ecclesiæ jejunia prætermittenda.* Sed si peregrinatio jam incepta esset, et interim aliqua dies jejunii accideret, non debet idèò interrumpi, *Laym. Abul. Sanch. Salm. Sporer*, etc. 3. Concionatores qui in Quadragesimâ quotidie concionantur, ratione studii, et corporis agitatione; et præcipuè hoc valeret pro Missionariis, qui vehementiori agitatione prædicant. Ità dicunt communiter *Wigandt, Cajet. Nav. Tolet. Salmant.* etc. Ceterum ex me dico, quòd sacri Oratores, qui potiùs exemplo quàm verbis prædicare debent, pro viribus efficere deberent jejunium observare. Nec assentire possum (generaliter loquendo) iis DD. qui etiam excusant eos Concionatores qui ter aut quater in hebdomadâ concionantur. 4. Multi excusant cantores qui jejunando vocem amitterent,

---

(a) n. 1042. — (b) l. 3. n. 1049. — (c) 2. 2. q. 147. a. 4. ad 3.

et Lectores scientiarum (*Sanch.* addit et Magistros Grammaticæ) quia magno studio et labore indigerent. Et idem dicunt de Advocatis, et Judicibus, qui animum valde intentum deberent ad studia adungere, ut suis muneribus satisfaciant, nam isti ob spirituum consummationem opus habent cibo, sin majori, saltem frequentiori. Ità *Castrop. Ronc. Salm. Sanch. Spor. Viva*, etc. excusant Confessarios, qui extraordinarium laborem subituri sunt, ut satisfaciant Pœnitentibus qui frequenti concursu confluent. Sed benè advertit *Tambur.* omnes istos tunc excusari, cùm jejunando suas partes adimplere non possent; et eam impotentiam debere esse patentem, quia in dubio possidet lex jejunii. Insuper advertunt *Laym. Nav. Cajet. Silvest. Tol. et Sporer*, quod si quis non haberet causam sufficientem quâ excusari possit à jejunio Quadragesimali: sed contra ipse in bonâ fide putaret justam causam habere præcepto satisfaciendi ter vel quater tantum in hebdomadâ jejunando, non debet Confessarius hunc obligare, ut quotidie jejunet, cùm adest periculum, ne postea quotidie omitat jejunium.

## CAPUT II.

De præcepto Confessionis, et Communionis annuæ.

*De præcepto annuæ Confessionis; an obliget qui tantum habet venialia; et an debeat prævenire qui prævidet, etc.* 35. *An qui anno præterito neglexit Confessionem, teneatur confiteri quàm primùm; et quot peccata committit qui negligit illam* 36. *An qui confiletur anno sequenti, satisfaciat præteritæ obligationi* 37. *Pænæ in transgressores* 38. *De præcepto Communionis Paschalis* 39. *An qui eam negligit teneatur ad quamprimùm etc. ? Et an teneatur prævenire, etc.* 40. *An excommunicati, etc. Carcere detenti etc. Debet in Parochiâ fieri* 41. *A tali obligatione eximuntur Sacerdotes, Peregrini, et servi Monasteriorum* 42. *Quâ ætate, et quando pueri communicare debent* 43. *Quando amentes* 44.

35. — **E**T I. quoad Confessionem sciendum est, quod in Conc. Lateranen. sub Innoc. III. statutum

fuit, ut quisque fidelis cùm ad rationis usum pervenerit, omnia peccata sua debeat saltem semel in anno confiteri, ità in *Cap. omnis utriusque sexûs de Pœnit. et rem.* ubi hæc habentur : *Omnis utriusque sexûs fidelis, postquàm ad annos discretionis pervenerit, omnia sua peccata, saltem semel in anno, fideliter confiteatur proprio Sacerdoti.* Dicitur 1. *Omnis fidelis :* intelligitur omnis baptizatus, etsi hæreticus. Dicitur 2. *Postquàm ad annos etc.* intelligitur qui ad Dei cognitionem pervenit, saltem *crasso modo*, et si peccavit, et pœnam meritus est. Quare (ut diximus *Tract. II. n. 37.*) tenentur ad hoc præceptum, qui antè septennium peccaverunt, si jam usum rationis adepti sunt; nam Concilium obligat universè quemlibet qui jam ad annos discretionis pervenit. Dicitur 5. *Omnia sua peccata.* Hic quæstio fit, an teneantur confiteri in anno qui eo anno non peccarunt mortaliter? Affirmant *Silvester*, et alii cum *S. Bon.* Sed communis sententia et verior negat cum *S. Anton. Cano, Suar. Cajet. Lugo*, etc., quia Ecclesia, præcipiendo Confessionem, præcipit eam quæ facienda est juxtà Jesu Christi institutionem; Dominus autem non præcipit nisi Confessionem mortalium dumtaxat, ut declaravit Trident. *sess. 14. c. 5.* Et hoc deducitur ex eodem textu allato, ubi dicitur : *Omnia sua peccata fideliter confiteatur.* Dicendo *Omnia*, certè intelliguntur sola mortalia, cùm certum sit apud omnes non esse obligationem confitendi venialia omnia volenti ea confiteri. Dicitur 4. *Saltem semel in anno.* Hic annus propriè deberet incipere à Januario, et terminare in Decembri; sed juxtà communem consuetudinem accipitur à Paschate ad Pascha, ut dicunt *Suar. Lugo, Concina, Holzm.* etc. (a). Hic fit aliud dubium: Cùm quis prævidet sibi in posterum non fore commoditatem confitendi toto anno, an debeat prævenire, et confiteri antequàm finiat annus? Negant *Holzman*, sed nos affirmamus cum *Busemb.* et *Lugo* (b), quia cùm iste jam peccaverit mortaliter, jam contraxit obligationem con-

---

(a) *Lib. 6. n. 662.* — (b) *lib. 3. n. 671.*

fitendi in illo anno, quare si prævidit, quod postea non possit adimplere illud, tenetur prævenire. Dicitur 5. *Fideliter confiteatur*, idèdque non satisfit per Confessionem invalidam, et tantò minùs per sacrilegam, propterea meritò damnata est Propositio 54. ab Alexand. VII. quæ dicebat : *Qui facit Confessionem voluntariè nullam, satisfacit præcepto Ecclesiæ.* Ratio quia Confessio nulla non est vera Confessio. Dicitur 6. *Proprio Sacerdoti*, intelligitur non tantùm Parochus, sed quilibet Sacerdos ad Confessiones approbatus, ut explicat *Glossa*, et intelligunt *Pugnanus*, *Cabass.* et alii communiter. Et hoc hodiè non revocatur in dubium ex universali consuetudine, quæ adest : Idèdque S. C. anno 1584. declaravit quod si Episcopus juberet, ne quis Confessarius in Paschate audiret confessiones Pœnitentium sinè licentia Curati, talis Decreti nullam habendam fore rationem (a).

36. — Quæritur 1. An qui, cùm teneretur confiteri, elabi annum effecit, teneatur confiteri quàm primùm? Negant *S. Antonin. Sot. Silvest. Tol.* etc. dicendo quod licèt adsit præceptum Divinum confitendi pluries in vitâ, nihilominùs respectu Confessionis annualis præceptum est Ecclesiasticum, et hoc est addictum anno; quare eo transacto cessat præceptum. Sed affirmat sententia communior, quam nos sequimur cum *Gonet, Suar. Nav. Lug. Tourn.* et cum *Lambertini* (b), tùm ob præceptum Divinum Ecclesiæ determinationi relictum : et Ecclesia determinavit obligare saltem semel in anno, ut tenet sententia probabilior, et communior (c) : tùm ob præceptum Ecclesiasticum, quod impositum est, ut quisque confiteatur saltem semel in anno, non ad finiendam, sed ad sollicitandam obligationem (d). Quot autem peccata committat, qui elapso anno non confessus est. Dicunt *Silv. Laym. Valent.* etc. unum peccatum committi continuatum. Sed probabiliter dicunt *Bonac. Suar. Lugo, Vasq.* etc. toties peccari, quoties occasiones opportunæ offeruntur, et negliguntur : cùm illud peccatum non perseverat in

---

(a) *Lib. 6. n. 654.* — (b) *Notif. tom. 3. pag. 97.* — (c) *lib. 6. n. 663.* — (d) *n. 668. et n. 297.*

aliquo effectū, sed tantū in malo proposito, propter quod jam multiplicantur peccata, cū per longum tempus perdurat, ut diximus *Tract. III. num. 46.*

37. — Quæritur 2. An qui anno sequenti confite-  
tur peccata præteriti anni, satisfaciatur præcepto  
utriusque anni? Alii affirmant, alii verò negant. Sed  
verior sententia *Castrop. Viva, Hurtad. Salm.* etc.  
sic distinguit: si ipse confitetur peccata mortalia,  
tām præteriti, quām præsentis anni, tū rectè sa-  
tisfacit utrique præcepto, quia jam præcepti finem  
adimplet, qui est reconciliatio cum Deo à peccatis  
illius anni. Non itā verò si confitetur peccata gravia  
tantū præteriti anni in posteriore anno, si post  
peractam confessionem labitur in alia peccata mor-  
talia, tenetur iterū confiteri, ut satisfaciatur præ-  
cepto posterioris anni: dū communiter dicunt  
*Suar. Laym. Castropal. Salm. Lugo*, etc. quòd si  
quis in principio anni confitetur sola venialia, te-  
netur denuò confiteri. Itaque illa Confessio morta-  
lium prioris anni non habet vim satisfaciendi præ-  
cepto anni posterioris. (a).

38. — Ex lege communi ob relatum *Can. Omnis*,  
Confessionis et Communionis violantibus præceptum  
duæ pœnæ impositæ sunt, Interdicti nimirū, et  
privationis sepulturæ Ecclesiasticæ. Sed hæ pœnæ non  
incurruntur nisi post Judicis sententiam. Impuberes  
sunt universaliter excusati, ut dicunt communiter  
DD. (b). In quā occasione, et tempore præter hoc  
urgeat præceptum Confessionis, sermonem faciemus,  
cū de hoc Sacramento pœnitentiæ agetur.

39. — Quoad præceptum Communionis Paschalis,  
advertendum illud esse, tām Divinum, quām Eccle-  
siasticum. *Divinum*, propter id quod dixit Dominus  
apud Joann. 6. *Nisi manducaveritis carnem Filii  
hominis, et biberitis ejus sanguinem, non habebitis  
vitam in vobis.* Est etiam *Ecclesiasticum*, propter id  
quod in cit. *Can. Omnis* præcipitur: *Suscipiens re-  
verenter ad minis in Paschâ Eucharistiæ Sacramen-  
tum.* Et in Trident. sess. 13. can. 9. *Si quis negaverit  
omnes fideles teneri singulis annis, saltem in Paschate,*

---

(a) *Lib. 3. n. 669.* — (b) *n. 674.*

ad communicandum juxtà præceptum S. Matris Ecclesiæ, anathema sit. Annus hujus obligationis computandus est à Paschate ad Pascha, juxtà communem consuetudinem hodiè receptam. Tempus Paschale incipit à Dominicâ Palmarum, et terminat Dominicâ in Albis, ex Declaratione Eugenii IV. in Bullâ *Fide digna*, an. 1440. Episcopi tamen ex Privilegio, vel consuetudine possunt hoc tempus prorogare, prout solent (a).

40. — Sicut diximus de Confessione, ità dicimus de Communionem, quòd si quis tempore Paschali non potuit communicare, tenetur ad quamprimum communicandum; quia urget præceptum tam Divinum (ab Ecclesiâ determinatum ut observetur quodlibet Pascha), quàm Ecclesiasticum, quod assignat tempus Paschale non ad finiendam, sed ad sollicitandam satisfactionem (b). Fit dubium, utrùm si quis prævidens non posse communicare in Paschâ, teneatur anticipare Communionem: De Confessione affirmavimus, quia cum quis peccaverit mortaliter, jam obligationem contraxit confitendi intrà annum; quare prævidendo auferendam sibi fore in posterum facultatem confitendi, antequam annus spiret tenetur prævenire. Sed hoc non procedit pro communionem, ut rectè ait *Suar. Azor. Holzm.* etc. (contrà *Laym. et Habert*); quia debitum communicandi juxtà sententiam communem non incipit, nisi incepto tempore Paschali, quâ de re antè illud tempus non adhuc contracta est obligatio; et si quis prævenit non satisfacit præcepto (c); et hoc ità est, ut si quis ob impedimentum præcisum anticiparet, et postea cessaret impedimentum, etiam teneretur communicare in Paschate, ut rectè dicunt *Lugo, Salm.* etc. contrà *Tamb.* (d). Dubium minimè est, quin incepto tempore Paschali, si quis prævidet se impeditum iri communicare postea, tenetur illicò communicare (e).

41. — Notandum I. quòd excommunicati et carceribus detenti cum possint tenentur procurare ab-

---

(a) *Lib. 6. n. 256.* — (b) *n. 197.* — (c) *n. 298.* — (d) *n. 297. circa fin. v. Dicit.* — (e) *n. 298. in fin.*



solutionem, aut libertatem, quo possint præcepto Paschali satisfacere, cum illud sit præceptum Divinum, ut dictum est (a). Notandum II. neminem posse extrà Parochiam præcepto Communionis satisfacere; aut saltem extrà Cathedralē (ut probabiliter admittunt *Bonac.* et *Busemb.* contrà *Lugo*; et ipse ignoro an hoc sit satis probabile, si deest usus communis, qui præsumere faciat consensum Episcopi) sinè licentiâ Parochi, aut Episcopi, vel ejus Vicarii; sufficit tamen in hoc licentia præsumpta, seu interpretativa, ut dicunt *Suar.* *Lugo* *Salm.* *Busemb.* dummodò adsit moralis certitudo consensûs illius (b). Nonnulli affirmarunt licere Communionem paschalem fieri in Ecclesiis Regularium, ratione eorum Privilegiorum, sed communiter id reprobatum à *Suar.* *Lugo*, *Salmant.* *Tambur.* etc. cum Decr. S. C. Nec privilegia suffragantur, dùm sæpè Pontifices declararunt quoad Communionem Paschalem illæsum servandum jus Parochorum. Et præcipuè Clem. VIII. anno. 1592. postquàm declaravit Regulares quovis tempore etiam Paschali licitè posse audire confessiones sæcularium, subjunxit: *dummodò tamen Sacramentum Eucharistiæ festo Paschalis Resurrectionis in propriâ Parochiâ ab eorum Parocho sumant.* Idemque statuit Clem. X. (c). Imò apud Benedictum XIV. (d) adest Decretum Sac. Congregat. 9. Julii 1644. et confirmatum die 11. Junii 1650, quo sancitum est posse Episcopos prohibere Regularibus, ne die Paschatis ministrent Eucharistiā sæcularibus etiamsi ipsi satisfacissent præcepto Ecclesiæ. Et quamvis die 31. Junii 1687. eadem S. C. ad instantiam Parochorum Lovaniensium, qui contendebant PP. Societatis Jesu non posse ministrare Eucharistiā toto tempore Paschali, responsum fuit posse ministrare, *excepto die Paschatis*, tamen intelligendum est, præsuppositâ Episcopi prohibitione.

42. — Notandum III. à tali obligatione eximi 1. Sacerdotes, qui ubicumque celebrant satisfaciunt Præcepto, juxtà communem sententiam: si verò

---

(a) l. 6. n. 299. — (b) n. 300. — (c) *Lambertini*, Not. 18. n. 7. — (d) *De Syn.* l. 9. n. 3.

non celebrarent, tenerentur communicare in Parochiâ.  
 2. Peregrini, qui longè absunt à propriâ Parochiâ, possunt communicare in quâcumque Ecclesiâ; nec tenentur communicare in loci Parochiâ, ubi reperiuntur: ita communissimè *Cajet. Sot. Azor. Suar. Lugo, Sanch. Bonac. Castrop. Salmant.* etc. (contrà *Barb. Tourn. et Ronc*). Ratio est quia tunc illi non habent proprium Pastorem, qui eos recognoscere debet, quare penitus cessat finis communicandi in Parochiâ (2). 3. Famuli Monasteriorum, qui in eâdem clausurâ degunt, et sub obedientiâ suorum Prælatorum, ut juremeritò sustinet *Lambertini* (b) cum *Wigandt*, et pluribus Decretis S. C. contrà *Castrop. Bonac. Salm. Ronc.* etc. qui eximunt omnes qui incolunt Monasteria. Et licet Societas Jesu habeat privilegium pro omnibus domesticis, qui in suis domibus morantur, tamen P. Zaccharia (c) refert S. C. multoties declarasse hoc privilegium ad alias Religiones minimè extendi (d).

43. → Notandum IV. pueris antè usum rationis, et perpetuò amentibus prohiberi communionem ex Concilio Lateranensi. Sed quæritur, an pueri statim ac usum rationis adepti sunt, et Confessionis sunt capaces, possint, et debeant communicare? Affirmant *Palud. S. Anton.* etc. Sed communiter et probabiliter negant alii: nam cum majorem reverentiam exposcat Communio, et propterea majorem quoque expostulat cognitionem; saltem quia hæc obligatio sic à communi Ecclesiæ usu intellecta est. Cæterum valdè probabiliter dicunt *Suar. Sot. Laym. Castrop.* etc. cum *S. Thomâ* (-) quòd licet hujusmodi parvuli non teneantur, semper ac tamen discernere valeant hunc cœlestem panem à terreno, possunt admitti ad Communionem: *Quia* (ait S. Doctor) *possunt aliquam devotionem concipere.* Et id confirmatur ex *Can. penult. 26. qu. 6.* ubi dicitur; *Cui Pœnitentiæ Sacramentum conceditur, neque Eucharistiæ Sacramentum denegari debet, si desiderat.* Et illis pueris, qui

---

(a) *Lib. 6. n. 240. ad 9. v. Huic.* — (b) *Notif. 55.* — (c) *Ap. Croix lib. 6. p. 1. n. 614.* — (d) *Vide opus Ven. edit. l. 6. num. 240. ad v. 1.* — (e) *3. p. q. 80. a. 9.*

in extremo vitæ sunt constituti, non solum potest, sed etiam debet dari Communio, ut communiter præfati DD. cum Bened. XIV. (a) quia in tali articulo cum usu rationis polleant, ex præcepto Divino tenentur communicare. Extrà tamen periculum mortis, dicunt communiter DD. (regulariter loquendo) obligationem communicandi incipere ab anno nono, et non posse differri ultra 12. aut ad plus 14. ità *Suar. Laym. Antoine, Croix*, etc. S. Carolus præcepit Parochis, ut instruerent pro Communionem pueros, qui ad 10. annum pervenissent (b).

44. — Quæritur hinc deniquè an possit ministrari Eucharistia amentibus? Jam dictum est quòd perpetuò amentibus omninò neganda est Communio, etiam in mortis articulo, ut habetur ex Rituali Romano (*de Euch.*). Aliis verò, qui sunt amentes, sed non semper fuerunt rationis expertes, potest dari (ut dicit ipsummet Rituale) cum habent aliquod lucis intervallum: aut ut dicit S. Thomas, (c): *Si prius quandò erant compotes mentis, apparuit in eis devotio hujus Sacramenti, nisi timeatur periculum expuitionis*; et idem dicit Catechismus Rom. (d). Ex quo benè inferunt multi DD. sufficere ad dandam Eucharistiam fatuo in mortis articulo, ut ipse dudum piè vixerit (e). Semifatuis verò dicunt *Castr. Wigandt, Laym. Holzm. Salm.* etc. quòd tantum in vitæ extremo, et præcepto Paschali possit ministrari Communio, semper ac discernere valent à cibo terreno. Idem asserunt *Laym. Castrop. et Salmant.* de mutis, et surdis à nativitate, modò constet ex signis, ipsos intelligere in Sacramento contineri Divinam personam (f).

---

(a) *De Synod. lib. 7. c. 12. n. 3.* — (b) *lib. 6. n. 301.* — (c) 3. p. q. 80. a. 9. — (d) p. 2. n. 64. — (e) l. 6. n. 302. — (f) n. 303.

## TRACTATUS XIII.

### DE PRÆCEPTIS PARTICULARIBUS CERTO HOMINUM STATUI PROPRIIS.

#### CAPUT I.

#### *De Statu Religioso.*

#### PUNCTUM I.

#### De obligatione Professionis Religiosæ.

*Quid sit status Religiosus, et quinam possit approbare Religiones* 1. *Religiosus tenetur tendere ad perfectionem; quando peccat contra hanc obligationem, et quando peccat Prælati non corrigendo illum* 2. *Ætas, acceptatio, et spontanea deliberatio requisita ad Professionem. Causæ nullitatis etc.* 3. *An Episcopi teneantur ad Vota, et Regulas, et an fugitivi, et expulsi. Causæ expulsionis* 4.

1. — **R**ELIGIO, loquendo juxta vitæ statum definitur: *Est status ab Ecclesiâ approbatus Fidelium in communi viventium, et ad perfectionem tendentium per vota paupertatis, castitatis, et obedientiæ.* Dicitur 1. *Ab Ecclesiâ approbatus*, quia Religiones prius approbantur etiam ab Episcopis, sed à Concilio Lateranensi statutum fuit, ut in posterum approbarentur tantum à Sede Apostolicâ.

2. — Dicitur 2. *Ad perfectionem tendentium*, quia quilibet Religiosus vi suæ Professionis tenetur tendere ad perfectionem, dum tenetur observare ea quæ sunt sui statûs propria; quæ quidem sunt consilii, non autem præcepti. Ideoque graviter peccat Reli-

giosus contrà hanc obligationem, 1. Si Regulas sui ordinis violet ex contemptu, nempè si aut eas putat esse vanas, aut quia non vult se illis subijcere; ceterum, ut dicit *S. Thomas* (a) in Regulis alio modo delinquere (etiam frequenter) si illæ per se non obligant ad grave, non excedit culpam venialem. At licet Regula ad nullam obliget culpam, numquàm excusabitur à veniali, qui advertenter, et citrà justam causam eas violat; *Laym. Sanch. Valent.* et alii cum eodem *S. Thomà* (b). 2. Si suo exemplo alios inducat ad Regulæ relaxationem, aut alicujus Regulæ majoris momenti, ut est illa silentii, orationis, aut hujusmodi, cum damno gravi communis Disciplinae (c). 3. Si absolutè statuit nihili habere perfectionem. Sed quæritur an peccet graviter qui vellet observare eas dumtaxat Regulas, quæ obligant ad mortale, et alias negligere? Multi eum excusant, multi verò non. Sed scire dicit *Sanchez* difficulter futurum esse, ut iste excusetur à mortali, saltem ex aliis capitibus, nimirum ob periculum cui se exponit aut delinquendi contrà vota, aut inducendi (ut dictum est) Regulæ relaxationem in communitatem (d). Et hic advertendum quòd licet subditi non peccarent nisi venialiter, nihilominus Prælati qui negligunt eos corrigere, peccant graviter, cùm defectus sunt multi, et hujusmodi, ut possint relaxare Disciplinam, ut sunt silentii solutiones, orationis omissiones, jejuniorum, etc. Et ità peccat etiam graviter (uti dicit *P. Suarez*, et alii) qui officio fungitur Zelatoris, si nimis negligit certiolem facere Superiorem defectibus, quos observat (e). Insuper dicit *S. Thomas*, (f) Prælatum (si opus est) posse etiam Subditum verberare, et conviciis exprobrare, modò id non efficiat ex iracundià, neque coram exteris, aut novitiis.

3. — Dicitur 3. *per vota paupertatis* etc. quia Religionis essentia in illis tribus votis consistit. Hic notandum 1. ad valorem Professionis Religiosæ non requiri, ut vota sint solemnia; sunt tamen tria ne-

---

(a) 2. 2. q. 186. a. 6. ad 3. (b) lib. 4. n. 10. — (c) lib. 3. Ib. Resp. III. — (d) lib. 3. n. 11. — (e) n. 15. — (f) 2. 2. qu. 72. a. 2. ad 2.

cessaria : I. ut Subjectus sexdecim sit annos natus , et ut integrum annum in novitiatu versatus sit , et nullum habeat impedimentum ex substantialibus pro illo Ordine , quem professurus est , ut statuit Trid. *Sess. 25. c. 25. de Refor.* Et quoad Mulieres declaravit insuper S. C. ut nemini detur habitus antè 12. annos contrà *Sanch. et Villalob.* etc. Præterea , ut antequàm suscipiatur habitus , et antequàm emitatur Professio , debeat Episcopus aut ejus Vicarius voluntatem uniuscujusque puellæ explorare , secùs graviter peccaretur , licèt Professio esset valida. Et notant *Salmanticenses* , Episcopum posse explorare voluntatem puellarum etiam in Monasteriis exemptis (a). II. Requiritur acceptatio Prælati , et Capitularium , juxtà cujusque Ordinis statuta. Et error circa substantiam tam quoad partem Prælati , quàm profitentis vitiat Professionem (b). III. Requiritur ut Professio sit spontanea , et non sit facta ex timore incusso ab aliis ad hunc finem , aut timore reverentiali parentum , aut precibus importunis et sæpe repetitis , ex quibus timet Novitius gravem indignationem , nisi profiteatur (c). Qui verò Professionem nullam emisit , et Religionem vellet deserere , debet intrà quinquennium reclamare , aliàs non amplius audiretur , juxtà Trid. *Sess. 25. c. 19.* , quia præsumitur ratam habuisse. Et super hoc puncto juvat hìc notare nonnulla sancita à Benedicto XIV. in Bullâ , *Si datam* (47. in tom. 3. *Bull.* ) nempè 1. Non posse Superiorem aliquem expellere , nisi priùs cognitâ judicialiter causâ. 2. Causas nullitatis debere cognosci tam à Prælato Regulari locali , quàm ab ordinario loci. 3. Professum , non obstante quòd non reclamaverit intrà quinquennium , posse tamen à Sede Apostolicâ obtinere restitutionem *in integrum*. 4. Professum non posse statim post primam sententiam egredi à Religione , sed debere expectare secundam , si pendet appellatio (d).

4. — Notandum 2. Episcopos Regulares non remanere absolutos à votis , nisi in quantum eorum observantia repugnat statui Episcopali ; ità *S. Tho-*

---

(a) *Lib. 4. n. 5.* — (b) *n. 7.* — (c) *n. 7.* — (d) *n. 8.*

mas (a), et communiter alii ex *C. Statutum*, n. 18. qu. 1. Quapropter S. Doctor docet Episcopum Regularem non posse testamentum facere (b). Contrà verò probabilissimum est Episcopum Regularem non teneri ad Regulas sui ordinis, ut infertur ex *c. citato*, ubi sic legitur: *Monachus quem canonica electio à iugo regulæ absolvit etc.* Et sic nec tenetur aliis votis suæ Religionis propriis (c). Religiosus verò ad Parochiam promotus tenetur tam ad vota, quàm ad regulam, juxtà sententiam probabiliorem; ac tenetur deferre habitum (d). Ad hæc omnia tenentur etiam Religiosi fugitivi; et notetur quòd quicquid isti acquirunt, Monasterio acquirunt. Ejecti verò obstricti remanent voto castitatis, sed quoad paupertatem, omnium quæ acquirunt usus est ipsorum, dominium est Monasterii; Et quoad obedientiam, et regulas, ac etiam Divinum Officium, ad ea non tenentur usquè dùm erunt denuò acceptati. Causæ ejiciendi aliquem Religiosum sunt hæc: 1. Si dùm receptus fuit aliquod essentiali impedimentum reticuerit, aut aliquod defectum valdè nocivum Communitati, ut est lepra, aut aliquis morbus id genus. 2. Si aliquod infame crimen commisit, quod toti Religioni erit damno. 3. Si est incorrigibilis in aliis criminibus. Olim ob quodlibet grave delictum, licèt semel admissum, poterant Religiosi ejici; sed Urbanus VIII. anno 1644. declaravit neminem (exceptâ Societate Jesu) posse expelli, nisi sit incorrigibilis, sed ut tantùm possint puniri jejuniis, et carcere: quod semper observandum est cum Monialibus incorrigibilibus (e).

---

(a) 2. 2. q. 88. a. 11. ad 4. — (b) lib. 4. num. 2. — (c) n. 3. — (d) n. 4. — (e) lib. 4. n. 79. et seq.



## PUNCTUM II.

## De votorum obligatione.

- I. Circà votum paupertatis. De manuscriptis 5. De Peculio 6. Quando peccatur contrà votum paupertatis 7. De prohibitione donorum 8. et 9. Quanta erit materia gravis, et quando Religiosus tenetur ad restituendum 10. An sufficiat licentia præsumta 11. Quid si injustè denegata fuerit licentia? Quando Prælati negaturus fuisset licentiam, si scivisset etc. An Abbatissæ possint donare, et licentiam dare 12? Quid si Religiosus impendit in usus turpes, et vanos cum licentiâ generali 13. An Prælati possit dare licentiam exponendi ludo 14. II. Circà votum castitatis, et circà clausuram 15. III. Circà votum obedientiæ, quando obligat, et circà quæ 16. Si Capitulum præcipit pristinam observantiam. Inobedientia est duplex peccatum. An in dubio sit obligatio obediendi 17. Si præceptum sit revelandi secretum 18. Si superveniat nova circumstantia 19. Si inferior dat licentiam negatam à Superiore 20. Cui tenentur Moniales obedire 21. Quid circà electionem Abbatissæ 22.*

5. — **EX** voto paupertatis vetitum est Religiosis possidere, aut disponere quicquidlibet pretio æstimabile. Excipiuntur manuscripta, ut benè dicunt de Lugo, Tournely, Sporer, Salmant. etc. (contrà Henno) quia hæc potius sunt spiritualia, cum sint partus mentis. Et hoc probatur tam ex Brevi Benedicti XIII. ubi dictum fuit quòd Religiosi ad Episcopatum promoti, debent omnia sua bona in manus superiorum tradere, non tamen manuscripta; quàm ex aliâ Declaratione Clementis VIII. ubi habetur, quòd Religiosi possunt disponere de manuscriptis, etiam sinè licentiâ. Idem dicunt Salm. de Reliquiis sacris (a).

6.

---

(a) n. 14.



6. — Voto autem paupertatis non repugnat 1. possidere bona in communi ut docet *S. Thomas* (a), et expressum est in *Trid. sess. 25. c. 3.* et in *Extrav. Ex iis, de Verb. signif.* Non repugnat 2. peculium, sive vitalitium, quod retinent Religiosi in multis Ordinibus cum licentiâ Prælati: quia licet juxtâ *Concilium sess. 25. c. 2.* videtur non posse dubitari, quin hoc sit prohibitum, cum ibi dicatur: *Nemini liceat bona immobilia, vel mobilia... etiam nomine conventus possidere.* Nihilominus ex consuetudine, hodiè quasi universali factâ, toleratâ à S. Sede, utique licet habere peculium cum licentiâ Superiorum pro usibus necessariis et honestis, modò Religiosus sit paratus se eo privare ad Prælati nutum; dùm votum paupertatis, quamvis abrogari nequeat quoad substantiam, potest tamen (ut dicunt DD. communiter) mutari quoad modum, juxtâ consuetudinem, quæ præsumitur justa, quoties practicatur etiam à Religiosis timoratis, et tolerata est à Superioribus consciis, et cum faciliè possint, non contradicentibus. Sed hic advertendum 1. quòd si quis Prælatus permetteret sinè præcisâ necessitate usum peculii ubi non adest, ego nescirem eum excusare à culpâ gravi, non jam ob voti læsionis rationem, sed ob laxitatem, quæ ex tali usu oriretur. Advertendum 2. quòd Superiores qui in aliquo Monasterio vellent restaurare vitam communem, subditi non possunt repugnare, ut dicunt communiter *Suar. Nav. Less.* et alii; quia licet non sit contrà votum non observare vitam communem, est tamen contrà votum eam recusare; semper ac (intelligitur) à Prælatibus sufficienter prospiceretur uniuscujusque necessitatibus (b).

7. — Certum autem est Religiosum peccare contrà votum 1. si eorum; quæ ei data sunt ad aliquem certum usum, aliquid ad alium applicet, dùm neuti-quàm potest illis uti nisi in quantum concedat Superior (c). 2. Si res datas sibi usui, commodo, aut mutuo dederit aliis. Dicunt tamen *Laym. Sanch. Peyrin. et de Alexand.* in opusculo de *Monialibus*, non peccare graviter, si esset certus de restitutione

(a) 2. 2. q. 178. a. 4. — (b) n. 15. circa finem. — (c) n. 19. Tom. I.

(a). 5. Si recipit pro usu proprio, aut si consumit, aut donat aliquid sinè licentiâ Prælati, et tunc tenetur ad restitutionem. Idem erit, si sinè licentiâ recipit pecuniam, ut de ea ad proprium arbitrium disponat, licèt in opera pietatis, dùm Religiosus nequit habere neque proprietatem, neque usum rei independentem à Prælato; vide *Rodriguez*, p. 3. tr. 3. c. 1. cum *Azor*. Idem pariter dicendum, si occultat aliquid, ut subtrahat illud à Prælati dispositione. Idem quoque, si remittit debitori aliquid de eo quod ipse jam acquisivit, vel si remisit aliquam hæreditatem, aut legatum sibi relictum; non autem si nollet acceptare aliquam donationem sibi factam; ratio, quia Religiosus, antequàm donationem acceptet, nullum super eam jus acquirit; sed super hæreditatem, aut legatum Religioso relictum, mortuo Testatore, statim Monasterium jus acquirit, ut communiter dicunt *Lugo*, *Sanch. Tourn.* etc. Posset in hoc peccare tantum contrà caritatem, impediendo bonum sui Monasterii; non verò contrà votum, quod obligat non alienare acquisitum, non autem ad acquirendum.

(b). Sicut autem negatur Religioso posse donare sinè licentiâ, ità et testari. Dicit tamen *P. de Alexand.* quòd si Religiosus ex licentiâ relinquit aliquid alicui, secutâ ejus morte, et Prælatus promittit adimplere illius voluntatem, tenetur Prælatus stare promissis, sicut tenetur dominus servare promissa facta servo, ut dicunt *Lessius*, et *Sanch.* (c).

8. — Sed loquendo præcipuè de donis, refert hic adnotare quæ statuit Clemens VIII. in suâ Bullâ *Religiosæ* 28. I. Prohibuit Religiosis subditis, et superioribus sub pœnâ privationis officii, et vocis activæ et passivæ, et inhabilitatis ipso facto incurrendæ, quicquidlibet donare sive nomine proprio, sive Conventus, etiam suis Religiosis, aut Prælati, nisi adsit consensus Capituli Generalis, præter esculenta, et poculenta, aut res devotionis modici pretii, aut si daretur aliquid in eleëmosynam necessariam, aut si exerceretur hospitalitas: sed omnia hæc cum licentiâ Superiorum. II. Prohibuit Superioribus parare convivium contraria frugalitati religiosæ ob quamcumque

---

(a) n. 27. — (b) n. 20. — (c) lib. 3. n. 21.

personam, aut festivitatem. III. Statuit ne quisquis accipiat dona contrà præfatam Bullam, acquirat ullum dominium, sed ut teneatur restituere Monasterio, et ne absolvi possit, nisi priùs restituat; æ ne talis restitutio possit condonari, aut fieri pauperibus. Sed Urbanus VIII. in Bullâ *Nuper* 158, licet confirmasset, et innovasset Bullam Clementis; attamen aliquibus moderationibus eam temperavit. I. Quoad dona, permisit ea quæ fiunt *propter actum virtutis, et meriti*, nempe propter remunerationem sive gratitudinem, aut propter eleëmosynam (quæ reverà, ut dicit *La-Croix*, non venit sub nomine *munerum*), sed etiam cum consensu Prælati Localis, dicendo sufficere licentiam oretenùs datam. II. Quoad convivia, permisit ea quæ fiunt in adventum Ordinariorum, aut benefactorum, modò non adversentur decentiæ Religiosæ. III. Quoad restitutionem donorum, dixit posse eam fieri etiam Monasterio propinquiore, si commodè non posset fieri proprio. Et huc notandum cum *Auctore Instructionum Confess. Nov.* (a), hunc casum de recipiendis donis à Religiosis contrà Bullam Clementis esse reservatum Papæ (licet sinè censurâ); dùm Urbanus statuit ne Confessarii ordinarii possent absolvere præfatum casum post publicationem suæ Bullæ, et si donum excederet decem scuta, qui dona recepit ne posset quidem absolvi à Sacrà Pœnitentiariâ, nisi factâ priùs restitutione doni; quod etiam confirmatum fuit à Bened. XIV. in Bullâ *Pastoralis*, an. 1744. (b).

9. — Multi DD. apud *Salmant.* (c) dixerunt Bullam Clementis non fuisse receptam, aut saltem abiisse in desuetudinem, ideòque non obligare. Idem postea dixerunt alii (qui valde adhærent *Salmanticensibus*) de Bullâ Urbani, dicendo, quòd cum ista sit declarativa illius Bullæ Clementis, et novum jus non constituat, sicut hodiè non obligat illa Clementis, ita pariter nec obligat hæc Urbani. Sed hæc opinio nescio quomodò sustineri possit, ut benè advertit *Instructor Confessariorum Nov.* (d). Urbanus

(a) *Part. 2. n. 439.* — (b) *lib. 7. n. 470. ad n. 11.* — (c) *lib. 3. tr. 13. de Rest. c. 6. n. 10.* — (d) *Part. 2. n. 439.*

enim non solum declaravit ac moderavit Bullam Clementis, sed etiam eam confirmavit, et innovavit, et damnavit omnem contrarium usum usque tunc introductum. Dicunt tamen *La-Croix*, et *P. Mazzotta* (a) quod cum illæ Bullæ emanatæ fuerint ad impediendam ambitionem, et bonorum dispositionem, non incurruntur illæ pænæ in iis appositæ; si dentur duo scuta, quia respectu pœnarum præscriptarum non reputatur gravis talis summa. Nec prohibentur convivia, et donationes moderatæ ex justâ causâ, v. g. ut animi erga Monasterium alliciantur, ad hoc ut ab aliquâ vexatione eximatur, aut obmeram benevolentiam, ut dicit *Croix*. Quanta verò sit summa quæ hodiè permittitur superioribus, aut subditis, ut possit donari, dicunt hoc dependere ab usu approbato, juxta quem in quodlibet Ordine præfatæ Bullæ receptæ sunt.

10. — Discutienda remanent multa dubia super hâc materiâ. Dubitatur 1. Quæ quantitas à Religioso impensa sinè licentiâ sit gravis? Aliqui dicunt idem judicium ferendum esse de Religiosorum furtis respectu Monasterii, ac de furtis filiorum respectu parentum. Sed rectè hoc non admittunt *Sanch.* et *Lugo*, quia filii sunt capaces possidendi, non autem Religiosi; et item sunt magis inviti Prælati in furtis Religiosorum, quàm parentes in furtis filiorum. Cæterum dicunt DD. communiter, quod ut sit grave furtum Religiosi de bonis Monasterii, requiritur major quantitas quàm in aliis furtis. Circà hoc variæ sunt opiniones: *Azorius*, *Nav.* *Castrop.* *Sanch.* etc. assignant pro materiâ gravi 4. scuta, et quid ampliùs pro Conventibus ditioribus; sed hæc opinio videtur nimis indulgens. *Sotus*, et *Rodriguez* assignant duo scuta pro materiâ gravi, et *Croix* (b) habet uti certum. *Lugo* putat esse materiam gravem sex carolenos, et octo pro Monasterio opulento, et si Religiosus accipit de portione suo usui assignatâ; sed si daret aliis Religiosis Monasterii, ampliât usque ad

---

(a) *Croix* l. 3. part. 2. n. 808. et *Mazzot. de Donat. tom. 2. pag. 54. c. 4. §. 1.* — (b) *lib. 3. part. 2. n. 808.*

5. scuta, modò non sint pecunia. Admittunt postea *Sanch. Bonac. Salm.* etc. non esse culpam gravem accipere res comestibiles multis vicibus, et in materiâ levi, licèt postea devenirent ad materiam gravem, cùm præsumentur Prælati non esse graviter inviti; modò (limitant) damnum Conventûs non sit multum, et non sit de rebus pretiosis (a). Cùm autem materia est gravis, an teneatur Religiosus ad restituendum, si nihil aliud habet quàm solam portionem Monasterii, quæ sibi usui contigit; alii affirmant, sed alii negant, ut *Peliz. de Leone, Fagundez; Salm.* etc., quia non præsimitur (ut dicunt) Prælatus velle obligare suum subditum ad restituendum cum tanto incommodo. Et hoc non videtur improbabile in casu quo illa portio est absolute necessaria Religioso pro suis usibus ordinariis (b).

II. — Dubitatur 2. An ad non lædendam paupertatem sufficiat licentia præsumpta? Nulli dubium est quòd sufficit tacita, sive præsumpta de *præsenti*, ut esset si superior jam videret id quod Religiosus impendit, aut accipit, et cùm posset faciliter prohibere, non prohiberet (quamvis, rectè ait *Tourn.*, hæc non possit esse regula generalis): aut, ut dicunt *Sanch. Castrop. Pelliz. Salm.* etc. si in illâ Religione adesset aliqua consuetudo recipiendi, aut impendendi aliquid sinè licentiâ, et Prælatus tolerasset (c); ratio est, quia in hujusmodi casibus licentia tacita æquivalet expressæ. Major difficultas est, an sufficiat licentia præsumpta de futuro, sive *ratihabitio*, nempe quòd si Religiosus eam peteret, utique Prælatus annueret? Hanc non admittit *Sanch.*, sed eam admittunt *Suar. Azor. Nav. Valent. Holzm. Elbel*, et alii, et non improbabiler, quoties præsumptio est rationabilis; quia tunc subditus jam procedit cum dependentiâ à voluntate superioris, et hoc efficit quòd ipse liberetur à culpâ proprietatis. Et pro hâc sententiâ est *S. Thomas* etiam (d), qui dicit quòd Religiosus non potest facere

---

(a) *Lib. 4. num. 24.* — (b) *num. 26.* — (c) *lib. 4. num. 17.* —  
 — (d) *2. 2. qu. 32. art. 8. ad 1.*

eleëmōsynas *sinè licentiâ Abbatis, vel expressè habitâ, vel probabiliter præsumptâ*. Et quòd S. Doctor intelligit de præsumptione non de *præsenti*, sed de futuro, quæ est ratihabitio, se explicat alibi, (a) ubi sic dicit : *Non esse proprietarium Religiosum, qui donat aliquid ponens spem in ratihabitione Prælati*. Ceterùm tales subditi dispositiones ex licentiâ præsumptâ, ut plurimùm sunt illicitæ saltem venialiter; quia superiores, saltem quoad modum, sunt inviti, et non rarò etiam graviter, et præcipuè quandò illæ sunt expressè ab ipso prohibitæ (b).

12. — Dubitatur 3. An Prælato immeritò licentiam negante, excusetur subditus à voto paupertatis? Respondetur negativè: modò (limitatur) periculum damni non sit ita in morâ, ut subditus habeat tùm jus ad concessionem licentiæ, quia in tali casu præsumitur saltem adesse licentia superiorum majorum; et in aliquo casu potest judicari votum non obligare; ita communiter *Castrop. Holzm. de Alex.* et alii cum *S. Thomâ* (c) ubi sic dicit : *Si verò sit subitum periculum, non patiens tantam moram, ut ad superiorem recurri possit, ipsa necessitas dispensationem habet annexam; quia necessitas non subditur legi* (d). Dubitatur 4. An possit subditus cum licentiâ dare aliquid alicui, qui si notus fuisset Prælato, licentia data non fuisset? Si præsumeretur, quòd Prælatus licentiam revocaturus esset, non potest; secùs si præsumeretur, quòd non revocaturus esset, si sciret, licèt à principio eam fuisset negaturus. In dubio autem ad superiorem recurrendum est; sed in casu quo esset difficile superiorem adire, præsumptio stat pro licentiâ jam datâ; ita *Molin. et de Alexand.* (e). Dubitatur 5. An Abbatissæ possint donationes (intellige licitas) facere, et licentias dare aliis eas faciendi? Respondetur affirmativè, semper ac sunt moderatæ, et rationabiles, quia Abbatissæ jam habent honorum administrationem. Possunt etiam de redditibus eleëmōsynas facere, et possunt etiam Ecclesiis appli-

---

(a) *In 4. Dist. 15. qu. 2. art. 5. qu. 4.* — (b) *lib. 4. num. 18.*  
 — (c) *a. 2. q. 96. art. 6. in fin.* — (d) *lib. 4. n. 33.* — (e) *n. 34.*

care, et ampliare ædificia domûs, aut Monasterii redditus adaugere (a). Quosnam autem contractus, aut condonationes possit facere Abbatissa, et ejus Capitulum, vide quod dictum est in Opere. (b).

13. — Dubitatur 6. (et hoc punctum maximi ponderis est) An Religiosus habens licentiam generalem à suo superiori aliquid expendendi pro suo libitu, si expendat illud in usus turpes aut vanos, peccet contrà votum, et teneatur ad restitutionem tam ipse, quam summam recipiens? Affirmat prima sententia, quam nos sequimur, et est communissima cum *Castrop. Sanch. Silvest. Molin. Salmant. Roncaglia* etc. tum quia Prælatus, dando licentiam, non intendit eam dare ad usus illicitos; tum quia, licet intenderet, licentia esset invalida, cum Prælatus non sit dominus, sed simplex administrator bonorum Monasterii. Contrà secunda sententia negat, quam tuentur *P. de Alexand. Rebell. Bard. et alii*. Hi dicunt, cum licentia est illimitata comprehendit usus tam licitos, quam illicitos, et licet Prælatus sit simplex administrator, nullà lege tamen habetur quòd ejus facultas restringatur ad solos usus licitos; hinc licet ejus licentia esset illicita, tamen non est invalida. Sed Prælatus (subjungunt) dando licentiam, non est quòd velit illam concedere etiam ad usus turpes, nec quòd limitet ad solos honestos, sed aufert de medio impedimentum quod subditus habebat, ne talem summam suo libitu expenderet defectu licentiæ. Et licet licentia Prælati esset invalida, dicunt saltem præsumi rei restitutionem remissam esse à Religione, ne fama subditi, aut Prælati, aut personæ quæ talem summam accipit, periclitetur. Sed hoc non obstante à primâ sententiâ desciscere nescio, quia satis mihi non probatur, quòd Prælatus possit unquam hanc licentiam, sive specialem, sive generalem, concedere ad usus illicitos; dum super bonis Monasterii non habet aliam facultatem, quam eam quæ sibi à sacris Canonibus, aut à Religione conceditur; et hanc facultatem ei nec Canones, nec Religio con-

---

(a) n. 36. — (b) *Ibid v. Potest.*

cedunt, quæ non præsumitur dare eam in perniciem suorum subditorum. Quoad restitutionem, dicunt *Sanch. Molin. et Salm.* cum aliis, sufficere, ut ille qui rem recepit restituat ipsimet Religioso, modò ille non sit denuò illâ abusurus. Sed hoc non potest convenire cum Bullâ Urbani superiùs allatâ, ubi præcipitur, ut restitutio fiat Monasterio. Insuper dicunt *Castrop. Salm.* etc. quòd si mulier ob turpem sui corporis usum acceperit à Religioso, excusatur à restitutione, si propter ipsam honor Religionis, vel Religiosi periclitaretur. Sed hoc periculum mihi videtur esse valdè difficile eventum. Excusant etiam mulierem, si præsumi posset quòd Religiosus intenderet ei donare illam rem, quam deberet restituere ex eo quia illa est pauper : dùm Religiosus tùm eam expendit in usus honestos. Sed huic etiam obstant præfatæ Bullæ, cùm præcipiatur ut restitutio fiat Monasterio; et ut à Conventu non possit remitti, nec concedi ut fiat pauperibus (a).

14. — Dubitatur 7. An Prælati possit dare licentiam Religioso, ut aliquam summam ludo exponat? Potest utique, si ludus est licitus, solatii nimirum, et non meræ sortis, et si summa est modica, et Religiosus non sit strictioris observantiæ, ut diximus *Tract. X. n. 220.* Et ut dicunt *Azor. Less. Mol. et, Salmant.* in hoc potest Religiosus uti etiam licentiâ tacitâ, aut præsumptâ. Si verò summa est magna, aut ludus est per se illicitus, jam numero præcedenti diximus invalidam esse licentiam sive generalem, sive expressam (b).

15. — Quoad votum castitatis, jam notum est quòd quilibet Religiosus qui illud lædit, peccat etiam sacrilegii, et scandali prætereà, si ob ejus peccatum aliquod famæ detrimentum Religio passura esset. Ob castitatis tutelam introducta est clausura, non tantum pro Monialibus, sed etiam pro Religiosis, qui per Clementinam *Nullus*, non possunt è Monasterio egredi nisi ex causâ, et cum socio, et cum licentiâ Prælati, singulis vicibus dandâ in particulari, non

(a) *Lib. 4. n. 30. et 31.* — (b) *lib. 4. n. 32.*



generali. Et communiter dicunt DD. hujus præcepti transgressionem esse gravem, nisi esset semel atque iterum (nunquam de nocte) et præciso scandalo (a).

16. — II. Quoad votum obedientiæ debent notari multa. Notandum 1. Quòd si Prælatus non exprimit præceptum, dicendo, *Impono, Jubeo*, etc. non inducitur præcisè obligatio obediendi; ità *Salmant.* cum *Suar.* et *Pelliz.* Sed addo ego, oportere distinguere consuetudinem uniuscujusque Instituti; nam in aliquibus superiores pro *Jubeo* solent dicere, *Oro, Placeat R. V.* etc. Attamen quocumque modo imponatur obedientia, dicunt communiter DD. *Suar. Sanch. Vasq. Medin.* etc. non obligare sub gravi, nisi dicatur, *in virtute sanctæ Obedientiæ*, aut *in nomine Jesu Christi*, aut *sub poenâ excommunicationis ipso facto* (b). Notandum 2. Quòd superior potest præcipere omnia quæ directè, vel indirectè respiciunt regulam, aut illius majorem observantiam; non autem illa quæ sunt contrà regulam (modò ille ex legitimâ causâ non dispenset), aut suprâ regulam, nisi hoc faceret ad probandam subditorum obedientiam. Non potest autem imponere obedientiam, ut exerceantur quædam corporis macerationes, aut alia extraordinaria onera (nisi esset in poenam), nec ut acceptetur Episcopatus, aut aliud Beneficium, sive sit curatum, sive simplex, nec ut ad infideles proficiscatur cum manifesto periculo vitæ, aut captivitatis: nec ut assistant extraneis peste infectis, nisi cum non adest qui eis Sacramenta necessaria ministret. Dictum *extraneis*, quia tenentur obedire in assistendo illis, qui sunt ejus ordinis; *Sanch. Cajet. Sporer*, et alii communiter (c). Notandum hîc quod dicitur in Trident. (*Sess. 25. de Reform. c. 4.*): *Non licet Regularibus à suis Conventibus recedere, etiam prætextu ad Superiores suos accedendi, nisi ab iisdem missi, aut vocati fuerint.*

17. — Notandum 3. Quòd non peccant Religiosi non observando primitivam regulam, postquam introductus est usus contrarius, ut dicunt *Turrecrem. Sanch. Cajet. Salmant.* etc. Dubitatur hîc, an pec-

(a) num. 37. — (b) num. 48. — (c) num. 49. et 50.

cent non obediendo Capitulo Generali, quod præciperet primam observantiam? Negant *Castr. Luym. Spor.* etc. nisi esset quòd Religio, nisi reformaret, esset potius nocumento Religiosis, quàm utilitati. Sed alii absolutè, et probabilius affirmant, ut *Suar. Pelliz. Salm. de Alexand.* etc. (a). Cæterùm certum est quòd Capitulum Generale, aut Provinciale semper aliquod novum statutum utile Religioni, quod non sit regulæ difforme, facere potest (b). Notandum 4. Quòd Religiosus qui transgreditur præceptum superioris, probabilius, ut dicunt *Suar. Castrop. Pelliz. Salm.* etc. committit duo peccata: unum contrà virtutem Religionis, ratione voti; aliud contrà virtutem obedientiæ promissæ Prælato, quæ præcisè à voto obligat (c). Notandum 5. Quòd subditus tenetur obedire, quoties quod imponitur non est certum peccatum; ità docent omnes, *S. Antonin. Silvius, Cajet. Cabass. Tournel.* et alii cum *S. Bernardo, S. Bonav. et S. August.* in c. *Si quod culpatur*, dist. 23. q. 1. quia superior est in possessione suæ potestatis præcipiendi, undè non potest illà privari, nisi constet quòd ejus præceptum sit illicitum (d); observetur id quod dictum est *Tract. 1. n. 18.* Et idem dicendum de dubio, an præceptum excedat, an non facultatem superioris, et an præceptum sit suprà regulam, ut dicunt *Azor. Sanchez, Valent. Salmant.* etc. (e). Idem dicitur in dubio, an qui præcipit sit legitimus superior, cùm in tali reperitur possessione (f) semper ei obediendum est. Excipitur tamen, si obedientia imposita ex unâ parte esset nimis molesta subdito, et ex aliâ esset probabiliter illicita, aut probabiliter excederet potestatem superioris: aut si obedire afferret subdito periculum grave damni spiritualis, aut temporalis; ità communiter *Sotus, Less. Tournel. Sanch. Castrop. Salmant. Holzman,* etc. (g).

18. — Quæritur circà votum obedientiæ. 1. An teneatur subditus obedire Prælato qui ei imponit,

---

(a) *Lib. 4. num. 42.* — (b) *num. 43.* — (c) *num. 46.* — (d) *n. 47.* — (e) *Ibid. v. Inf. II.* — (f) *Ibid. in fin. v. Dub. 2.* — (g) *c. f. num. 47. v. Communiter.*

ut revelet secretum sibi commissum? Respondetur cum *S. Thomâ* (a), *S. Anton. Navar.* etc. negativè, quia præceptum naturale prævalet præcepto superioris. Sed aliter currit; si ex secreti occultatione detrimentum passurus foret Prælati, aut Monasterium, aut alius innocens (b). An autem posset quis revelare secretum ut vitet damnum proprium, vide quod dictum est *Tract. XI, num. 9.*

19. — Quæritur 2. An possit excusari Religiosus à votis emissis in professione, cum suboriretur aliqua circumstantia, quæ si prævisa fuisset, utique illa vota non emisisset? Jam diximus *Tract. V. n. 23. et 35.* hoc esse probabile cum *S. Thomâ, S. Antonin.* et aliis, loquendo de votis simplicibus; exceptis tamen votis Religionis, et castitatis, ut rectè dicunt *Sanct. Suar. Pontius, Castropal. Diana, Salpant.* et contrà *Bonac.* qui dicit, quòd excusaretur ab illis, qui reperiretur in gravi periculo incontinentiæ: sed nos diximus, quod si hæc ratio militaret, quasi semper hujusmodi vota frustrarentur. Sed loquendo de votis solemnibus quæ in professione Religiosâ fiunt, aut in Ordinum sacrorum susceptione, nullam circumstantiam, licet novam, et non prævisam, posse unquam ab illis excusare, ut unanimes omnes, nemine contradicente, affirmant; quia Professus, aut in *Sacris* ordinatus, non respicitur ut persona particularis, cui satius erit voto non esse ligatam, sed ut membrum Communitatis, cujus bono debet posthaberi bonum privatum (c). Et idem propter eandem rationem currit in votis (licet non solemnibus), quæ fiunt in aliquibus Congregationibus virorum aut mulierum, et maximè si adiungitur votum, aut juramentum perseverantiæ, quia tunc (ut diximus *Tract. V. n. 19.*) adest contractus cum Congregatione obligatorius pro ambabus partibus; itaque sicut nequit, quâcumque adveniente novâ Circumstantiâ (intellige sinè suâ culpâ) Congregatio subjectum dimittere, ita subjectum nequit à Congregatione abire (d).

---

(a) 2. 2. qu. 70. art. 1. — (b) *Lib. 4. num. 49.* — (c) *num. 50.*  
— (d) *num. 50. v. Et idem.*

20. — Dubitatur 3. An valeat licentia à Prælato inferiore concessa, cùm à superiore denegata est ? Affirmandum cum *Holzm. Pelliz. et Croix*, quoties superior positivè non prohibet subdito exequi rem petitam ; nam denegando tantùm licentiam, non intelligitur velle derogare inferioris auctoritati. Si autem superior interdicat inferiori dare licentiam pro aliquâ re, probabiliter dicunt AA. citati, licentiam inferioris esse validam (licet illicitam), semper ac superior non declarat esse etiam nullam (a).

21. — Dubitatur 4. Cui Moniales teneantur obedire vi voti ? Respondetur : I. Summo Pontifici. II. Episcopo, si non sint exemptæ; si autem sunt exemptæ, Prælato Ordinis. Sed circà clausuram etiam exemptæ tenentur obedire Ordinario Loci, ex Bullâ Greg. XV. *Inscrutabilis*, Clementis X. et Clementis XII. vide quod de hoc dicitur *Tom. III. Tract. XX. de Priv. n. 82*. Quoad obedientiam generaliter Ordinario debitam, notandum quòd Moniales non tenentur obedire circà electionem Officialium Monasterii, ut declaravit S. C. Insuper notandum quòd tempore visitationis tenentur Moniales denunciare Religiosas regulas violantes, excipe si illæ jam resipuerint, aut si delictum sit occultum, aut cognitum sub secreto naturali, aut posset occultari sinè communi damno, aut si ab aliis jam sit manifestatum, aut si prævideatur quòd revelatio profutura non esset, aut sibi obfutura, et occultatio non futura esset damno Communitati (b). III. Tenentur Moniales obedire Abbatissæ in hoc quod spectat ad observantiam. Dicunt verò aliqui DD. non posse Abbatissam præcipere in virtute obedientiæ, cùm non habeat jurisdictionem spiritualement, sed solùm præsidere gubernio œconomico Monasterii. Sed valdè rationabiliter *P. de Alex. cum Pasqual.* et multis aliis contrarium tuetur, cum ex voto obedientiæ teneantur Moniales obedire omnibus legitimis Superioribus, et Abbatissæ à Pontificibus uti tales in Regularum approbatione recognoscuntur (c).

---

(a) *cit. n. 50. v. Quærit.* — (b) *lib. 4. n. 37.* — (c) *num. 52.*

22. — Hic juvat animadvertere, juxtà Trident. sess. 25. c. 7. non posse eligi in Abbatisam quæ sit minor 40. annis, et 8. annos non vixerit post Professionem in Religione, et debere esse ex Choristis. Item advertendum quòd si Moniales fuerint discordes, debet Prælatus assignare tempus, quo elapso ipse deputabit Abbatisam, juxtà Decretum S. C. In Monasteriis non exemptis Prælatus erit Episcopus; in exemptis erit Superior Regularis, qui accipiet vota unà cum Episcopo qui solus assistet. Factà electione, non poterit Abbatisa Officium exercere, nisi priùs confirmationem acceperit à Prælato. Alia levioris momenti observari poterunt in Opere (u).

### PUNCTUM III.

Cuinam ingredi Religionem vetitum est.

*An ingredi possint filii, relinquendo parentes in necessitate? Et an professi teneantur egredi, ut succurrant parentibus 23. An possint ingredi invitis parentibus? An si relinquuntur filii in necessitate; quid si fratres aut sorores 24. Qui avertit aliquem à statu Religioso 25. Qui vocationem negligit 26. An ingredi possint debitores 27. An Episcopi 28. An Parochi 29.*

23. — I. **N**EQUEUNT Religionem ingredi qui relicturi essent parentes in necessitate, semper ac possent illis succurrere, in sæculo manendo; præterquàm si in sæculo, ut ait S. Thomas (b), *vident non posse vivere sinè peccato mortali, vel non de facili*; et idem dicunt Sanch. Castr. Lez. Peyr. Salm. etc. (c). Pro periculo autem intelligitur, ut dicunt Salm. proximum. Et pro necessitate non intelligitur solùm extrema, sed etiam gravis, ut dicunt communiter DD. cum S. Thomà; qui dicit contrà loco citato, quòd non sit obligatus filius in sæculo remanere, si (parentes) possunt aliququaliter sustentari,

---

(a) num. 59. — (b) Quodlib. 10. ad 9. — (c) num. 66.

*non honorificè* (a). Notandum tamen quòd si filius culpabiliter relinqueret parentes in gravi necessitate, ejus professio non esset invalida. Ideoque ex sententiâ probabiliori *S. Antonin. Cajet. Sanch. Bonac. Salm. Bord. Busemb.* etc. si filius jam professus sit, non tenetur egredi è Religione, ut succurrat parentibus in gravi necessitate constitutis. Ratio est, quia professus jam elegit statum, sicut filius qui uxorem duxit. Et hoc docet idem Doctor Angelicus (b) dicens: *Professus reputatur mortuus mundo, unde non debet occasione sustentationis parentum exire à Claustro.* Dictum est in necessitati gravi, quia in extremâ utique teneretur filius egredi (c).

24. — Extrà casum necessitatis, dicebat Lutherus peccare filios ingrediendo Religionem sinè parentum consensu. Sed oppositum docuerunt omnes SS. Patres: *S. Hieronymus, S. Ambrosius, S. Augustinus, S. Joannes Chrysostomus*, Concilium Toletanum X. c. ult. *S. Thomas*, et omnes Catholici; dùm certum est, ut ait Angelicus (d), filios circa statûs electionem liberos esse. Et licèt deceat (ut dicunt DD.) ut filii, nisi priùs patris benedictionem susceperint, non discedant, hoc tamen intelligitur, cùm nullum subest periculum, quòd pater eos à sancto proposito avertat; sed quia hoc periculum plerùmque semper adest, idèdque *S. Thomas* (e) absolutè hortatur filios, ne consanguineorum consilio utantur, cùm res agitur de vocatione Religiosa: *Ab hoc consilio* (ait Sanctus) *amovendi sunt propinqui; propinqui enim in hoc negotio amici non sunt, sed inimici.* Et *S. Cyrillus* relatus ab ipso *S. Thomâ* (f) explicando effatum Evangelii: *Nemo mittens manum suam ad aratrum, et respiciens retrò, aptus est regno Dei*, (Lucæ 9. 2.), ait: *Aspicit retrò, qui dilationem quærit cum propinquis conferendi* (g). Parentes pariter non possunt ingredi Religionem, et relinquere filios in gravi necessitate, aut sufficienti educatione destitutos, non proviso qua-

---

(a) cit. num. 66. v. Sed. — (b) 2. 2. qu. 101. art. 4. ad 4. — (c) num. 67. — (d) 2. 2. qu. 104. a. 5. — (e) Opusc. 17. cap. 10. — (f) 2. 2. q. 18. art. 10. — (g) Vide lib. 4. num. 68.

*liter educari debent*, ait *S. Thomas* loco citato. Sed hoc non intelligitur, ut dicunt *Suar. Castrop. Pelliz.* etc. (regulariter loquendo), de filiis emancipatis (a). Quoad fratres, et sorores, tunc tantum non possunt Religionem ingredi, cum illi in necessitate extremâ relinquerentur; si autem essent in solâ gravi, qui votum emisit Religionis, non potest propter hoc illud differre, saltem diutius, sinè dispensatione (b).

25. — Sed antequàm ulteriùs procedamus, juvat hîc animadvertere, quòd parentes qui sinè justâ et certâ causâ avertunt filios à statu Religioso quocunque modo, sive malis artibus, aut precibus simplicibus, aut promissionibus, nequeunt excusari à peccato mortali: ità communiter *S. Antonin. Navar. Tournely, Abelly, Salm. Concina, Spor. Mazzot.* etc. Et (ut dicunt) non solum parentes, sed quicumque alius qui abducit proximum à vocatione Religiosâ, peccat graviter, ob grave damnum quod illi affert. Parentes autem dupliciter peccant, contrâ caritatem, et contrâ pietatem; dùm ipsi tenentur pietatis officio ad procurandum filiorum spiritualem profectum quàm maximè possunt, ut rectè advertit *Bonac.* (c).

26. — Sed prætereà hîc quæritur, an peccet graviter qui vocatus ad Religionem, vocationem negligit? Respondit *Less.* (d), quòd ex se loquendo, non peccaret; consilia enim Divina ad culpam non ligant; tamen subjungit, quòd non posset excusari à peccato qui existimaret se damnatum iri, si in sæculo remaneret, en verba Lessii: *Si conscientia dicet tibi (quod sæpè accidit) te desertum iri à Deo, nisi Divinæ vocationi obtemperes, et te periturum, si manseris in sæculo, etc. tunc peccatum est non sequi Divinam vocationem.* Cæterùm ego sic ratiocinor: si peccat graviter (ut superiùs dictum est) quicumque alium à vocatione abducit propter damnum quod illi infert, quomodò à culpâ erit immunis, qui novit se certè vocari à Deo ad Religionem, et in Mundo vult remanere cum suæ salutis æternæ periculo? Ait doc-

---

(a) *Lib. 4. num. 69.* — (b) *num. 70.* — (c) *n. 77.* — — (d) *de Stat. vitæ eligend. qu. 8. num. 94.*

tus *Habert*, quòd qui statum vitæ, ad quem non est vocatus à Deo, eligit, licèt (absolutè loquendo) possit in eo salvari, attamen cum difficultate salvabitur; nam (ut loquitur) erit ut membrum à suo loco motum, quod cum difficultate suo muneri deservire potest. Non secùs qui in sæculo manere vult, neglectâ Divinâ vocatione, difficulter salvabitur, cum Deus in sæculo negabit ei ea uberiora auxilia, quæ præparaverat exhibere in Religione, et sinè his auxiliis posset salvari, (absolutè loquendo) sed nunquam salvabitur. S. Gregorius scribens ad Moritium Imperatorem qui interdixerat militibus ingressum in Religionem, dixit hanc legem esse injustam, quia multis Paradisum clauderat: *Nam plerique sunt* (sunt verba Sancti) *quoniam nisi omnia reliquerint, salvari nullatenus possunt.* Itaque huic periculo salutis æternæ se exponere, nunquam mihi suadere potero, vacare culpâ. Utrum verò hæc culpa sit gravis, aut levis, sapientum iudicio relinquo (1). Sed redeamus undè progressi sumus.

27. — II. Nequeunt Religionem ingredi debitores, qui ingrediendo non sunt ampliùs solvendo, sed si in sæculo manerent, sinè gravi difficultate, et brevi solvendo fuissent; ità *Azor. Navarr. Sanch. Salm.* etc. Et licèt sit satis probabile quod docet *S. Thomas* (b) (quem sequuntur *S. Anton. Cajet. Silvest. Palud. Arm.* etc.) qui dicit quòd debitor non tenetur in sæculo manere, ut procuret undè debitum solvat, dicendo sufficere si cedat eis bona quæ possidet; quia (rationem afferens) *persona liberi hominis superat omnem æstimationem pecuniæ.* Nihilominus ego puto probabiliorem primam sententiam, quoties tamen (ut dictum est) brevè soluturus erit, nempe intra biennium, juxtà *Sanch. et Nav.* et sinè notabili difficultate solvere poterit, quia (sicut conveniunt DD. primæ sententiæ), si debitori manendò in sæculo brevi tempore immineret probabile periculum labendi in mortale, et vocationem amittendi, tunc potest statim ingredi. Intelligitur etiam modò debita sint certa, dum pro satisfaciendo debitis incertis non adest hæc obligatio, ut communi-

---

(a) *Vide hæc, et alia num. 78.* — (b) 2. 2. qu. 189. a. 6. ad 3.



ter docent *Castr. Suar. Lugo, Sanch. Salm.* etc. (a). Advertendum tamen quòd Sixtus V. in Bullà 1587. et Clemens VIII. vetarunt ingredi Religionem nimis ære alieno gravatos, qui bona sua dilapidarunt, nisi priùs satisfaciant ad eos, qui deponere debent rationes, antequàm eas reddiderint (b).

28. — III. Nequeunt fieri Religiosi Episcopi, nam ipsi nequeunt relinquere suas Ecclesias sinè justà causâ; et hoc tùm ob vòtum quod emittunt in acceptatione earum ut docet *S. Thomas* (c), se obligando perpetuò eis inservire; tùm ob spirituale conjugium quod Episcopus contrahit cum suâ Ecclesiâ, quod conjugium à solo Deo solvi potest, ut exprimitur in *c. Inter corporalia, de Translat. Episc.* ubi Innoc. III. sic dixit: *Non enim humanâ, sed potiùs Divinâ potestate conjugium spirituale dissolvitur.* Ex quo meritò deducunt, *Sotus, Sanch. Cajet. Vasquez, et Salmant.* (contrà *Suar. et Barb.*) permutationem Episcopatum prohiberi jure Divino; undè ne Papa quidem potest dispensare sinè justà causâ. Dico sinè justà causâ; nam, ut habetur in *c. Nisi, de Renunt.* benè potest Papa, propter aliquam utilem, et honestam causam, permittere renunciationem, vel permutationem. Justæ causæ sunt, ut dicunt DD. I. Bonum Ecclesiæ universalis, ac etiam particularis (loquendo de permutationibus), v. gr. si alicui Ecclesiæ non esset alius idoneus qui promoveri possit. II. Defectus proprius, si Episcopus esset infirmus; aut si aer illi esset nocumento, aut si est senex, aut ignarus, aut irregularis. III. Defectus subditorum, si eorum profectui redditus sit inefficax, aut si officio suo, ut convenit, fungi nequit. IV. Evitatio scandalii aliorum; sed non intelligitur scandalum eorum qui justitiam proterere vellent (d).

29. — Nihilominus hoc quod dictum est de Episcopis, non procedit de Parochis; nam hi etiam contradicente Episcopo, possunt Religionem ingredi, ut declaravit Urbanus II. *c. Duo sunt.* 19. q. 2. sic dicens: *Si quis Clericorum in Ecclesiâ suâ sub Epis-*

---

(a) *Lib. 4. n. 71.* — (b) *lib. 4. n. 71. v. Advertendum.* — (c) 2. 2. q. 189. a. 7. — (d) *lib. 4. num. 76. et 104.*

*copo Populum (nempè proprium ut explicat Glossa) retinet, et sæculariter vivit, si afflatus Spiritu Sancto in aliquo Monasterio, vel Regulari Canonica salutare se voluerit, etiam Episcopo contradicente, eat liber nostrâ auctoritate. Et ut ait S. Thomas (a), Parochus ingrediendo Religionem licentiâ ne Pontificis quidem indiget. Hoc confirmatum est à Benedicto XIV. in suâ Bullâ, Ex quo dilectus, anno 1747. Atamen ibi dicit Pontifex, quòd Parochus antequàm ingrediatur, debet Epi copum certiozem facere; insuper decrevit ibidem Parochiam non vacare, nisi post Professionem, adeò ut fructus ad eum spectent durante tempore novitiatus. Et idem dicendum de aliis Beneficiatis, ut dicunt *Suar. Sanch.*, sed hi non peccant (ut subjungit idem Benedictus ibidem), si suos Episcopos certiorare omittunt, timentes ne ab ipsis de suo proposito revocentur. Cæterum declarat Pontifex, quòd sicut potest prælatus Regularis subditum suum, qui ad strictiorem Ordinem sit digressus, ita Episcopus potest Parochum, aut Clericum suum repetere à Religione, si ex transitu suo prima Ecclesia gravem sustineret jacturam, etc. Sed si Ecclesia graviter læderetur, esset revocandus. Priora verba sunt Innoc. IV, posteriora Panormitani, quibus utitur Benedictus in suâ Bullâ, et postea concludit: *Et sic satis provisum est Episcopo (b).**

## CAPUT II.

### De statu Clericali.

30. — **C**IRCA Clericorum statum quatuor possunt considerari principaliora, Privilegia, Munia, Officia, et Beneficia, quibus eos Ecclesia providet, quo ipsi sustentari possint. De Privilegiis agetur *Tom. III. Tr. XX. Cap. II.* ubi de Privilegiis ex proposito erit sermo. De Muneribus, et Officiis in Examine Ordinandorum in *Appendice III.* qui locum habet in calce *Tom. III.* Hic solum agemus de Beneficiis Ecclesiasticis, quæ Clericis conferuntur.

---

(a) 2. 2. q. 189. art. 7. — (b) *lib. 4. n. 74. et 75.*

## PUNCTUM I.

Cuinam conferri possint et debeant Beneficia?

*Quotuplex sit Beneficium 31. Quot modis acquiruntur. De Jurepatronatûs 32. An etiam Beneficia simplicia conferenda sint dignioribus 33. An Patroni debeant digniores præsentare 34. An ad Prælaturas, etc. 35. An sit valida minùs digni electio 36. An Elector teneatur ad restitutionem 37. An peccet dignus qui concurrat cum digniori 38. An examinatores non denunciando etc. 39. De pluralitate Beneficiorum 40. et 41.*

31. — **B**ENEFICIUM Ecclesiasticum definitur: *Est jus perpetuum auctoritate Ecclesiæ constitutum exercendi Officium spirituale in aliquâ Ecclesiâ, et pereipiendi propter ipsum fructus ex bonis Ecclesiæ.* Distinguere oportet Beneficia simplicia à duplicibus. Simplicia sunt illa quæ tantum instituta sunt ad Horarum Canonicarum recitationem, aut ob Altaris servitium, et sunt Canonicatus, et Capellanix auctoritate Pontificis, aut Episcopi erectæ, et etiam præstimonia, quæ Clericis præstantur, ut vacent studio, et hujusmodi. Duplicia sunt illa quæ aliquam jurisdictionem habent, ut Episcopatus, et Parochiales, et etiam Decanatus, Præposituræ, Archidiaconatus, et hujus generis, quæ aliquâ jurisdictione gaudent in Clerum: aut aliquâ præeminentia fulgent, sed sinè jurisdictione, v. g. loco distincto in Choro residere, aut in processione, ut sunt dignitas Primiceriatûs, Cantoratûs, aut Sacristæ majoris, et hæc proprio vocabulo appellantur *Personatus*; aut denique habent annexum aliquod Officium Ecclesiasticum, ut Thesaurarii, Oeconomus, custodis, Sacristæ minoris, et hi habent aliquam administrationem, sed sinè jurisdictione, et sinè ullâ præeminentia (a).

---

(a) *Lib. 4. n. 3. et 84.*

32. — Tribus modis acquiritur Beneficium : 1. Collatione liberâ Pontificis aut Episcopi. 2. Electione aut Confirmatione Superioris approbantis idoneitatem Electi. 3. Præsentatione, et Institutione, sive Eléctione superioris, quæ subsequitur, cum Beneficium est Jurispatronatûs. Jus autem patronatûs alterum est laicale, alterum est Ecclesiasticum. Et in hoc scire oportet, quòd si patronatus laicus non præsentat infra quatuor menses, Ecclesiasticus intra sex, collatio devolvitur ad Prælatum, ad quem institutio spectabat, ut habetur ex *c. Quoniam, de Jurepatr. et c. un. §. Verum eod. in 6. (a)*. Et notandum quòd tempus præfatum currit etiam si orta fuerit lis circa præsentationem; modo lis non vertatur inter Patronum et Episcopum, ut dicunt *Azor. Salm. etc. ex cit. c. Quoniam*. Potest tamen Episcopus prorogare præfatum terminum per alios sex menses, sed non ampliùs, ut notant *Barb. Salm. ex c. 2. de Concess. præb. (b)*. Si autem à Patrono laico plures præsentati sint, Episcopus potest eligere quem malit, quia utraque præsentatio est vâlda; si autem à Patrono Ecclesiastico, debet eligere priùs præsentatum, ex *c. Cum authenticè, de Jurepatr.* Sed si plures à diversis patronis fuerint præsentati, tunc si Patronatus est Ecclesiasticus, Episcopus debet præferre digniorem, ut habetur expressè ex *Trid. sess. 24. cap. 18.* ubi dicitur: *Episcopus ex dignis eligat digniorem, quem Patronus ei præsentet*. Nominè *Patroni* hic intelligitur Patronus Ecclesiasticus, de quo in hoc loco sit sermo, et intelligitur sive sit unus, sive plures qui haberent jus patronatûs. Et sic declararunt mentem Concilii Sixtus V. et S. C. ut referunt *Salmant. (c)* cum *Garcia, Barbosa* etc. Si verò Patronatus est laicalis, sufficiens erit si præsentatus sit idoneus, ut declarat Concilium ibidem. *Quod si juspatronatûs laicorum fuerit, debeat præsentatus examinari, et non, nisi idoneus repertus fuerit, admitti*. Quà de re tunc Episcopus debet eligere eum qui plures voces habet, ut dicunt com-

(a) *Lib. 4. num. 88.* — (b) *num. 89.* — (c) *tract. 28. cap. un. num. 291.*

muniter *Less. Busemb. cum Laym. et Salmant. cum Sanch. (a)*. Et hoc procedit proculdubio etiam pro Beneficiis Curatis, de quibus perspicuè loquitur Concilium in præfato loco, quicquid dicant *Salmant.*

33. — Sed ad propositum punctum deveniamus, nempe cuinam possint et debeant conferri Beneficia? Pro resolutione multa dubia discutienda sunt. 1. An omnia Beneficia sint conferenda dignioribus? Quoad Cardinalatus, et Episcopatus, certum est quòd eligendi sunt digniores, ut constat ex Trid. *sess. 24. c. 1.* et ex Prop. 47. ex proscriptis ab Innoc. XI. Et idem currit pro Beneficiis Curatis, ut habetur ex eodem Concilio *cit. cap. 2. et cap. 18.* Major autem dignitas accipienda ex majori Ecclesiæ, aut fidelium utilitate; sed ceteris paribus præferri debet qui pietate, aut prudentiâ præstat doctiori: nobilior, aut potentior: oriundus, senior, pauperior, et Sacerdos non Sacerdoti (b). Quomodo autem habendus sit concursus pro Ecclesiarum Parochialium collatione; ac de appellationibus ab irrationabili Ordinarii judicio admittendis, vel rejiciendis, vide in Bullar. Benedict. XIV. tom. 1. Bullâ *Cùm illud* 68. sub die 14. Decemb. 1741. Dubium vertitur circà Beneficia simplicia, an peccet Episcopus eligendo minùs dignum? Prima sententia *Soti, Nav. Sa, Sanch. etc.* quam probabilem putant *Salm. Carden. etc.* negat eum peccare. (nempe graviter, quia communiter non excusant saltem à veniali) dùm dicunt quòd Beneficia principaliter sunt instituta in communitatis utilitatem, undè modicum est damnum cùm præfertur, non tamen indignus, sed dignus digniori. Excipiuntur tantùm Canonici, quibus sit etiam annexum officium Pœnitentiarum, aut Instructoris. Hanc sententiam non puto improbabilem, sed existimo certè probabiliorē contrariam, quæ etiam est communior cum *S. Thomâ (c), Less. Lugo, Castrop. Holzm. Croix, Roncagl. Viva, Salm. etc.* Ratio, quia Beneficia, ut communiter dicunt DD. non tantùm instituta sunt propter Ecclesiæ utilitatem, sed etiam (licet

---

(a) *Less. c. 34. num. 33. et Salm. ib. num. 292.* — (b) *num. 81. et 92.* — (c) 2. qu. 63. a. 2. ad 1.

minùs principaliter) ob meritorum remunerationem. Ex quo Episcopus duplici ex capite peccat graviter conferendo ea minùs dignis, 1. quia lædit justitiam distributivam, attento jure quod habent digniores, cum Episcopus non sit dominus, ut loquitur *S. Thom.*, sed simplex distributor Beneficiorum: 2. ob damnum quod Ecclesiæ suæ infert, dùm ubi non præferuntur digniores, pauci curant digniores se reddere, et hoc non est detrimentum parvi momenti in bonum commune (a). Limitant tamen *Nav. Sot. Less. Lugo*, etc. 1. si posthaberetur dignior semel atque iterùm ad Beneficium simplex, et etiam ad aliquem Canonicatum, qui caret jurisdictione, aut functione magni momenti. 2. Si Beneficium esset tenue. 3. Si eligeret aliquem de familiâ fundatoris, ut ait *Tournely* cum *Silvio*. 4. Si electus brevì renuntiaturus esset Beneficium; *Holz. cum Pichler* (b).

34. — Quæritur 1. An Patroni etiam teneantur præsentare digniorem? Quoad Beneficia curata, certum est Patronos Ecclesiasticos, et Patronos Episcopatum (qui sunt Reges) ad hoc teneri, ut declaravit Trident. *Sess. 24. Cap. 1. et 18.* At idem proculdubio tenendum cum *Lugo, Sanch. Croix, Viva, Ronc. Salm.* etc. quoad omnia Beneficia curata, dùm in cit. *Cap. 1.* Concilium dicit quòd quicumque Patronus tenetur præsentare ad curas animarum digniores. Et hoc confirmatur ex eadem Prop. 47. Innoc. XI. quæ loquebatur de quocunque Beneficio curato. Si autem Beneficium fuerit simplex, ut diximus, probabilius est Episcopos teneri ad eligendum digniorem; ita dicimus de patronis qui eos præsentare debent. Excipit *Lugo* tantùm eos qui conferunt Cappellanas contrà *Azor, Mol. Vasq.* qui hoc permittunt solùm fundatoribus (c). Quæritur 3. An etiam renunciationes debeant fieri dignioribus? Hic adsunt multæ sententiæ diversæ, quæ in Opere observari possunt (d); Sed maximè æqua mihi videtur illa *Card. de Lugo*, qui dicit hinc rationem culpæ dimetiendam esse à damno, quod ex tali renuntiatione Ecclesiæ obveniret. Undè postea concludit, quòd rarò licitè

---

(a) *Lib. 4. n. 91.* — (b) *n. 96.* — (c) *lib. 4. n. 97.* — (d) *n. 98.*

sunt renuntiationes Beneficiorum curatorum, et præcipuè Episcopatum, quia istæ ut plurimum sunt sub onere pensionis, ideòque non sunt cum diligenti meritorum inquisitione (a).

35. — Quæritur 4. An peccent graviter Religiosi qui eligunt minus dignos ad Prælaturas? Negant aliqui pauci, sed communissimè, et rectissimè affirmant *Lugo, Viva, Croix, Ronc. Salm.* etc., quia Prælati æquè ac Episcopi debent prospicere bono communitatis; et minus digni faciliter evadunt indigni, quia minori diligentia incumbunt ad sartam tectam servandam observantiam (b).

36. — Quæritur 5. An electio minus digni sit valida, cum Beneficium est curatum? Negant *Sanch. Castrop. Salm.* etc. Sed probabilius affirmant *Lugo, Fill. Vasq. Holzm. Anacl. Croix*, etc. Et probatur ex Bullâ S. Pii V. ubi, licèt concedatur appellatio digniori, ibi tamen declaratur quòd appellatio non impedit quominus executioni mandetur electio minus digni; valida igitur habetur. Nec obstat id quod dicitur in Trid. (*Sess. 24. c. 18.*): *Provisiones omnes præter supradictas formas factis subreptitiæ censeantur.* Nam pro *formas* non intelligitur electio, ut adversarii autumant, sed propriè intelligitur ritus præscriptus qui tenendus est in collatione curarum, nimirum, ut intercedant edictum, concursus, et examen (c).

37. — Quæritur 6. An eligens ad Beneficium minus dignum teneatur ad restitutionem? Etiam de Beneficio simplici, quod sinè concursu providetur, affirmant *Silvest. Cajet. Bann. Salm.* et alii: quorum alii dicunt restitutionem faciendam esse digniori: alii dicunt faciendam etiam Ecclesiæ. Sed communius *Canus, Nav. Tol. Less. Sanch. Lugo, Castrop. Croix*, eum excusant à restitutione faciendâ tam digniori, qui nullum jus rigorosum habet super Beneficiis, quæ principaliter fuerunt instituta ob bonum publicum, et minus principaliter in præmium meritorum; quàm Ecclesiæ, quæ non intendit obligare electores, nisi ad non eligendos indignos (in quo

---

(a) n. 99. — (b) n. 100. et 101. — (c) n. 103.

casu utique tenerentur restituere Ecclesiæ damnum). Et hanc sententiam puto probabiliorem, juxtà id quod dictum fuit *Tract. I. n. 20. et Tr. X. n. 73.* ubi dictum fuit possessorem bonæ fidei non teneri ad restitutionem, quoties non est certus sui debiti (a). Idèdque ad nihil pariter tenetur qui Episcopum sinè fraude avocat à conferendo Beneficium digniori; ut diximus *Tract. X. n. 63. (b).* Sed majus dubium vertitur, an, cum Beneficium providetur per concursum, eligens minùs dignum teneatur compensare digniori damnum? Communissima est sententia affirmativa cum *Sanchez, Tourn. Less. Lug. Castrop. Holzm. Croix, etc.*, quia dignior ob concursum acquirit verum jus in Beneficium, ratione pacti, quod tunc intercedit inter electorem et concurrentes, quod pactum (ut dicunt) sufficienter explicatur in Edicto. Hoc non obstante etiam excusant electorem non jam à peccato, sed à restitutione, *Sotus, Nav. Ledes. Henriq. et alii*, dicentes quòd pactum quod supponitur non est rigorosum, ità ut obliget sub justitiâ commutativâ, sed potiùs declaratio obligationis quæ Episcopo inest juxtà justitiam distributivam (præferendi nempè digniorem), quæ non obligat ad restitutionem. Hanc secundam sententiam mihi animus non est uti probabilem probare, sed nec ut improbabilem audeo damnare; et si reverà non constaret de hujusmodi pacto, non esset certa obligatio restituendi. Ceterum iidem DD. contrarii, uti *Sanchez. Lugo, Roncag. et Garcias* excusant ab omni restitutione, si excessus dignitatìs esset modicus (c).

38. — Quæritur 7. An peccet dignus concurrendo cum aliis, quos se digniores putat? Negant *Less. Sot. Azor. Cajet. Vasq. Salm. etc.* et quidem probabiliter, nam talis videtur esse Ecclesiæ mens, ut omnes digni concurrant, alioquin si dignioribus dumtaxat esset licitum concurrere, pauci concurrerent, et fortè iidem digniores scrupulo perculti, abstinerent à concursu, quod quidem in Ecclesiæ detrimentum redundaret. Contrà affirmant *Sanchez. Castrop. Nav. Lugo,*

---

(a) n. 106. et 107. — (b) n. 108. — (c) num. 109.



*Lugo*, etc. semper ac dignus pro comperto haberet alium esse se digniorem, quia si unquam electus esset, jam esset causa talis injustae electionis. Speculativè loquendo hæc secunda sententia videtur probabilior; sed in praxi videtur locum non posse habere, quia in nullo casu dignus potest esse certus, quod Episcopus non habeat aliquam rationem, se latentem, excludendi illum quem ipse putat digniorem (a). Sed hic illud dubium se offert, an hic dignus, si certo cognoscat alium esse digniorem, peccet, si acceptet Beneficium, et teneatur ad restitutionem damni? Affirmant *Nav.* et *Castrop.* Sed *Sotus Sanch. Turr. Salmant.* etc. probabilius dicunt nec peccare, nec teneri ad restitutionem. Non peccat, quia acceptando Beneficium, non jam coöperatur injustae electioni ut supponunt adversarii, dum Episcopus cum jam illud ei contulerit, jam suum peccatum consummavit: quare per accidens habetur, quod postea acceptet vel non. Nec tenetur ad restitutionem, quia, collato Beneficio in minus dignum, collatio est valida (ut ostensum est *num.* 36.); Undè Beneficium non amplius sistit inter bona communia, idè dignior nullum amplius jus habet. Et hujus sententiæ est etiam *S. Thomas* (b), qui loquendo de Episcopatibus dicit, quod elector tenetur præferre meliorem; sed loquendo postea de electo sic ait: *Non autem requiritur ut reputet se aliis meliorem, sed sufficit quod nihil in se inveniat per quod illicitum ei reddatur assumere praelationis officium.* Tantò magis quod nemo, ut paulò antè diximus, potest certus esse injustam fuisse ejus electionem (c).

39. — Quæritur 8. An peccent Examinatores, non deferendo ad Episcopum quis sit inter Examinatos dignior? Negant *Lugo, Castrop. Croix*, etc. dicendo illos satisfacere, si tantum deferant Episcopo quos idoneos probant, dum Episcopi munus erit declarare quis eorum sit dignior. Sed probabilius et communiùs affirmant *Azor. Nav. Ronc. Diana, Salm.* etc., quia licèt judicium ad solum Episcopum spectet, attamen

---

(a) *Lib.* 4. n. 110. — (b) 2. 2. q. 185. a 3. — (c) *Vide hæc, et alia cit. n.* 110. v. *Dub.* 2. *Edit. Ven.*

hâc propterea de causâ Concilium statuit concursus, et Examinatores, ut ipsi digniorem proponant, ut ita possit Episcopus melius judicare, et eligere (a). Examinatores autem debent jurare fungendi fideliter officiis suis, ut præcipit Trident. *Sess. 24. c. 18. de Reform.* Secus concursus est nullus ex Decr. S. Congr. Conc. 2. *Decemb. 1628.*

40. — Quæritur 9. An possint unquam conferri plura Beneficia uni personæ? Sed hic prius distinguenda sunt Beneficia compatibilia ab incompatibilibus. *Compatibilia* sunt omnia simplicia quæ residentiam non indigent. *Incompatibilia* autem alia sunt primi, alia secundi generis. *Primi generis* sunt omnia Beneficia duplicia quæ hic *num. 31.* adnotata reperiuntur; nempe primò omnia Beneficia curata, et ea quæ sunt uniformia sub eodem tecto, ea nimirum quæ eodem loco, et tempore in iisdem functionibus conveniunt: item omnes dignitates, personatus, et officia Ecclesiastica quæ ibidem adnotavimus. *Incompatibilia verò secundi generis* sunt Canonicatus, et cætera Beneficia residentiam exigentia. Sed hic antequàm ad punctum attingamus, advertere oportet, quòd si quis duo Beneficia incompatibilia recipit, accepto secundo, *ipso jure* vacat primum, et si ipse præsumat sibi retinere utrumque, *ipso facto* privatur utroque, uti constat ex Trident. *sess. 7. c. 4. sess. 24. c. 1. et 17.* Hoc est certum de Beneficiis incompatibilibus primi generis: dubitatur an idem valeat pro aliis secundi generis? Affirmant *Contin. Tourn. Spor. et Salm.* (b) cum *Azor. Consal. Fagn. etc.* Et probant ex eodem Trident. locis citatis, et ex quâdam declaratione S. C. et idem dicunt *Salmant.* cum aliis etiam de Beneficiis simplicibus licet residentiam non requirant (c). Nihilominus *Laym. Busemb.* et alii apud *Salm.* hoc negant cum *Navar.* qui dicit non constare de hâc declaratione; et ad Tridentinum respondent, Concilium in posteriore loco, ubi tantum disserit de vacatione, loquitur de Beneficiis curatis, non verò de aliis (d). Sed, ut dicunt iidem

---

(a) *num. 111* — (b) *Tract. 28. de Benefic. n. 664.* — (c) *Vide Opus nostrum l. 4. n. 118. v. Quær.* — (d) *num. 116.*

*Salm. et Abelly*, Papa potest dispensare, et dumtaxat in casu evidentis necessitatis, aut utilitatis; secus (ut tenent *Bell. Panormit. Tol. Salm.*) qui plura hujus generis Beneficia reciperet, etiam ex Pontificis dispensatione, tutus non esset in conscientia (a).

41. — Ceterum Beneficiorum etiam simplicium pluralitas certè Canonibus adversatur, modò primum Beneficium congruæ sustentationi sufficiat, ut declaravit Trident. *Sess. 24. c. 27.* ubi sic habetur: *Mandat, ut unum tantum beneficium singulis conferatur. Quod si unum non sufficiat ad sustentationem, liceat aliud simplex sufficiens, dummodò utrumque personalem residentiam non requirat, eidem conferri.* Sed majus restat dubium, an pluralitas etiam simplicium sit vetita non tantum jure Canonico, sed etiam Divino. Alii absolutè id negant, ut *Innoc. Lugo, Filliuccius, Valent.* etc. Alii absolutè id affirmant, ut *Panormit. et Continuator Tournely* cum aliis, et præcipuè cum *Bellarm.* qui tenet Papam sinè causâ urgentissimâ dispensare non posse: et hoc tum quia non potest unus duobus Ecclesiis deservire, tum quia hæc præsumitur fuisse voluntas fundatorum, ne quis nisi de unâ Ecclesiâ curam habeat. Sed sententia communis et tenenda cum *S. Thomâ (b)*, quem sequuntur *Azor. Less. Laym. Abel. Holzm. Salm.* etc. dicit pluralitatem beneficiorum utique esse illicitam, etiam jure naturali, ita ut ne Papæ quidem dispensatione possint licitè retineri, cum unum satis est ad sustentationem. Et non tantum ob primam rationem allatam, quàm ob secundam; tum etiam, quia perturbaretur Ecclesiasticus ordo propter tot rerum confusiones à Joanne XXII. in *Extrav. Execrabilis, de Præb.* adnotatas, nimirum quòd, admissâ hac pluralitate, aliqui superfluis redundarent, et alii forsan digniores mendicare cogerentur: item quòd cum Ecclesiæ non haberent Rectorem peculiarem, facilè illæ debito obsequio

(a) *Ibid. v. Præterea.* — (b) *Quodlib. 9. a. 15.*

defraudarentur : item quòd qui plura habet Beneficia, nequit invigilare ad defendenda jura uniuscujusque Ecclesiæ : item, quia reddituum copiâ cupiditas et luxus fovetur. Nihilominus dicimus cum eâdem sententiâ, quòd hoc non ita illicitum, ut Papa ex justis causis nequeat dispensare (a). Hæ autem causæ sunt, I. *Necessitas*, nempe ut docet S. Thomas (b), *si sit necessitas in pluribus Ecclesiis ejus obsequio*. II. *Utilitas*, si Beneficiatus melius potest ipse solus, licet absens, suâ auctoritate, doctrinâ, et prudentiâ, quàm alius præsens prodesse, ut ait idem Doctor Angelicus loco citato : *Ipse possit plus deservire Ecclesiæ, et tantummodò absens quàm alius præsens*. III. *Meritorum prærogativa*, eorum nempe qui prosunt Ecclesiæ suâ doctrinâ, instructione, aut scripture, cum dicatur in *Cap. de multâ, §. fin. de Præben.* *Nullus plures dignitates, aut personatus habere præsumat, circa sublimes tamen, et literatas personas, quæ majoribus Beneficiis sunt honorandæ, etc.*

---

(a) *Lib. 4. num. 117.* — (b) *cit. art. 15.*



## PUNCTUM II.

De qualitate et obligatione Beneficiatorum, et quot modis Beneficia amittuntur.

*Qualitates Beneficiatorum. De intentione infra annum suscipiendi Ordines, etc. 42. Qui recipit Parochiam cum animo dubio, aut conditionato 43. Qui recipit Beneficium cum animo illud relinquendi 44. Munia Beneficiati. Quoad fructus etc. An de illis vivere possit 45. Quibus debet erogare superflua 46. An loci pauperibus 47. An parentibus 48. An Pensionarii teneantur erogare superflua 49. De residentiâ Canonîcorum 50. Pœnæ non residentium 51. Causæ excusantes, et I. Infirmitatis 52. II. Necessitatis 53. An excommunicatus, etc. 54. An irregularis, etc. 55. III. Utilitatis. De eo qui assistit, etc. De Pœnitentiario, et Theologo 56. De Examinatoribus, Visitoribus etc. 57. Quot modis amittuntur Beneficia; præcipuè renunciatione, et per jura, et præcisè si intercedit simonia 58. De Pensionibus 59. Quæ artes, et officia sunt Clericis interdicta 60. De bonorum Ecclesiasticorum alienatione 61. De solemnitatibus requisitis 62.*

42. — **P** RIMO loco de qualitatibus loquendo; Beneficiatus debet esse Clericus, saltem Tonsuratus. Item non debet esse illegitimus (cum quo tamen potest Episcopus dispensare ad Ordines Minores, et ad beneficium simplex). Item quòd non sit Irregularis, non facinorosus nec excommunicatus. Item habeat scientiam competentem, et ætatem legitimam, nempe ad Beneficium simplex 14. annorum (et sufficit inceptorum juxtà communem cum Decl. S. C. apud *Fagn. in C. Super, de Præben. n. 15.*), ad illud autem, quod requirit Ordinem Subdiaconatûs, annum 21. inceptum; pro eo quod requirit Diaconatum, annum 22; quod requirit Sacerdotium habeat annos 24; pro Beneficio curato habeat annos 25. inceptos, ut habetur ex c. *Licet de Elect. in 6* Pro Epis-

copatu denique requiritur ætas 30. annorum completorum, ex *c. Cum in cunctis 7. eodem tit.* Adnotandum hinc insuper, quòd in Ecclesiis Cathedralibus pro Dignitatibus quæ Sacerdotium non requirunt, exposcitur ætas 22. annorum inceptorum: sed hoc non requiritur pro Collegiatis, juxtà Declarat. S. C. apud *Fagnan. in cit. Cap. 7. de Elect.* Hi beneficiati tenentur infrà annum suscipere Ordinem sacrum; et si una tantum hora desideraretur, Beneficiatus illud retinere non posset, modò in bonâ fide illud non præscripsisset per triennium, ut dicunt *Less. et Busemb. (a).* Qui ergò Beneficium cui annexus est sacer Ordo suscipit, intentionem tenetur habere se promovere faciendi intrà annum. Et si beneficium est curatum quò animus non habet Sacerdotio initiandi, non tantum graviter peccat, ut certum est, sed etiam *ipso jure* Beneficio privatus existit, adeò ut teneatur restituere omnes fructus perceptos, excepto si intrà annum ab hâc voluntate discederet, ut rectè dicunt *Less. Nav. Sanch. et Salm. (contra Sotum et Tol.)* et ut clarè habetur ex *Cap. Commissa de elect. in 6.* cùm ibi dicatur: *Nisi voluntate mutata, promotus fuerit, etc.* Potest tamen Episcopus ad septennium dispensare, ut Beneficiatus studiis vacet, substituendo interim Beneficio vicarium *(b).* Sed hoc debet intelligi (ut ait *Laym.*) non posse hujusmodi dispensationem concedi sinè gravi necessitate, aut magnâ utilitate Ecclesiæ, ut apparet ex *Cap. Cùm ex eo, de election. in 6.*

43. — Hic dubitatur 1. An graviter peccet, aut teneatur ad restitutionem fructuum quò animo accipiti, aut conditionato Sacerdotio initiandi, recipit Beneficium curatum? Tres adsunt sententiæ. Alii absolutè negant; alii affirmant, si animus est dubius, negant verò si sit conditionatus; ità *Less. Sanch. Salm. etc.*, quia animus conditionatus (ut dicunt) est verus animus. Sed nos affirmamus cum *Soto, Azor. et Conc.*, sive animus sit dubius, sive conditionatus, quia semper ac deest animus Sacer-

---

(a) *Lib. 4. num. 117.* — (b) *lib. 4. n. 112.*

dotio initiandi, semper adest fraus, ratione cujus textus citatus *Cap. Commissa*, obligat ad fructuum restitutionem, cum ibi dicatur; *Teneris ad restitutionem fructuum, cum eos receperis fraudulenter*. Ceterum hoc non impedit, quominus Beneficiatus, accepto Beneficio animo absoluto, deinde mutata intentione possit illud abdicare (a).

44. — Dubitatur 2. An qui recipit Beneficium simplex, graviter peccet, si illud acceptet animo illud postea deponendi? Certum est (ut supra jam innuimus) graviter peccare, si Beneficio annexus est sacer ordo, et ipsi deesset animus initiandi; ita communiter *Castrop. Sanch. Salmanticens. Busemb.* etc. Sed dubium restat, an cum Beneficio non est annexus ordo, peccet qui illud recipit cum intentione illud renunciandi, et deinde uxorem ducendi? Affirmant *Tolet. Less. et Salm.* putantes hoc gravem ordinationis naturalis, et divinæ continere perturbationem. Alii contra, ut *Castropal. et Garzia* eum excusant ab omni culpa. Sed alii communius, ut *Sanch. Nav. Laym. Vasq. et Busemb.* dicunt peccare tantum venialiter, non agnoscentes in hoc tam gravem perturbationem, ut pertingat ad mortale, saltem ob *S. Antonin.* documentum ex *S. Thomæ* excerptum, nempe nihil tamquam grave dammandum, nisi evidens ratio id suadeat (b). Verba *S. Antonini* allata sunt *Tr. III. n. 66.*

45. — Loquendo secundo loco de Beneficiatorum muneribus, hæc sunt plura. Tenentur illi deferre habitum, et tonsuram, recitare horas canonicas, et restituere fructus, si illas omittunt. Sed de his in Examine Ordinandorum in III. *Appendice Tom. III. ex num. 49. ad 84.* Restant tantum hic discutiendæ et obligatio bene administrandi fructus Beneficiorum, et obligatio residendi. Et quoad administrationem fructuum, notandum 1. certum esse (quicquid dicant aliqui AA. qui videntur potius rigore oblectari, quam ratione) Beneficiatum tunc posse ex illis vivere, licet bonis propriis provisus esset; ita communiter

---

(a) num. 114 — (b) num. 113. Qu. 1.

*Fagnan. Habert, Petrocor. Anacl. Holzm.* et alii cum *S. Thomâ* (a); cùm æquum sit ut qui Altari servit, ex Altari vivat. *Quis militat* (ait Apostolus:) *suis stipendiis unquàm*? Sed excipiendus cum Angelico casus in quo adesset aliquis pauper in gravi necessitate, aut captivus apud barbaros, quia tunc Beneficiatus, cùm jam habeat superfluum statui suo, tenetur ei subvenire (b). Ceterùm excepto hoc casu, si Clericus viveret propriis redditibus, benè potest sibi abdicare ex bonis Beneficii, et pro libitu suo insumere, quantum ad suos usus impendit, ut dicunt *Less. Anacl.* et alii (c).

46. — Notandum 2. quòd si fructus Beneficii supersunt Clerici sustentationi, etiam certum est, quòd ille tenetur eos pauperibus erogare; aut alii pio usui applicare, ut communiter admittunt DD. dùm à Tridentino nihil aliud præcipitur, nisi ne illos dilapident, sed ut in pia opera applicent. Sed in hoc etiam excipiendus est cum *Lugo, et Lessio*, casus, si adessent pauperes in gravi necessitate constituti: quorum pauperum, ait *P. Viva*, teneri Episcopos, et Parochos notitiam exquirere (d). At cùm desint hujusmodi pauperes, ait *Holzm.* cum *S. Thomâ* (e), et aliis, posse Beneficiatum reservare fructus perceptos pro Ecclesiæ aut pauperum necessitatibus futuris (f).

47. — Notandum 3. non teneri præferre loci pauperes, ut dicunt DD. communiter, dùm Canones disponunt pro pauperibus in generali. Limitant *Salm. et Holzm.* si in loco adessent pauperes in extremâ, aut gravi necessitate; sed hæc limitatio communius negatur à *Molina, Azor. et Bon.* cum *Nav.* Dummodò (intelligendum) fructus distribuuntur aliis pauperibus æquè indigentibus; et dummodò non constet aliam fuisse fundatorum voluntatem; et addit *Molina*, dummodò aliud non postulet bonum commune Diocesis, v. g. si prospiciendum esset alicujus Collegii educandorum paupertati (g).

(a) 2. 2. qu. 18. a. 5. ad 3. — (b) Vide l. 3. num. 491. Qu. V. — (c) Vide hæc et alia cit. n. 491. Qu. I. — (d) lib. 3. num. 491. Qu. I. (e) 2. 2. q. 185. a. 7. ad 4. — (f) lib. 3. n. 491. Qu. IV. — (g) num. 491. Qu. III.



48. — Notandum 4. sub nomine pauperum comprehendendi etiam conjunctos, si verè ipsi egentes ità sint, ut juxtà statùs sui conditionem vivere nequeant, quod expressum habetur in *Trident. Sess. 23. cap. 1.* Et hoc valet etiam si adsint pauperes egentiores, ut dicunt communiter *Tolet. Molina, et Viva* (contrà *Laym.*), quia propinquorum sustentatio ad proprium statum pertinet Beneficiatorum; quapropter dicitur universaliter cum *Azor. Castrop. et Croix*, quòd Clericus liberè potest ex fructibus Beneficii alere se, et suos (a).

49. — Quæstio est an pensionarius teneatur pariter erogare pauperibus fructus pensionis statui suo superfluos? Alii, ut *Sanch. Mol. Salmant.* distinguunt pro pensionis qualitate, si est Laicalis, aut Ecclesiastica (prout explicabitur *num. 59.*): negant si est Laicalis; affirmant verò si est Ecclesiastica, dicendo tunc pensionem transire cum eadem naturâ et onere fructuum Beneficii. Nihilominus est satis probabilis sententia de *Lugo, Vasq. Covar. Azor. etc.* quæ universè negat; et *Azor.* refert ità fuisse decisum à Rotâ Romanâ; ratio est, quia cùm jam detracta sit pensio à fructibus Beneficii, jam isti reperiuntur piè applicari; quâ de re nulla remanet obligatio illos applicandi denuò in opera pia. Et idem dicit *Mastrius* cum *Bonac. de Commendis Equitum S. Joannis, S. Jacobi, etc.* quibus Gregorius XIII. concedit testandi facultatem: Sed in hoc contradicunt *Azor. Navar. etc.* (b). An autem beneficiati teneantur ad restitutionem, si fructus Beneficii in usus vanos impendant, vide quod dictum est *Tract. X. n. 7.* ubi etiam fuit sermo de diversis Clericorum Peculiis, et de eorum facultate in disponendo de illis. Hic tantum superest advertendum, materiam gravem in hoc debere esse majorem quàm in furto, ut communiter loquuntur DD. *Coninch. et Castrop.* qui requirunt tertiam aut saltem quartam partem fructuum Beneficii; sed *Lugo, Croix, etc.* hoc reprobant, et dicunt esse sufficienter gravem vigesimam partem, nempè quina in

---

(a) *Lib. 3. num. 491. Qu. II.* — (b) *ibid. Qu. VI.*

centena, si ipsa pars pertingit ad summam notabilem (a).

50. — Quoad residentiam verò, jam locuti sumus de Episcoporum, et Parochorum residentiâ *Tr. VII. ex n. 14. et ex n. 62.* Restat hîc de residentiâ Clericorum, qui portionem habent in Cathedralibus, aut Collegiatis: hi ex *Trid. Sess. 44. cap. 12.* possunt abesse tres menses; et hoc tempore licet lucrentur fructus præbendarum, non verò distributionum, quæ (hic obiter advertendum) non possunt à consociis remitti; *quamvis, remissione seclusâ, his careant*; ut loquitur Concilium (b). Ceterum quoad fructus præbendarum tribus illis mensibus, ille eos non amittit, licet inutiliter, et sinè justâ causâ Canonicus abesset, ut satis probabiliter dicunt *Sanch. Pelliz.* et alii, dùm Concilium sinè ullâ limitatione Canonicis permittit tanto tempore abesse. Advertatur tamèn, quòd ex *Decr. S. C. Conc. apud Jordan. Pax* (c), Canonici nequeunt in mensibus conciliaribus abesse Diœcesi, nisi de licentiâ Episcopi. Et hîc notandum ampliùs Episcopum non posse conjungere tres menses anni præteriti cum tribus aliis anni sequentis, ut declaravit Benedictus XIV. in suâ Bullâ *Ad universæ* (d); sed hoc benè posse Canonicos, dummodò (ait *P. Concina*) absit scandalum, et cultus divinus non minuat.

51. — Præcipit Tridentinum ibidem, Canonicos, qui ultrà tres menses non resident, primo anno privari dimidiâ parte fructuum; quòd si in absentia perseveraverint, privantur omnibus fructibus illius anni: *Crescente verò contumaciâ* (ait Tridentinum), *contrà eos juxtâ sacrorum Canonum constitutiones procedatur*, nempe ad ipsorum beneficiorum privationem. Tenet *Bon.* (e) Canonicos absentes pro illo absentiae tempore non privari ipso facto dictis fructibus, dicens quòd Decretum Concilii est pœnale, ideòque exposcit sententiam. Nos

---

(a) *Lib. 4. num. 183.* — (b) *lib. 3. num. 675. Dub. 2.* — (c) *Jord. Pax Elucubr. lib. 20. tom. 40. num. 79.* — (d) *lib. 4. num. 122. v. Insuper.* — (e) *T. 1. D. 5. de Onere Benef. ad resid. pag. 4. num. 19. cum Macigno.*

non dubitamus quin sit pœnale quoad restitutionem dimidiæ partis fructuum totius anni; sed quoad fructus correspondentes ad absentiae tempus elapso trimestri conciliari, dicimus cum *Salm.* (a) eos non posse exigi, aut retineri, dùm in Concilio dicitur: *Privetur dimidia parte fructuum, quos ratione etiam præbendæ, et (nota) Residentiæ fecit suos.* Si igitur Canonicus ratione residentiæ facit suos fructus, consequens erit, quòd non residens non facit suos. Et hoc clariùs explicavit Benedictus XIV. in Brevi (quod in Bullario est appositum) Cardinali Delfino directum sub die 19. Januar. 1648, ubi dixit Canonicos non canentes in choro nullo pacto ex præbendis et distributionibus facere fructus suos, atque adeò restitutioni obnoxios esse. Igitur si non canens non acquirit fructus, tantò minùs qui non assistit choro (b).

52. — Causæ excusantes totaliter Canonicos à Chori assistentiâ sunt tres: *Infirmitas, rationabilis corporis necessitas, et evidens Ecclesiæ utilitas*, ut dicitur in *Cod. un. de Clericis non resid. in. 6.* Ità ut his stantibus causis, Canonici non privantur nec fructibus, nec distributionibus. Excusat igitur, I. *Infirmitas*, intelligitur gravis, aut ea quæ probabiliter potest gravis fieri. Hinc excusantur senes, si non possunt sinè gravi incommodo adire, aut interesse choro. Cæci tamen tenentur interesse, si sinè gravi incommodo possent adire Ecclesiam; et ità pariter surdi: qui tamen supplere tenentur submissè recitando partem, quàm non audiunt (c).

53. — Excusat II. *Necessitas corporis*; quâ de re intelligitur excusare timor cujuslibet damni gravis. Ideòque excusantur, qui medicinas sumunt, aut ad balnea, aut ad salubriorem aerem proficiscuntur (d). Hic notatur 1. quòd si quis fuerit injustè excommunicatus, aut suspensus, aut si ei injustè denegetur absolutio, et propterea choro non interest, hic nec fructus, nec distributiones amittit. Notatur

---

(a) de legib. c. 2. num. 62. — (b) lib. 3. num. 675, Dub. 3. et lib. 4. num. 129. — (c) lib. 4. num. 129. Dub. 1. et 2. et n. 163. Qu. III. — (d) lib. 4. num. 130. v. II. excusat.

2. quòd si Ecclesia fuerit polluta aut interdicta, Canonici, licèt non assistant, lucrantur utrumque, modò ipsi causam non dederint interdicto, aut Ecclesiæ violationi (a).

54. — Hic dubitatur 1. An excommunicatus, etsi choro assistat, sit *ipso facto* privatus distributionibus, et fructibus? Affirmat *P. Concina* cum aliis, sed non improbabiliter negant *Sanch. Bonac. Castr. Salm.* etc., quia licèt ille peccet assistendo, et mereatur illis privari, attamen nullibi reperitur imposita talis privatio *ipso facto* (b).

55. — Dubitatur 2. An irregularis sit privatus? Sed hoc dubium dependet ab illo alio, nempe, an sola collatio Beneficii facta irregulari sit ex se invalida? Si irregularitas fuerit incursa post collationem, certum est apud omnes eum non privari, ideòque Canonicus irregularis qui interest, non privatur nec fructibus, nec distributionibus. Quæstio igitur est, an sit nulla provisio, cùm irregularitas antè illam incursa fuerit? Negant *Castrop. Roncag. Elbel, Salm.* etc. Sed probabiliùs affirmant *Bonac, Tournely, Concina, Holzm.* et alii communissimè. Et probatur 1. ex *cap. 1. de Cler. pugn. in duello*, ubi dicitur; quòd potest dispensari cum Clerico irregulari, ut Beneficium recipiat; itaque sinè dispensatione est incapax. Probatur 2. ex *Trident. Sess. 22. c. 4.* ubi sic dicitur: *Non fiat provisio nisi iis qui ætatem, et ceteras habilitates habent, aliàs irrita sit.* Nec dicatur hìc loqui de habilitate de jure naturali, non autem positivo; nam respondetur, quòd ætas utique est de jure positivo, ideòque *Tò ceteras habilitates* debet intelligi de habilitatibus tùm de jure naturæ, cùm de positivo. Quare probabiliùs, imò veriùs irregularis non potest Beneficii fructus lucrari (c).

56. — Excusat III. *Ecclesiæ utilitas*; intelligitur modò sit gravis Episcopi aut capituli judicio; intelligitur non tantùm utilitas Ecclesiæ propriæ, sed etiam Ecclesiæ universalis, aut Diœcesis, ut com-

---

(a) *ibid. v. Quando* — (b) *ibid. v. Cùm autem.* — (c) *lib. 4. cit. num. 130. v. Quæritur autem.*

munitur dicunt *Concina*, et *Salmant.* cum *Pelliz. Castropal. Bonac.* etc. contra *Holz.* qui non admittit bonum Ecclesiæ universalis; sed immerito, quia istius bonum est præstantius, et in bonum particularis etiam confert. Propterea non carebit nec fructibus, nec distributionibus, 1. Canonicus qui Romæ, aut apud Principem degit ut jura sui Beneficii (non autem jus proprium ad Beneficium) patrocinatur, aut missus à Capitulo negotiorum Ecclesiæ causâ, aut missus ab Episcopo ejus nomine ad limina Apostolorum visitanda; aut si Episcopus eum ducit secum (cum possit etiam duos secum ducere) ad præfatam visitationem: aut si fuerit in Vicarium Capitularem electus; si autem ab Episcopo sibi Vicarius fuerit creatus, lucrabitur fructus, non verò distributiones (a). 2. Canonicus Pœnitentiarius, si ipse Confessiones excipit dum officium recitatur. *Trid. Sess. 24. c. 8.* aut in Confessionali expectat eos qui confiteri velint, ut dicunt *Castr. Bonac. Concina. Ronc. Salm.* etc. cum declaratione S. C. Et idem dicit probabiliter *P. Concina* de Canonico in locum Pœnitentiarum suffecto, aut de alio qui tempore concursus ad illum coadjuvandum missus fuerit ab Episcopo. Idem dicunt de Canonico curato dum suo ministerio fungitur, *Castr. et Concina* qui hoc admittunt (contra *Bonacinam*) licet Ecclesiæ, cujus curam habet, esse diversa, sed ipsius Diocesis. 3. Canonicus Theologus qui tempore officii docet, aut concionatur, aut concioni faciendæ vacat (b). 57. — Lucrantur verò fructus, sed non distributiones (nisi alia esset consuetudo, ut dicunt *Pichler, et Concina*) 1. Canonici Examinatores examinantes dum recitatur officium. 2. Visitatores Diocesis. 3. Duo illi Canonici quos sibi Episcopus adsciscere potest. 4. Canonici qui docent in scholis (aut student de licentiâ Episcopi per quinquennium Theologiæ), ut habetur in *Cap. in fin. Docentes, de Magistris*; Quod etiam extendunt communiter DD. cum Declar. S. C. etiam ad Grammaticam, *Castr.*

---

(a) num. 130. v. III. *Excusus* — (b) *ibid* v. *Sic pariter.*

*Ronc. et Salmant.* qui rationabiliter extendunt etiam ad Logicam, et Philosophiam. Et etiam currit pro Parochis qui docent, non autem qui student, ut dicunt iidem AA. (a).

58. — Deniquè notatur quòd quatrifariam Beneficia amittuntur : 1. morte Beneficiati. 2. Sententiâ Judicis. 3. Renunciatione. 4. Legis dispositione. Sed circà hos postremos modos oportet plura notare. Et I. quoad renunciationem, aut resignationem Beneficii, oportet distinguere plura renunciationum genera, quæ reperiuntur. Alia dicitur *expressa*; alia *tacita*, v. g. ob Religionis Professionem, aut hujusmodi. Alia est *pura*, sinè ullo pacto, aut conditione; alia *conditionata*, nempe in alicujus favorem facta. Et hæc potest esse aut *simplex*, aut *qualificata*, nempe cum pensione, aut cum pacto iterùm Beneficium recipiendi, quæ dicitur *Jus regressus*. Ad hoc ut hæc renunciatio conditionata vim habeat, multa desiderantur, 1. ut Beneficium jam à resignante sit acquisitum. 2. Ut liberè, non minis fiat. 3. Ut fiat in manus Pontificis. 4. Ut à Papâ acceptetur, vel ab alio, qui potest illam admittere; et si renunciatio est pura, ut sit validæ, omninò acceptata esse debet saltem à Collatore, ut habetur ex cap. *Admonet*, de *Renunc.* (b). Ut acceptetur à resignatario. 6. Ut patroni consentiant. 7. Ut fiat eum clausulâ, *Non aliter*, etc. 8. Ut si Renuncians sit infirmus, saltem post renunciationem peractam, superstes sit per 20. dies. 9. Ut renunciatio publice-  
tur in Curiâ Romanâ (c). Quod dicitur de renunciatione, idem etiam currit pro Beneficiorum permutatione. II. Quoad ultimum, quod est legis dispositio, vi hujus ipso facto amittuntur Beneficia ob Matrimonium, ob Religiosam Professionem, ob alterius Beneficii incompatibilis acceptationem, ut dictum fuit num. 40. Item amittuntur Beneficia ob simoniæ facinus, et præsertim ob simoniam patratam ab Examinatoribus Synodalibus in Beneficiis Curatis; qui si aliquid accipiunt examinis contem-

(a) num. 131. et 132. — (b) Vide hæc et alia lib. 3. num. 61.  
— (c) lib. 3. num. 212.

platione, tàm ipsi, quàm illi qui dederunt, inhabiles fiunt ad recipienda in posterum Beneficia; et *ipso facto* privati existunt omnibus Beneficiis quæ jam habebant; et hoc antè omnem sententiam, ut habetur ex Trident. *sess. 24. c. 18.* dùm dicit Concilium, ab eâ simoniâ *absolvi nequeunt, nisi dimissis Beneficiis.* Incurritur etiam privatio Beneficiorum, etiam antèa obtentorum, ob collationem simoniacam alicujus Beneficii. Sed hîc distinguendæ sunt multæ species Simonix: Mentalis, Conventionalis, Realis, et Confidentialis. *Mentalis* est, cùm aliquis dat temporale cum intentione aliquem obligandi ad præstandum spirituale, aut è converso, sed nullo interveniente pacto. *Conventionalis* est, cùm intercedit pactum; sed ex neutrâ parte executioni mandatum; neutri harum imposita est aliqua pœna. *Realis* autem est cùm jam pactum est adimpletum; et huic ex Bullâ S. Pii V. *Cùm primùm* 1566. præter Papalem excommunicationem *ipso facto* imposita est pœna nullitatis collationis Beneficii (itâ ut ex *Extr. Pii IV. In sublimi*, sub die 5. Maji 1662. Simoniacus, si nollet Beneficium omittere, absolvi nequeat); et adest præterea pœna privationis Beneficiorum antèa adeptorum; et inhabilitas ad alia in posterum adipiscenda. Sed juxtâ sententiam probabiliorum, et communiorum *Nav. Suar. Sanch. Laym. Anac. Ronc. Croix*, etc. præfatæ pœnæ non incurruntur, nisi simonia ab utrâque parte perfecta sit; et hic est stylus Curix, ut testatur *Nav.* et alii (a). Et licèt simonia sit completa, prædictæ duæ ultimæ pœnæ privationis, et inhabilitatis non incurruntur, nisi post sententiam condemnatoriam, ut dicunt communissimè *Bonac. Castrop. Sanch. Laym. Filliuc. Salm.* etc. (b), nam in nullâ legum invenitur hæc pœna *ipso facto*. Nec obstat Bulla S. Pii, quia (ut dicunt præfati DD.) illa intelligitur suam habere vim in foro externo, cùm dicatur ibi *quicumque convictus fuerit*; saltem in eo sensu est tantum recepta. Simonia *Confidentialis* deniquè est cùm ali-

---

(a) *num. 106. v. Qu. I.* — (b) *lib. 3. num. 212.*

quis renunciat alteri Beneficium cum pacto, ut hic postea retrocedat, aut renunciet sibi, aut alteri, aut cum onere fructuum portionem sibi præstandi. Huic simoniæ confidentiali impositæ sunt eadem poenæ, et insuper ex aliâ Bullâ ejusdem S. Pii *Intolerabilis*, §. 3. sufficit ut simonia completa sit ab unâ ex partibus (a). At quod spectat ad privationem Beneficiorum, quæ jam erant obtenta, et inhabilitatem ad ea in posterum obtinenda, impositas expressè in citatâ Bullâ *Cum primum*, saltem opus est sententiâ declaratoriâ delicti, ut dicunt probabiliter *Cajet. Less. Sanch. Castrop. Spor. Mol. Salm.* etc. contra *Vasqu. Bonac.* etc. (b). Observa etiam quod dictum est *Tract. IV. n. 51. et 52.*

59. — Lubet hîc aliqua adnotare circâ pensionem de quâ in præcedentibus numeris mentio facta est. Pensio est *Jus exigendi aliquam partem ex Beneficio alterius*. Ipsa triplex est: Temporalis, Spiritualis, et Media. Temporalis, sive Localis est illa quæ datur Sæcularibus, aut Clericis ob aliquod temporale munus, v. gr. Procuratoris, Advocati, Cantoris etc. Spiritualis, sive Ecclesiastica est illa quæ datur ob aliquem spirituale titulum, ut Prædicatoris, Coadjutoris Parochi, etc. Media autem est illa quæ non datur ob aliquod munus spirituale, sed est fundata in aliquo titulo spirituali, ut est illa quæ datur ad sustentationem Parochi senis, Clerici pauperis, etc. (c). Notandum 1. quòd Pensio super Beneficium quomodolibet sit, debet à Papâ designari. An autem Episcopus possit assignare Pensionem in certis casibus necessariis, v. g. ad lites componendas, aut ad compensandam æqualitatem in Beneficiorum permutatione, aut ad succurrendum (ut dictum est.) paupertati alicujus Clerici; alii hoc admittunt cum *Busemb. ex c. 21. de Præb. cap. 3. de Coll. et cap. Aquæductus, de Rer. permut.* Sed *Lessius, et Salm.* negant dicentes hoc esse Pontifici reservatum, juxta stylum Curie Romanæ, qui facit legem (d). Notandum 2. Pensionem debere esse moderatam, adeò ut

---

(a) num. 1061. v. Qu. I. — (b) lib. 4. num. 112. Qu. III. —  
 (c) lib. 3. num. 137. — (d) Vide hæc, et alia l. 3. num. 74. et seq.



tertiam partem Beneficii redditum non excedat (a). Notandum 3. quòd cùm Beneficium est Jurispatronatus, requiritur (ut dictum est num. præcedent.) consensus Patroni ad renunciationem, cùm est conditionata, secùs verò ad Pensionem; ità *Lessius*, *Busemb.* et alii (b). Notandum 4. quòd Pensionarius, si recipit Pensionem uti Clericus (non autem uti Laicus), tenetur ex Bullâ S. Pii V. ad recitandum Officium B. Virginis, et omittendo illud fructus non facit suos. Illi tamen qui Officium majus recitant excusantur à tali onere; et Equites Ordinum Militum satisfaciunt aliis precibus à Religione impositis, ut commune est apud omnes DD (c).

60. — Notandum insuper (loquendo de Clericis in generali) 1. vetitas esse Clericis artes viles, ut hospitis, lanii, gesticulatoris. Vetitus est etiam profiteri Chirurgiam in morbis, ubi incisione aut adustione opus est, modò alius idoneus non desit (d). Hoc tamen solùm vetitum est Clericis in *Sacris*, ut habetur ex *cap. Sententiam, Ne Clerici*, etc., non autem Beneficiatis, ut rectè dicunt *Bon. Mol. Tournely, Pontas*, etc. (e) 2. Ordinatis in *Sacris*, et Beneficiatis vetita sunt munia Judicis in criminalibus, et etiam in civilibus in foro sæculari; *cap. Sed nec. 4. Nec. Cler. vel Mon.* et Advocati in foro sæculari; *cap. Multa 1. eod. tit. et cap. Cler. de Post.* ubi interdicitur Ministris Altaris, Beneficiatis, et Monachis, *In placitis sæcularibus disputare, exceptâ defensione orphanorum, aut viduarum*, ut dicitur in dicto *cap. Multa*. Et exceipit etiam, si defenderent aliquam causam propriam, aut consanguineorum intrà quartum gradum; qui defensorem non inveniunt. Clerici tamen in *Minoribus* licitè possunt in quocunque foro causas civiles, et etiam reos in criminalibus patrocinari (f). Et Monachis etiam permissum est ex licentiâ Prælati Monasterii causas tueri; *cap. Ex parte, de Postul.* 3. Vetitum est Clericis cum mulieribus cohabitare, modò non sint mater,

(a) *Lib. 4. num. 138. ad II.* — (b) *lib. 3. num. 73. et lib. 4. num. 138. ad III.* — (c) *lib. 3. num. 74. v. Sed nos, et lib. 4. n. 138. ad IV.* — (d) *lib. 4. num. 189. et lib. 7. num. 384. ad V.* (e) *Lib 4. n. 187.* (f) *Lib. 4. n. 219.*

soror, aut amita, aut talis ut nulla ingeri possit periculi, aut scandali suspicio : et insuper arma deferre (nisi esset in itinere) ut dicit *Busemb.* (a); venationes clamorosas exercere : observa quod dictum est *Tract. X. num. 72.* et negotiari, vide in *Tract. cit. num. 192. et seq.*

61. — Deniquè notandum vetitum esse Clericis, et Religiosis Ecclesiastica bona cujuscumque loci pii sinè assensu Pontificio alienare, ut ex *Extrav. Ambitosæ, de Reb. Eccl. non al.* Sub nomine *Alienationis* veniunt permutare, pignori dare, transactiones facere, cum pars remittitur. Sub nomine *Bonorum Ecclesiasticorum* veniunt stabilia, debitorum nomina, annui redditus, jura, et servitutes in bona aliena, greges, et armenta, arbores fructiferæ, et summæ magnæ datæ ad emptiones faciendas stabilium; item veniunt bona mobilia pretiosa, quæ possint conservari, ut Bibliothecæ, gemmæ, vasa aurea, aut argentea. Sub nomine *loci pii* intelligitur quilibet locus auctoritate Episcopi erectus, ut sunt Seminaria, Hospitalia, et Confraternitates. Si tamen adesset aliquis fundus donatus Ecclesiæ cum facultate, ut arbitrio administratoris alienari possit, bene potest alienari ab eo sinè Pontificis assensu, ut probabiliter dicunt *Armill. Bonac. Cov. Croix*, etc., nam tunc facultas habetur à domino rei. Sed ita pariter, si dominus prohibuisset alienationem, fundus etiam accedente Pontificis assensu alienari non potest, nisi talis causa supervenisset, ut præsumere faceret consensum donantis (b).

62. — Solemnitates autem pro bonorum Ecclesiasticorum alienatione sunt sequentes : 1. Communis consultatio. 2. Episcopi, aut Capituli, aut Cleri, aut Prælati Regularis consensus, et etiam domini, si bona Beneficii alienentur. 3. Subscriptio ipsorum consentientium. 4. Assensus Papæ, aut S. C. juxta Decretum Urbani VIII. sub die 7. Septembris 1624. sed cum petitus esset tenue ex c. *Terrulas*, 12. q. 2. conceditur Episcopo, ut per ipsum liceret alienari. Dubitatur autem quodnam pretium dicatur tenue,

---

(a) num. 190. — (b) lib. 4. num. 187.

alii dicunt esse summam inferiorem centum ducatis; sed *Delbene* cum communi, (ut dicit *La-Croix*) et ut deducitur ex Glossâ ad illum textum citatum, dicit esse summam non excedentem 25. scuta aurea, quæ valent 40. scutis Romanis. Subjungit tamen *Fagnanus* in cap. Nulli, de Reb. Eccl. etc. n. 26. in hoc nihil haberi certi, sed summam remitti arbitrio Judicis. Et multi dicunt, quod in casu necessitatis, aut evidentis utilitatis, potest Episcopus licentiam dare pro quâlibet alienatione (a); sed hoc debet intelligi, cum tempus non suppetit S. C. adire. An autem alienationes factæ sinè solemnitatibus, sed ex justâ causâ sint non solum illicitæ, sed etiam invalidæ? multi negant; sed alii probabilius cum *Fagnano* affirmant, præsertim si deest Pontificis assensus. Dicit *La-Croix* cum multis aliis, quod cum adest præscriptio 40. aut 30. saltem annorum, tunc præsumitur intercessisse assensus Pontificius (b). Advertendum quod locatio fundorum Ecclesiasticorum, qui quolibet anno fructificant, non potest ultra triennium fieri: Beneficiatus tamen, ut dicunt communiter, potest locare bona Beneficii, duraute suâ vitâ (c).

### CAPUT III.

*De statu, et officiis nonnullorum sæcularium.*

#### PUNCTUM I.

De Judicibus, et Scribis.

*De Judicibus. Quando Judex potest condemnare, aut inquirere, aut pœnam diminuere. Et an possit ex scientiâ privatâ judicare 63. et 64. Et an possit judicare cum opinione minus probabili 65. An possit cum commissario stipendium partiri; et an possit dona acceptare 66. An possit sibi retinere prætium injustæ sententiæ 67. De Scribis 68.*

63. — **I**N hoc puncto multa quæ ad Forum spectant, omissa facimus; dumtaxat hîc adnotabimus ea

(a) l. 3. n. 187. Not. 6. — (b) *ib. v. Si autem.* — (c) *ib. Not. VII.*

quæ conscientiam respiciunt, et quædam Forensia principaliora.

64. — Et I. Circà Judices, notandum 1. non posse Judicem nonnullum damnare reum, si non est qui accusat; excepto delicto læsæ Majestatis, aut hæresis, aut si reus esset confessus in judicio coram duobus testibus, aut si delictum esset notorium, aut si publicâ famâ constaret, et indicia satis nota sunt majori parti regionis, aut viciniæ. Ut autem possit procedi ad inquirendum sinè publicâ infamiâ, et aliquandò etiam ad sententiam, sufficit adhuc semiplena probatio, ut est unicus testis fide dignus (a). Notandum 2. Judicem inferiorem non posse pœnam diminuere sinè aliquâ urgenti causâ, ut potest supremus, quoties intervenit aliqua juxta causa (b). Notandum 3. quòd si Judex sciat privatâ notitiâ aliquem esse reum, qui juridice constat esse innocens, non potest illum damnare juxta communem sententiam cum *S. Thomâ* (c), quia cum judex sit persona publica, debet ille procedere secundum allegata et probata, nimirum juxta publicam scientiam quæ habetur de causâ. Et ita contrà dicunt *Sancti. Salm.* et alii cum ipso *Angelico*, quòd si quis probatus est reus, sed Judex scit eum esse innocentem, tenetur Judex eum condemnare. Nihilominus hoc ultimum valde probabiliter negant *Silvest. Lessius, Nav. Tol. Bonac. Holzm. Anacl.* etc. damnare enim innocentem videtur intrinsecè malum; sicut esset, si Judex obligaret mulierem cohabitare cum aliquo, quem privatim sciret non esse ejus virum. Ità res se habet circà pœnas corporales; sed in pœnis pecuniariis, et in causis civilibus Judex sinè dubio judicare debet juxta id quod probatum est; *Less. Lug. Bonac. Laym.* etc. dum Respublica pro communi utilitate, quæ habetur dum judicium fertur juxta publicam scientiam, potest utique transferre bonorum dominia (d).

65. — Notanda est 4. Propositio damnata ab Innoc. XI. quæ dicebat: *Probabiliter existimo Judicem posse judicare juxta opinionem minus probabi-*

---

(a) *Lib. 4. num. 199. et 200.* — (b) *num. 205.* — (c) 2. 2. q. 67. a. 2. — (d) *lib. 4. num. 208.*

*lem.* Merito fuit illa proscripta, quia Judex unicuique suum jus distribuere tenetur, et utique majus sibi jus habet illa pars, quæ probabiliore affert rationes. Cum autem causa habet æqualem probabilitatem ex utrâque parte, si illa est civilis, res dividi debet, modò causa quæ agitur non sit pupilli, viduæ, loci pii, aut Matrimonii, quia tunc isti debent præferri. Si autem causa esset criminalis, semper reo favendum est, cum in sui defensionem adsint rationes probabiles (a). Fit autem dubium, an in civilibus erit reo favendum rem possidenti? Certum est. 1. possessori favendum esse, si rationes sunt æquales; ita communiter *Sotus, Silvest. Molin. et Sanch.* cum multis aliis, ex Regulâ 65. de Reg. jur. in 6. ubi sic dicitur: *In pari delicto, vel causâ potior est conditio possidentis.* Certum est 2. in dubio tam proprietatis, quam possessionis, judicium ferendum esse pro habente sibi rationes probabiles, ut apparet ex Prop. damnatâ superius relatâ. Et cum rationes sunt æquæ probabiles, Judex tunc debet rem dividere, ut dictum est, et tunc nihil potest ab aliquâ partium accipere, ut sententiam illi proferat, juxta aliam Propos. 26. ab Alexandro VII. proscriptam (b). Sed dubitatur, si pro actore sint rationes probabiles, pro quo judicandum? In hoc casu ait *Tamburin.* judicandum esse pro actore; sed communissimè contrarium dicunt *Carden. Holzm. Elbel, Bonacin, Filguer. Croix*, et quidem modernus doctus asserit hanc sententiam esse communem; quia (ut pluries dictum est, et præcipuè in *Tract. I. numer. 20.*) legitima possessio dat jus certum ad rem retinendam, usquedum non constat illam non esse possessoris; et tunc Judex favendo possessori non solum judicat juxta probabiliorem, sed juxta probabilissimam sententiam, fundatam in aliâ Regulâ juris, (*Reg. II. Juris*) quæ sic dicit; *Cum sunt partium jura obscura* (sicuti jam est, cum non adest certitudo ex parte Actoris) *potius favendum est reo, quam actori* (c).

(a) num. 210. Qu. I. — (b) lib. 4. num. 216. v. *Sed hic.* — (c) lib. 4. num. 210. Qu. II.

66. — Notandum 5. non posse Judicem cum commissario partiri stipendium quod ad commissarium spectat, quia Judicis munus est commissarium eligere. (a) Notandum 6. non posse Judicem recipere dona ex partibus; et hoc certum est si dona sint pretiosa, quæ à lege dicuntur *Sportulæ*. Sed dubitatur 1. An Judex possit recipere esculenta, et poculenta, *Xenia* appellata? Multi admittunt cum *Azor. Cajet. Silv. Ang. Menoc.* apud *Salm.* (b), ex *L. Solet*, §. *Non verò*, ff. *de Off. Præt. et cap. Statutum*, §. *Insuper, de Rescript.* in 6. ubi permittuntur accipi esculenta sponte oblata, modo hæc, (ut subjungit *Glossa*) nec directè, nec indirectè quærantur. Sed negant *Salm. n. 80. Sot. Nav.* etc.; nam quoad *L. Solet*, illa correctæ fuit in Authenticâ §. *Scriptum*, et §. *Jusjurandum*. Et quoad textum Canonicum, dicunt quod ille tantum procedit pro Judicibus Delegatis Apostolicis, non verò pro aliis. Sed hæc distinctio mihi non suadet; dum nescimus percipere cur isti, et non alii Judices possunt id facere. Et ratio quam *Glossa* adducit in textu pro primâ sententiâ, non est contemnenda: sicut ait (*Glossa*) non est simonia, si Prælatas Regularis gratis recipit aliquid ab eo qui Religionem ingredi cupit, uti habetur in *c. Delict. 30. de Simon.* in fine, ubi dicitur: *Illud tamen grante recipi poterit, quod fuerit sine taxatione* (nempe Superioris) *gratis oblatum*. Quia non supponitur Prælatas pro re gratuitè oblatâ velle admissionem ad Religionem venumdare; sic pariter non supponitur Judex ob tenue donum sententiam injustam velle proferre. Hanc opinionem in opere reprobavimus (c); sed hæc re diligentius perpensâ, eam reprobare nescimus; Saltem in hoc (ut ait *de Lugo*) (d), non debet reprobari consuetudo, ubi reperitur legitime præscripta. Non dubitatur quin Episcopi in visitatione Diocesis victus moderatas expensas recipere possint, uti habetur in *c. Romana*, §. *Procuratores, de Censib.* in 6.

---

(a) num 217. v. *Certum*. — (b) *Salm. tr. 29. t. 1. num. 74.* — (c) *lib. 4. num. 211.* — (d) *Disp. 37. num. 137. v. Quarta.*

67. — Dubitatur 2. An Judex prolatâ sententiâ injustâ, teneatur antequâm damnatorium in se detur judicium ad restituendum id, quod accepit pro ferendâ tali sententiâ? Alii probabiliter affirmant, ut *Sot. Medina*, etc., alii tamen, ut *Less.* cum *S. Antonin. Nav.* et *Lugo* cum *Mol. Vasq. Reb.* etc. (a), (et *Salm.* vocant hanc opinionem æquè probabilem) etiam probabiliter negant, quia juxtâ legem naturalem, positâ operâ malâ promissâ, justè recipitur pretium, ut dictum fuit *Tract. X. num. 123.* Opponunt Adversarii *L. 26. ff. de Verb. oblig.* et *L. Pacta, 6. de Pactis*, ubi sic dicitur; *Pacta contrâ leges, vel bonos mores nullam vim habent.* Item opponunt *c. Statutum*, §. *Si quid, de Rescr. in 6.* ubi imponitur restitutio pretii accepti, ac ne illud possit remitti. Sed respondet *Lessius*, quòd licèt ipsæ leges irrita faciant pacta turpia, itâ ut nullam inducant obligationem antequâm ponatur opus turpe promissum; posito tamen opere, licèt auferant actionem talibus pactis agendi in judicio, sed non auferunt (saltem expressè) naturalem obligationem, nec pretium acquisitum irritant. Et etiamsi adesset lex præcipiens restitutionem antè judicium damnatorium, saltem requireretur sententia Declaratoria, juxtâ id quod dictum est *Tract. II. n. 25. (b).*

68. — II. Quoad Scribas, intelligendo eos qui testes examinant, et acta judiciaria describunt, et partibus copias authenticas exhibent; hi peccant si augeant aut minuunt dispositiones, aut omittunt examinare aliquem testem jam productum; si occultant aliquam scripturam præsentatam, aut copiam renunt exhibere; si cùm aliqua scriptura præsentata est, aliam fictam loco ejus supponunt. Item peccant, si exigunt stipendium ultrâ taxam. Dicunt in hoc tamen *de Lugo, Turrian. Salm. et Coreglia*, cùm *Mol. et Dian.* hodiè non peccare Scribas, si aliquid exigunt ultrâ taxas antiquas, quia hodiè aucta sunt rerum pretia, undè non sufficit ad vitam sustentandam illud stipendium, quod dudum sufficiens erat (c); et

---

(a) *Less. cap. 14. num. 56. Lugo Disp. 37. a. 134.* — (b) *l. 4. num. 216.* — (c) *num. 231.*

si taxa antiqua hodiè est injusta, ait *Coreglia*, cum *Sanch.* et *Macado*, ne obligare quidem juramentum taxæ observandæ. Cæterùm communiter omnes dicunt ultrà justum pretium non posse Scribam aliud recipere à partibus, etiam titulo donationis, quia tales largitiones nunquàm sunt spontaneæ, *Navarr. Rodriq. Salm.* etc. Attamen si aliquem laborem extraordinarium adhiberet, tunc potest aliquid amplius accipere. An autem Commissarius plures procurationes missus executum, possit à singulis debitoribus totum stipendium diurnum exigere? Affirmant *Lugo*, et *Less.* (a) exemplo tabellarii qui aliquò missus ad efferendas literas, potest simile stipendium ab aliis, qui ei literas dant eodem ferendas, exigere, ut dictum est *Tract. X.n. 209.* Sed hoc negant *Sanch. Tamb. Dian. Salm.* etc. dicentes quòd salarium diurnum non datur commissario pro numero executionum, sed pro suâ operâ cujusque diei, excepto, si pro executionum numero labor esset extraordinarius (b). Sed tamen hìc oportet distinguere, quia *Sanch.* et *Salmant.* loquuntur, cùm commissario taxatum est pretium pro occupatione suâ cujusque diei; et tunc certè (ut concedit *Lugo*) non potest ille plùs eo exigere. Sed cùm commissiones essent disparatæ, et assignatum esset salarium speciale pro quâlibet procuratione, rectè dicit *Lug.* posse commissarium exigere plura salaria, pro qualitate executionum; et hoc est quod sentit etiam *Lessius*.

## PUNCTUM II.

---

(a) *Lugo de Inst. D. 37.num. 138. Less. lib. 2. cap. 24. num. 28.* (b) *lib. 4.num. 217.*



## PUNCTUM II

### De advocatis , et procuratoribus.

*An Monachi , et Clerici possint agere advocatos. Et quandò advocatus tenetur defendere* 69. *Quas causas potest defendere , et quanto salario etc.* 70. *Si causa est justa etc. Si conveniatur de salario in litis prosecutione , aut pactio fiat de quotâ litis* 71. *De procuratoribus , si habent advocatum gratis. Si ipsi se offerant , etc.* 72.

69. — **I**N primis quoad advocatos , notandum 1. Monachis , et Clericis in sacris vetitum esse alias defendere lites , quàm proprias , et propinquorum , aut miserabilium ( vide quod dictum est n. 60. ). Notandum 2. quòd in causis criminalibus potest advocatus defendere reos etiam nocentes , quia reus semper potest licitè efficere , ut suam pœnam vitet , donec damnatus non est , aut saltem convictus ; sed in causis criminalibus dubiis non potest advocatus defendere actores (a). Notandum 3. Quòd advocatus tenetur defendere eum qui est in extremâ necessitate etiam cum incommodo suo gravi ( non autem gravissimo ) cùm aliud remedium non apparet ; *Sanch. Castropal. Salmant.* et alii communiter cum *S. Thomâ* (b). In necessitatibus verò gravibus etiam tenetur defendere pauperes , sed non cum gravi incommodo ; intelligitur semper ac habet superfluum suo statui. In necessitatibus communibus , sufficit ut eis det aliquid ex superfluis (c).

70. — Notandum 4. quòd advocatus potest certè defendere causas æquè probabiles , sive actorum , sive reorum ; et cùm agitur de reis potest etiam minùs probabiles. Dubium est , an possit defendere causas actorum , quas ipse videt esse minùs probabiles ? Nonnulli id negant , sed probabilìus cum communiori affirmant *Lugo , Azor. Sanch. Busemb.* etc. , quia illa causa quæ tunc sibi videtur minùs

---

(a) *L. 4. n. 210.* — (b) *2. 2. q. 71. a. 1.* — (c) *lib. 4. num. 221. Tom. I.*

probabilis, potest Judici videri, imò postea fieri probabilior. Tenetur tamen tunc suum clientem certiore facere de minori probabilitate suæ causæ (a). Notandum 5. quòd si conventum est de pretio salarii, et cliens litem omissam faciat, benè potest advocatus de integro salario contendere, ut rectè dicunt *Salmant.* cum *Sayro*, juxtà id quod diximus *Tract.* VII. n. 7. ad 4. Hoc tamen intelligitur, modò non eveniret aliqua justa causa litem intermittendì (b). Notandum 6. quòd si advocatus pactione conveniat cum cliente de annuali salario pro omnibus ejus causis, potest illud exigere, licèt nullæ lites occurrerent; nam si postea plures exurgerent lites, ille non potest majus stipendium quærere, modò aliquis extraordinarius labor non requireretur. Si autem advocatus ægrotaret diutius, dum lites aguntur, debet ille saltem pro illo tempore salariùm remittere (c).

71. — Peccat advocatus 1. si defendit aut persequitur causam certè injustam quoad proprietatem, licèt esset justa quoad possessionem, quia sicut reus non potest tunc retinere rem, ità nec ille potest eum tueri. Si verò causa est injusta, advocatus tenetur restituere damna tam parti adversæ, quam suo clienti, si huic injustitia erat ignota. Ideoque antequàm sibi onus causæ defendendæ suscipiat, tenetur sedulò meritum causæ perpendere, et clientem certiore facere de statu et qualitate illius (d). Peccat 2. si paciscitur de pretio, dum lis actitatur, ut habetur ex *cap. Infame*, 3. q. 7. Ille debet conventionem facere de salario, vel priùs, vel postea, quia in decursu litis conveniendo, de facili cogi potest cliens, ut acquiescat solvendo pretium valdè excedens. Si autem salariùm esset certè justum, *Salm.* cum *Navar.* nesciunt eum damnare (e). Tantò magis peccat advocatus, si pasciscitur de quotà litis, v. g. de tertiâ parte, aut quartâ, si causa obtinetur, ex *L. Sumptus*, ff. de Pactis, et *L. Litem*, C. de Proc. Nam tunc adest periculum totis viribus

(a) num. 222. — (b) num. 225. — (c) *ibid.* v. Not. III. — (d) l. 4. num. 223. — (e) lib. 4. num. 224.

conandi litem superare, aut *per fas*, aut *per nefas*. Sed si pretium esset certè justum, neque ad restituendum eum damnant *Lug. Nav. Laym. Filliuc. et Sanch.* cum *Henriq.* dicunt enim ex pacto tunc non teneri clientem solvere pretium, de quo conventum est, quia tale pactum reprobatur per leges; sed non propterea tenebitur advocatus restituere quod accepit (a). Peccat 3. si plures suscipit causas, quam potest commodè illis incumbere, nisi de illis certum faciat clientem. Peccat 4. si aperit parti adversæ arcana parti quam tuetur; modò (aliqui limitant) si secùs fieret, pars adversa subitura esset injustè grave damnum; sed hanc limitationem alii non admittunt cum *S. Thomà* (b). Peccat 5. si dolis, aut dilationibus ad rem non facientibus utatur. Dicit in hoc tamen *Sanch.* (c) cum *Silvest. Armil. Covar. Tap.* etc. quòd si ejus causa est manifestè justa, modò nullam falsitatem producat, benè potest uti dolis (vel ut melius dicat, dilationibus emendicatis), ut injustis dolis adversarii occurrat; citat etiam *S. Thomam* (d) qui ità dicit: *Advocato licet prudenter occultare ea, quibus impediri possit processus ejus.* Sed si causa non esset manifestè justa, nescirem quomodò possem permittere dilationes ad rem non facientes, quibus nonnulli indifferenter utuntur, (eas vocant *Gubernationem causæ*) nisi in solo casu, quo timeretur probabiliter de injustitiâ sententiæ, quia adesset aliquis Judex ob humanos respectus parti adversæ valde affectus.

72. — II. Quoad procuratores notandum 1. quòd si procurator habet advocatum aut scribam, qui operam suam gratis exhibet tantum illius causâ, benè potest pretium quod illis spectaret sibi exigere; secùs verò si illi salarium remittunt clientis causâ. Notandum 2. quòd si procurator substituit alium procuratorem, benè potest dividere cum illo salarium, modò illum admoneat de eo quod agendum est, et causæ periculum in se suscipiat, casu

---

(a) *Lib. 4. Ibid. v. Nec licet.* — (b) 2. 2. q. 71. art. 3. ad 2. — (c) *Cons. p. 2. l. 6. c. 7. d. 9.* — (d) *cit. art. 3. ad 3.*

quo ob alterius negligentiam causa caderet. Notandum 3. id quod aliqui dicunt, nempe non posse procuratorem salarium accipere, si ipse se sponte offert adesse causæ, saltem cum cliens est sibi conjunctus, aut amicus. Sed ego nescirem clientem liberare ab omni onere satisfactionis, nisi constaret quod procurator omnes suos labores remittere voluisset, et quod ipse eam donationem acceptaverit; secus procurator semper habet jus ad mercedem quam meretur (a).

### PUNCTUM III.

De accusatore, testibus, et reo.

*De accusatoribus. Quando debet fieri accusatio, aut denunciatio. An custodes, etc. 73. Clerici quando possunt accusare. Et an debeat præcedere correctio. Præsertim si in communitate vivitur 74. De monitoriis 75. De denunciationibus Hæreticorum 76. De blasphemis hæreticalibus 77. De superstitionibus 78. De testibus. Quando tenentur, etc. 79. Qui omittit dicere veritatem 80. Qui occultat veritatem 81. De reis. Reus, quando teneatur confiteri 82. An cum pœna est magna 83. Si falsum delictum sibi imponit 84. Si falsum delictum imponit accusatori 85. An reus possit resistere; et an teneatur fugere, etc. 86. An possit carcerem effringere; et an custodem pecuniâ corrumpere. An alii possint auxilium ei in hoc præbere, etc. 87.*

73. — **E**T I. Circà accusatorem multa DD. scribunt, quæ in Opere nostro observari possunt: at quia illa potiùs ad Forum quàm ad conscientiam pertinent, hìc omissa facimus; adnotemus tantùm aliqua magis præcipua. Notandum 1. aliam esse *accusationem*, aliam *denunciationem juridicam*, aliam *denunciationem evangelicam*, sive paternam. *Accusatio* est illa quæ fit superiori tanquàm Judici, ut reus puniatur, cum obligatione probandi delictum, et

(a) Num. 233.

pœnam incurrendi, nisi probetur. *Denunciatio* juridica fit superiori tanquàm Judici, sinè tamen obligatione probandi delictum. *Denunciatio* verò *evangelica*, sive paterna, est quæ fit superiori uti patri. Notandum 2. quòd cùm agitur de evitando damno communi, quilibet tenetur accusare delinquentem, ut cùm delictum esset perduellionis, hæresis, aut latrocinii in publicâ viâ, et hujusmodi : et in istis casibus, ut dicit *Sanch.*, potest aliquandò Judex justè offensum ad offensorem patefaciendum obligare, ut damno publico caveatur. Dicunt tamen *Sotus*, *Cajet.* *Sanch. Lugo*, *Salmantic.* etc. ordinariè sufficere denunciationem facere, quia de hoc satis contenti sunt superiores (a). Talis obligatio etiam intercedit cùm agitur de evitando innocentis damno, semper ac gravi incommodo non esset denunciante. Illi tamen qui stipendio locati sunt à Republicâ, aut à dominis, ut denuncient, aut accusent delinquentes, tenentur ad hoc etiam cum gravi incommodo, aliàs debent satisfacere damnum quod ex tali denunciationis omissione oritur. Dubitatur an agrorum, aut gabellarum custodes, nisi denuncient, teneantur solvere pœnæ valorem, quæ, si denunciassent, exacta fuisset? Multi, ut *Sotus*, *Molinus*, *Laym.* etc. affirmant. Sed multi alii communiùs negant, ut *Azor. Less. Lugo, Sanchez, Navar. Salmant.* etc., quia (ut dicunt) ipsi peccant quidem contrà justitiam legalem, non autem contrà commutativam respectu pœnæ, dùm fiscus, aut domini non acquirunt jus ad pœnam, nisi post sententiam; tantò magis, quòd finis legis nihil aliud est, nisi ut domini remaneant indemnes; undè sufficit, ut custodes restituant tantum gabellarum valorem, qui solvendus erat, aut damnum illatum. (b).

74. — Notandum 3. quòd cùm agitur de reparando damno proprio, aut propinquorum usquè ad quartum gradum, aut Ecclesiæ, licitè possunt Clerici accusare delinquentes, etiam in causis sanguinis; modò expressè protestentur se nolle pœnam corporalem, sed solam damnorum restaurationem (c).

---

(a) *Ibid.* n. 236. — (b) *lib.* 4. n. 237. — *Ibid.*

Notandum 4, quòd quandò delictum vergit in damnum commune, licèt sit occultum, debet denunciari, prætermisâ correctione, præsertim si delictum sit hæresis, ut habetur ex Propos. 5. damnatâ ab Alexand. VII. Sed si delictum redundaret in damnum solius delinquentis, debet tunc præmitti correctio juxtâ Evangelium; sed si illa non prodesset, licèt in Evangelio dicatur, quòd debeat repeti coràm uno aut duobus testibus, nihilominùs, si in aliquâ Religiosâ communitate versatur, dicit *S. Thomas (a)*, cum *S. Augustino* tunc expedire denunciare delictum Prælato priusquàm aliis: quia (ait *S. Doctor*) *Prælatus magis potest prodesse, quàm alii (b)*. Imò Angelicus alibi (c) animadvertit, quòd cùm Religiosus videt correctionem futuram fore utiliore per Prælatum, quàm per se, tunc potest statim ipse denunciare delinquentem Prælato; nam in secretâ correctione magis principalis finis est fratris emendatio, quàm illius famæ conservatio; et idem dicunt *S. Bonav. S. Antonin. Sanch. Sol. Castrop. Laym. etc. (d)*. Et rationabiliter subjungunt *Laym. Sanch. et Suar.* quòd cum delictum (sivè sit grave, sivè leve) non adhuc est emendatum, et timetur relapsus, semper meliùs erit à principio illud denunciare superiori, qui prudens judicatur (ut plerùmque æstimari debet, nisi constet de contrario), qui semper meliùs aliis reparare potest; tantò magis quòd omnia delicta particularium in communitatibus Religiosis (ut *P. Suarez*) fere semper redundant in commune damnum, aut propter scandalum, aut propter infamiam, quàm Religio potest sufferre. Quâ de re meritò à Pontificibus approbata fuit Regula Societatis Jesu, ut quisque Religiosus deferre possit ad Superiorem delictum, quin aliquam correctionem præmittat (e).

75. — Notandum 5. quòd cùm per edictum, aut monitorium publicum præcipitur denunciare aliquod delictum, non adest obligatio denunciandi illud,

---

(a) 2. 2. q. 33. a. 8. ad 4. — (b) *Vid. l. 4. n. 242.* — (c) *Quodlib. XI. art. 13.* — (d) *lib. 4. n. 243.* — (e) *Vid. n. 245. Qu. III. et IV.*

nisi quandò delinquens est diffamatus, aut saltem si habeatur indicium, aut tùm est in damnum communitatis, aut tertii: sed cum hâc differentiâ, quòd cum delictum est tantùm in damnum tertii, debet præmitti correctio, et non adest obligatio denunciandi cum damno proprio, sed cum delictum est in damnum commune, totum contrà; tunc enim non tenetur præmittere correctionem, et quilibet denunciare tenetur, etiam cum proprio damno (1). Hoc valet pro monitoriis in generali, sed loquendo de monitoriis particularibus, pro quibus Episcopus excommunicationem fert (ut concessit S. Pius V. in Bullâ Sanctissimus) in injustè retinentem, aut non revelantem intrâ certum tempus eum qui retinet alterius bona (intellige notabilis valoris) ablata, aut inventa, in hoc debet adverti cum *Instructione Confess. tyron.* et cum *Barbosa* (2), qui citat alios AA. ferè communiter uniformes, non teneri denunciare. 1. Ipsum furem. 2. Eum qui furem quidem scit, sed sinè gravi proprio incommodo denunciare non potest. 3. Eum qui cogi non potest ad testimonium ferendum, ut filius, uxor, parens, et *Instructor* præfatus cum *Bonacin.* dicit idem de conjunctis usquè ad 4. gradum, et omnium eorum, qui sunt de familiâ ejusdem qui rem detinet: sed non excusat servos, quoties ab illorum servitio sinè gravi incommodo discedere possunt. Infames tamen, licèt fidem non faciant, tenentur denunciare, 4. Eum, qui solus scit factum, et non potest alium habere testem, ut probet illud. 5. Eum qui nescit certâ scientiâ, aut qui à personis dubiæ fidei scivit, aut non meminit à quo audivit, aut si scivit ab eo qui jam denunciavit. 6. Eum qui justè compensavit pro suo credito. 7. Eum qui tempore monitorii existeret extrâ diœcesim; non autem qui à diœcesi proficiscitur antequàm terminus monitorii spiret. 8. Eum qui delictum cognovit secreto naturali commisso, aut promisso. Dicunt tamen non-

---

(a) n. 248. Not. II. — (b) lib. 4. *Instruct.* p. 2. n. 265. *Barb. de Pot. Episc. Alleg.* 95. ex num. 44. ad 67.

nulli Canonistæ apud *Riccium* (a), ut *Felin: Abb. Rip.* etc. laicos teneri denunciare furem, licet sciverint secretò; sed Theologi communiter, ut *Sotus, Azor. Salm. Navar. Filliuc. Arag.* etc. cum *S. Thomâ* (b) docent oppositum. Potest emanari Monitorium etiam pro scripturis authenticis occultatis, licet non sint partis, sed tertii; modò hic tertius non sit in causâ, ut dicit idem *Instructor*, ex cap. 1. de *Probat.*

76. — Notandum 6. circâ obligationem denunciandi hæreticos, si isti tantum sunt de hæresi suspecti, ut sunt Confessarii sollicitantes *ad turpia*, sortilegia patrantes, Sacramentis abutentes, duas uxores ducentes, Sacramenta ministrantes Sacerdotio non initiati (alii addunt Sacerdotes sigillum frangentes Sacramentale, sed hoc communius negant *Lugo, Molin. Bonac. Salmantic.* etc.): item blasphemias hæreticales effutientes, omnes isti denunciari debent, sed non adest obligatio denunciandi cum gravi damno proprio. Et probabiliter, ut dicunt *Lezana, Bord. Dian. Homob.* etc. etiam excusantur à denunciando omnes conjuncti usque ad 4. gradum, quia in hoc semper adest grave damnum, aut incommodum. Secùs autem si sunt hæretici formales, ut tenendum est cum *Suar. Salm. Fel. Potest.* etc. contrâ alios, quia hæresis est lues quæ semper in damnum commune redundat. Ideòque isti denunciandi sunt etiam cum damno proprio: et non tantum à fratribus, sed etiam ab uxoribus, filiis, et à parentibus, juxta sententiam communissimam *Azor. Bonac. Ronc. Salm. Dian Viva*, (c).

77. — Notandum 7. præsertim circâ blasphemias, aut propositiones hæreticales, quòd quandò illæ prolatae sunt seriò, et advertenter, adest obligatio denunciandi intrâ mensem, ut dicit præfatus *Instructor*, contrâ *Salm.* qui volunt intrâ sex dies; sed *Salm.* loquuntur de legibus particularibus Hispaniarum. Dictum est seriò, *advertenter*, quia non adest obligatio denunciandi propositiones, aut blasphemias prolata ex ignorantia, aut lapsu linguæ,

(a) *Lib. 4. in Praxi, de Monit. num. 12. et 13.* — (b) 2. 2. q. 70. art. 12. ad. 2. (c) n. 249. et 250.



aut eo iracundiæ impetu , ut proferentem extrà rationis usum abripuerit , aut prolatas sinè pertinaciâ , quæ semper necessaria est ut ad denunciandum obligationem inducat , ut dicunt iidem *Salm.* cum aliis (a). Olim ex Concil. Lateran. erat obligatio denunciandi omnes blasphemias etiam simplices ; sed ut dicunt *Sanch. Tambur. et Mazzotta* , hodiè hæc obligatio abiit in desuetudinem , saltem ut volunt *Salm. cum Bonac. Trull.* etc. cessat hæc obligatio , si delinquens emendatur per correctionem (b).

78. — Notandum 8. quòd , generaliter loquendo , debent etiam denunciari superstitiones , cùm sunt qualificatæ , nempe cùm sunt factæ cum pacto aut invocatione expressâ dæmonis , aut eum adorando , aut certos psalmos aut preces recitando , quibus videtur in auxilium invocari ille ; aut hostiis consecratis , Chrismate , aut Oleo sancto abutendo , aut si illas ex professo docuerint vel docti fuerint ; aut si effectum consecutæ sint. Dictum est *generaliter loquendo* , quia in Regno nostro , quoad sortilegia à sæcularibus patrata , ex insinuatione nostri regnantis Regis Caroli , nulla adest obligatio eos denunciandi ad tribunal Ecclesiasticum , nisi cùm intercederet Eucharistiæ , aut olei sancti abusus (c). Notandum tandem quòd in eos qui culpabiliter omitunt denunciare , adest excommunicatio , sed ferendæ sententiæ : nec est reservata , uti advertunt *Bonac. Lugo, Fel. Potestas* , etc. (d).

79. — II. Quoad testes , ommissa faciemus hic ea quæ ad forum pertinent. Notabimus dumtaxat 1. Testem non teneri veritatem fateri , ut dicit *S. Thomas* (e) , nisi cùm eâ opus est secundùm caritatem ad reparandum aliquod grave Reipublicæ , aut proximi malum , aut ut pareatur Judicis mandato , qui legitime eum interrogat , nempe cùm semiplena habetur probatio publicitatis delicti , aut indiciorum evidendum , etc. aliàs non tenetur testis ad deponendum quod scit (f). Sic pariter non tenetur ,

---

(a) *Lib. 4. num. 252. et lib. 3. n. 123.* — (b) *lib. 4. n. 252. et n. 254. Not. II.* — (c) *lib. 4. n. 253.* — (d) *n. 254.* — (e) *22. qu. 70. art. 1.* — (f) *n. 264. ad 267.*

quandò indè proveniret sibi, aut suis aliquod damnum, aut cùm sub naturali secreto factum cognovisset, ut dicit *S. Thomas l. c. art. 2.* modò revelatio non expediret ad vitandum commune damnum, aut ut liberaret proximum ab aliquo futuro damno (a).

80. — Notandum 2. quòd si quis advertenter falsum testatur, et ejus depositio est damni alterius causa, nemo dubitat quin totum damnum restituere teneatur (b). Sed dubitatur 1. An peccet, et teneatur ad restitutionem testis, qui veritatem fateri renuit, in casu quo tenetur eam aperire ex justitiâ, aut ex caritate? Oportet distinguere: si istæ effugit ne citetur, peccat contrà caritatem, non autem contrà justitiam; quâ de re nihil tunc tenetur restituere, ut fatentur omnes. Si autem citatus jam elabatur, nonnulli eum obligant ad damnum; sed communiter, et probabiliùs negant *Lugo, Less. Mol. Silvest. et Bonac.* quia citatio dumtaxat ad obedientiam eum constringit, non autem ad justitiæ actum (c).

81. — Dubitatur 2. An ad restitutionem teneatur testis, qui à Judice legitimè interrogatus veritatem celat, quin falsum testetur, v. gr. dicendo se nihil scire? Multi affirmant, ex eo quia, posito Judicis præcepto, ex justitiâ tenetur testis veritatem fateri. Sed probabiliter negant *Molina, Less. Bonac. Lug. Raynaud.* et alii, propter eandem superiùs allatam rationem, quia Judicis præceptum testes ad testificandum non obligat ex justitiâ, sed solum ex obedientiâ. Hinc infert *Ciera (d)*, cum de *Januariis* hunc ne casum quidem reservatum incurrere, quia reservatio (ut ait) afficit falsum cum positivo mendacio, non autem negativè testantem. Dicit tamen *Bonac.* quòd si testis jurat se quod scit fassurum, tunc tenetur ex justitiâ veritatem aperire propter jusjurandum promissorium quod præstitit. Sed huic probabiliter respondet *Lessius*, quòd testis jurando veritatem dicturum, non intendit se ligare justitiæ, sed tantum Religionis vinculo, quæ Religio non obligat ad restitutionem (e).

---

(a) *Vide hæc, et alia n. 268.* (b) *n. 270.* — (c) *lib. 4. n. 270. Dub. 1. et 2.* — (d) *de Casib. reser. D. 7. n. 62.* — (e) *n. 270. D. 3. Alia spectantia ad forum vide n. 272.*

82. — III. Quoad reos, notandum 1. quòd non tenetur reus suum delictum confiteri, si Judex non est legitimus, aut nisi legitimè interroget, id est (ut dictum est) nullà præcedente saltem semiplenâ probatione, aut infamiâ, aut indiciis manifestis delicti, ut inquit *S. Thomas* (a) : *Aliud est veritatem tacere, aliud falsitatem deponere. Quoniam primum in aliquo casu licet, non enim aliquis tenetur omnem veritatem confiteri, sed illam solùm, quam ab eo potest requirere Judex, putà cùm præcessit probatio semiplena.* Et etiam in dubio an Judex legitimè interroget reum, non tenetur respondere, quia ille cùm etiam possidet jus ad propriam vitam et famam, in dubio prosequitur possidere jus ad illius conservationem, usquè dùm non constat de legitimâ interrogatione; ità communissimè *Sotus, Less. Laym. Cajet. Sanch. Lugo, Navar. Busemb. Salm. contra Palud. et Silvest.* (b).

83. — Sed quæritur 1. An reus legitimè interrogatus, antè sententiam teneatur suum delictum fateri cum timore magnæ poenæ? Affirmant *Sot. Less. Sanch. Salmant.* etc. cum *S. Thomâ* (c), quia Judex cùm interroget legitimè, habet jus veritatem sciendi. Sed negant multi alii, *Suar. Lugo, Sa, Peyrin. Fill. Henriq. Villal. Elb. Busemb.* qui putant non adesse hanc legem tam duram et imbecillitati humanæ quasi impossibilem, ut quis teneatur delictum confitendo quasi ex se velle damnari gravi poenâ (nimirum mortis, triremium, carceris perpetui, aut perpetuæ infamiæ, etc.); nisi esset, ut damno communi consuleretur, v. g. hæresis, rebellionis, etc. Et si probabile est talem non adesse legem, probabile pariter est Judicem jus non habere ad exigendum in eo casu à reo veritatis testationem. Prima sententia est probabilior, hanc tamen secundam improbabilem vocare non possumus; ceterum communiter dicunt *Sanch. Salm.* cum aliis, Confessarium in eo casu non debere reum obligare ad delictum suum confitendum, cùm videt quòd difficulter poterit eum ad hoc inducere, et scit eum esse in bonâ fide (d).

(a) *S. Th. 2. 2. qu. 69. art. 2.* — (b) *n. 272. et 273.* — (c) *2. 2. q. 69. a. 1. ad 1.* (d) *n. 274.*

Dictum est autem *antè sententiam*, quia post eam jam iudicium completum est, undè reus non tenetur ampliùs confiteri, ut dicunt *Laym. Sanch. Salm. etc.* Imò subjungunt, quòd ne antè sententiam quidem tenetur reus suum patefacere delictum, nisi iterùm interrogetur. Sed huic probabiliùs contradicunt *Sot. Navar. Sòyr.* et alii communiter (ut fatetur ipse *Sanch.*), quia ante sententiam perseverat Iudicis præceptum (a).

84. — Quæritur 2. An graviter peccat innocens, qui sibi delictum capitale imponit, ne gravi tormento torqueatur? Negant *Lessius, Sot. Tol. Silvest. Busemb. etc.*, quia non tenetur quis vitam tanto incommodo servare, juxta id quod dictum est *Tr. VIII. n. 2. in fin.* Excipit tantùm *Busemb. cum Tanner.* casum, quo ex tali confessione damnum commune emanaret, aut familiæ infamia. Affirmant contrà, et quidem probabiliùs *Molin. Lug. Nav. et Govar.* et licèt *Lugo* primam sententiam habeat ut probabilem propter patronorum auctoritatem, nihilominùs hanc absolutè tuetur. Ratio est, quia licèt mediis adèd duris non teneatur homo suam vitam tueri, attamen non potest positivè coöperari morti suæ injustæ, dùm ipse non est suæ vitæ dominus. Hinc rectè infert *Molina*, quòd reus etiam post confessionem tenetur dicta revocare, semper ac illo modo possit mortem impedire. Sed hic pariter dicit quòd si reus sit in bonâ fide, non debet pariter dicit eum obligare, ut se retractet, cum periculo quòd ille ut vitet tormenta, peccet formaliter, denuò delictum quod non patravit, sibi imponendo (b). Sed si reus denunciavit alium innocentem, nemo est qui dubitet, quin teneatur se revocare, licèt quodcumque tormenti genus subiturus fuisset (c).

85. — Notandum 3. nunquàm reo licere, licèt esset innocens, accusatorem aut testem falso crimini dare, ut causam tueatur, ut certum est ex *Prop. 44.* ex proscriptis ab *Innoc. XI.* Contrà certum est licere delictum occultum, sed verum, accusatoris aut testis prodere, quia hoc absolutè conducit, ut sua innocentia

(a) *n. 274. in fin.* — (b) *n. 275.* — (c) *lib. 4. n. 276. ad 3.*

cognoscatur, et ut ipse grave damnum vitet; ita communiter *Sanch. Milant. Ronc. Salm. et Viva* (a); Vide dicta *Tract. XI. num. 7.* et idem dicunt *Sanch. Ronc. Salmant. et Correglia*, cum rei delictum esset omninò occultum, quia testis deponendo de delicto penitus occulto, idem est ac si testaretur, de falso. Et hoc, ut subjungunt *Lugo, Milante, et Viva*, etiam procedit si testis non testificaretur ultroneè, sed à Judice arcessitus (b). Notandum 4. quòd si delictum est ex exceptis, tenetur reus, etiam non interrogatus, complices revelare; secus si delictum non est ex illis, tunc nec tenetur nec potest, si illorum delictum est omninò occultum. Dicunt tamen *Laym. Less. et Busemb.* si tormentorum vi eos prodatur non peccare (c).

86. — Notandum 5. quòd reus injustè damnatus, non potest satellitibus obsistere *vim vi repellendo*, v. g. occidendo, aut vulnerando, ut constat ex Prop. 18. Alexand. VII. Sed potest quidem positivè obsistere, ut ex satellitum manibus liberetur, modò non adsit scandalum, aut gravis perturbatio, ut docet *S. Thomas* (d). Secus, si adhuc non est condemnatus, sed carceribus detinetur: aut si justè est morte damnatus (ut dicit ipse S. Doctor ad 2.), quia sententia solùm damnat ne obsistat, non autem ne fugam arripiat, non potest jam tunc resistere, potest verò licitè fugere è carceribus; et idem dicunt *Sot. Tol. Cajet. Ronc. Salm. etc.* communiter de pœnâ ad triremes, aut ad flagella, aut carcerem perpetuum; modò carcer non sit illi in pœnam jam designatus, ut communiter dicunt DD. Sed *Lugo, Sanchez, Less. Nav. et Salmant.* (contrà *Vasq. etc.*) excusant damnatos qui è triremibus fugiunt. Quæritur autem an reus resistere possit, si sententia fuisset justa secundum externas probationes, sed injusta secundum veritatem? Alii negant; Sed *Lugo, et Roncaglia* non improbabiler id admittunt, quia præsumptio cedere debet veritati innocentie, quæ dat jus ad defensionem, modò id fieri possit sinè scandalo et per-

---

(a) n. 277. *Resp. II.* — (b) n. 277. *Sed quid.* — (c) n. 278. — (d) 2. 2. q. 69. a. 4. *in fin.*

turbatione, ut suprâ dictum est (a). Dicunt autem aliqui quòd morte damnatus tenetur fugere, si potest; sed hoc rectè negant *Sotus*, *Silv. Sa*, *Salm.* etc. quia justè potest manere in carcere, præsertim si id agat, ut sui peccati piacularem luat pœnam (b).

87. — Cùm igitur è carcere possit damnatus fugere, potest eum etiam infringere; dùm cui permittitur finis, conceduntur etiam media, ut dicunt *Sot.* *Cajet. Lugo*, *Tol. Less. Salm.* et *Ronc.* Nec ideò ad damni refectionem tenetur, quia tale fractionis damnum per accidens evenit, ut subjungunt *Salm.* cum *Valent. Bann.* et *Sayr.* Dicunt insuper *Salm. Ronc. Tamb.* etc. quòd potest reus etiam pecuniis corrumpere Custodem; sed huic acquiescere non valeo, dùm nunquàm licet proximum ad actionem intrinsecè malam inducere, qualis esset si carceris custos eum aperiret, suo in officio delinquendo (c). Cùm autem liceat reo fugere, licebit quoque aliis ei supeditare funes, limas, aut alia instrumenta, ut fugiat, sicut docent *Silvest. Vasq. Less. Lugo*, *Sanch. Roncaglia*, *Busemb. Salm.* etc. contrà *Sotum*; modò fuga, ut rectè limitant *Salmant.* et *Roncaglia* non obfutura fuisset Reipublicæ, v. g. si latro esset viarum grassator. Nemini contrà fas est carceres infringere, ut liberet damnatos: *Ronc.* et *Busemb.* cum communi (d). Quomodò se gerere debeat Confessarius cum damnatis morte, observa quod dicetur *Tom. III. Tract. ultimo Puncto VIII.*

---

(a) n. 281. v. *Sed.* — (b) n. 281. — (c) n. 282. — (d) n. 283.

# INDEX

## RERUM NOTABILIMUM,

*Quæ in hoc primo Tomo continentur.*

Prior numerus denotat *Tractatum*, posterior Arabi-  
cus denotat *numerum marginalem*.

### A

**A**BBATISSA. An possit irritare, aut dispensare vota. V. 36.  
An possit donare, et dare licentiam donandi. XIII. 12. In  
Abbatissæ electione Moniales sunt liberæ. 22.

*Abortus*. VIII. 22. Prægnantes. 23. Fœtus animatio. 24.  
Medicinam præstare matri. 25. et 26.

*Abrogare*. An decennio leges abrogentur, etiam Eccle-  
siasticæ. II. 11.

*Absolvere*, et *Absolutio*. An excommunicati teneantur  
curare, ut absolvantur. II. 21. Non debet absolvi qui prius  
non restituit. X. 105.

*Abstinencia* à carnibus. XII. 2. à Lacticiniis. 3. à larido.  
5. à piscibus. 7. à carne suillâ. 8. à sorbetto. 14. à choco-  
late. 15. Parva materia in jejuniis; et qui pluries comedit.  
20. et 21.

*Abusus*. Non est facienda restitutio, si timeatur abusus.  
X. 116. ad 3.

*Acceptatio legis*. II. 9. 10. *Acceptatio dispensationis*. 48.  
*Donationis*. X. 130. Et si est per Nuncium, aut Epistolam.  
*ibid.*

*Accessorium in voto*. V. 24.

*Actus*. Debet stari pro validitate actûs. I. 16. An lex  
possit præcipere actus internos. II. 17. An pluribus præ-  
ceptis, pluribus actibus, an uno etc. 30. 31. Actus homi-  
nis, et actus humani. III. 2. Actus voluntarius quot modis.  
3. ad 6. Actus liber. 7. ad 9. Actus à quo bonitatem aut  
malitiam sumunt. III. 20 et IV. 26. Actus indifferens. III.  
21. Distinctio numerica actuum interiorum. III. 58. ad 61.  
exteriorum. 62. et 63. An unico actu pluribus præceptis,  
etc. 64. Si actus internus durat in effecta. 61. Quomodo

uniuntur actus externi. 62. Qui furatur centum in centum vicibus. 63. Actus Fidei, Spei, etc. IV. 13.

*Adjuratio*. V. 20.

*Administrare* Sacramenta lucri fine. IV. 45. Parochorum obligatio. VII. 24. et 27. Tempore Pestis 28.

*Adventitia* bona. X. 4.

*Advertentia* ad dubium an adsit lex. I. 4. ad peccatum. III. 24. et 25. et V. 8. v. Quæritur.

*Advocatus*. An Clerici, et Monachi etc. XIII. 69. Quando Advocatus tenetur defendere. *ibid.* Quas causas, et quo salario etc. 70. Si causa est injusta etc. Pactio in litis progressu, et de quotâ litis. 71.

*Adulator* circa restitutionem. X. 51.

*Adulterium*, et *Adulter*. Si adulter occidit virum, ut se defendat. VIII. 18. An dissentiente viro sit duplex peccatum. IX. 16. Vir qui sodomiticè etc. *ibid.* ad quid adultera tenetur. Et an debeat se prodere etc. X. 99. Ad quid adulter. 101. In dubio si proles sit sua. 102. Quid si divites mittunt ad hospitalia etc. 103.

*Equiparata*, quæ sunt. II. 34.

*Equivoca*, et restrictio mentalis. V. 15. et 16.

*Aggressor*, vide *Defendere*.

*Aleæ* ludus Clericis. X. 219. Monachis. 220. Episcopis. 221.

*Alienatio* Bonorum Ecclesiasticorum. XIII. 61. Solemnitates requisitæ. 62.

*Allicere*. Donatio in Simoniam. IV. 41. et 44. Donatio, si finis donantis non habeat effectum. X. 132.

*Amicus* an possit cedere tabulam etc. VIII. 1.

*Amor* erga Deum. IV. 9. ad 12. Erga proximum, 14. et seq. Erga parentes. VII. 1.

*Animalia*. Societas animalium. X. 226. Quorum animalium caro in jejuniis, etc. XII. 2. Animalia in venatione capta. X. 71.

*Animatio* foetus. VIII. 22.

*Animus*. Qui jurat sine animo etc. V. 17. Qui vovet sine animo etc. 21. ad 23. Qui contrahit sine animo. X. 122. Animus initiandi intra annum. XIII. 42. Si animo dubio aut conditionato etc. 43. Qui habet animum amittendi Beneficium. 44.

*Antichryseos* pactum, vulgè à godere. X. 182.

*Appendix* de Oratoriis privatis. VI. 38.

*Arrha* in venditione. X. 166.

*Aspicere* turpia. IX. 8. In Ecclesiâ aspectus turpes an sint sacrilegia. IV. 39. et IX. 23.

*Assesurationis* contractus. X. 231.

*Assistentia* Moribundis quâ tenentur Parochi. VII. 45.

*Astrologia* naturalis, et judiciaria. IV. 34.



*Attentio* in audiendâ Missâ. VI. 28. Qui dùm audit Missam, recitat Officium etc. 29. Vide alia verbo *Missâ*.

*Audire* sermones obscûnos. IX. 10. aut detractiões XI. 17.

## B

**B**ENEFICIATUS. An habeat dominium fructuum. X. 7. Qui illos recipit. 8. Animus initiandi intrâ annum. XIII. 42. Animus dubius aut conditionatus. 43. Animus dimittendi Beneficium. 44. Obligatiões Beneficiatorum; et an possit vivere de fructibus. 45. Quibus debet fructus distribuere. 46. ad 48.

*Beneficium.* Diversitas Beneficiorum. XIII. 31. Conferenda dignioribus. 33. An præsentandi digniores. 34. An valeat electio minùs digni. 36. An elector restituere debeat etc. 37. Si minùs dignus concurrit etc. 38. Examinatores. 39. Pluralitas Beneficiorum. 40. et 41. Beneficiorum venditio. IV. 46. Electio simoniaca nulla, et si adest præscriptio triennalis. 52. Privatio, et inhabilitas ob simoniam 53. An requiratur sententia. 54. et XIII. 58. Quot modis amittuntur. *ibid*.

*Benevolentia* circâ simoniam. IV. 44. Circâ usuram. X. 143.

*Bestialitas.* IX. 27. Coitus cum Dæmone. 28.

*Blasphemia*, quandò dicitur. V. 1. Qui maledixit Regioni etc. qui dicit *Atta*, *Potta*, etc. Qui maledicit creaturis, aut Mundo. Qui animæ. 2. Qui Fidei. 3. Mortuis. 3. ad 11. Blasphemia hæreticalis. V. 1. et XIII. 77.

*Bona.* An ad vitandum scandalum etc. IV. 28. Votum debet esse de bono meliori. V. 24. Bona filiorum Castrensia, et quasi. X. 2. profectitia, et data in Patrimonium. 3. Adventitia. 4. Bona uxorum. 5. Clericorum. 6. Dominium fructuum beneficii. 7. Qui eos recipit. 8. Bona incerta. 67. Compositio etc. 68. Bona inventa. 69. Thesauri. 70. Qui recipit à fure rem permixtam cum suâ. 75. Si res crescit, aut crevisset pretio. 78. Si peritura fuisset. 79. An res ablata possit restitui furi. X. 53. Si dominus eam evincit ab emptore. 66. Si est vendita. 107. Si præservari debet res domino. 137. Res duobus vendita. 190. Si res vendita perit. 191. Cessio honorum. X. 117. *in fin*. Obligatio legandi bona conjunctis. 237. Alienatio honorum Ecclesiasticorum XIII. 61. Requisita. 62. Bona inventa. X. 69.

*Bullæ* Benedicti XIV. circâ jejunium. XII. 6. Circâ negotiationem Clerico X. 192. Bulla Nicolai V. circâ censum. 197. S. Pii V. 198.

## C

**C**AMBIUM, quotnplex est, et quodnam est permissum. X. 203. qui recipit monetam falsam. 204.

*Canonicus.* Residentia. XIII. 50. Pœna, 51. Causæ excusantes. 52. ad 57. Pœnitentiarius, et Theologus. 56. Examinatores, Visitatores etc. 57.

*Capitale.* Vide *Sors*.

*Caput saluum.* Contractus ad caput saluum. X. 226.

*Carcer*, et *Carcere detenti.* An carcerati ut intersint Missæ etc. II. 21. et VI. 39. An ut communicent in Paschate. XII. 41. An reus possit infringere carcerem et custodem nummis corrumpere, et an alii possint ei auxilium præstare. XIII. 87.

*Caritas* ergà Deum. IV. 9. ad 13. Ordo caritatis. 14. An cum periculo peccandi etc. An in necessitate gravi Episcopi et Parochi, et an in tempore pestis Sacerdotes, etc. (Et vide etiam *Tom. II. Tract. XVI. num. 125.*) Ergà inimicos. IV. 16. De eorumdem salutatione, *ibid.* De remissione. 17. Eleēmosyna 18. et 19. Correctione fraternà 20. et *seq.* Si caritas excuset à laborando tempore festi. VI. 16. et 17. De pacto in damno mutuo propter caritatem debito. X. 161.

*Caro.* Quæ carnes tempore jejunii liceant. XII. 2. Si dispensatis pisces, etc. 7. De carne porcinà. 8. Qui sæpius carnem edit, et de materiæ parvitate 20.

*Caseus.* An prohibitus in collatiunculâ etc. XII. 19.

*Charta.* Chartarum ludus Clericis. X. 219. Monachis. 220. Episcopis. 221.

*Chocolate.* An tempore jejunii liceat. XII. 15.

*Christiani* quoad redemptionem à captivitate. X. 16.

*Chyroglyphum* si emitur. X. 179.

*Clericus.* Venatio Clericis prohibita. X. 72. Si negotiatur per alios, vel propter alienam utilitatem, 192. Si in pascais propriis. 193. Si emat, ut vendat majori pretio, etc. Emat lanas, etc. Si in necessitate, etc. 194. Si tutor vel factor. 195. Ludi; et si assistere. X. 219. Artes, et officia. XIII. 60. Advocatus 79. Si accusat 74.

*Collatiuncula* serotina XII. 16. ad 19.

*Commodatum.* X. 135.

*Commoditas* sortis in societate. X. 222.

*Communio.* Qui de jejunio dubitat. I. 19. Communio Paschalis. XII. 39. Si quamcitiùs, et an prævenire, etc. 40. Si in carcere detenti, et excommunicati etc. 41. Si in Parochiâ, *ibid.* Quisnam eximatur. 42. De pueris 43. De stultis 44.

*Commutatio voti.* V. 38.

*Concilia* sunt subter Papam. II. 35.

*Congregatio* puellarum. VII. 55. Ecclesiasticorum 57.

*Conjuges.* Donatio inter conjuges. X. 229.

*Concupiscentia.* Quandò importat peccatum. III. 15.

*Conductor.* Vide *Locatio*.

*Confessio*, et *Confessor.* Confessor cum scrupulosis I. 8. ad 11. Si de Confessionibus timent. 10. Qui constitetur in Missa. VI. 31. Si Missa relinqui potest per Confessionem. 43.

*Connexa*, quæ intelligantur. II. 78.

*Conscientia* est prima regula. I. 1. Quandònam est vincibilis. 4. Perplexa. 7. Scrupulosa. 8. Dubia. 12. Probabilis. 21.

*Consensus*, Circà scrupulosos. I. 9. ad peccatum mortale. III. 24. ad 31. Consensus corruptæ. IX. 14. et X. 91. Consensus creditoris excusat à restitutione. 116. ad 2.

*Consilium*, et *Consiliator.* Qui dat consilium ad minus malum etc. IV. 30. et X. 37. Quoad restit. obligat. X. 44. ad 49. Si alius jam determinatus erat. 45. Qui revocat consilium. 48.

*Consuetudo.* Conditiones consuet. II. 79. De desuetudine 80. Si reprobatur quæcunque consuet. 81. An Leges generales etc. 83.

*Contemptus* formalis quis sit. II. 14. et III. 68.

*Contenta* quænam intelligantur. II. 78.

*Contrahere*, et *Contractus.* An culpa theologica etc. X. 27. et 28. Qui sinè animo etc. 122. Contractus turpis 123. Dolo et errore 124. Metu 125. Sinè solemnitatibus. 126. De tribus contractibus. 227.

*Contumelia.* Restitutio honoris. XI. 3. Causæ excusantes 4.

*Conventus* Regular. exempti. II. 39. (sed circà Missas vide Tom. III. Tract. XX. n. 75. et 77.)

*Conventualis* Missa. VII. 29. in fine.

*Conventionalis* pœna. An requiratur sententia. II. 27. In mutuo. X. 156. et 157.

*Coöperans*, *Coöperator*, et *Coöperatio.* Coöperatio formalis et materialis. IV. 31. Quandò est licita. 32. Coöperantes in duello. VIII. 28. in furto. X. 42 et seq. Si plures domum incendunt. 55. Ad evitandum proprium damnum. 56. 57. Quis priùs teneatur, et quid si uni remissa est pars. 60. Coöperantes usurario. X. 163. et 164.

*Correlativa.* II. 78.

*Correctio*, et *Corripere.* Corripere etiam ignorantem. IV. 20. Quis excusatur à correctione. 21. Pastores an cum periculo etc. 22. et VII. 30. ad 32. Concionatores. IV. 22. Prælati Regulares. XIII. 2. An in denunciatione præmitti

debeat correctio; et an Religiosus denunciari possit sine correctione. XIII. 74.

*Creaturæ.* Si illis maledicatur. V. 2.

*Creditor.* An debeant præferri creditores onerosi. X. 108. et 109. An ex delicto et ex contractibus etc. 110. An certi. 111. An hypothecarii anteriores, et an personales. 112. Si remittit uni partem etc. X. 60. Si homicida intendit creditoris damnum. 88. Si creditor exigit. 114. Qui restituit creditori creditoris. 116. ad 1. Consensus creditoris, *ibid.* ad 2. Si creditor in necessitate existit. 119. 120.

*Crescere.* Si res crescit, aut crevisset. X. 78.

*Culpæ.* An sub levi cum materia est gravis etc. II. 14. Culpæ theologica ad restit. X. 39. Juridica. 38. Venialis an obliget ad restit. 40. An in contractibus, etc. 41.

*Curatela*, et *Curator.* X. 234.

*Custodes*, an excusentur à Missâ. VI. 36. Si non denunciant. XIII. 73. Si reus corrumpit custodem 87.

## D

**D**EMONEM *adjurare.* V. 20. Concubitus cum Dæmone IX. 28.

*Damnum.* An lex cum gravi damno etc. II. 19. Delectari de damno ob bonum finem. III. 53. Concionatores cum proprio damno etc. IV. 22. Qui minus damnum consulit. X. 47. Qui ad vitandum proprium etc. 56. et 57. Qui vult impedire damnum propinquorum vel creditorum. X. 87. Qui differt restitutionem. 104. Si damnum est multò majus. 65. et 117. ad 4. Damnum emergens in mutuo. 147. 152. In venditione. 169.

*Debitor*, et *Debitum.* Si debitum est dubium. I. 20. An debitor possit præferre etc. X. 113. Si est in necessitate. 118. ad 120. Donatio ære alieno gravati. 128. An ære alieno gravatus possit ingredi Religionem. XIII. 27.

*Deceptio.* Si corrupta cognoscit deceptionem. X. 84. Deceptio in emptione si est ultra vel infra dimidium. 172.

*Decisiones.* Rotarum circa alimenta. VII. 4. circa præscriptionem. X. 12.

*Declarationes* S. C. U. 34. Declar. non *purè tales.* 73. 74. Resolutiones S. Congr. Rituum, *vide* Tom. II. Tract. XV. num. 87.

*Decretum* S. C. II. 34. Rotæ Rom. 35.

*Dedecus.* Vide *Familia.*

*Defendere*, et *Defensio.* Ob vitæ defensionem. VIII. 11. Honoris. 14. Bonorum. 15. Pudicitie aut Proximi. 16. Prævenire. 19. Si adulter etc. 20. Qui excedit an restituere etc. X. 89. Detrahare ob defensionem. XI. 10.

**Delectatio.** An sit explicanda species. III. 48. De opere malo, et de cogitatione malâ. 49. De malo si esset licitum. 50. De sponsis. 51. De conjugibus, *ibid.* (*vide etiam Tom. II. Tract. XVIII. n. 42.*) De causâ malâ ob effectum. III. 52. De damno ob bonum finem. 53. Delectatio sensibilis: IX. 1. et 2.

**Delegare, et Delegatus.** Qui delegare potest. II. 61. (*vide etiam Tom. III. Tract. XX. n. 34.*) Si delegatus moritur: et quomodò interpretari etc. II. 61. (et *Tom. II. Tract. XVI. n. 82.*) Si adest claus. *donec dispensetur.* II. 62. Qui delegare potest 63. et *Tom. II. Tract. XVI. n. 81.*

**Delictum.** An possit propalari ob defensionem. XI. 10. An ob consilium, aut solamen; et an uni vel alteri 11. Si est publicum in uno loco. 12. Si uno tempore. 13. Si est connexum. 14. Si auditum est ab aliis. 15. Si reus sibi falsum delictum imponit. XIII. 84. Si imponit accusatori. 85.

**Denuntiatio** quot modis. XIII. 73. Custodes gabellarum, *ibid.* An præmittenda correctio; et an Religiosus etc. 74. De Monitoriis. 75. De Hæreticis. 76. Blasphemix. 77. Superstitiones. 78.

**Depositum.** X. 136. Quandò restitui non debet. 138.

**Desiderare, et Desiderium.** Desiderium sinè operibus etc. I. 6. Qui desiderat diversa mala. III. 50.

**Desuetudo.** Conditiones et tempus. II. 80. Pro legibus Ecclesiasticis. 11. Si reprobatur 81.

**Determinatio, et Determinatum.** Si peccator est determinatus. IV. 26. Si fur etc. X. 46. Determinatio pretii, et rei 165.

**Detractio, quandò est peccaminosa.** XI. 7. Qui nominat Ordinem Religiosum, aut Monasterium. 16. Qui inducit, et audit. 17. An fama cum pecuniâ. X. 83. et XI. 20. et 21. Vide *Delictum.*

**Diffamatio.** Vide *Detractio.*

**Differre.** Vide *Dilatio.*

**Dignus.** An dignioribus Beneficia simplicia etc. XIII. 33. An præsentare. 34. An prælaturæ. 35. An valeat electio minùs digni. 36. Si concurrat minùs dignus. 38.

**Dilatio voti.** V. 33. In restituendo mutuo. X. 140. Pretium in emptione. 178.

**Dispensare, et Dispensatio.** Vota cum Peregrinis. II. 42. Dispensatio sinè causâ: et qui utitur etc. 46. Supplicatio subreptitia. 47. Potest peti à tertio. 48. Dispensatio tacita. 49. Quandònam superior tenetur ad dispensandum. 52. Dispensatio cum malâ fide, aut sine causâ. 53. et V. 40. Ex timore. II. 34. In quo potest dispensare Papa. II. 55. et 56. et *Tom. II. Tract. XVIII. n. 83.* In quo Episcopus. II. 57. et 58. et Vicarius. 57. In quo Parochi. 59. Cum seipso. 64. Quomodò cessat dispensatio. 66. ad 68. Circa

Simoniam. IV. 53. *in fin.* Votum non petendi dispensationem. V. 26. Dispens. Votorum 39. ad 44. De votis reservatis. 45. et 46. An remaneat reservata secunda materia. 48. An in observantia dierum Dominicorum etc. VI. 1. Ad laborandum die festivo. 14. Ad celebrandum domi. 38. Si propinqui copulentur post dispensationem. IX. 19. Qui habet votum castitatis, et violat etc. X. 97. Qui est propinquus. 89. Dispensatio in jejunio. XII. 22. Dispensati ad carnes, au piscibus vesci etc. XII. 7. An caro suina. 8. An ab unica comestione etc. 9. In collationculâ. 16. ad 19.

*Distillatio* quomodo vetetur. IX. 30.

*Distinctio* specifica. III. 55. 56. Numerica. 57. *et seq.*

*Diversi*, et *Diversitas*. Diversitas objectorum totalium. III. 64. et 65. Qui optat diversa mala. 50. Furtum diversis factum. X. 28. An diversis eodem tempore. 30. Si plures domum incendunt. 55.

*Dolus*. Contractus dolo etc. X. 124.

*Domicilium*, quando contrahitur, et quando quasi Domicilium. II. 40.

*Dominium* directum, et utile. X. 1. De fructibus Benefic. 7. et 8. Quot modis acquiritur. 9. Præscriptio. 10. ad 13. Dominium rei emptæ. 107. et 167. Rei donatæ. 132.

*Dominus*. Qui laborare facit decem servos etc. VI. 26. Obligatio dominorum præsertim circa salarium. VII. 7. Si dominus longè abest. X. 66. Si evincit rem. 66. Si est certus. 67. Si res periisset etc. 79. Servus ære alieno gravatus. X. 115. Quando res domini præservari debeat. 177. Sors in societate tota est domini. 223. Solus valor commoditatis etc. 224.

*Donare*, *Donum*, et *Donatio*. Quis potest donare. X. 128. Et an ære alieno gravatus etc. *ibid.* Inter conjuges et inter patrem. 129. Acceptatio. 130. Per nuncium aut litteras, *ib.* Si est per causam piam. 131. Revocatio. 133. Si est inofficiosa, *ib.* Causa mortis. 134. An pupilli et Minores. 234. Dona Religiosi. XIII. 8. 9. An Abbatisæ donare et dare licentias. 12. Si Index recipit dona. 66.

*Dubitare*, et *Dubium*. Dubium negativum et positivum. I. 12. Speculativum. 13. et 14. Practicum, *ibid.* An cum speculativo operari quis possit. 14. Si Superior præcipit rem dubiam. I. 18. et XIII. 17. Dubium circa Communionem. I. 19. Dubium satisfactionis aut debiti. 20. De regulâ: *In dubiis via* etc. 69. Dubia circa leges. II. 22. et 23. In dubio an requiratur dispensatio. 51. In dubio utrùm effectus sit superstitiosus. IV. 37. In dubio an sit votum vel propositum. V. 22. In dubio usus rationis. II. 37. In dubio Juris non potest incipi possessio. X. 8. et 144. In dubio an consilium fuerit causa etc. X. 45. In dubio an proles sit adulteri. 102.

*Duellum.* Propositiones damnatæ. VIII. 27. Quandò est illicitum, et pœnæ duelli. 28.

## E

**E**BRRIETAS VIII. 4. An ob remedium. 5. An ad evitandam mortem. 6. Inducere alios. 7. Quisnam censendus ebrius. 8. *Ecclesia.* Quandò dicatur polluta. IV. 39. An possit præcipere actus internos. II. 17. Votum in favorem alicujus Ecclesiæ. V. 41. An Ecclesia possit dispensare in Dominicis etc. VI. 1.

*Effectus.* In dubio an effectus sit superstitiosus. IV. 37. De pulvere sympatico, *ib.* Delectari ob bonum effectum, III. 52.

*Elector*, et *Electio.* Electio in voto disjunctivo. V. 31. Electio Abbatis. XIII. 22. An electio minus digni. 36. An elector teneatur ad restitutionem 37.

*Electuaria* in jejuniis. XII. 11.

*Eleemosyna.* Quandò quis teneatur. IV. 18. et 19. Qui colligit eleemosynas inter Missam. IV. 32. Eleemosyna ad quam tenetur Parochus. VII. 45. Episcopus. 64.

*Emtio*, et *Emtor.* Qui emit à fure. X. 53. Qui emit in dubio. 80. Si non est data fides de pretio. 107. Emtio conditionata. 168. Ad quem spectat periculum et fructus. 169. *Ere alieno.* 171. De *Chirographis.* 179. Pactum de reemendo. 181. Census redimibilis. 200. Vide *Vendere.*

*Emphiteusis*, quid sit. X. 211.

*Ensalmi* an liceant. IV. 34.

*Epikeja*, quandò liceat. II. 77.

*Episcopus.* Potest ferre leges, et à quo facultatem habeat: et quibus rebus. II. 33. In quibus dispenset. 57. et 58. Correctio cum periculo. IV. 22. Dispensatio super inhabilitate ad Benefic. simoniacè etc. 53. Potest instituere festa. VI. 3. Prædicare. 4. Dispensare in festo. 14. De residentia. VII. 14. 60. Ubi residere debeat. 18. Causæ excusantes. 19. Circa Ordinandas. 47. ad 52. Seminarium. 53. Quoad celeb. Miss. invigilare. 58. Visitatio. 59. Cura Monialium. 61. Eleemosyna. 64. Debet celebrare. 65. Si ludit aut assistit. X. 221. An possit mutare ultimas voluntates. 236. Religiosus, an ad vota, et regulas. XIII. 4. An possit fieri Religiosus. 28. An absolvere peregrinos à voto. II. 42.

*Error.* Votum ex errore. V. 23. Contractus ex errore. X. 124.

*Exorare* an sit opus servile. VI. 9.

*Examinatores* an debeant digniores præferre. XIII. 39.

*Excommunicatio*, et *Excommunicati.* An debeant procurare absolutionem etc. II. 21. et VI. 39. An teneantur ad

Missam etc. VI. 39. An pręgnantes quę abortum etc. VIII. 23. Duellantes. 28. Qui occidit unum Clericum etc. X. 85.  
*Exhęredare* filios. X. 238.  
*Exorcismi*. A quo fieri possint. V. 20.  
*Expellere*. Religiosi expulsi. XIII. 4. Causę expuls. *ibid*.  
*Expensę* utiles factę a fure. X. 78. A Religioso in usus vanos. XIII. 13.

## F

**F**ACTOR. An hujus officium liceat Clerico. X. 195.  
*Factum* non pręsumitur nisi probetur, sed pręsumitur de jure esse probandum. l. 16.  
*Fama*. Restitutio famę et modus. XI. 18. Causę excusantes. 19.  
*Familia*. Si Matrimonium est cum dedecore familię. X. 95. ad IV.  
*Famulus*. Si ei imponitur labor die festo. VI. 26. An satisfacit audiendo Sacrum in Oratorio privato, et quandō. 38. in *App. Clausula* X. Servi coacti ad omittendum sacram. 40. Salarium famuli. VII. 7. Famulorum obligatio; si permittunt furta, si discedunt contrā pactum. 8. Si sibi compensant. 10. et 11. Furta famulorum. X. 34. Si dominus est gravatus ære alieno. 115. Si servo infirmo. 110. Famuli Monasteriorum circā Communionem Paschalem. XII. 42.  
*Femina*, Vide *Mulier*.  
*Festum*. An sit divinum obligatio festi. VI. 1. Cultus internus. 2. An Episcopus possit instituere festa. 3.  
*Feudum* quid sit. X. 212.  
*Fidejussio* quid sit. X. 232.  
*Fides*. Quid sit et quodnam sit ejus objectum. IV. 1. et 2. Mysteria et veritates scienda et credenda. 3. Actus fidei. 13. Qui maledicit fidei. V. 3. Probabilitas in rebus fidei. I. 22. Si superior dispensat in malā fide. II. 53. Qui non residet in bonā fide. VII. 16. Possessor bonę fidei. X. 73. Malę fidei. 77.  
*Filius*. Si negotiatur. X. 3. et 228. Furta filiorum. 32. Si homicida obtinuit remissionem patris. 86. An adultera debeat patefacere filio etc. 99. Et an filius teneatur ei credere. 100. Mutuum datum filiis. 141. Si ludunt. 215. Dehęredatio. 238. An possint fieri Religiosi parentibus in necessitate relictis. XIII. 23. Quid si sunt professi, *ibid*. Si patre dissentiente. 24. An parentes possint relinquere filios, et an fratres, *ibid*.  
*Finis*. Votum malo fine. V. 25. Si cessat finis legis. II. 69. Pro libris prohibitis. 70. Donatio si non adhibetur finis. X. 132. *Fiscus*.







- Fiscus.* Circà intercepta. X. 62.  
*Fœtus.* Animatio. VIII. 22. Medicina. 23. et 24.  
*Forense.* Opera forensia. VI. 12.  
*Fornicatio* sponzorum. IX. 13. et 18.  
*Frater.* Obligatio fratrum. VII. 6. Societas inter fratres. X. 229. Si fratres remanent in extremâ necessitate etc. XIII. 24. in fine.  
*Fraus* gabellarum. X. 81. In ludo. 216. Secretum fraude cognitum. XI. 8.  
*Fructus* Parochi non residentis. VII. 21. An debeat omnes restituere. 22. Fructus superflui benefic. X. 7. Qui eos recipit. 8. Qui fructus debent restitui domino. 74. Fructus rei emtæ cui etc. 169. et 170. Beneficiatus potest vivere de fructibus etc. XIII. 45. cui debent erogari superflui. 46. ad 48. An Pensionarius etc. 49. Canonici non residentes. 51.  
*Furtum* in Ecclesiâ. IV. 39. Reliquiarum *ibid.* et X. 27. Si servus permittit furta. VII. 8. Materia gravis. X. 22. Furtum fructuum. 23. 24. Lignorum. 25. Furta minuta, et facta à tabernariis 28. et 29. Furta facta multis. 30. Materia parva post furtum grave. 31.

## G

- G**ABELLE. X. 81. Qui impedit fiscum ab interceptis. 62. Si custos non denunciât. XIII. 73.  
*Genitores.* Vide *Parentes*.  
*Gratuitum.* Debita gratuita debent postponi. X. 108. Dona in simonia. IV. 44. In mutuo. X. 144.

## H

- H**ÆRES. An homicida hæredibus etc. X. 87. Si intenditur eorum damnum, *ibid.* Hæredes eorum in quos animadversum est. 88. An hæres possit acceptare donationes. X. 131. Hæres usurarii, 162.  
*Hæresis.* Ad hæresim requiritur error intellectûs et pertinacia. IV. 5. Denunciatio hæreticorum. XIII. 76.  
*Hasta.* Vendere sub hastâ. X. 175. 176. et 177.  
*Homicida*, et *Homicidium.* Quid restituere debet homicida. X. 82. Qui occidit unum pro alio. 84. Et an incurrat excommunicationem et irregularitatem. 85. Qui obtinuit remissionem à patre. 86. Qui intendit damnum aliorum. 97. Si homicidium imputatur aliis. 88. Qui excedit in defensione. 89.  
*Honor.* Vide *Contumelia*.

Tom. I.

Bb

*Hospitale.* Si adulteri mittunt proles etc. X. 103.  
*Hypotheca.* Creditor hypothecarius. X. 112. quid sit hypotheca? 233.

## J

**J**ESUNIUM. Qui pluries carne vescitur, aut alio. XII. 20. De parvâ materiâ, *ibid.* De horâ refectionis. 21. Dispensatio. 22. Impotentia. 23. et 24. Senes. 25. Labor. 26. ad 45. Pietas. 34. Qui communiter vult et dubitat. I. 19. Vide *Abstinentia*.

*Judex.* Quando potest damnare aut inquirere, aut poenam diminuere, et an scientiâ privatâ etc. XIII. 63. et 64. An cum opinione probabili. I. 24. et XIII. 65. An dividere cum commissario etc. et an recipere dona. 66. pretium injustæ sententiæ. 67.

*Judicium* speculativum et practicum. I. 13. et 14. *Judicium* requisitum in jure jurando. V. 14. *Judicium* temerarium. XI. 1. et 2.

*Juramentum.* Quando dicitur tale. V. 12. Quotuplex est 13. Qui jurat sinè animo. 17. De juramento execratorio. 13. Conditiones juramenti liciti. 14. De equivoco et restrictione mentali. 15. et 16. *Juramentum* promissorium. 18. Qui promittit secretum, an cum periculo vitæ, *ibid. in fine.* Quomodò tollitur obligatio juramenti; et de juramento perseverantiæ. 19. De adjuratione. 20. *Juramentum* in ludo de non repetendo. X. 218.

*Jus in re*, et *jus ad rem*. X. 1. *Jus mendicandi* an possit locari. X. 208. *Jus patronatûs*. XIII. 32.

*Justitia*. X. 1. Sola commutativa obligat ad restitutionem. 36. Obligatio reddendi in mutuo debita ex justitiâ. 161.

## I

**I**GNORANTIA præceptorum naturalium. I. 5. et II. 43. Quæ ignorantia dicenda vincibilis. I. 4. et II. 43. Quotuplex est ignorantia. III. 13. An corrigendus ignorantia laborans. IV. 20.

*Impedimentum*, et *Impedire*. An teneamur remove impedimentum. II. 20. Qui opponit impedimentum legi. *ibid.* Excommunicati et incarcerati. 21. *Impedimenta* Matrimonii in dubio etc. 51. Qui impedit impedire volentem etc. X. 58. Qui impedit à consecutione justî boni. 61. Qui impedit fîscum, etc. 62. Si odio. 63.

*Impotentia* excusat à præcepto. II. 45. In jejunio. XII. 23. et 24. De senibus. 25.

*Incestum.* An distinguatur inter consanguineos et affines. IX. 17. An inter gradus in affinibus, *ibid.* An inter gradus consanguineorum. 18. An obtentâ dispensatione. 19.

*Incommodum.* An lex cum gravi incommodo etc. II. 18. Quale incommodum excuset à sacro. VI. 41.

*Indifferentia* ad peccandum, vel merendum. III. 10. Indifferentia iudicii. 11. An detur actus indifferens. 21.

*Infamatio.* Vide *Detractio*.

*Infidelis*, et *Infidelitas*. Infidelitas quot modis. IV. 4. Opera servilia infidelibus. VI. 1. *in fine*.

*Infirmitas.* Quandò excuset à sacro. VI. 39. An servo infirmo etc. X. 210. Infirmitas Canonici etc. XIII. 52.

*Inhabilitas.* Pœnæ inhabilitantes. II. 25. Inhabilitas propter simoniam ad Beneficia. IV. 51. et 52. et XIII. 58. An Episcopus possit dispensare. IV. 53. *in fine*.

*Inimicus.* Qui optat diversa mala inimico. III. 61. Signa communia, et salutare inimicum. IV. 16. De remissione. 17.

*Innocens.* An liceat eum occidere. VIII. 21.

*Inofficiosa* donatio. X. 133.

*Intentio* pro lege, voto, aut penitentiâ. II. 29. Pro consuetudine. 79. Pro desuetudine. 80. Pro Missâ. VI. 27.

*Interceptum.* Qui impedit Fiscum etc. X. 62.

*Intercessor* circa simoniam. IV. 41.

*Interpretatio.* Quot modis. II. 72. An requiratur promulgatio. 73. De doctrinali; et si illa prohibet etc. 75. Regulæ pro interpretatione. 76. Quandò lex extendi debeat de casu ad casum. 78.

*Invincibilis.* Vide *Ignorantia*.

*Irregularitas.* An incurratur ab eo qui occidit unum pro alio. X. 85.

*Irritare.* Qui potest irritare iuramentum. V. 19. 36. An vota subditorum sint ex se irrita. 37.

## L

**L**ABOR, et *Laborare.* In festo quis dispensare potest. VI. 14. Si adest consuetudo. 15. An ob pietatem, aut caritatem etc. 16. et 17. An ob necessitatem. 18. ad 21. An propter magnum lucrum. 22. An ad evitandum otium. 23. An ob utilitatem. 24. Parvitas materiæ. 25. Qui imponit opus decem servis. 26. Quandò labor excusat à jejuniis. XII. 26. et 27. Itinerantes. 28. ad 30. Artifices opulenti. 31. Robusti. 32. Qui gratis assumit laborem. 33. Vide *Opera*.

*Lacticinia.* An vetentur in jejuniis. XII. 3. et 4.

*Laici* quoad ludos prohibitos. X. 217.

*Laridum.* An diebus etc. XII. 5.

*Legatum* virginibus etc. X. 236. (de dispens. circa hoc Pœnitentiariæ, vide *Tom. II. Tract. XIX. in fine num. 149. ad XII.*)

*Legislator.* An teneatur ad leges. II. 38.

*Legitima.* Si pater lædit legitimam ob vota etc. V. 27. Legitima debita filiis. VII. 4.

*Lex* dubia non obligat. I. 15. et 32. In dubio an sit abrogata, *ibid.* In dub. an sit acceptata. 16. et II. 23. Conditiones legis. II. 4. Promulgatio. 5. Leges civiles. 6. Pontificiæ. 7. An duo menses etc. 8. Acceptatio. 9. et 10. Si per decem annos. 11. Si major pars etc. 12. Si lex est difficilis. 13. Materia gravis sub culpâ levi. 14. Contentus formalis, *ib.* Indicia gravis oblig. 15. Leges mixtæ. 16. An actus interni. 17. An cum gravi damno aut incommodo. 18. An obligatio naturalis. 19. Impedim. legis. 20. et 21. Dubia circa legem. 22. et 23. Leges pœnales. 24. Privativæ. 25. Falsa præsumptio. 26. An caritas. 28. An intimatio. 29. An plura præcepta pluribus actibus aut uno etc. 30. et 31. Si plura præcepta. 31. et 32. An leges civiles obligent; et quis leges condere etc. 33. An S. Cong. 34. An Rota. 35. Pueri. 37. Peregrini 39. ad 41. Dispensationes votorum. 42. An excusat ignorantia. 43. Timor. 44. An impotentia. 45. Si cessat finis. 69. et 70. An per legem generalem. 71. Interpretatio. 72. Epickeja. 77. An de casu ad casum. 78. Delectatio de rebus vetitis. III. 50. et 54. Vide *Dispensatio*, et *Consuetudo*.

*Libellus.* Contractus libelli. X. 213.

*Liber.* Prohibitio librorum an cessante periculo. II. 70.

*Libertas* hominis. III. 2. Quod modis. 7. ad 9. Libertas indifferentiæ. 10. Judicis. 11.

*Licentia.* Parocho non residenti. VII. 17. Licentia oretenus et scripta. 20. et 21. Præsumpta circa paupertatem. XIII. 11. Si injustè negetur. 12. Si data ab Abbatissâ, *ibid.* Ad usus vanos. 13. Ad ludos. 14. Licentia negata à superiore et concessa ab inferiore. 20.

*Ligna.* Furtum lignorum. X. 25.

*Litera.* Donatio per literas. X. 130. Resignare aut legere literas. XI. 5. Cui permissum est. 6.

*Locatio.* X. 205. Successor conductoris. 206. in casu sterilitatis. 207. Jus mendicandi. 208. Tabellar. 209.

*Loca* exenta. II. 39. Sacra IV. 39. Undè Missa audiri. VI. 35. Si delictum est publicum in uno loco non verò in alio. XI. 12.

*Lucrum.* Opera liberalia ob lucrum die festivo. VI. 8. et 9. An ob lucrum liceat laborare. 22. An omitti Sacrum. 43. Mutuum spe lucri. X. 143. Lucrum gratis datum. 144. Timore. 145. De lucro cessante. 148. ad 152.

*Ludus.* Votum non ludendi. V. 30. Religiosi qui ludunt. X. 215. Fraudes. 216. Ludi prohibiti laicis. An victor possit sibi retinere. 217. An qui perdit teneatur solvere. 218. De ludis prohibitis Clericis. 219. Religiosis. 220. Episcopis. 221. Licentia data Religioso de ludendo. XIII. 14.

## M

**M**ALBEDICTION, creaturis etc. V. 2. Mortuis. 3. ad 11. Vivis V. 8.

*Malum.* Qui optat diversa mala inimico. III. 61. Qui suadet minus malum. IV. 30.

*Mandans* circa restitutionem. X. 42. et 43.

*Manducare.* Qui pluries in jejunio. XII. 20. et 21. Vide *Abstinentia*.

*Manuscripta* sunt propria Religiosi. XIII. 5.

*Maritus.* Quæ vota irritare potest etc. V. 36. Obligatio. VII. 12. Si decoquit bona, *ibid.* Si adulter occidit maritum etc. VIII. 20.

*Mater.* An possit sumere medicinam, etc. VIII. 23.

*Materia* gravis sub culpâ levi. II. 14. Mutatio materiæ in juramento. V. 19. In voto. 35. An remaneat reservata materia etc. 48. Materia gravis in furto. X. 22. Materia parva. Vide *Parvitas*.

*Matrimonium.* An per usum Matrimonii Ecclesia etc. IV. 39. Promissio ficta matrim. cum defloratione. X. 93. Si deflorata recusat matrim. 96.

*Medicus* debet sequi tutiorem. I. 23. An possit præbere medicinam prægnantibus. VIII. 23. et 24.

*Mentalis* restrictio. V. 15. Simonia mentalis. XIII. 58.

*Mercēs* ultronea. X. 174.

*Meretrices.* An possint permitti. IX. 12.

*Metus.* Vide *Timor*.

*Medium*, et *Mediator*. Media extraordinaria pro vitâ. VIII. 2. Duæ mediæ Missæ. VI. 34. Mediator si non restituit. X. 106. In dubio an bellum sit justum. VIII. 31.

*Miles* debet persistere in periculo. VIII. 1.

*Minores.* Si accipiant mutuo. X. 140. An possint obligari et donare. 234.

*Missæ.* Intentio. VI. 27. Attentio. 28. Qui recitat officium etc. 29. Qui celebrat. 30. Qui constitetur. 31. Qui dormitat, aut colligit eleemosynas. 32. Parva materia. 33. Duæ mediæ Missæ. 34. Undè potest audiri. 35. Oratoria, et ubi Episcopus celebrare etc. 36. et 37. Quot Missæ celebrari possunt in Oratorio priv. 38. in *Append. Claus.* V. An Episcopus posset dispensare ut domi etc. 38. Excusat à Missâ

Bb 3

impotentia. 39. et 40. (*de infirmo habente Oratorium vide Tom. III. Tr. XX. n. 3.*) Incommodum. 41. Usus. 42. An ob scandalum aut lucrum, aut ob Confessionem etc. 43. Obligatio Parochi. VII. 29. Missa Conventualis, *ibid. in fine.* Episcopo invigilandum est super Missis etc. 58. Missa Episcopi. 65. Si Confessarius imponit furi Missas etc. X. 106.

*Mixtio.* Mixtione acquiritur dominium. X. 9. Qui recipit à fure rem mixtam cum re illius. 75.

*Mohatra* contractus. X. 182.

*Monasterium.* Si pater cogit ingredi etc. VII. 5. Famuli Monasteriorum circa Communionem Paschalem. XII. 42.

*Moneta* falsa. X. 204.

*Monialis.* Cura Episcopi. VII. 61. Cui obedire debent. XIII. 21. In electione Abbatissæ etc. 22.

*Monitoria.* XIII. 75.

*Monopolium.* X. 183. et 184.

*Montes Pietatis.* X. 155.

*Mortale* quandò sit veniale. III. 67. Et quandò veniale sit mortale. 68. Qui se exponit periculo probabili mortalis. 69.

*Mortificatio.* An liceat vitam sibi brevare etc. VIII. 2.

*Mulier* ostendens ubera etc. IV. 29. Permittens tangi. IX. 5. Aut violari. 7. An teneatur clamare. 6. Qui ponit mulierem in Monasterio vi. VII. 5. Vide etiam *Uxor.*

*Mundus.* Qui maledicit Mundo. V. 2.

*Mutatio.* Vide *Materia*, et *Testator.*

*Mutilare.* An liceat pro vitâ etc. VIII. 3. Sibi virilia abscindi, *ibid.*

*Mutuum.* Quandò debet restitui. X. 139. Minoribus mutuo datum. 140. Filiisfamilias. 141. Sub spe lucri. 143. Timore. 145. Pactum ad longum tempus. 146. Damnum emergens et lucrum cessans. 147. et 148. Admonitio. 149. Lucrum non excedat spem. 150. Ut mutuum sit causa etc. 151. Periculum. 153. et 154. Pœna conventionalis. 156. et 157. Animo benevolo. 158. Pacta. 159. ad 161.

*Mysteria.* Necessitate medii et præcepti. IV. 3.

## N

**N**ecessitas. Quænam sit extrema, si nobilis etc. X. 15. Fur si consumit. 19. An dives non succurrendo teneatur etc. 20. An cum probabili periculo peccandi etc. IV. 14. Pastores in gravi necessitate, *ib.* et VII. 28. De necessitate extremâ, gravi, et communi. IV. 18. et 19. Correctio cum periculo etc. 22. Necessitas excusat à festo. VI. 18. et



21. Quandò à restitutione. X. 118. ad 120. An relinquere parentes in necessitate. XIII. 23. Filios aut fratres. 24.

*Negotiatio.* Cui vetita, et si Clericus per alios negotiatur aut aliis. X. 192. An in propriis pascuis etc. 194. Filius qui negotiatur etc. X. 3. et 228.

*Nullitas* professionis. XIII. 3.

*Numerica* distinctio peccatorum. III. 57. et seq.

*Nuntius.* Donatio per nuntium. X. 130.

*Nundinæ* die festivo. VI. 13.

O

**O**BEDIENTIAE. Votum obedientiae quandò obligat. XIII. 16. Si Capitulum regulas reformat. etc. Inobedientia an sit duplex peccatum. 17. In dubio an res præcepta sit licita. I. 16. et XIII. 17. Revelanti secretum. 18. Si Prælatus inferiori det licentiam etc. de Monialibus. 21. Circa electionem Abbatissæ. 22.

*Objectum* Fidei IV. 2. Spei. 7. Caritatis. 9.

*Obligare*, et *Obligatio.* Signa ut cognoscatur quandò graviter lex obliget. II. 15. An lex possit auferre naturalem obligationem. 19. Obligatio voti levis in materiâ gravi. V. 29. Obligatio filiorum. VII. 1. ad 3. Parentum. 4. et 5. Fratrum. 6. Dominorum. 7. Famulorum. 8. Viri. 12. Qui jurat sinè animo se obligandi. X. 122. An lex auferat obligationem naturalem. 126. Promissio etc. 127. Donatio non acceptata. 130. Mutuum minoribus. 140. Obligatio usurariorum et hæredum. 162. De coöperantibus ad usuram. 163. et 164. Obligatio legandi bona confunctis. 237. Obligatio secreti. XI. 9. Obligationes beneficiati. XIII. 45.

*Observantia.* IV. 36. Vide *Vana observantia.*

*Obstetrices* debent examinari à Parocho. VII. 45.

*Occasio.* Patri qui non aufert occasionem. IV. 30.

*Occidere* se indirectè. VIII. 1. 2. Tabula, incendium navis etc. 1. Si reus non fugit: Mortificationes, media extraordinaria, aut subire manus Chirurghi. 2. Ob vitæ defensionem. 11. Confutatur super hoc puncto opinio cujusdam Neoterici. 12. De occisione Tyrannorum, an unquam liceat? 13. De honoris invasore. 14. Bonorum. 15. Pudicitiae. 16. Proximi. 17. et 18. Prævenire. 19. Adulter. 20. Innocens. 21. Abortus. 22. Prægnans. 23. Animatio. 24. Medicina cum periculo. 25. et 26. Vide *Homicidium.*

*Odium.* Qui optat diversa mala etc. III. 61. Qui odio impedit aliquem ab aliquo bono. X. 63.

*Offensa.* An ob offensam illatam vitæ aut famæ etc. X. 83.

**Omissio.** Ad omissionem requiritur actus positivus. Et quandò imputetur omissio. III. 30. Qui omittit correctionem ob timorem. IV. 21.

**Opera**, et **Opus**. Qui putat tantum opera esse peccata. I. 6. Opus servile. VI. 7. An infidelibus etc. VI. 1. *in fine*. Opera liberalia ob lucrum. 8. An exarare. 9. Pingere. 10. Ire venatum etc. 11. Opera forensia. 12. Nundinæ, et contractus. 13. Vide *Labor*.

**Opinio**. Quam opinionem Medicus. I. 23. Judex. 24. et XIII. 65. In Sacramentis. I. 25. Sed in necessitate. 26. In matrimonio et pœnitentiâ. 27. Si ratio convincens. 28. Quæ opiniones eligendæ sint. 29. in bello. VIII. 29. Cum opinione probabili non potest incipi possessio. X. 8. et 144. Vide *Probabile*.

**Oratoria** VI. 36. et *fusiùs in App. post n. 38*. Ubi potest Episcopus celebrare 37. (*vide etiam Tract. XX. num. 62.*)

**Ordo** bonorum circa caritatem. IV. 14. Personarum. 15. Qui detrahit alicui Ordini, aut personæ illius. XI. 16. Qui non habet animum suscipiendi Ordinem intrâ annum etc. XIII. 42. Qui habet animum dubium aut conditionatum. 43.

**Ordinandi** debent probari. VII. 47. De probitate positivâ requisitâ. 50. De scientiâ. 52.

## P

**P**ACTUM non repetendi sortem intrâ longum tempus. X. 146. De pœnâ conventionali. 156. et 157. Pacta obligatoria in mutuo. 159. De restituendo in eadem quantitate. 160. De reddendo id quod tenetur ex justitiâ, aut caritate. 161. De exigendis fructibus usquè ad solutionem. 170. De retrovendendo. 180. De reëmendo. 181. *Mohatra* et *Anti-Chryseos* (vulgò *a godere*) 182. Monopolium. 183. et 184. Pactum ad *caput salvum*; et de supplendo animalia mortua. 226. Pactum de salario in progressu litis, et de *quota litis*. XIII. 71. *Palpo*. X. 51.

**Papa**. Ejus definitiones sunt infallibiles. II. 33. ipse est suprâ Concilium, *ib.* in quo dispensare potest. 55. et 56. (*vide etiam Tom. II. Tract. XVIII. n. 83.*) An Papa dispensare possit in votis solemnibus. V. 50. An mutare possit ultimas voluntates. 236.

**Paraphernalia** bona. X. 5.

**Parentes**. Amor parentibus debitus. VII. 1. Obligatio alimentorum, legitimæ, et dotis; Dec. quatuor Rotar. 4. Si impediunt filios, ne vocationem sequantur, aut eos cogunt ingredi Monaster. 5. An filius possit relinquere parentes pauperes. XIII. 23. An dissentientibus parentibus possit fieri Religiosus. 24. An parentes possint relinquere filios, *ibid.*

**Parochus**. In quo dispensare potest. II. 59. et VI. 14. Onera Parochi et præsertim de residentiâ. VII. 14. et seq.

Correctio cum periculo etc. et inquirere. IV. 22. Concio. VI. 5. et VII. 35. 36. De iis de quibus concionandum. 37. ad 44. An Parochus possit fieri Religiosus. XIII. 29. Vide *Residentia*, *Sacramenta*, et *Missa*.

*Parsimonia* bona quænam sunt. X. 6.

*Participans* in furto. X. 54. Si multi incendunt domum. 55.

*Pauper*. Quibus pauperibus restituendi sunt fructus non residentis etc. VII. 23. An pauper teneatur petere etc. X. 17. An possit accipere rem magni valoris. 18. Pauper simulatus. 78. Jus mendicandi. 208. Qui relinquit parentes pauperes. 237. Quibus pauperibus fructus benefi. XIII. 47. et 48. Vide *Necessitas*.

*Paupertas*. An manuscripta sint propria Religiosi. XIII. 5. De peculio. 6. Quando peccatur contra paupertatem. 7. De donis 8. et 9. De materiâ gravi, et restitutione. 10. De licentiâ presumpta. 11. Licentia negata. 12. Ad usus vanos. 13. Ad ludos. 14.

*Peccare*, et *Peccatum*. De differentiâ etc. III. 21. Veniale etiam lædit legem. 23. Advertentia. 24. ad 39. Consensus. 40. ad 45. Peccatum philosophicum. 46. Desiderium. 47. Delectatio, *ib.* usque ad 54. Distinctio specifica. 55. et 56. Numerica. 57. ad 63. De objectis totalibus. 64. et 65. Effectus mortalis, et venialis. 66. Mortale in veniale. 67. Veniale in mortale. 68. Cum periculo probabili mortalis. 69. Votum committendi venialia. V. 25. De peccato in causâ. VIII. 8.

*Peculium* Religiosorum. XIII. 6.

*Pensionarius*, et *Pensio*. An Pensionarius teneatur ad dispensandum superfluum. XIII. 49. De pensione. 59.

*Peregrinus*. Circâ leges loci. II. 39. De domicilio et quasi. 40. Si per breve tempus morantur. 42. Communio Paschalis. XII. 42.

*Perfectio*. Ad quam Religiosi tenentur. XIII. 2.

*Periculum* probabile mortalis. III. 69. In necessitate extremâ proximi. IV. 14. Corripere cum periculo. 22. An ad conservandam honestatem. VIII. 1. *in fine*. Titulus periculi in mutuo. X. 153. et 154. Periculum ad quem spectet in emptione. 169. Si res idem periculum incursura fuisset. 79.

*Perire*. Si res in manu domini etiam periisset. X. 79. Si perit res vendita. 191. Si fundus censi perit. 201.

*Permittere* mortem propriam. VIII. 1. et 2. De innocente. 21. Mulier permittens se tangi. IX. 5. Se violari. 7.

*Permutare* res sacras. IV. 47.

*Perseverantia*. Juramentum perseverantiæ in Congr. V. 19.

*Personale*, vota personalia possunt permutari in re aliâ et contrâ. V. 38. Credita personalia anteriora. X. 112. Censensus personalis. 199.

*Pestis*. Sacerdotum obligatio pestis tempore. IV. 14. Parochorum. VII. 28.

*Pietas*. Quandò excusat à laborando in festo. VI. 16. Montes Pietatis. X. 155. Quomoddò pietas excuset à jejunio. XII. 34.

*Pignus*. X. 233.

*Pingere*. VI. 10.

*Pluralitas* beneficiorum. XIII. 40. et 41.

*Pœna*. In lege si adest pœna et præceptum. II. 16. Inhabilitatis vel privativa. 24. et 25. In Duellantes. VIII. 28. In Sodomitas. IX. 26. Conventionalis. X. 156. et 157. In transgressores Paschalis præcepti. XII. 38. An Judex possit pœnam diminuere. XIII. 64. Quandò pœna est magna an, réus etc. 83.

*Pœnale*. Leges pœnales. II. 24. Votum pœnale. V. 49.

*Pollutio* tangendo puerum aut mulierem. IX. 25. An semen corruptum etc. 31. An teneamur eam impedire etc. 32. An vitare causas. 33. Quæ actiones liceant. 34. Pollutio nocturna. III. 52.

*Pontifex*. Vide *Papa*.

*Possessio*, et *Possessor*. Quandò possessio stat pro legè aut libertate. I. 14. *Possessor* in dubio. 20. Ad quid teneatur possessor bonæ fidei. X. 73. Quos fructus etc. 74. Qui putat damnum minus quàm est in se. 76. Ad quid possessor malæ fidei. 77. Vide *Præscriptio*. Cum opinione probabili nemini licet suscipere possessionem. X. 8. 144.

*Potestas*. Qui habet ordinariam potest eam delegare. II. 61. (vide etiam *Tom. III. Tract. XX. n. 34. et 58.*) Quænam sit ordinaria. 34. An exspiret morte delegantis. II. 61. Quomoddò interpretanda delegata, *ibid*.

*Potus* in jejunio. XII. 12. Vinum et birra. 13. Sorbetta. 14. Chocolate. 15.

*Practicum* dubium. I. 13. Judicium. 14.

*Præceptum*. An detur ignorantia invincibilis. I. 5. Præceptum dubium. 15. Si adest præceptum et pœna. II. 16. An pluribus præceptis possit pluribus actibus, aut uno etc. 30. et 31. Si plura præcepta idem etc. 31. et 32. An præceptum festi sit Divinum. VI. 1. Confessionis. XII. 35. ad 38. Communionis. 39. ad 44. Præceptum prodendi secretum. XIII. 18.

*Prædicatio* de peccatis publicis. IV. 22. Obligatio audiendi concionem. VI. 4. Obligatio Episcoporum et Parochorum, *ibid*. 4. et 5. et VII. 35. et 36. Quæ prædicanda sunt à Parochis. 37. ad 44.

*Prægnans*, au excommunicat. incurrat in abortu. VIII. 23.

*Prælatatus*. Vide *Episcopus*, et *Superior*.

*Prælaturæ*. An debeantur dignioribus. XIII. 35.

*Præscriptio* triennalis. IV. 52. Præscriptio domini et ejus conditiones. X. 10. ad 13. Præscriptio legis Ecclesiasticæ. II. 33. De consuetudine. 79. De desuetudine. 80. De salario. VII. 9.

*Præsentare* digniores. XIII. 34.

*Præsumptio*. Factum non præsumitur. I. 16. Lex fundata in falsa præsumptione. II. 26.

*Prandium*. An possit dividi in jejunio. XII. 10.

*Precarium*, quid sit. X. 135.

*Pretium*. Si emptor dat fidem pretii. X. 107. Determinatio pretii. 165. Si non dat fidem pretii. 169. Fructus usque ad solutionem. 170. Qui emit cum damno alieno. 171. De pretio justo. 172. ad 175. Sub hasta. 175. ad 177. Dilatio aut anticipatio solutionis. 178. Si pretium brevi augendum. 188. An Clericus ut minoris emat etc. 194. Pretium sententiæ injustæ. XIII. 67.

*Principale* non possibile in voto. V. 24.

*Probabile*, et *Probabilitas*. Probabile cum damno alterius. I. 21. et 28. Probabile de jure. 29. In rebus fidei. 22. Medicus. 23. Judex. XIII. 65. Distinctio probabilis. I. 29. ad 32. Probabile periculum peccandi. III. 69. Votum probabiliter adimpletum. I. 17. Vide *Opinio*.

*Procurator* litium. XIII. 72.

*Professio*. Conditiones et causæ nullitatis Professionis. XIII. 3. An professus ob parentum paupertatem etc. 23.

*Promissio* jurata tertio. V. 19. Si est firmata voto. 41. Ficta cum violatione. X. 95. Quomodo obligat simplex promissio. 127.

*Promulgatio* legis. II. 5. In legibus Civilibus. 6. In Pontificibus. 7. In decretis SS. Congregationum. 34. In declaratione non purè tali. 73. et 74.

*Propositum* peccandi quantum duret. III. 60. Si durat in effectu. 61.

*Propositiones* damnatæ circa Duellum. VIII. 27.

*Proxenetæ*. Ad quid tenetur. X. 189.

*Proximus*. Qui impedit prox. à justis boni etc. X. 61. Si odio. 62. Prodere peccatum proximi uni vel alteri. XI. 11.

*Publicum* delictum in uno loco. XI. 12. Publicum uno tempore. 13.

*Puella*. Vide *Virgo*.

*Puer*. Si ad usum rationis. I. 37. Quando teneatur ad Communionem. XII. 43.

*Pupillus*. An possit se obligare, aut donare. X. 234.

## Q

**Q**UALITAS. Error circa qualitatem. X. 124.

*Quantitas*. Pactum in mutuo restituendi eandem quantitatem. X. 160.

## R

**R**ADIX distinctionis specificæ. III. 55. et 56. Numericæ. 57. Restitutionis radices. X. 37.

- Raptus* quid sit. IX. 15.  
*Receptator* circa restitutionem. X. 52.  
*Redemptio* Christianorum. X. 16.  
*Regula* proxima et remota operandi. I. 1. *Regulæ* pro scrupulis. 8. *Regula* : *In dubiis via tutior* etc. 69. *Regulæ* interpretandi leg. II. 76.  
*Regularis*. An Ecclesia et Conventus Regularium sint exempta. II. 39. An Episcopus possit prohibere celebrationem in iis etc. *vide* Tom. III. Tr. XX. n. 123. et 124. Prælati Regulares in quo dispensare. II. 60. Si admittunt pro pecuniâ etc. IV. 43. Debet tendere ad perfectionem. XIII. 2. De Episcopis Religiosis. 4. De fugitivis et ejectis, *ibid.* Si noctû exit. 15. Qui relinquit patrem in necessitate etc. Quid si est Professus. 23. An patre dissentiente etc. 24. Si relinquit filios, aut fratres etc. *ibid.* Qui avertit etc. 25. Qui negligit vocationem. 26. *Ære alieno* gravati. 27. An Episcopus possit fieri Religiosus. 28. An Parochus. 29. An denunciare prætermisâ correctione. 74. Si ludit. X. 215. De ludis prohibitis Religiosis. 220. Venatio prohibita 72.  
*Relaxatio* juramenti. V. 19.  
*Religio*. Virtus et vitia opposita. IV. 33. Admittere pro pecuniâ. 43. Qui vovit Religionem. V. 34.  
*Religiosus*. *Vide Regularis*.  
*Reliquiæ*. Furtum reliquiarum. IV. 39. et X. 27.  
*Remedia* adversus tentationes etc. III. 43.  
*Remissio* offensori. IV. 17. Si tertius remittit promissionem juratam. V. 18. Si pater occisus remittit. X. 86. Si violata remittit. 95. ad III. Si creditor remittit uni partem ejus. 60.  
*Renunciatio*. Per renunciationem cessat dispensatio. III. 68. Renunciatio beneficiorum. XIII. 58.  
*Reservatio*. Vota reservata. V. 45. et 46. An juramentum castitatis, et Religionis sit reservatum. 47. An secunda materia remaneat reservata. 48. De voto pœnali aut conditionato 49.  
*Residentia* Parochi. VII. 14. Residentia inutilis. 15. An in bonâ fide etc. 16. Causæ excusantes. 19. et 21. *Vide Parochus*, et *Licentia*. Residentia Episcopi. VII. 62. Ubi Episcopo residendum est, et Cardinali. 18. De Canonico. XIII. 50. Pœnæ. 51. Causæ excusantes. 52. et 57.  
*Resistentia* tentationibus. III. 43. Si adest causa non resistendi positivè. 44.  
*Restitutio*. Radices restitutionis. X. 37. Ex quâ justitiâ etc. 36. Culpa Theologica. 38. Si culpa est venialis. 40. Culpa in contractibus. 41. Mandantes. 42. et 43. Consilium dantes. 44. ad 49. Quid suffragium. 50. Palpantes. 51. Recipientes. 52. Participantes. 54. Causæ negativæ. 59. Qui impedit proximum. 61. Qui fiscum. 62. Qui odio. 63. Si

dominus abest. 64. et 65. Si evincitur res. 66. Si est incertus. 67. Dilatio. 104. An debet absolvi qui prius non restituit. 105. Si mediator non restituit, aut Confessarius Missas celebrandas etc. 106. Causæ excusantes ex parte creditoris. 116. Debitoris. 117. Si necessitas etc. 118. et 119. Cum damno majore 65. et 117. ad 3. Depositarius etc. 38. Restitutio honoris. XI. 3. Causæ excusantes. 4. Restitutio famæ. 18. Causæ excusantes. 19. Restitutio Religiosi. XIII. 10. An Elector minus digni etc. 37. Restitutio fructuum non residentis. VII. 22. et 23. De Canonicis. XIII. 51. An dives non succurrendo. X. 20.

*Restrictio mentalis* quando fit. V. 15.

*Revocare*, et *Revocatio*. Per revocationem cessat dispensatio. II. 67. (quomodo cessat Privilegium vide *Tom. III. Tract. XX. n. 15. ad 17.*) Quando revocari potest donatio. X. 133. Donatio causâ mortis. 134.

*Reus*. Quando tenetur ad confitendum. XIII. 82. Si poena est magna. 83. Si imponit sibi falsum delictum. 84. Si aliis. 85. An possit resistere et an debeat fugere. 86. et VIII. 2. Si infringit carceres, et corrumpit custodem et si alius ad sibi opitulandum etc. 87.

## S

**S**ACRAMENTA administrare ob lucrum. IV. 45. Obligatio Parochi VII. 24. et 25. Tempore pestis 28.

*Sacrilegium*. Quotuplex est. IV. 39. An Ecclesia polluitur ob occultam effusionem etc. et per usum Matrimonii; et an tactus, aspectus, et sermones etc. *ibid.* et IX. 21. et 22. Si furtum. IV. 39. Furtum Reliquiarum etc. *ib.* Sacerdos Religiosus fornicans. IX. 20. Inducens, *ibid.* In quo loco dicitur Sacrileg. committi etc. 21. Sacrileg. circa rem. 23. Aspectus turpis circa personam sacram. IX. 2.

*Salarium* servis debitum. VII. 7. Præscriptio salarii. 9. Salarium Advocati. XIII. 70. et 71. Procuratoris. 72.

*Salutare* inimicum ut liberet eum etc. IV. 16.

*Satisfactio*. Intentio satisfaciendi legi, votis, aut poenitentiae. II. 29. Qui satisfacit oblitus voti, aut habet probabilitatem quod satisfecit. V. 31.

*Scandalum*. Quotuplex. IV. 23. et 24. Quot peccata. 25. Si proximus est paratus. 26. Primus ad tentandum etc. *ib.* Matuum ab usurario, aut Sacramentum à peccatore. 27. Qui est scandalo pluribus. III. 50. An bona temporalia aut spiritualia omittenda. 28. Mulier ubera ostendens. 29. Qui suadet minus malum. 30. Si pater non aufert occasionem, *ib.* De coopératione materiali et formali. 31. et seq.

- Scientia.* Si Judex privatâ scientiâ etc. XIII. 63. et 64.  
*Scribæ* quandò peccant etc. XIII. 68.  
*Scrupulus.* Regulæ pro Scrupulis. I. 8. et 9. Circâ Confessiones præteritas. 10. Circâ timorem peccandi. 11.  
*Secretum* cognitum fraude. II. 8. Obligatio secreti. 9. Resignare litteras. II. 5. et 6. Præceptum revelandi secretum. XIII. 18.  
*Seminarium* utile, et regulæ. VII. 53.  
*Senex.* Quandò excusatur à jejuniò. XII. 25.  
*Sententia* in pœnis spiritualibus inhabilitantibus, aut privativis, an requiratur. II. 24. et 25. Si fundatur in præsumptione falsâ. 26. An in pœnis conventionalibus. 27. An ad beneficia Simoniaca et inhabilitatem etc. IV. 51. et 52. et XIII. 58. Pretium sententiæ injustæ. 67.  
*Servus.* Vide *Famulus*.  
*Signa* ad dignoscendum quandò lex graviter obliget. II. 15.  
*Simonia* quid. IV. 40. Mentalis, conventionalis; realis, et confidentialis, *ib.* et XIII. 58. Munus à manu etc. IV. 41. Simonia de jure divino et humano. 42. Qui admittit in Religionem pro temporali. 43. Qui dat temporale ob finem principalem etc. vel ob benevolentiam. 44. An ob administrationem Sacramenti, et principaliter ob lucrum. 45. Vendere beneficia. 46. Permutare res sacras. 47. An sit Simonia dare aliquid, ut alter omittat rem spiritua-lem. 48. Ut liberetur à vexatione. 49. Pœna. 50. ad 53. Si electiones sunt nullæ etc. etiam si à tertio etc. 52. Privatio Beneficii et inhabilitas. XIII. 58. An debeant esse completa ex utrâque parte, *ib.* Restitutio pretii et fructuum. IV. 53. Quis ptoest absolvere ab excommunicatione et dispensare super inhabilitate etc. *ib.* Sed ad privationem et inhabilitatem requiritur sententia. IV. 52. et XIII. 58.  
*Societas.* Conditiones societatis. X. 222. An capitale deducendum domino. 223. Divisiò lucri et damni sortis. 225. Pactum ad caput salvum, et ad supplenda pecora. 226. *Contractus triplex.* 227. Societas inter fratres. 229. Quandò finitur societas. 230.  
*Sodomia.* Si maritus sodomiticè coeat. IX. 16. et 25. In quo consistat. 24. an agens etc. *ibid.* Pœnæ sodomitarum. 26.  
*Solemnitates* requisitæ ad alienanda bona Ecclesiastica. XIII. 62. Contractus sinè solemnitate. X. 126.  
*Somnia.* An iis præstanda est fides. IV. 34.  
*Sorbetum.* An frangat jejuniùm. XII. 14.  
*Soror.* Vide *Frater*.  
*Sors* divinatoria. IV. 34. Virga divinatoria. 35. in societate sors et ejus damnum spectat ad dominum. X. 223. Commoditas sortis etc. 224.  
*Sortilegium.* Quid sit. IV. 34.  
*Species.* An in delectatione morosâ explicanda species. III. 48.



- Specifica* peccatorum distinctio. III. 55. et 56.  
*Speculativum* dubium. I. 13. et 14. *Practicum* *ibid.*  
*Spes*. Quid sit IV. 6. Objectum. 7. Vitia opposita. 8. Actus  
 spei. 13. Mutuum sub spe lucri. X. 143.  
*Sponsio*. X. 214.  
*Spurius*. Vide *Filius*.  
*Sterilitas*. in locatione. X. 207.  
*Stuprator*. An stuprum virgine consentiente sit unum  
 peccatum. IX. 14. An tunc restitutio parentibus etc. X. 91.  
 Si cum promissione fictâ etc. 63. Limitationes. 94. et 96. Si  
 stuprator habet votum castitatis. 97. Si consanguineus etc.  
 98. Ad quid tenetur qui vi et minis etc. 92.  
*Subdelegare* quis possit. II. 63. et 82. Vide etiam *Tom. II.*  
*Tract. XVI. n. 28.* et *Tom. III. Tract. XX. n. 34.* et 58.  
*Subditus*. Si superior præcipit aliquid dubium. I. 18. et  
 XIII. 16. An vota subditi sint ex se irrita. V. 37.  
*Successor*. locatoris. X. 206.  
*Suffragium* quoad restitutionem. X. 50.  
*Superior* si præcipit aliquid dubium. I. 18. Si præceptum  
 affert damnum, aut est difficile. *ibid.* et XIII. 17. Obligatio  
 dispensandi. II. 52. Qui dispensat malâ fide, aut sinè causâ.  
 53. Superiores Regulares in quo dispensare possunt. 60. Si  
 non corrigunt. XIII. 2. Licentia præsumpta. 11. Si injustè  
 negatur. 12. Ad usus vanos. 13. Præceptum prodendi secre-  
 tum. 18.  
*Superstitio* quot modis. IV. 34. Virga divinatoria. 35. Vana  
 observantia. 36. Pulvis Sympatica. 37. An superstitiones de-  
 nunciandæ sint. XIII 78.  
*Supplicatio* quandò est subreptitia. II. 47.  
*Supplere*. Pactum supplendi pecora. X. 226.  
*Suspicio* temeraria. XI. 1. et 2.  
*Synderesis*, quid sit. I. 2.

## T

- T**ABELLARIUS missus à duobus. X. 209.  
*Tabula* possit cedi in naufragio. VIII. 1.  
*Tactus* quinam sint mortales. IX. 3. An tactus in Ecclesiâ  
 sint sacrilegia. IV. 39. et IX. 22. Mulier permittens se tangi.  
 IX. 5. Pollutio tangendo puerum aut mulierem etc. 25. Tactus  
 inter propinquos, *ibid. in fine.* Cum promissione fictâ Ma-  
 trimonii. X. 95. ad V.  
*Tempus* ad præscribendam consuetudinem. II. 79. Ad de-  
 rogandum legi. 80. etiam Ecclesiasticæ 11.  
*Tentatio* Dei formalis et interpretativa. IV. 38. Remedia  
 adversùs tentationes turpes. III. 43. Si est causa non resis-  
 tendi positivè. 44.

*Tertius.* Juramentum in favorem tertii. V. 19. Votum in favorem tertii. 41.

*Testamenta.* X. 235. Si constat de voluntate testatoris, et si adsit unus solus testis, *ibid.*

*Testator.* An ultimæ voluntates testatoris possint mutari à Papâ, aut ab Episcopo. X. 236. Bona leganda sunt consanguineis pauperibus. 237.

*Testis.* Si tantum unus testetur etc. X. 235. Quando teneatur ad deponendum. XIII. 79. Si omittit dicere veritatem. 80. Si occultat. 81.

*Thesaurus* ad quem spectat. X. 70.

*Timor* sive metus quotuplex est. III. 16. ad 18. An excuset timor à præceptis. II. 44. Dispensatio data ob timorem. 54. Qui timore omittit correctionem. IV. 21. Votum ex timore. V. 23.

*Translatio* In donatione. X. 132. In emptione. 167.

*Triplex* contractus. X. 227.

*Tutela*, et *Tutor*. X. 234. An Clericus possit tutare. 195.

## V

*Valor.* Standum est pro valore actûs. I. 16.

*Vana observantia.* IV. 36. In dubio an effectus sit naturalis. 37. Pulvis sympathica, *ibid.*

*Vendere* die festivo. VI. 13. Ad quem spectat periculum et fructus. X. 169. Res aliena. 171. Merces ultronea. 174. Quando potest vendi carius, *ibid.* Sub hastâ. 175. ad 177. Pecunia credita. 188. Chyrogaphis. 179. Pactum de retrovendendo. 180. Vitium rei. 185. ad 187. Venditricæ. 189. Res duobus vendita. 190. Si res perit 191.

*Veniale* an lædat legem. III. 23. Quomodo veniale sit mortale. 77. et mortale veniale. 68. Votum de committendo veniale. V. 25. An veniale obliget ad restituendum X. 40.

*Verba obscæna.* IX. 9. Qui ea audit. 10. Si in Ecclesiâ. IV. 39. et IX. 22.

*Veritas* in juramento. V. 14. Testis si præterit, aut celat veritatem. XIII. 80. et 81.

*Vexatio.* An sit simonia dare ad redimendam vexationem. IV. 49.

*Vicarius* an possit dispensare. II. 57.

*Vincere.* Qui vincit in ludo prohibito. X. 217. Vincere scrupulos. I. 8. et 11.

*Vincibilis.* Vide *Ignorantia*.

*Vinum* an liceat in jejuniis. XII. 13.

*Vir.* Vide *Maritus*.

*Virga Divinatoria.* IV. 35.

*Virgo*

*Virgo* an ob honestatem possit se exponere periculo etc. VIII. 1. *in fine*. An subire manus Chirurgi 2. *in fine*. An sit duplex peccatum violare virginem consentientem. IX. 14. An tunc adsit obligatio restituendi. X. 91. Si violata potuit deceptionem animadvertere. 94. Si remittit. Si tantum tactus etc. 95. Si fuerit prius corrupta; si respuat nuptias. 96.

Vide *Legatum*.

*Vitium rei*. X. 185. ad 187.

*Vocatio*. Qui impedit eam, aut cogit Monasterium ingredi. VII. 5. et XIII. 25. Qui negligit vocationem. XIII. 26.

*Voluntarium*. III. 3. ad 6.

*Voluntates ultimæ*. Vide *Testamentum*.

*Votum* dubium, aut dubie adimplendum. I. 17. Intentio satisfaciendi. II. 29. Dispensatio cum Peregrinis 42. Animus se obligandi; et an in dubio. V. 21. In dubio usus rationis. 22. Ex timore, vel errore. 23. Materia possibilis, et melior. 24. Ob malum finem. 25. Peccandi venialiter *ibid.* Non petendi dispensationem. 26. De nubendo. 27. De non vovendo. 28. Obligatio levis in materia gravi; et an materia levis quotidie; et an hæres etc. Et si pater votis etc. et an ab aliis satisfieri. 29. De votis conditionatis. 30. Disjunctivis; Missæ, etc. Oblitus voti; qui probabiliter satisfecit. 31. Qui differt. 32. et 33. Votum Religionis. 34. Mutatio materiæ. 35. Irritatio. 36. et 37. Commutatio. 38. Dispensatio. 39. Dispensatio in bonâ, vel malâ fide. 40. In favorem tertij 41. Qui Dispensare potest. 42. Qui delegare. 43. De votis reservatis. 45. et 46. De jurejurando si est reservatum. 47. An reservata remaneat posterior materia. 48. Si votum est reservatum vel poenale. 49. An Papa in votis solemnibus. 50. Qui corripit cum promissione Matrimonij voto castitatis ligatam. X. 97. Votum paupertatis. XIII. 5. ad 14. Castitatis. 15. Obedientiæ. 16. ad 20. Obedientiæ Monialium. 21.

*Usura* in mutuo. X. 142. Lucrum datum gratis. 144. Titulus damni, et lucri 148. ad 152. De periculo. 153. et 154. Montes Pietatis. 155. Titulus poenæ conventionalis. 156. et 157. Pacta. 159. ad 161. Obligatio usurariorum, et Hæredum. 162. De coöperantibus. 163. et 164.

*Uxor* an possit irritare vota viri. V. 36. Obligationes præsertim sequendi virum. VII. 13. Bona Uxoris. X. 5. Si vir dilapidet. 14. Furta uxorum. 33.

*Finis Tomi primi.*

Documenta è variis veteris Testamenti historiis, et Evangelio item petita, modulis Rythmicis quo jucundius rantu, si lubet, annis influant. Per C. Van Beughem, Oblongo. Mechl.

Historia et Concordia evangelica, in-8vo. Edit. nova, cum tabula Terræ Sanctæ. Mechl. 1819.

Instructio Confessariorum. Auctore R. P. Gaspare Loarte, Societatis Jesu, Doctore Theologo, in qua quomodo Sacerdos dignè Pœnitentiæ Sacramentum ad suam et Pœnitentium salutem administrare possit, docetur. Accessit Institutio Confessariorum, auct. Martino Fornario, Societatis Jesu. Ea pariter continens quæ ad praxim audiendi Confessiones pertinent. In-12. Mechl. 1822.

Mauduit, analyse de l'Evangile selon l'ordre historique de la Concorde, 4 volumes. — Des actes des Apôtres, 2 volum. — Des Epîtres 2 vol. — De l'Apocalypse 1 vol.; avec des Dissertations sur les lieux difficiles, formant 9. vol. in-12. Malin. 1821.

Memoriale vitæ sacerdotalis, Libellus, verè aureus, authore pio sacerdote. Adduntur preces ante et post celebrationem Missæ recitandæ, preces agonizantium, formula benedictionis apostolicæ etc. in-12. Orné d'un frontispice. Mechlin. 1817.

Nova collectio Synodorum Mechliniensium, Epistolarum pastoralium ac variorum decretorum Archiepiscoporum Mechliniensium, in-8vo. Mechlin.

Prælectiones Logicæ et Metaphysicæ, auctore Adamo Contzen, in universitate Coloniensi in gymnasio trium Coronarum philosophiæ professore ordinario ac publico. 3 vol. in-12. Mechlin. 1823.

Sapientia Christiana. A Claudio Arvisenet, sacerdote Lingonensi, auctore Memorialis vitæ Sacerdotis. 2 vol. in-12. Mechlin. 1818.

Theologia ad usum Seminariorum et sacrae Theologiæ alumnorum, auctore reverendo ac eruditissimo Domino Petro Dens, etc., 7 volum. groot in-8vo. Nieuwen druk, merkelyk verbeterd, met 't afbeeldzel van den Auteur. Mech. 1819.

Tractatus de Jure, Justitia et Contractibus juri hodierno Galliæ accommodatus, sive Institutiones Theologiæ ad usum Seminariorum, illustriss. ac reverend. in Christo Patris DD. Claudii-Magdalenæ de la Myre, Cenomanensis Episcopi, approbatione et auctoritate in ucem editus, 2 vol. in-12, Mechl. 1822.



